






Presented to
The Library
of the
University of Toronto
by

The Estate of the late
G. Percival Best, Esq.





Digitized by the Internet Archive
in 2011 with funding from
University of Toronto



OEUVRES MESLEES

DE PLVTARQVE, TRANSLA-
tees de Grec en François, reueuës & cor-
rigees en ceste seconde Edition en
plusieurs passages par le
Traducteur.

Le II. Volume du II. Tome, qui
contient xv. Traitez.

V. 2²

I.	Les Vies des dix Orateurs.	341
II.	De trois sortes de gouuernement.	370
III.	Sommaire de la Comparaison d'Aristophanes & de Menander.	372
IIII.	Estranges Euenemens aduenus pour l'Amour.	375
V.	Quels Animaux sont les plus aduisez.	380
VI.	Si les Atheniens ont esté plus excellents en armes qu'en lettres.	423
VII.	Lequel est plus vtile, le feu, ou l'eau.	432
VIII.	Du premier froid.	437
IX.	Les Causes naturelles.	452
X.	Les Questions Platoniques.	465
XI.	De la creation de l'Ame.	483
XII.	De la fatale Destinee.	509
XIII.	Que les Stoiques disent des choses plus estranges que les Poetes.	519
XIIII.	Les Contredits des Philosophes Stoiques.	521
XV.	Des communes Conceptions.	586

A PARIS.

De l'Imprimerie de Michel de Vascosan.

M. D. LXXIIII.

AVEC PRIVILEGE DV ROY.

OUVRES MESSIE

DE PIVTAROV, TRANSLA

tes de Grèce, François, romain & cor-

riges en cette seconde édition

plusieurs passages par le

Traducteur.

Le II. Volume de la Tome 1^{re}

contient 24. Tableaux.

I. Les Vies des six Orateurs.

II. De trois sortes de gouvernement.

III. Sommaire de la Compagnie d'Aristocratie de

de Mithridate.

IV. Étranges Évenemens advenus pour l'année 1717.

V. Description de l'île de la Grèce.

VI. Description de l'île de la Grèce.

VII. Description de l'île de la Grèce.

VIII. Description de l'île de la Grèce.

IX. Description de l'île de la Grèce.

X. Description de l'île de la Grèce.

XI. Description de l'île de la Grèce.

XII. Description de l'île de la Grèce.

XIII. Description de l'île de la Grèce.

XIV. Description de l'île de la Grèce.

XV. Description de l'île de la Grèce.

XVI. Description de l'île de la Grèce.

XVII. Description de l'île de la Grèce.

XVIII. Description de l'île de la Grèce.

XIX. Description de l'île de la Grèce.

XX. Description de l'île de la Grèce.

XXI. Description de l'île de la Grèce.

XXII. Description de l'île de la Grèce.

XXIII. Description de l'île de la Grèce.

XXIV. Description de l'île de la Grèce.

XXV. Description de l'île de la Grèce.

XXVI. Description de l'île de la Grèce.

XXVII. Description de l'île de la Grèce.

XXVIII. Description de l'île de la Grèce.


XXIX. Description de l'île de la Grèce.

XXX. Description de l'île de la Grèce.



LES VIES DES DIX ORATEURS.

ANTIPHON. I.



ANTIPHON fils de Sophilus, natif du bourg de Ramnus, fut escholier de son propre pere qui tenoit eschole, où lon dit qu'Alcibiades mesme alloit lors qu'il estoit encore enfant, & aiant acquis la suffisance de bien dire, de soy-mesme, pour la viuacité de son entendement, comme quelques vns estiment, il s'entremist des affaires publiques, & ne laissa pas pourtant de dresser aussi vne eschole, où il eut quelque different en matiere de lettres avec le philosophe Socrates, non pour disputer par emulation opiniaistrement, mais pour reprendre sa façon de faire, ainsi comme a escrit Xenophon au premier de ses Commentaires des faicts & dicts de Socrates. Il composa des oraisons à quelques vns de ses citoiens qui l'en requirent, pour s'en seruir en iugement à defendre & iustifier leurs causes: & fut le premier, à ce que lon dit, qui commença

ceste façon de faire, car on ne trouue pas vne orai-
 son iudicielle pour prononcer en iugement, faite
 par aucun des Orateurs qui ont esté parauant luy,
 non pas mesme de ceux de son temps (pour ce que
 la coustume n'estoit pas encore d'en composer
 ainsi pour autrui) ny de Themistocles, ny de Pe-
 ricles, ny d'Aristides, combien que les temps leur
 presentassent plusieurs occasions, voire necessitez,
 de ce faire: & si n'estoit point par insuffisance
 qu'ils s'en abstenoient, ainsi qu'il appert de ce qui
 est escrit par les historiens de chascun de ceux dont
 nous auons fait mention. Au reste tous les plus
 anciens dont nous nous pouuons souuenir, qui
 ont eu ce mesme stile, & exercé ceste mesme for-
 me de dire, comme Alcibiades, Critias, Lysias &
 Archinoüs, on trouuera qu'ils ont tous hanté &
 conferé avec Antiphon, qui estoit desia vieil: car
 aiant l'entendement grand & profond, il fut le pre-
 mier qui composa & mit en lumiere des Institu-
 tions en l'art oratoire, de maniere qu'il estoit sur-
 nommé Nestor. Et Cecilius, au traitté qu'il a fait
 de luy, coniecture qu'il ait esté precepteur de Thu-
 cydides l'historiographe, par ce qu'il le louë. Il est
 en son langage exquis, plein de persuasion, aigu &
 subtil en inuention, es choses malaises artificiel,
 assaillant à couuert, tournant son dire aux loix, &
 à esmouuoir les affections, visant tousiours à ce
 qui est le bien-seant, & de plus belle apparence. Il
 fut enuiron les guerres des Perses, & du temps de
 Gorgias le Leontin Sophiste, estant vn peu plus
 ieune que luy, & dura insques à la subuersion de
 l'estat

A l'estat & domination populaire, faitte par les quatre cens coniurez, à laquelle il semble que luy mesme ait tenu la main, par ce qu'il defraya deux galeres, & fut Capitaine en ce temps la, où il eut la victoire en plusieurs rencontres, & leur gaigna plusieurs grandes alliances. Il feit prendre les armes aux ieunes gens, & équippa soixante galeres, & à tout propos estoit enuoyé ambassadeur deuers ceux de Lacedemone, lors que lon bastit les murailles de la ville de Erionie : mais apres que les quatre cens furent ruinez, il fut accusé de la conspiration avec Archeptolemus, l'un des quatre cens conspirateurs, avec lequel il fut cōdamné & soubmis à la punition des traistres. Son corps fut ietté sans sepulture, & luy attec toute sa posterité escrit au nombre des infames. Les autres tiennent qu'il fut mis à mort par les trente Tyrans, comme entre autres Lysias en vne harengue qu'il feit pour la fille d'Antiphon : car il eut vne fille laquelle Calleschrus, comme plus proche lignager, demanda pour femme en iustice : & que ce aient esté les trente Tyrans qui l'aient fait mourir, Theopompus mesme l'escrit au quinzième de ses Philipiques, mais celuy la estoit plus moderne, & si estoit fils d'un Simonides, duquel Cratinus fait mention, cōme d'un homme non meschant, en sa comédie de Pythine. Comment donq seroit ce luy, qui auroit au parauant esté tué par les quatre cens, derechef retourné en estre sous les trente Tyrans? On recite encore sa mort en vne autre sorte, c'est qu'estant ia fort auancé en son aage il nauigua en Si-

cile, lors que la tyrannie du premier Dionysius D estoit en sa plus grande vigueur: & comme durant le disner on eust mis en auant vn propos, quel estoit le meilleur cuyure, les vns en disant d'une sorte, les autres d'une autre, luy respondit, que le meilleur à son aduis estoit celuy dont on auoit fait les statues de Harmodius & d'Aristogiton. Ce que Dionysius aiant entendu, & imaginé que c'estoit tacitemēt inuiter les Syracusains à luy courir sus, & attenter à sa personne, il commāda que lon le feist mourir. Autres disent, que ce fut par despit de ce qu'il se mocquoit de ses Tragedies. On trouue de E cest orateur soixante oraisons, desquelles Cecilius tient qu'il y en a vingt & cinq qui faussement luy sont attribuees. Il est piqué & moqué d'auarice par Platon le Comique avec Pisander: & dit on qu'il a cōposé quelques Tragedies seul, & d'autres avec Dionysius le Tyran. Et au mesme temps qu'il vacquoit à la poësie, il cōposa aussi vn art de remedier aux ennuis & maladies de l'esprit, ne plus ne moins que les medecins guarissent les maladies & douleurs du corps: & de faict aiant basti vne petite maison à Corinthe sur la place, il meit vn billet F sur la porte, qu'il faisoit profession & auoit le moien de guarir de paroles ceux qui estoient enuiez & attristez, & leur demandant les causes de leurs ennuis, il les reconfortoit, & consoloit leurs douleurs: toutefois depuis estimant que cest art & profession la estoit trop petite & trop basse pour luy, il se remeit à enseigner la Retorique. Aussi y en a il qui attribuent à Antiphon le liure de Glaucus de

Rege

A Rege des Poëtes, & louëlon principalement le traitté qu'il a fait d'Herodote, & celuy qui est dedié à Erasistratus touchant les Idees, & l'oraison de Dilation qu'il escriuit pour soy mesme, & celle contre Demosthenes le Capitaine, en laquelle il l'accuse d'auoir fait contre les loix. Aussi escriuit il vne autre oraison contre Hippocrates le medecin estant capitaine, & le feit condamner par cōtume, le Decret qui fut l'annee que Theopompus fut preuost, soubz lequel les quatre cens vsurpateurs de la chose publique furent ruinez. Cecilius escrit

B le Decret mesme du Senat, par lequel il fut ordonné que son proces luy seroit fait en ces termes. Du
 » vingt & vnième iour de la Prytannee, estant De-
 » monicus d'Alopece greffier, Philostratus Pellenien
 » Capitaine general, à la proposition de Andron, le
 » Senat a ordonné touchant Archiptolemus, Ono-
 » macles & Antiphon, que les capitaines ont decla-
 » ré estre allez en ambassade à Lacedemone, au dom-
 » mage de la cité d'Athenes, & estre sortis du camp
 » sur vn vaisseau d'ennemis, & en terre auoir passé
 » par le fort de Decelie: Le Senat a ordonné qu'ils
C soient pris au corps & cōstituez prisonniers és pri-
 » sons fermées, à fin qu'ils soient punis. Que les capi-
 » taines mesmes, avec quelques vns du Senat iusques
 » au nombre de dix, tels comme il leur plaira choisir,
 » les deferent, à fin que sur les points alleguez iuge-
 » ment soit donné. Que les Thesmothetes les appel-
 » lent le lendemain qu'ils auront esté constituez pri-
 » sonniers, & qu'ils les introduisent en iugement de-
 » uant les Iuges, apres que par le sort ils serōt esleus:

„ & que les Capitaines avec les susdits orateurs les ^D
 „ accusent de trahison, & quiconque autre voudra:
 „ puis, quand le iugement sera conclud & prononcé
 „ cōtre eux, que la cōdamnation soit executee selon
 „ la forme & teneur de la loy qui a esté establee cōtre
 „ les traistres. Au dessoubs de ce decret y a escrit la
 „ condamnation de trahison: Furent cōdamnez Ar-
 „ cheptolemus fils de Hippodamus d'Agrante pre-
 „ sent, Antiphon fils de Sophilus de Ramnuse aussi
 „ present, & furent condamnez à estre liurez entre
 „ les mains des vnze executeurs de la iustice, leurs
 „ biens cōfisquees, la dixme desquels seroit attribuee ^E
 „ à la deesse Minerue, leurs maisons demolies de
 „ fond en cōble, & la place d'icelles bornee de tours,
 „ sur lesquelles sera escrit, Icy furēt les maisons d'Ar-
 „ cheptolemus & d'Antiphon traistres à la R. P. &
 „ declairees adiugees au Receueur du domaine,
 „ pour * * Qu'il ne soit loisible ensepuelir ny
 „ inhumer les corps d'Archeptolemus ny d'Anti-
 „ phon en la ville d'Athenes, ny en part quelconque
 „ qui soit sous son domaine. Que leur memoire
 „ soit infame, & toute leur posterité, tant d'enfans
 „ bastards que legitimes: & que si aucun adopte pas ^F
 „ vn de leurs enfans pour son fils, que luy mesme
 „ soit infame. Que tout cela soit escrit en vne cou-
 „ lonne de bronze, en laquelle soit aussi mis le de-
 „ cret qui a esté fait contre Phrynicus.

ANDOCIDES. II.

ANDOCIDES estoit fils de Leagoras, celuy
 qui fait vne paix entre les Atheniēs & les La-
 cedemo-

A cedemoniës, du bourg Cydathenien ou Thurien, extrait de noble race des Ceryces, c'est à dire heraux, paruenue iusques à luy. Et pourtât fut il esleu vn iour avec Glaucon, pour aller avec vingt nauires porter secours aux Corcyreiens, qui auoient la guerre contre les Corinthiens : depuis il fut accusé d'impieté, pour auoir avec les autres brisé les statues de Mercure qui estoient parmy la ville, & d'auoir aussi forfait contre les mysteres & saintes cerimonies de Ceres, pour ce qu'estant ieune desbauché, allant en masque follastrant vne nuit, il

B auoit brisé quelques images de Mercure, dont il auroit esté deferé en iustice : & pour ce qu'il n'auroit pas voulu représenter & liurer à la torture le seruiteur que ses accusateurs requeroient qu'il representast, il fut tenu pour atteint & conuaincu de ce qu'on luy mettoit sus : pour la seconde accusation, laquelle fut bien tost apres le partement de la grande armee de mer qui alla en la Sicile, aians les Corinthiens enuoyé des Ægestiës & des Leon-tins dedans la ville d'Athenes, ausquels quelques particuliers Atheniës deuoient prester secours, vne

C nuit ils briserent toutes les images de Mercure qui sont alentour de la place, ainsi que Cratippus dit. Et d'auantage aiant forfait contre les saints mysteres, & en estant appellé en iustice, il en fut absouls, à la charge de donner à cognoistre & declarer les forfaitteurs : & y aiant employé toute son estude, il feit en sorte qu'il trouua ceux qui auoient forfait contre les saints mysteres, entre lesquels fut son propre pere : & quant aux

autres, les aiant conuaincus il les feit tous mourir, **D** mais il sauua la vie à son pere, encore qu'il fust desia en prison: & s'estât fait fort, & aiant promis qu'il feroit beaucoup de choses qui seroient de tresgrād proffit à la R. P. il ne leur faillit pas de promesse, car Leagoras en accusa plusieurs qui auoient desrobé les deniers publiques, & qui auoient commis d'autres mauuais cas, au moien dequoy il fut absous. Mais estant Andocides en reputation pour les affaires qu'il manioit en l'administration publique, il ne laissa pas de se mesler du traffic de marchandise par mer, au moien dequoy il acquit amitié **E** & droit d'hospitalité avec plusieurs princes & seigneurs, mesmemēt avec le Roy de Cypre, & fut lors qu'il rauit vne ieune fille d'Aristides, & sa niepce, outre le sceu & contre la volonté de ses pères, & l'enuoya en don au roy de Cypre: mais estât prest d'en estre appellé en iustice, il la redescroba derechef, & la ramena de Cypre à Athenes. A raison dequoy le roy de Cypre luy aiant fait mettre la main sur le collet, le retint prisonnier, mais il rôpit les prisons, & s'en refouit à Athenes, lors que la conspiration des quatre cens fut chassée de la ville. **F** Mais derechef il en fut encore chassé quād les trente tyrans vsurperent la domination. Et s'estât tenu durant le temps de son exil en la ville d'Elide, lors que Thrasybulus & ses adherens retournerent en la ville, il y retourna aussi, & fut enuoyé en ambassade à Lacedemone, là où s'estât trouué qu'il auoit mal versé il fut derechef banny. Toutes lesquelles choses apparoissent par les oraisons qu'il a escri-

A escrites, car il y en a les vnes ausquelles il respond à l'imputation qu'on luy mettoit sus des mysteres violez, les autres où il prie generally les Iuges. On trouue aussi l'oraison, pour laquelle il defere ceulx qui auoient forfait contre les mysteres, & sa defension & response contre Phaiax, & de la paix. Il fut en vogue au mesme temps que Socrates le philosophe, mais il nasquit en la soixante & dix-huitième Olympiade, lors que Theagenides estoit Preuost à Athenes, tellemēt qu'il vient à estre plus ancien que Lysias d'environ cent ans. Il y auoit **E** vn des Hermes qui portoit son nom, & l'appelloit on le Mercure d'Andocides, aiant esté dedié par la lignee Ægeide, pour autant qu'Andocides auoit sa maison tout ioignant. Il feit les frais d'une danse ronde au nom de la lignee Ægeide, qui pretendoit le pris d'honneur aux festes Bacchanales: & l'aiant gagné il consacra le tripié, qu'il attacha hault, tout vis à vis du Porine Selin. Son stile est simple, sans artifice, tout nud, & sans figure quelconque.

L Y S I A S. I I I.

C **L** Y S I A S estoit fils de Cephalus, fils de Lysanias fils de Cephalus, natif de Syracuse, mais il s'en vint demourer à Athenes pour l'affectiō qu'il portoit à la ville, & pour la persuation de Pericles fils de Xantippus, qui estant son amy & son hôte, luy persuada de ce faire, à cause qu'il estoit fort riche, ou bien, comme les autres le tiennent, aiant esté banny & chassé de Syracuse lors qu'elle estoit as-

seruie par la tyrannie de Gelon. Si vint à Athenes D l'annee que Philocles fut preuost apres Phasicles, la deuxieme annee de la quatre-vingt-deuxieme Olympiade, & fut du commencement nourry & enseigné auec les plus nobles des Atheniens. Mais depuis quād la ville enuoya la colonie de Sybaris, qui depuis fut surnōmee Thuries, il s'y en alla auec son frere plus ancien Polemarchus, car il auoit encore deux autres freres Eudemus & Brachillus, leur pere estant desia decedé, & s'y en alla pour participer à la distributiō des terres au sort, l'annee que Praxiteles fut Preuost, & là se tint estant instruit & E enseigné chez Tyfias & Nicias tous deux Syracusains. Et y aiant acquis vne maison, auec la portion de terre qui luy estoit escheute par le sort, il y vescu & se porta comme citoien l'espace de soixante trois ans, iusques à l'annee que Clearchus fut Preuost à Athenes, & l'annee ensuiuant sous Callias, la nonante & deuxieme Olympiade, estant adueni aux Atheniens la calamiteuse perte qu'ils feirent en la Sicile : à raison de laquelle se remuans plusieurs de leurs subiects & alliez, mesmement ceulx du costé de l'Italie, il fut accusé de tenir le P party & fauoriser à ceulx d'Athenes, à raison de quoy il fut banny auec trois autres : & estant arriué à Athenes en l'annee que Callias fut Preuost, apres Cleocritus, que les quatre cents auoiēt desia occupé la ville, il s'y arresta. Mais apres la bataille nauale de la riuere de la Chéure que les trente tyrans eurent occupé la ville, il en fut dechassé l'espace de sept ans, & fut priué de son bien & de son frere

A frere Polemarchus : & luy f'estant sauué par l'huys de derriere de la maison , où lon le gardoit en intention de le faire mourir , il se retira en la ville de Megares. Et comme ceulx de Phyle fussent rentrez dedans la ville , & en eussent chassé les tyrans , pour ce qu'il f'estoit monstre trespvtille à l'entreprise , comme celuy qui auoit contribué deux mille liures en argent , & deux cents boucliers : & aiant esté enuoyé auec Herman , il soudoya trois cents & deux soldats , & si feit tant enuers Thrasyleus Elien son amy & hoste ancien , qu'il les aida de quelque nombre de talents : au moyen dequoy Thrasylbulus à son retour en la ville proposa au peuple , que pour ses bons seruices le droit de bourgeoisie luy fust ottroyé , n'y aiant encore nul Preuost esleu , l'an de deuant Euclidas , le peuple ratifia l'octroy : mais vn Archinus accusa ceste proposition , comme faitte contre les loix , d'autât qu'elle auoit esté proposee au peuple , auant que d'auoir esté proparlee & deliberee au Senat. Le decret de la ratification fut condamné & cassé , & ainsi debouté du droit de bourgeoisie , & neantmoins demoura en la ville tout le reste de sa vie auec mesmes droits & priuileges que s'il eust esté bourgeois , & y mourut finablement apres y auoir vescu l'espace de quatre vingts & trois ans , ou cōme les autres disent septante & six , ou cōme aucuns escriuēt , quatre vingts , tant qu'il veit Demosthenes encore ieune garçon. On dit qu'il fut né l'annee que Philocles fut Preuost , & treuue lon de luy quatre cents oraisons , desquelles il y en a selon le iugemēt

de Dionysius, & de Cecilius, deux cents & trente ^D
 qui sont naïfvement siennes, esquelles il fut vaincu
 par deux fois seulement. Il y a aussi celle qu'il feit
 cōtre Archinus, en la defense du decret, par le quel
 le droit de bourgeoisie luy auoit esté donné, & vne
 autre contre les trente tyrans. Il fut apte à persua-
 der, & es oraisons qu'il bailloit aux particuliers fort
 succinct & bref. On trouue aussi des Introdu-
 ctions à la Retorique de luy, & des Concions, des
 lettres missiues, des louanges, des harengues fune-
 bres, des discours de l'amour, vne defense de So-
 crates qui picque ses Iuges bien au vif, & semble ^E
 que son stile soit aisé & facile, combié qu'il soit im-
 possible à imiter. Demosthenes en l'oraison qu'il
 a faite cōtre Neæra, dit, qu'il fut amoureux d'une
 Metanira, laquelle estoit serue & compagne de
 Neæra. Depuis il espousa la fille de son frere Bran-
 chyllides. Platon mesme fait mention de luy au
 liure de Phædrus, cōme d'un orateur fort eloquent
 & plus ancien que Isocrates. Et Philiscus qui estoit
 familier d'Isocrates, & compagnon de Lysias, en
 fait vn Epigrāme, par où il appert qu'il estoit plus
 ancien d'ans, ce qui appert aussi par ce que Platon ^F
 en dit, & est l'Epigramme tel,

De Calippé fille à langue diserte,
 Ores fault il que tu sois bien alerte,
 Pour nous monstrier si bon esprit tu as,
 En nous rendant le fils de Lysias
 Tel que sonner, en memoire eternelle,
 S'oyè par luy la vertu paternelle:
 Car de pais en autre tracassé,

De

A De meurs en meurs passé & repassé,
 Par sapience immortel il doit estre,
 Et en honneur apres sa mort renaistre,
 Notifiant ma grande charité
 Enuers son pere à la posterité.

Il composa aussi vne harengue à Iphicrates, celle qu'il prononça contre Harmodius, & vne autre, par laquelle il accusa Timotheus de trahison, & obtint en l'une & en l'autre. Mais comme depuis Iphicrates approuuast les faicts & gestes de Timotheus, & taschast à soustenir ceste accusation de trahison, en luy demandant compte des finances qu'il auoit maniees, il en fut appellé en iustice, & respondit par vne oraison que luy composa Lyfias: & quant à luy il fut bien absouls, mais Timotheus fut condamné en l'améde d'une grosse somme de deniers. Il recita aussi en vne assemblee des ieux Olympiques vne longue oraison, par laquelle il suada aux Grecs, que se reconcilians les vns avec les autres, ils fissent entreprise de ruiner le tyran Dionysius.

C ISOCRATES. IIIII.

ISOCRATES estoit fils de Theodorus archipresbtre, l'un des mediocres bourgeois, qui auoit nombre d'esclaves faiseurs de aubois & de flustes, par la manufacture desquels il deuint si riche, qu'il fit honorablement nourrir & instituer ses enfants. Car il en auoit encore d'autres masles, Telesippus, Diomnestus, & vne fille. C'est pourquoy il est

farcé par les poëtes Comiques Aristophanes & D
 Stratis, touchant ces flustes. Il fut environ la qua-
 tre-vingt-sixieme Olympiade, plus aagé que Lysimachus Myrrhinusien de vingt & deux ans, & que
 Platon de sept. Il fut auditeur & disciple de Pro-
 dicus de Chio, & de Gorgias Leontin (& en son
 enfance fut aussi bien nourry & instruiât, que nul
 autre qui fust à Athenes) & de Tisias Syracusain,
 & de Theramenes le Rhetoricien, lequel estant
 prest à estre pris par les trente tyrans s'enfuit à l'au-
 tel de Minerue cōseillere, dont tous ses amis estants
 effroyez, Socrates seul se leua pour le secourir, & E
 demoura longuement sans parler du commence-
 ment. Mais Theramenes luy mesme le pria de se
 deporter, disant qu'il luy seroit plus douloureux
 que son mal propre, s'il voyoit qu'il y eust aucun
 de ses amis qui tombast en affaire pour l'amour de
 luy : & dit on qu'il luy aida à compiler certaines
 Institutions, lors que lon le calomnioit en iuge-
 ment : ces Institutions sont intitulees de Boton.
 Apres qu'il fut deuenue homme, il ne se voulut pas
 entremettre du maniemment des affaires de la chose
 publique, tant pource qu'il auoit la voix foible & F
 gresle, que pource que de nature il estoit craintif,
 & qu'il auoit perdu ses biens en la guerre contre les
 Lacedemoniens. Il semble bien qu'il ait porté
 tesmoignage en public iugement pour d'autres,
 mais de harengues il n'en prononça iamais qu'une
 seule, celle du contr'eschange des biens : & aiant
 dressé vne eschole, il se meit à estudier & à escrire,
 là où il cōposa son oraison Panegyricque, & quel-
 ques

Aques autres deliberatiues, dont il en lisoit luy mesme les vnes, & les autres il les composoit pour des autres, estimant que par ce moien il enhorteroit & inciteroit les Grecs à faire ce qu'ils deuoient. Mais se trouuant trompé de son intention, il se deporta de cela, & se fit maistre d'Eschole, premierement en l'Isle de Chio, aiant neuf disciples, là où lon dit que voiant le salaire que ses escholiers luy comptoient „ pour leur escholage, il se prit à plorer & dit, Or „ voy ie bien maintenāt que ie me suis vendu à ceux „ icy. Il conféroit avec ceulx qui vouloient deuiser „ avec luy, aiant esté le premier qui a separé les al-
B tercations des plaideries d'auec le discours des affaires publiques. Il ordonna des Magistrats en Chio, & vne mesme forme de gouuernement de la chose publicque qu'en son païs, & amassa autāt d'argēt que fit oncques maistre d'eschole, tellemēt qu'il eut bien la faculté de defrayer vne Galere: Il eut des auditeurs iusques au nombre de cent, & entre autres Timotheus fils de Conon, avec lequel il visita plusieurs villes, escriuant toutes les lettres que Timotheus enuoyoit aux Atheniens, à l'oc-
C casion dequoy il luy dōna six cents escus de l'argent qui luy resta de la composition de Samos. Aussi furent ses disciples Theopōpus de Chio, & Ephorus de Cumes, & Asclepiades qui a cōposé les subiects tragicques, & Theodectes qui a depuis escrit des Tragedies. Son sepulchre est en allāt vers Cymitis, en la rue sainte qui va à Eleusine, maintenāt tout demoly. Il y auoit aussi fait dresser les images des poētes illustres avec luy, dont il n'est demouré

que celle d'Homere seule. Aussi estoit de ses disciples Leodamas Athenien, & Lacritus Legislateur: &, comme aucuns disent, Hyperides & Iseus. Et dit on que Demosthenes, ainsi comme il enseignoit encore la Rhetorique, s'en vint à luy, & luy dit que certainement il n'auoit pas moien de luy payer & fournir les mille drachmes qu'il demandoit pour son escholage, mais que volontiers il luy en payeroit deux cents qu'il auoit, pour apprendre, au fur de son argent, vne cinquieme partie de son art d'eloquence, & qu'Isocrates luy respondit, Demosthenes mon amy, nous ne despeçons point par trôçons nostre besongne, non plus que les grands poissons, mais les vendons tous entiers: aussi si tu veux estre mon escholier, ie te monstraray mon art tout entier. Il mourut l'annee que Cherionides estoit preuost, estans venues les nouuelles de la desconfiture de Cheronee, qu'il entendit estant au lieu des exercices d'Hippocrates, & se fit volontairement mourir soy mesme en s'abstenant de manger par quatre iours durans, apres auoir prononcé les trois premiers vers des trois tragedies d'Euripides,

Danaus Roy qui eut cinquante filles.

Pelops estant arriué dedans Pise.

Cadmus partant du pais de Sidoine.

Il vescu quatre vingts & dix ans, ou comme quelques vns disent, cent. Estant ia fort auant en son aage, il adopta pour son fils Aphareus, le plus ieune des trois enfans de Plathaine sa femme, fille de l'Orateur Hippias. Il fut assez riche, par ce qu'il exigeoit argent de ses familiers & escholiers, & aussi pource

A pource qu'il eut de Nicodes Roy de Cypre fils de Euagoras, la somme de douze mil escus, pour l'oraison qu'il luy dedia. A l'occasion dequoy aiant acquis des enuieux, il fut par trois fois eleu Capitaine de galere. Et pour les deux premieres fois feignant estre malade, il s'en excusa par son fils, mais à la troisieme il se leua & reçeut la charge, à laquelle il despendit beaucoup d'argent. Il y eut vn pere qui luy parlant de son fils qu'il enuoyoit aux escholes luy dit, qu'il n'auoit enuoyé quand & luy pour le gouuerner qu'un sien esclau: Or va

B doncq, respōdit il, car pour vn esclau tu en recoureras deux. Il combattit au ieu de pris que la Royne Artemisia institua sur le tumbeau de son mary Mausolus, & trouue lon encore là l'oraison qu'il y fit à la louange du defunct. Il en fit aussi vne autre à la louange de Helene, & vne autre à la louange de l'Arcopage. Aucuns escriuent qu'il sortit de ceste vie par s'estre abstenu neuf iours de reng de manger, les autres disent quatre, au iour mesme que lon faisoit les obseques publicques de ceulx qui estoient decedez en la bataille de Chæronee.

C Son fils aussi Aphareus composa des oraisons. Si fut inhumé avec toute sa parenté pres du parc de Cynosarges, sur vne motte, à la main gauche. Son fils & son pere Theodorus, & sa mere avec la sœur de sa mere Anaco tante de l'orateur, & son frere qui auoit le mesme nom de son pere Theodorus, & son fils adoptif Aphareus, & son cousin Socrates fils de sa tâte Anaco, sa femme Plathaine mere du fils adoptif Aphareus. Sur tous lesquels corps

il y auoit six tables ou tûbes de pierre, qui n'y sont plus maintenāt: mais sur le tumbeau d'Isocrates il y auoit vn grād mouton de trēte coudees, & sur iceluy vne Sirene de sept coudees, pour signifier figureemēt la douceur de son naturel & de son stile, ce qui maintenāt n'y est plus. Aussi y auoit il pres de luy vne table où estoīēt ses maistres, entre lesquels y estoit Gorgias regardant vne Sphère astrologique, & Isocrates ioingnant de luy. Aussi y auoit il en la ville d'Eleusine au deuāt de l'entree du portique vne statue de brōze que luy fit faire Timotheus fils de Conon, sur laquelle il y a ceste inscription, E

Timotheus par amour cordiale,
En honorant l'alliance hospitale
D'Isocrates, aux Deesses a fait

Icy poser son naturel pourtraict.

La statue estoit faicte de la main de Leochares. On trouue encore soixante de ses oraisons, entre lesquelles il y en a de vrayes vingt & cinq, selon le iugement de Cecilius, les autres luy sont faulsement attribuees. Et estoit si peu curieux d'ostentation, & se soucioit si peu de monstrier sa suffisance, qu'estants venus à luy trois pour l'ouir declamer & discourir, il en retint les deux, & renuoya le troisieme, disant qu'il retournaist le lendemain, pource que lors il auoit vn plein theatre en son auditoire: & disoit souuent à ses familiers qu'il prenoit cent escus pour enseigner son art, mais qui luy pourroit enseigner à luy la hardiesse & la forte voix, qu'il en payeroit mille. A quelqu'un qui luy demandoit, comment il estoit possible qu'il rendist les autres F
orateurs

A orateurs suffisans à bié dire, veu qu'il ne l'estoit pas
 „ luy mesme : Pource, dit il, que les cueux ne peuuēt
 „ pas couper , mais elles rendent bien le fer apte &
 „ propre à couper. Aussi y en a il qui disent qu'il a
 composé des liures de l'art de Retorique, toute fois
 les autres tiennent que ce n'estoit pas par art ny
 methode, mais par exercitation seulement qu'il les
 rendoit eloquents. Il est vray que iamais il n'exigea
 salaire de citoien d'Athenes , & prioit ses familiers
 de se trouuer aux assemblees de ville pour luy rap-
 porter ce qui s'y seroit dit. Il fut extremement des-
 B plaisant de la mort de Socrates , & de faict le len-
 demain il en porta le ducil. A vn qui luy deman-
 doit que c'estoit que Retorique , il luy respondit:
 „ C'est l'art de faire les choses grandes petites , & les
 „ petites grandes. Quelque iour estant en vn festin
 chez Nicocreon Tyran de Cypre, comme les assi-
 „ stans le priaissent de discourir, il leur respondit: De
 „ discourir des choses auxquelles ie suis bien propre,
 „ il n'en est pas le temps maintenant: & quant à cel-
 „ les dont il est temps maintenāt , ie n'y suis pas pro-
 „ pre. Et voiant que Sophocles le poëte Tragicque
 C poursuivoit de l'œil affectueusement vn ieune gar-
 „ son, il luy dit: Il ne faut pas, Sophocles, qu'un hom-
 „ me de bien contienne ses mains seulement , mais
 „ aussi ses yeulx. Ephorus natif de Cumes estoit for-
 ty de son eschole sans y auoir rien fait ne rien ap-
 pris, à raison dequoy son pere Demophilus l'y aiāt
 renuoyé avec vn second salaire, Isocrates s'en riant,
 l'appelloit par ieu Diphoros , c'est à dire , portant
 deux fois : si trauailloit il beaucoup apres luy, &

luy mesme luy suggeroit l'argument de sa decla- D
 mation. Il estoit enclin & subiect au plaisir de l'a-
 mour, à raison dequoy il vsoit tousiours de grands
 & plantureux matteras en son liect, & auoit des au-
 reillers parfumez & trempez d'eaux de senteurs, &
 tant qu'il fut ieune il ne se maria point, mais quand
 il fut deueni vieil, il entretenoit en sa maison vne
 courtisane, laquelle s'appelloit Lagisce, de laquelle
 il eut vne petite fille qui mourut auant que d'estre
 mariee, en l'aage de douze ans : depuis il espousa la
 femme de l'orateur Gorgias, Plathaine, laquelle
 auoit trois enfans, dont il adopta Aphareus, ainsi E
 comme nous auons dit, qui luy fit faire vne statue
 de bronze, & la planta aupres du temple de Iupi-
 ter Olympien, avec vne telle inscription:

Aphareus fils par adoption
 D'Isocrates, en veneration
 De Iupiter, dedia ceste image
 De son feu pere, à fin que de courage,
 Il se monstrest deuot enuers les Dieux,
 Et honorast ses parents vertueux.

Lon dit qu'il courut en carriere, estant encore ieu-
 ne enfant, car on le voit de bronze au chasteau, de- F
 dans le ieu de paulme des presbtres de Minerue, à
 cheual, ainsi comme aucuns ont dit. En toute sa vie
 il a eu deux proces, le premier pour eschanger ses
 biens, estant prouocqué par Megacrides, là où il ne
 comparut pas en personne à l'adiournemēt, à cau-
 se de sa maladie, mais il y enuoya son fils, & le gai-
 gna. Le second luy fut intenté par Lysimachus,
 pour eschāger ses biens, à la charge de defrayer vne
 galere

- A** galere, auquel proces estant vaincu, il fut cōtrainct de defrayer la galere : aussi y auoit il vne sienne image sur la place du Pompeum. Mais Aphareus composa plusieurs oraisons & iudicielles & deliberatiues, & fit des Tragedies enuiron trentesept, dont il y en a deux que lon contredit, & commença à faire ouir en public ses œuures, depuis l'annee que Lysistratus fut preuost, iusques à celle de Sotigenes, en vingt & huit ans, durant lesquels il en fit iouer six ciuiles, dont il gaigna le pris de deux, les aiant mis en auant par vn maistre ioueur nommé
- B** Dionysius, & par d'autres ioueurs deux autres Lenaïques, c'est à dire, ioyeuses pour rire. Il y auoit des statues de la mere d'Isocrates & de Theodorus, & de la sœur d'elle Anaco dedans le chasteau, dont celle de la mere est encore en estre, plantee aupres de Hygia, l'inscription en estant changee, mais celle d'Anaco ne se trouue pas. Elle laissa deux enfans, Alexandre qu'elle eut de Cœcon, & Vicles de Lysias.

I S Æ V S. V.

- C** I S Æ V S estoit natif de Chalcide, & estât venu à Athenes, il estudia és œuures de Lysias, lequel il imita de si pres, tant à la tissure & assemblage des paroles, comme en la subtilité & arguce de ses inuentions, que si ce n'est vn homme bien exercité à discerner le stile de ces Orateurs, il ne pourroit pas facilement distinguer plusieurs de leurs oraisons à qui elles seroient. Il eut la vogue enuiron la

guerre du Peloponese, ainsi comme lon peut con-
iecturer par ses oraisons, & dura iusques au regne
de Philippus : mais il quitta son eschole pour aller
domestiquemēt enseigner & instruire Demosthe-
nes, pour le pris & somme de dix mille drachmes, à
raison dequoy il acquit fort grande reputation, &
luy composa des oraisons exhortatoires, comme
quelques vns ont escrit. Il a laissé soixante & qua-
tre oraisons, dont il y en a de naïfues & legitimes à
luy cinquante : aussi escriuit il des particulieres In-
troductions & regles de Retorique, & fut le pre-
mier qui commença à former & tourner la senten-
ce de son stile au maniemēt des affaires, ce que
principalemēt imite Demosthenes. Theopompus
fait mention de luy en son Theseus.

ÆSCHINES. VI.

AESCHINES fut fils d'Atrometus, lequel fut
Abanny & chassé du temps des trente tyrans, &
ayda à remettre sus le peuple, & sa mere eut nom
Glaucothea de la lignee Cothocide, n'estant ny
quant à la noblesse de sa race, ny quant à ses facul-
tez & richesses, des bōnes maisons de la ville, mais
se trouuant ieune, & fort & roide de sa personne, il
se fortifia encore d'auātage aux exercices du corps :
& ayant la voix forte & claire, depuis il fit profes-
sion de iouer des Tragédies, & comme dit Demo-
sthenes, il alloit apres les autres, & ne faisoit que
tiercer entre les ioueurs és festes Bacchanales sous
vn Aristodemus. Estant encore ieune garson il
monstra

A monstra les lettres avec son pere : & arriué à son adolescence, il fut à la guerre parmy les autres. Il ouit, comme aucuns tiennent, Isocrates & Platon, ou comme Cecilius dit, Leodamas : & se mellant des affaires publicques non sans bruiet & reputation, pour autant qu'il faisoit teste à la faction de Demosthenes, il fut en plusieurs autres ambassades, & nommeement deuers Philippus pour traiter de la paix, pour laquelle il fut accusé par Demosthenes, pour auoir esté cause que la nation des Phociens fut exterminée : & pource que la guerre

B estant allumée entre les Amphictyons & les Amphissiens aiant esté député pour comparoir en l'assemblée des Amphictyons qui faisoient vn port, il fut cause qu'ils se jetterent entre les bras de Philippus, lequel à sa suscitation prit cest affaire en main, & conquist tout le pais de la Phocide, mais moiennât le port & faueur que luy fit Eubulus fils de Spintharus Proballusien, qui estoit l'un de ceux qui auoient credit enuers le peuple, il eschappa & fut absous de trente ballottes & suffrages seulement: les autres disent que les Orateurs escriuirent

C & composerent bien les oraisons, mais qu'estant aduenue la fortune de la bataille de Cheronee, la cause ne fut point appelée ny plaidee. Quelque temps depuis Philippus estant trespasé, & son fils Alexandre passé en Asie, il accusa Ctesiphon d'auoir mis en auant vn decret contraire aux loix en l'honneur de Demosthenes, mais n'ayant pas eu la cinquieme partie des voix & suffrages du peuple, il fut banny d'Athenes & se retira à Rhodes, n'ayant pas

voulu payer mille drachmes, pour l'amende en laquelle il estoit condamné. Les autres disent qu'il fut d'avantage noté d'infamie, pour n'auoir pas voulu sortir de la ville, & qu'il se retira à Ephese par deuers Alexandre, mais Alexandre mort & les choses estants en grand bransle, il s'en retourna à Rhodes, là où il dressa vne eschole, & commença à enseigner l'art d'eloquence. Il recita quelquefois aux Rhodiens la harengue qu'il auoit prononcee en iugement alencontre de Ctesiphon, dont tous les assistans demourerent esmerueillez, comment il auoit peu estre vaincu, aiant prononcé vne telle oraison. Vous ne vous en esbahiriez pas, Seigneurs Rhodiens, leur respondit il, si vous auiez ouy Demosthenes respōdant à cela. Il laissa à Rhodes vne eschole, qui depuis fut appelée l'estude de Rhodes: depuis il s'en alla à Samos, & apres auoir demouré quelques temps en l'Isle il y mourut. Il eut fort belle voix, comme il appert tant par ce qu'en dit Demosthenes, que par l'oraison de Demochares. On trouue de luy quatre oraisons, celle cōtre Timarchus, celle de la fausse ambassade, & celle cōtre Ctesiphon, qui sont vrayement de luy: car la quatrieme qui est intitulee Deliaque, n'est pas d'Æschines, car il est vray qu'il fut bié designé pour aller plaider en iugemēt la cause du Tēple de Delos, mais il ne la pronōça pas, par ce que Hyperides fut esleu au lieu de luy, ainsi que dit Demosthenes. Il eut des freres, ainsi qu'il dit luy mesme, Aphobus & Demochares: il apporta le premier la nouuelle de la secōde victoire que les Atheniēs auoiēt gaignee

A à Tamynes, à l'occasion dequoy il eut en don vne couronne. Les autres disent qu'Æschines ne fut iamais à eschole de maistre quelconque en Rhetorique, mais qu'ayant esté nourry au greffe il s'eleva de luy mesme, par ce qu'il assistoit & versoit ordinairement aux iugemens. La premiere fois qu'il parla en public deuant le peuple, fut contre Philippus, en quoy ayant esté bien ouy il fut incontinent esleu ambassadeur deuers les Arcadiens, là où il feit vne ligue de dix mille combattans alencontre de Philippus. Il accusa Timarchus de tenir vn bordeau, lequel craignant de comparoir en iugement se pendit, ainsi comme le dit quelque **B** part Demosthenes. Depuis il fut esleu ambassadeur vers Philippus, avec Ctesiphon & Demosthenes, pour traiter de la paix, en laquelle il se porta mieux que Demosthenes. Et depuis fut esleu luy dixième pour aller faire iurer la paix, dont estant appellé en iustice il fut absouls, comme il a parauant esté dit.

LYCURGVS. VII.

C **L**YCURGVS estoit fils de Lycophron qui fut fils de Lycurgus, celuy que les trente Tyrans feirent mourir à la suscitation d'un Aristodemus qui estoit de Bata, & ayant esté tresorier general de la Grece, auoit esté banny durant la domination populaire du bourg de Buta, & de la famille des Eteobutades. Il fut premierement auditeur de Platon le Philosophe, & feit profession de philoso-

phe, & depuis estant deuenu familier d'Isocrates, il se
 fentremet du gouuernement des affaires avec
 grand credit, tant en faicts qu'en paroles, & si luy
 commeit on le maniement des finances : car il fut
 esleu tresorier general l'espace de quinze ans, du-
 rant lesquels il mania quatorze mille talens, qui
 sont huit millions & quatre cens mille escus, ou
 comme les autres disent, dixhuit mille six cens
 cinquante talens, & fut l'orateur Stratocles qui
 meit en auant qu'on luy decernast cest hōneur. Si
 fut esleu du commencement luy mesme en person-
 ne tresorier, mais depuis il y mettoit le nom de
 quelqu'un de ses amis, & luy ce pēdant faisoit tout
 le maniement, & auoit toute l'administration, par
 ce qu'il y auoit eu vne ordonnance publiee, que
 nul ne peust auoir l'administration des deniers pu-
 blicques pour plus de temps que cinq ans. Il conti-
 nua tousiours à presider aux œuures publiques
 esté & hyuer, & luy aiant esté commise la charge
 de prouoir aux choses necessaires pour la guerre,
 il s'habilla beaucoup de fautes en la chose public-
 que. Entre autres il feit bastir au peuple trois cens
 galeres, & feit le parc aux exercices de Lyceum, &
 le planta d'arbres, & edifia aussi vn parc à lucter,
 & paracheua le Theatre qui est au temple de Bac-
 chus, luy mesme aiant l'œil sur les ouuriers : & estoit
 sa foy & conscience tenue si bonne, que pour vne
 fois il s'est trouué auoir entre ses mains iusques à la
 somme de deux cens cinquante talens, de l'argent
 des particuliers qui luy bailloient à garder. Aussi
 feit il faire plusieurs beaux vases d'or & d'argent
 pour

A pour ornement de la chose publique, & feit aussi faire plusieurs Victoires d'argent, & aiant trouué plusieurs ouurages publiques imparfaicts, il les paracheua tous, comme l'arcenal & les salles à ser-rer les armes & vtensiles publiques, & feit faire l'enceinte des murailles alentour de la closture Pa-nathenaïque, & combla & applanit la grande fondrière, aiant vn nommé Dinius, qui en estoit propriétaire, quitté & donné la propriété du fond en faueur principalement de Lycurgus. Il eut aus-si la garde de la ville, & la charge de prendre au
B corps les malfaitteurs, qu'il chassa tous, tellement que quelques Sophistes disoient, que Lycurgus trempoit sa plume, non point en ancre, mais en sang, quand il escriuoit contre les malfaitteurs. A l'occasion dequoy il fut tant aimé du peuple, que quand Alexandre le demanda entre autres pour le faire mourir, iamais le peuple ne le voulut aban-donner. Mais du temps que Philippus faisoit la guerre aux Atheniens pour la seconde fois, il alla avec Polyeuctus & Demosthenes en ambassade, tant au Peloponese qu'en quelques autres villes, &
C fut tousiours en bien bõne reputation, tant cõme il s'entremet du gouuernemēt, & le teint on tousiours pour vn grand homme de bien & iuste, telle-ment qu'ès iugemens quand on disoit que Lycur-gus l'auoit ainsi dit, cela estoit vn grand preiudice à celuy pour lequel il parloit. Il meit aussi en auant deux loix, l'vne que lon celebrast & exercest le ieu des comédies, où les poètes feissent iouer leurs œuures à l'enuy les vns des autres dedãs le theatre

à la feste des Chytres, & que celuy qui obtiendrait **D**
& gagneroit le pris, acquist droit de bourgeoisie,
ce qui parauant ne se faisoit pas, remettant sus ce ieu
qui auoit esté discontinué. L'autre, que lon feist
faire aux despens du public des images de bronze
aux poëtes Æschylus, Sophocles, & Euripides, &
que lon feist escrire leurs Tragedies pour les gar-
der en public, & que le greffier de la ville les leust
aux ioueurs, par ce qu'il n'estoit pas loisible de les
iouër. Et la troisieme, qu'il ne fust permis à aucun
citoien, ou autrement manant & habitant de la
ville d'Athenes, acheter des prisonniers de guerre **E**
de condition libre, pour les rendre esclaves, sans le
consentement de leur premier maistre. Et d'avan-
tage, que lon feist dedans le port de Piree le ieu de
pris des dâses rondes és festes de Neptune: & qu'il
y en eust au moins trois: & que lon donnast à
ceux qui emporteroiët le premier pris, non moins
de cent escus, & aux seconds non moins de qua-
tre vingts, & au troisiemes non moins de soixante,
selon qu'il seroit adiugé par les iuges. Qu'il ne fust
pas loisible à pas vne dame Atheniense aller en co-
che à Eleusine, de peur que les pauvres ne fussent **F**
en cela inferieures aux riches, & que si quelqu'une
y estoit surprise allant en coche, qu'elle payast pour
l'amende six mille drachmes. A quoy sa femme
n'ayant pas obey, & ayant esté surprise contreuenant
à la Loy, par les escumeurs qui alloient recher-
chant telles choses, il leur bailla luy mesme vn ta-
lent: de quoy ayant depuis esté accusé & chargé de-
uant le peuple: Au moins voiez vous, dit-il, Athe-
niens,

A niens, que ie suis surpris d'auoir donné, & non pas
" pris de l'argent. Il rencontra vn iour par la ville le
fermier de la taille foraine, qui mettoit les mains
sur le philosophe Xenocrates, & le vouloit emme-
ner en prison pour le faire payer la taille des estrā-
gers, il donna d'vne baguette qu'il auoit en la main
sur la teste du fermier, & luy osta le philosophe
d'entre les mains, puis le mena luy mesme en pri-
son, comme aiant fait chose indigne d'vn tel per-
sonnage. Peu de iours apres, le philosophe rencon-
" trant ses enfans. I'ay, ce leur dit il, mes beaux en-
B fans, bien tost rendu la grace à vostre pere, par ce
" qu'il est loué & prisé de tout le monde de ce qu'il
" m'a secouru. Aussi proposa il & meit en auāt quel-
" ques decrets publiques, vsant en cela de l'entremi-
se d'vn Euclides Olynthien, qui estoit fort suffisant
homme en matiere de dresser tels decrets. Et com-
bien qu'il fust homme riche, si ne portoit il iamais
qu'vne mesme robbe l'hyuer & l'esté, & chaussoit
de mesmes souliers. Il s'exercitoit continuellement
à declamer & nuit & iour, n'estant pas bien pro-
pre à parler à l'improueu. Pour son giste il auoit
C sur son chalit vne peau de mouton seulement avec
la laine, & sous sa teste vn oreillier, à fin que plus
tost & plus aisémēt il se peust esueiller pour estu-
dier. Quelqu'vn luy reprocha vn iour qu'il payoit
encore de l'argent à des Sophistes & Retoriciens
" pour apprendre les lettres: Mais, dit il, s'il y auoit
" quelqu'vn qui me promeist de me rendre mes en-
" fans meilleurs, ie ne luy baillerois pas seulement
" volontiers mille drachmes, mais la moitié de tout

„ mon bien. Il estoit hardy à parler franchement au **D**
 peuple, pour sa noblesse, & luy dire sa verité, telle-
 ment qu'un iour pour ce que les Atheniens ne le
 vouloient pas laisser haréguer, il s'escria tout haut:
 „ O fouët de Corfou, combien tu vaux de talens!
 Vne autre fois, comme quelques vns appellassent
 „ Alexandre Dieu: Et quelle façon de Dieu est-ce
 „ la, du temple duquel ceux qui sortiront il faudra
 „ qu'ils s'aspergent d'eau pour se purifier? Apres qu'il
 fut mort on meit ses enfans entre les mains des
 vnze executeurs de la haute iustice, Thrasicles aiât
 minuté l'accusation, & Menesarchus l'ayant pro- **E**
 noncée. Mais Demosthenes du temps de son exil,
 en aiant escrit aux Atheniens, ils s'en repentirent
 & les laisserent aller. Democles disciple de Theo-
 phrastus, les aiant iustifiez & defendus luy & quel-
 ques vns de ses enfans, furent inhumez aux despés
 du public, vis à vis du temple de Minerue Pëonie-
 ne, dedans le vergier de Melanthius le philosophe.
 on trouue encore iusques à nostre temps des tum-
 bes inscriptes du nom de Lycurgus & de ses en-
 fans: Et qui est le plus grand point de son gou-
 uernement, il feit monter le reuenu de la chose pu- **F**
 blique iusques à douze cens talens, qui sont sept
 cens vingt mille escus, qui n'estoit au parauant
 que de soixante. Vn peu deuant qu'il mourust sen-
 tant sa mort prochaine, il se feit porter au temple
 de la mere des Dieux, & au Senat, voulant estre
 syndiqué, & rendre compte & raison de toute
 son administration en la chose publique. Il ne se
 trouua personne qui l'osast accuser ny charger
 de

A de rien, fors Menesechmus: Et apres auoir respon-
du aux charges & imputations qu'on luy mettoit
fus, il se fait reporter en sa maison, où il mourut,
aiant eu toute sa vie reputation d'homme de bien,
& estant loué de son eloquence, sans que iamais
il ait esté condamné, combien que par plusieurs
fois il ait esté accusé. Il eut trois enfans de Callisto
fille d'Abron, & sœur de Caleus, fils aussi d'Abron,
du bourg de Cata, qui fut tresorier de l'extraor-
dinaire des guerres, l'annee que Cherondas fut
Preuost. De ceste affinité fait mention Dinarchus,
B en l'oraison qu'il a faite contre Pastius: & laissa
des enfans, Abron, Lycurgus & Lycophron, des-
quels Abron & Lycurgus moururent sans enfans,
mais Abron apres auoir eu bonne reputation &
grand credit au maniement des affaires deceda.
Et Lycophron aiant espousé Callistomaché fille
de Philippus Aixenes engendra Callisto, laquelle
fut mariee à Cleóbrotus fils de Dinocrates Achar-
nanien, & eut vn fils Lycophron que son grand
pere Lycophron adopta pour son fils: celuy la mou-
rut sans enfans. Apres la mort de ce Lycophron
Callisto fut remariee à Socrates, dont elle eut vn
C fils Symmachus, duquel nasquit Aristonymus, &
d'Aristonymus Charmides, & de cestuy-cy Philip-
pé, & d'icelle Lyfander Medien, qui fut interprete
des Eumolpides: de luy & de Timothea fille de
Glaucus nasquirent Laodamia & Medius, qui eut
la presbtrise de Neptune Erethië, & Philippé, qui
depuis fut religieuse de Minerue, mais deuant l'a-
uoit espousee Diocles Melittië, dont il eut Diocles,

qui fut coulommel de gens de pied:& aiant espousé D
Hediste fille d'Abron, il engendra Philippide &
Nicostrate. Themistocles fils de Theophraste le
porte-torche, aiant espousé Nicostrate engendra
Theophrastus & Diocles, & gouuerna aussi la
presbtrise de Neptune Erechthien. On trouue en-
core quinze oraisons de luy: il fut couronné plu-
sieurs fois par le peuple, & luy furent ordonnees
les statues, dont il y en a vne de bronze en la rue
du Ceramique par decret public, l'annee qu'Ana-
xicrates fut Preuost, sous lequel luy fut aussi de-
cretée & ordonnée bouche à court en l'hostel de B
ville, à luy & à son fils aîné, par mesme decret du
peuple: toutefois apres sa mort, Lycophron le plus
aagé de ses enfans en eut proces pour ce don la. Il
plaida aussi pour les choses de la Religion, & en
accusa Autolycus Senateur en la court d'Areopa-
ge, & Lyficles Capitaine, & Demades fils de De-
mius, & Mesarchus, & plusieurs autres, lesquels il
fait tous condamner. Il appella aussi en iustice Di-
philus, pour ce qu'il ostoit des mines d'argent les
pilliers qui soustiennent les fardeaux de terre qui
sont au dessus, & en auoit acquis beaucoup de F
biens, ce qui estoit directement contre les loix, &
y aiant peine de mort, il l'en fait condamner. Il di-
stribua de ses biens à chasque citoien d'Athenes,
cinquante drachmes, qui sont cinq escus, ou com-
me les autres disent vne mine, qui en sont dix, &
monta la somme totale cent soixante talens, qua-
tre vingts seize mil escus. Il accusa aussi Aristogi-
ton, Cleocrates, & Autolycus d'estre esclaves, qui

neant-

A neantmoins se portoient pour libres. On sur-
nommoit Lycurgus, Ibis, qui est vne cicongne
noire, & disoit on communément à Lycurgus
l'Ibis, à Xenophon le Chat-huan. Ils estoient an-
ciennement descendus de ceux la, & d'Erechtheus
fils de la terre & de Vulcain, mais des plus pro-
chains de Lycomedes & de Lycurgus, que le peu-
ple honora de funerailles & obseques publiques.
Et est ceste descente de leur race de ceux qui ont
esté presbtres de Neptune, dedans le temple E-
rechthien, en vn tableau qui fut peint par Ismenias
B Chalcidien, & des statues de bois, tant de Lycurgus
que de ses enfans, Abron, Lycurgus, Lycophron,
que firent iadis Timarchus & Cephisodorus, en-
fans de Praxiteles. Celuy qui posa & dedia le ta-
bleau fut Abron, auquel par ordre de succession
hereditaire estoit escheute la presbtrise, mais il la
ceda volontairement à son frere Lycophron. C'est
pourquoy il est peint baillant à son frere le tri-
dent, & aiant fait escrire sur vne coulonne carree
tout ce qu'il auoit fait en l'administration publi-
que, il la fait planter deuant la porte du parc à la
C luiete qu'il auoit fait bastir, à fin que chascun le
veist qui voudroit. Et ne se trouua personne qui
le peust accuser ny conuaincre d'auoir rien desro-
bé au public. Il mit en auant que lon donnast vne
couronne à Neoptolemus fils d'Anticles, & vne
statue, pour ce qu'il s'estoit offert & auoit promis
de dorer l'autel d'Apollo, qui est sur la grande
place, ainsi comme il est commandé par son ora-
cle. Il postula aussi des honneurs pour Euonymus

filz de Diopithes, filz de Diotimus, l'annee que **D**
Ctesicles fut Preuost.

DEMOSTHENES. VIII.

DEMOSTHENES filz de Demosthenes & de
Cleobule, de la lignee Peaniene, fut laissé or-
phelin par son pere en l'aage de sept ans, avec sa
sœur qui n'en auoit que cinq. Depuis qu'il eut
perdu son pere, il se teint avec sa mere veufue, al-
lant à l'eschole d'Isocrates, comme quelques vns
ont dit, ou comme la plus part le tient à celle de **E**
Isëus Chalcidien, qui estoit disciple d'Isocrates, se
tenant à Athenes, imitant Thucydides, & Platon
le Philosophe, à l'eschole duquel on dit qu'il fut
premierement. Mais ainsi comme Hegesias le Ma-
gnesien raconte, estant aduertie que Callistratus
Aphidneien Orateur fameux, qui auoit esté capi-
taine general de la gendarmerie, & qui auoit de-
dié l'autel de Mercure harengueur, deuoit faire
vne harengue deuant le peuple, il pria son pèdago-
gue de la luy faire ouir, & l'ayant ouy il deuint a-
moureux de l'eloquence. Or quant à cest orateur, il **E**
ne le peut pas ouir longuement en la ville, car il en
fut banny, & se retira en la Thrace: alors Demo-
sthenes entrant en son adolescence commença à
hanter Isocrates & Platon, & depuis il prit en sa
maison Isëus qu'il teint l'espace de quatre ans, &
s'exerça à imiter son stile, ou comme recite Ctesic-
bius en son traitté de la philosophie, il feit en sorte
qu'il recouura les oraisons de Zethus Amphipoli-
tain,

A tain, par le moien de Callias Syracusain, & par le moien de Charicles Charistien, celles de Alcidas, il se meit apres à les imiter : puis estât homme fait, & forty de tutelle, voiant que ses tuteurs ne luy rendoient pas de son bien suffisamment, il les meit en iustice pour leur faire rendre compte de sa tutelle l'annee que Timocrates fut preuost. Ils estoient trois, Aphobus, Theripides, Demophoon ou Demea, lequel il chargea plus que les autres estant son oncle frere de sa mere. Il demandoit à chascun par sa demâde dix talens, qui sont six mille escus, & obtaint contre eux, mais il ne leur en feit iamais rien payer de la cōdamnation, ny d'argent aux vns, ny de grace aux autres. Et estant ia Aristophon si aagé qu'il ne pouuoit plus prendre la peine de dresser les dâses, ausquelles il auoit esté esleu commissaire, Demosthenes en son lieu fut maistre de la danse. Et pour ce qu'en plein Theatre Midias le frappa d'un soufflet, ainsi comme il vacquoit au deuoir de son office, de dresser & defrayer les dances, il l'en appella en iustice, mais depuis il se deporta de son actiō pour le pris & somme de trois mille drachmes, que Midias luy en paya. Lon dit qu'estant encore ieune il se retira en vn caueau, là où il se meit à estudier, s'estant fait raire la moitié de la teste, à fin qu'il ne peust sortir en public, & que là il couchoit sur vne petite couche biē estroite, à fin qu'il s'en leuast plus habillement, & qu'il s'exercitast à bien parler: mais pour ce qu'il auoit accoustumé de remuer l'espaule de mauuaise grace en parlant, il y remedia en attachant, au dessus vne

petite broche, ou, comme les autres disent, vne dague, au planché, à fin que de peur de se picquer il oubliast ceste mauuaise contenance. Et à mesure qu'il proffitoit & alloit en auant en l'art de bien dire, il feit faire vn mirouer de grandeur egale à luy, à fin qu'il declamast deuât ce mirouer, & qu'il obseruast les mauuais gestes qu'il auroit en parlant, pour les rhabiller. Aussi alloit il quelquefois sur le port Phalerique faire ses exercices de declamations, alendroit où battoient les flots de la mer, à fin qu'il s'accoustumast à ne se troubler point du bruit & de la clameur du peuple. Et pour ce qu'il auoit l'haleine courte qui luy defailloit, il donna dix mille drachmes à Neoptolemus vn ioueur de Comedies, pour luy apprédre à pouuoir prononcer tout d'une halenee de longues clauses. Quand il commancea à s'entremettre des affaires, il trouua que les Gouverneurs estoient diuisez en deux factions, les vns tenans le party du Roy Philippus, les autres parlans pour la liberté. Il choisit la ligue de ceux qui contrarioient & resistoient à Philippus, & toute sa vie continua de conseiller au peuple de secourir ceux qui estoient en danger de tomber sous la main de Philippus, communiquant ses conseils au maniement des affaires, & s'entendant avec Hyperides, Nausicles, Polyeuctus, Diotimus: & pourtant rendit il confederez à ceux d'Athenes les Thebains, les Euboïens, les Corcyreïens, les Corinthiens, les Bœotiens, & plusieurs autres encore. Mais il se trouua vn iour rabroué du peuple en assemblee de ville, à l'occasion duquel re-

but

Abut il se retiroit tout fâché & desespéré en son logis, quand Eunomus le Thriasien, qui estoit desia vieil, le rencontra par le chemin, qui le remeit, & le reconforta, & encore plus Andronicus ioueur de Comédies, lesquels ensemblément luy remonstrerent, que ses oraisons estoient les plus belles du monde, & qu'il ne luy defailloit rien qui soit sinon l'action, & luy recita quelques passages qu'il auoit dits en sa harangue, & que Demosthenes luy adioustant foy se donna du tout à luy: de maniere que depuis quand on luy demanda, quelle chose estoit la premiere en l'art d'eloquence, il respondit, l'action: qui estoit la seconde, l'action: & quelle la troisiéme, l'action. Il fut aussi vne autre fois sifflé en assemblée de ville, pourautant qu'il y dit quelque chose qui sentoit son ieune homme, dont il fut depuis brocardé par les Poëtes Comicques, Antiphanes & Timocles, Par la terre, par les fontaines, par les fleuves & riuieres: & aiant fait ce serment la deuant le peuple, il s'en fuscita vne émotion. Il iura aussi vne autre fois par Æsculapius, & par erreur de langue, il feit l'accēt sur la penultime syllabe. Il sembloit qu'il voulust soustenir que c'estoit bien dit & bien prononcé, par ce que le Dieu estoit Pius, c'est à dire, doux & bening, il en fut pour cela souuentefois troublé: mais frequentant l'eschole d'Ebulides le Dialecticien, il corrigea tout. Se trouuant vn iour en l'assemblée des ieux Olympiques, & y aiant ouy Lamachus Terineien, qui recitoit des harangues faittes à la louange de Philippus & d'Alexandre, &

Ἀσκληπιὸς
ἡπιος.

qui couroit sus aux Thebains & aux Olynthiens, D
 s'approchant de luy il commença à alleguer au cō-
 traire plusieurs passages des poëtes anciens, qui
 estoient à la louange des Thebains & des Olyn-
 thiens, pour les choses par eux vertueusemēt fait-
 res, de maniere que Lamachus se deporta de plus
 harenguer, & s'enfuit de l'assemblée. Et Philippus
 mesme quand on luy rapportoit les concions &
 " harengues qu'il auoit faictes contre luy, disoit, Je
 " croy que moy mesme si ie l'eusse ouy haréguer de
 " telle sorte, ie l'eusse esleu Capitaine pour me faire
 " la guerre. Suiuāt lequel propos il appelloit ses ha- E
 rengues soudards, pour la force guerriere qui ap-
 paroissoit en icelles: Et celles d'Isocrates escrimeurs
 pour le plaisir de la fanfare que lon y prenoit. Estāt
 en l'aage de trente sept ans, à compter depuis Do-
 xitheus iusques à Callimachus, en la preuosté du-
 quel les Olynthiens par leurs ambassadeurs en-
 uoyerent demander secours à ceux d'Athenes, par
 ce qu'ils estoient fort pressez de guerre par Philip-
 pus, il suada au peuple de leur en enuoyer: & l'an-
 nee ensuiuant, qui fut l'annee que Platon mourut,
 Philippus destruisit les Olynthiēs. Xenophon aus- F
 si le Socratique l'a cogneū, comme il commençoit
 encore à venir, ou bien qu'il estoit desia en sa fleur:
 car Xenophon escriuoit ses Chroniques des faicts
 & gestes des Grecs, mesmement de ce qui fut fait
 enuiron & peu apres la bataille de Mantinee, l'an-
 nee que Chariclides estoit Preuost: & Demosthe-
 nes au parauant auoit desia obtenu alencontre de
 ses tuteurs. Apres la condamnation d'Æschines,
 com.

A comme il s'en alloit d'Athenes en exil, Demosthenes en estant aduerti courut apres à cheual. Æschines l'aiāt apperceu pensa estre pris prisonnier, si se meit à genoux deuant luy, & se couurit le visage, mais Demosthenes le feit leuer & luy donna vn talent d'argent. Il conseilla aux Atheniens d'entretenir quelque nombre de soldats estrangers en l'Isle de Thasos, & pour cest effect y alla capitaine d'une galere. Aussi fut il esleu vne autrefois prouiseur pour acheter des bleds, & accusé d'y auoir mal versé, se trouua innocent & fut absous. Philippus aiant
B pris & occupé la ville d'Ælatia, luy sortit de la ville avec ceux qui combattirent à Chéronée, là où il semble qu'il abandonna son reng pour fuir, & en s'enfuyant il y eut vne ronce qui accrocha son manteau, & luy en se retournant dit, Pren moy à ran-
con. Il auoit sur son bouclier pour sa deuise, Bonne fortune: il feit l'oraison funebre aux funerailles de ceux qui moururent en ceste bataille. Apres cela appliquant sa sollicitude à faire reparer & raccoustrer la ville, estant esleu commissaire pour reparer les murailles, il y despendit du sien, outre
C les deniers du public, cent mines d'argent, qui sont mille escus, & en donna encore dix mille pour employer aux spectacles, & à faire iouer les ieux: puis montant sur vne galere il alla deçà delà recueillāt argent des alliez & confederez, à l'occasion dequoy il fut couronné par plusieurs fois. La premiere fois à la proposition de Demomeles fils d'Aristonicus, fils de Hyperides, qui mit en auant qu'on luy donnast par honneur vne couronne

d'or : Et la dernière fois à l'instance de Ctesiphon, **D** duquel le decret fut accusé, comme estant contraire aux loix par Diodetus & par Æschines : contre lesquels il le defendit si bien qu'il obtint sentence en sa faueur, de maniere que l'accusateur n'eut pas la cinquième partie des voix & suffrages du peuple pour luy. Depuis estât Alexandre passé en Asie Harpalus s'enfuit à Athenes avec grosse somme de deniers : & du cōmancement il empescha que lon ne luy dōnast seureté, & que lon ne le receust en la ville : mais depuis qu'il y fut arriué, & qu'il luy eut donné mille pieces d'or, adoncques il changea de **E** langage, car voulans les Atheniens le rendre & mettre entre les mains d'Antipater, il y contredit, & escriuit que son argent fust mis en depost dedās le chasteau, & que lon luy fist declarer la somme qu'il y auoit. Harpalus specifica qu'il y auoit enuiron sept cens cinquante talens, & vn peu plus, ainsi que dit Philochorus. Apres cela s'en estant Harpalus fuy de la prison, là où on le gardoit iusques à ce que lon eust nouuelles d'Alexandre, & s'estant retiré, comme disent aucuns, en Candie : ou, comme les autres, à Tenarus en la Laconie : Demosthenes **F** fut accusé de concussion, & d'auoir pris argent de luy pour luy faire voye, d'autant qu'il n'auoit déclaré ny la somme & quantité de deniers qui fut trouuée, ny la negligence de ceux qui l'auoient en garde. Si fut appelé en iustice par Hyperides, Pytheus, Menesechmus, Himeræus & Patrocles, qui le firent condamner par la court de l'Areopage : & estant condamné, il s'en alla en exil, par ce qu'il

A ne peult payer le quintuple de sa condamnation, par ce qu'il estoit accusé d'auoir pris trente talents. Les autres disent qu'il ne voulut pas attédre l'yssue du iugement, & s'en alla deuant en exil. Depuis ce temps la les Atheniens enuoyerent Polyuctus en ambassade deuers la communauté des Arcadiens, pour les diuertir & distraire de la ligue & confederation des Macedoniés. Ce que n'ayant sceu faire, Demosthenes y suruint, qui parla tellement qu'il obtint & leur persuada: dont il acquist telle grace & telle reputation, que lon rappella son ban par decret public, & luy fut enuoyee vne galere pour le ramener à Athenes, & ordonnerét les Atheniens que pour l'amende des trente talents, en quoy il estoit condamné il fist bastir vn autel à Iupiter sauueur, au port de Piræe, & ce faisant qu'il fust tenu pour quitte de la cōdamnation. Ce decret fut proposé par Demon Paranien qui estoit son cousin. Au moyen dequoy il retourna à se mesler des affaires comme deuant. Et estant Antipater renfermé & assiegé par les Grecs dedans la ville de Lamia, les Atheniens en firent sacrifices pour la bonne nouuelle. Mais luy deuisant avec vn sien familier Agestistratus, dit, qu'il n'auoit pas vne mesme opinion que les autres touchant les affaires: Car ie sçay tresbien, dit il, que les Grecs d'vn plein fault, pour vne premiere carriere, sçauent & peuuent bien faire la guerre, mais à la continue, non. Depuis Antipater aiant pris Pharsalus, & menassant les Atheniens d'aller mettre le siege deuant leur ville, s'ils ne luy rendoient les orateurs qui harenguoient au peuple

contre luy : Demosthenes le craignant abandon-
na la ville d'Athenes, & s'enfuit premierement en
l'Isle d'Ægine, pour se ietter en franchise du tem-
ple d'Acræum: mais depuis aiant peur de n'en estre
enleué par force, il passa en l'Isle de Calabria, là où
entendant que les Atheniens auoient resolu d'a-
bandonner les Orateurs, & luy principalement
entre les autres, il s'en alla seoir, comme suppliant,
au temple de Neptune: là où Archias, celuy qui fut
surnommé Phygadotheras, cōme qui diroit, chas-
seur de bannis, qui fut disciple & sectateur de Ana-
ximenes, le vint trouuer, luy suadant qu'il se leuast
de là, & qu'il seroit des amis d'Antipater. Il luy re-
» spondit, Quand tu iouois les Tragédies, tu ne me
» persuadois pas, que cela fust vray que tu iouois,
» aussi peu me persuaderas tu maintenant de croire
» à ton conseil : & comme il le voulust enleuer & ti-
» rer de là par force, ceulx de la ville l'empescherent:
» & adonc Demosthenes leur dit : Ce n'a point esté
» en intention de sauuer ma vie que ie m'en suis re-
» tiré & fuy en ceste ville de Calabria, mais pour
» conuaincre les Macedoniens d'estre tyrans vio-
» lents, mesme alencontre des Dieux: & demandant
à escrire il escriuit, comme dit Demetrius le Ma-
gnesien, les vers que les Atheniens firent depuis
escrire sur sa statue.

Demosthenes, si autant de puissance

Tu eusses eu comme d'entendement,

La Macedoine à toute sa vaillance

N'eust sur la Grece onc eu commandement.

Ceste statue est posée aupres du pourpris de l'autel
des

A des douze Dieux, aiant esté faicte par Polyuctus. Les autres disent que lon trouua en escript le commencement d'une missive, Demosthenes à Antipater, Salut. Philochorus escrit, qu'il mourut de poison qu'il beut: mais Satyrus dit que la canne estoit empoisonnée, & que l'aiant mis en sa bouche, si tost qu'il en eut goûté, il mourut. Eratosthenes dit que de long temps redoutant la fureur des Macedoniens, il auoit fait prouision de poison, qu'il portoit dedans vn petit cerceau alétour de son bras. Les autres disent qu'il se feit mourir en retenant son haleine tant & si longuement qu'il s'estouffa: les autres escriuent, qu'il auoit le poison dedans vn anneau. * * vingt & deux. Mais quand Philippus de Macedoine mourut, il sortit en public avec vne belle robe neuue, encore qu'il n'y eust gueres que sa fille estoit morte, se resiouissant de la mort de ce Roy Macedonien. Il aida aussi aux Thebains, faisant la guerre à Alexandre, & encouragea tous les autres Grecs, tant qu'il peult: parquoy Alexandre, apres auoir destruit la ville de Thebes le demanda aux Atheniens, les menassant s'ils ne le luy rendoient. Et quand il eut entrepris la guerre contre les Perses, il demanda aux Atheniens leurs vaisseaux, & Demosthenes luy cōtredit, alleguant pour sa raison qu'il ne scauoit s'il en voudroit point user contre ceux mesmes qui luy auroient presté. Il laissa deux enfans qu'il eut de la fille d'un Heliodorus des premiers citoiens de la ville. Il eut vne fille laquelle mourut auant que d'estre mariee, & vne autre de laquelle, & de Lachis Leuconien, naquit son petit

fils Demochares, qui fut hōme vaillant à la guerre, D
 & aussi eloquent que nul autre de son temps. On
 en voit encore vne statue dedans le palais & hostel
 de ville, ainsi comme lon entre à main droite. Ce
 fut le premier qui harēgua avec son espee au costé,
 ceinte par dessus sa robbe, lors qu'Antipater de-
 manda les Orateurs. Mais depuis les Atheniens
 ordonnerent bouche à court au palais à ses descen-
 dans, & luy dedierent vne statue sur la place, l'an-
 nee que Gorgias fut preuost, à la poursuite de son
 arriere-fils. Demochares qui requit ces honneurs,
 & depuis Lachis son fils en requit aussi pour luy E
 mesme, l'annee que Pytharatus fut preuost dix ans
 apres, vne statue dedans la place, & bouche à court
 au palais, tant pour luy que pour l'aisné tousiours
 de ses descendans, & priuilege de presider en tous
 les ieux & spectacles. Les deux decrets en sont en-
 core és registres, mais la statue de Demochares,
 dont nous auons parlé, fut transportee dedās l'ho-
 stel de ville. On trouue de ses oraisons qui sont
 vraiment à luy, iusques au nombre de soixante
 cinq : il y en a qui disent qu'il vescu dissoluēment
 iusques à vser de robes de femmes, & à faire ban- F
 quers, masques & mommeries ordinaiemēt, dont
 il fut surnommé par vn brocard de ville, Battalus.
 Les autres disent que ce fut du nom de sa nourrice
 que lon luy bailla ce soubriquet par iniure. Dio-
 genes le Cynicque l'apperçeut vn iour dedans vne
 tauerne, dont Demosthenes eut hôte, & se voulut
 » retirer au dedans, & Diogenes luy dit, Tant plus tu
 » recules arriere, tant plus auāt tu entres en la tauer-
ne

A ne. Et en se moquant de luy il disoit, qu'il estoit Scythe en paroles, c'est à dire, braue comme vn Tartare, mais qu'au combat il estoit bourgeois d'Athenes. Il reçeut de l'argent d'Ephialtes l'un des harengueurs, lequel estant allé en ambassade deuers le Roy de Perse en apporta grosse somme de deniers, pour distriuer secrettement aux Orateurs, à celle fin qu'ils allumassent la guerre contre Philippus, & dit on que luy particulierement en eut pour vn coup trois mille drachmes. Il fit prendre vn Anaxilas de la ville d'Oree, qui auoit esté
B autrefois son amy & son hoste, & le fit constituer prisonnier, comme estant espion, & luy fit donner la question, sur laquelle il ne cōfessa rien, & neantmoins requit qu'il fust liuré entre les mains des vnze executeurs de la iustice. Vn iour qu'il vouloit haréguer en pleine assemblée de ville, le peuple ne le vouloit point ouir, n'eust esté qu'il dit, que ce n'estoit qu'un conte qu'il leur vouloit faire: ce qu'entendant le peuple luy donna audience, & il commença en ceste sorte. Il y eut, dit il, nagueres vn ieune homme qui loüa vn asne, pour aller de
C ceste ville à Megares. Quand ce vint sur le midy que le Soleil estoit fort ardēt, l'un & l'autre, le propriétaire & le locataire vouloient se mettre à l'ombre de l'asne, & s'entr'empeschoient l'un l'autre, disant le propriétaire qu'il auoit loué son asne, mais non pas son vmbre: le locataire à l'opposite soustenoit, que tout l'asne estoit en sa puissance. Aiant ainsi commencé ce conte, il s'en alla. Le peuple le
D rappella, & le pria d'acheuer. Et comment, leur dit

„ il, vous me voulez bien ouir conter vne fable de D
 „ l'ombre d'un asne, & vous ne me voulez pas en-
 „ tendre parler de voz affaires d'importance? Le
 ioueur de Comédies Polus se vançoit vn iour à
 luy, que pour deux iours qu'il auoit ioué, il auoit
 „ gagné vn talent, qui font six cents escus: Et i'en
 „ ay, dit il, gagné cinq pour me taire seulement vn
 „ iour. Sa voix s'estant vne fois esclatée, ainsi com-
 me il harenguoit deuant le peuple, & à cause de
 cela son audience luy en estant troublée, il leur dit
 „ tout hault, Il fault estimer les ioueurs de Comē-
 „ dies & de Tragedies, à cause de leurs belles & for- E
 „ tes voix, mais les Orateurs pour leur bon sens. Epic-
 cles se mocquoit de luy de ce qu'il estudioit & pre-
 „ meditoit tousiours ce qu'il auoit à dire: l'aurois
 „ honte, dit il, si aiant à parler deuant vn si grand
 „ peuple, i'y venois à l'improueu. On dit qu'il
 n'estaingnit iamais sa lampe, c'est à dire, qu'il ne
 cessa d'estudier tousiours à limer ses oraisons, iuf-
 ques à l'aage de cinquante ans. Il dit luy mesme
 qu'il ne buuoit que de l'eau. Lysias l'Orateur l'a
 cogneu, & Isocrates l'a veu maniant affaires iuf-
 ques à la bataille de Cheronce, & quelques vns F
 des philosophes Socraticques. Il prononça la plus
 part de ses oraisons à l'improueu, aiant l'esprit
 prompt & propre à ce faire. Le premier qui re-
 quit qu'il fust couronné d'une couronne, ce fut
 Aristonicus fils de Nicophanes Anagyrasien, & le
 seconda par serment Diondas.

Cecy sem-
 ble n'estre
 pas de Pla-
 que, & de
 gne à
 que des-
 s.

A **H**YPERIDES fils de Glaucippus, fils de Dionysius du bourg Colyttien, eut vn fils du mesme nom que son pere Glaucippus, qui fut Orateur & composa quelques oraisons, duquel nasquit vn autre orateur Alphinus. Il fut vn temps auditeur du philosophe Platon, & de Lycurgus, & d'Isocrates. Il se mesla des affaires, du temps qu'Alexandre le grand entendoit aux affaires de la Grece, & luy contredit touchant les Capitaines qu'il demandoit à ceux d'Athenes, & touchant les galeres. Il conseilla au peuple de ne casser point les gens de guerre que lon entretenoit à Ténare, dont estoit capitaine Chares, duquel il estoit particulieremēt amy. Il plaida & aduocassa du commencement pour de l'argent, & fut soupçonné d'auoir reçu part des deniers que Ephialtes auoit apportez de Perse. Il fut eleu Capitaine d'une galere, lors que Philippus alla mettre le siege deuant Byzance, & fut enuoyé pour secourir les Byzantins. Ceste mesme annee il prit la charge de defrayer des danſes, là où tous les autres Capitaines, auoient esté exemptez de toute charge publicque pour ceste annee la. Il requit aussi des honneurs pour Demosthenes, & son decret aiant esté recusé, comme fait cōtre les loix, par Diondas, il en fut absous. Il estoit amy de Demosthenes, & de Lyſicles & de Lycurgus, & ne perseuera pas en ceste amitié iusques à la fin : car depuis que Lyſicles & Lycurgus furent morts, & que Demosthenes fut appellé en iustice, comme aiant pris argent de Harpalus, luy seul de tous fut nommé, & mis en auant pour faire l'accusation, d'autant

que tous les autres se trouuoient coupables du mesme faict, & l'accusa. Mais luy mesme fut accusé par Aristogiton, d'auoir proposé vn decret contraire aux loix, apres la bataille de Cheronee, que tous les estrangers qui estoient habitants & domiciliez à Athenes fussent faicts bourgeois de la ville, & tous les esclauues libres, & que lon depostast les choses saintes, les enfans & les femmes, dedans le port de Pirée, toute fois il en fut absous: & comme quelques vns l'arguassent & s'esmerueillassent comment il auoit ainsi lourdement failly à voir tant de loix qui estoient au contraire de son decret, il respondit, Si les armes des Macedoniens & la bataille de Cheronee ne m'eussent esbloui la veüe, ie ne l'eusse iamais proposé ny escrit. Mais il est certain que depuis ce iugement la Philippus en estant estonné, leur donna permission d'enleuer leurs morts, ce qu'il auoit auparauant refuzé aux heraults qui estoient venus de Lebadie. Depuis, apres la defaite de Cranon, aiant esté demandé par Antipater, & le peuple estant resolu de le liurer, il s'enfuit de la ville en l'Isle d'Ægine avec les autres condamnez, là où rencontrant Demosthenes, il s'excusa enuers luy de ce qu'il l'auoit par contraincte accusé. Et comme il se vouloit departir de là, il fut surpris par vn Archias que lon surnommoit Phygadotheras, lequel estoit natif de la ville de Thurias, & sa premiere profession auoit esté de iouer des Tragedies, & lors il s'estoit mis au seruice d'Antipater. Si fut pris à force dedans le temple de Neptune, là où il tenoit l'image du Dieu embrassée, & de là

A de là mené à Corinthe vers Antipater, où estants mis à la gehenne, il se tronçonna luy mesme la langue à belles dents, à fin qu'il ne peust rien descouvrir des secrets de la ville, & ainsi finit ses iours le neuvieme iour du mois d'Octobre. Toutefois Hermippus dit, qu'estant allé en Macedoine il y eut la langue coupee, & son corps ietté aux bestes sans sepulture, mais qu'un Alphinus son parent, ou comme les autres disent, fils d'un Glaucippus, obtint par le moien d'un medecin licence d'enleuer le corps & le brusler, dont il emporta depuis les cendres à ses parents & amis, contre les arrests des Macedoniens & des Atheniens, pource qu'ils estoient non seulement bannis, mais aussi interdits, de maniere qu'il estoit defendu de les inhumer dedans leur pais. Les autres disent qu'il fut mené en la ville de Cleones, là où il eut la langue coupee, & fut tué ainsi comme nous auons dit, & que ses parents en recueillans les ossements, les inhumerent deuant la porte aux cheuaux, ainsi que met Heliodorus en son tiers liure des monuments. Mais maintenant son sepulchre est tout demoly, & n'y en a plus apparence quelconque. On dit qu'il estoit singulier entre tous les orateurs à prescher le peuple, voire qu'il y en a qui le mettent mesme deuant Demosthenes. On trouue de ses oraisons soixante & dix-sept, dont il y en a de vraies cinquante & deux. Il estoit subiect au plaisir des femmes, de maniere que pour ceste occasion il chassa son fils de sa maison, & y introduisit Myrrhine, la plus sumptueuse courtisane qui fust pour lors, & si

ne laissoit pas d'auoir au port de Pirée Aristagora, D
& en Eleusine sur ses terres Philté Thebaine, l'aiât
rachetee de vingt mines d'argent, qui sont quatre
cents escus. Il se promenoit tous les iours par le
marché de la poissonnerie. Et estant la courtisane
Phryne qu'il aimoit appelée en iustice, & accusée
de lèse maiesté diuine, pour auoir forfait contre
les Dieux, il fut aussi enquis alencontre de luy par
mesme moien, comme il semble, car luy mesme le
monstre au commencement de sa harengue. Et
ainsi comme elle estoit toute preste à condamner,
il la fit venir en auant au milieu de la place deuant E
les iuges, & luy deschirant sa robbe, leur monstra
son estomach à descouuert, de maniere que les Iu-
ges pour sa grande beauté l'absolurent. Il auoit à
part secrettement composé & dressé des memo-
res pour accuser Demosthenes, qui le descourrit
en ceste sorte. L'estant vn iour allé visiter en sa
maison vn peu mal disposé, il y trouua ces memo-
res dressez encontre luy, dequoy s'estant amere-
ment courroucé, Hyperides luy respondit, Tant
que tu me seras amy, cela ne te faschera point: mais
au cas que tu me deuiennes ennemy, cela te gar- F
dera d'entreprendre quelque chose contre moy.
Il requit que lon decernast des honneurs à Iolas,
celuy qui donna le poison à Alexandre, & fut de la
ligue de Demosthenes à la suscitation de la guerre
Lamiaque, & fit l'oraison funebre qui fut admi-
rable aux funerailles de ceulx qui y moururent.
Comme Philippus s'apprestast pour passer en l'Isle
d'Eubœe, les Atheniens se trouuerent en grand es-
moy

A moy & grande perplexité. Luy assembla en peu de temps iusques à quarante galeres de contribution volontaire, & luy mesme le premier pour soy & pour son fils contribua pour en defrayer deux. Et comme differént & proces se fust meu entre les Atheniens & les Deliens, pour sçauoir ausquels deuoit appartenir la superintendence du temple de Delos, & qu'Æschines eust esté eleu pour plaider la cause, le Senat d'Areopage mit en auant Hyperides pour la plaider, & trouue lon encore au iourd'huy l'oraison qui est intitulee la Harengue

B Deliaque. Il fut aussi en ambassade deuers les Rhodiens, & y en arriua aussi d'autres de la part d'Antipater qui le louoient hautement, comme bon, „ doulx & gracieux prince. Il leur respondit, le sçay „ bien qu'il est voirement doulx & gracieux, mais „ nous ne voulons point de maistre quelque bon & „ gracieux qu'il puisse estre. Lon dit, qu'il haren- guoit sans action quelconque, & ne faisoit que simplement & nuement reciter les affaires, sans autrement fascher les Iuges. Il fut aussi enuoyé de- uers les Eliens, pour defendre Callippus l'un des

C combattants és ieux sacrez, qui estoit imputé d'auoir par corruption emporté le pris, & gaigna sa cause. Il accusa aussi le don qui par honneur auoit esté ordonné à Phocion à l'instance & proposition de Midias Anagyrasien l'annee que Xenius fut preuost, le vingt & septieme iour du mois de May.

DINARCHVS. X.

DINARCHVS fils de Socrates, ou de Softra-
 tus, natif du pais mesme d'Attique, ou com-
 me les autres veulent de Corinthe, vint à Athenes
 estant encore ieune, enuiron le temps qu'Alexan-
 dre de Macedoine passa en Asie. Il fut auditeur de
 Theophrastus, celuy qui succeda à Aristote en l'es-
 chole peripatetique, & hāta aussi avec Demetrius
 Phalerien, pour autant qu'il commancea à s'entre-
 mettre des affaires du gouuernement apres la mort
 d'Antipater, estant les Orateurs les vns morts, les
 autres bannis & chassez de la ville: & aussi qu'il fut
 amy de Cassander. Il se fit riche merueilleusemēt, **E**
 prenant argent de ceulx à qui il composoit des
 oraisons, qui l'en requeroient: il se banda contre
 les plus renommez orateurs de ce temps la, non
 qu'il vint luy mesme deuant le peuple prononcer
 les harengues, car il ne l'eust sceu faire, mais il les
 bailloit à ceux qui leur faisoient teste: mesme quād
 Harpalus s'enfuit, il composa plusieurs oraisons
 alencontre de ceulx qui estoient soupçonnez d'a-
 uoir pris argēt de luy, & les bailla aux accusateurs.
 Long temps depuis estant accusé d'auoir esté com-
 municquer & parler avec Antipater & avec Cas-
 sander, enuiron le temps que le port de Munychia
 fut surpris par Antigonus & par Demetrius qui y
 mirent garnison, l'annee qu'Anaxicrates fut pre-
 uost, il vendit & fit argent de la plus part de ses
 biens, & s'enfuit en la ville de Chalcide, là où il fut
 en maniere d'exil bien l'espace de quinze ans, du-
 rants lesquels il acquist & assembla beaucoup de
 bien, & puis retourna à Athenes par le moien de
 Theo-

- A** Theophrastus, qui procura le rappel de ban de luy & des autres bannis. Et s'en alla loger chez vn Proxenus qui estoit de sa cognoissance, là où estant ia fort vieil, & aiant mal aux yeulx, il perdit son or & son argent, dequoy Proxenus voulant faire informer, Dinarchus le fit luy mesme adiourner, & fut la premiere fois que luy mesme en personne parla & plaida sa cause en iugement. Lon en trouue encore le plaidoyer, & sont aussi és mains des hommes soixante & quatre oraisons vraiment siennes, excepté que lon en attribue quelques vnes à
- B** Aristogiton. Il fut imitateur de Hyperides, ou comme les autres veulent, de Demosthenes, à cause de sa vehemence à emouuoir les affections, & la force de ses figures.

DECRETS PROPOSEZ AV PEUPLE A ATHENES.

- DEMOCHARES fils de Laches du bourg de Leucouthee, demande pour Demosthenes fils de Demosthenes Pæanien, vne statue de brôze, bouche à court en l'hostel de ville, & le premier lieu aux seances d'honneur, pour luy & pour l'aîné de ses descendents à perpetuité, pource qu'il a esté tousiours bienfaiteur du public, & qu'il a conseillé au peuple d'Athenes plusieurs belles & honorables choses: qu'il a tousiours exposé son bien pour le seruice de la chose publique: qu'il a liberalement cōtribué huit talents & vne galere, lors que le peuple affrâchit & deliura l'Isle d'Eubœe: & vne

autre quand le capitaine Cephisodorus alla au d
 voiage de l'Hellespont : & vne autre quand Cha-
 res & Phocion Capitaines furent enuoyez à By-
 zance par le peuple : pource qu'il a racheté de son
 argent plusieurs des citoiens qui auoient esté pris
 prisonniers par Philippus, és villes de Pydne, de
 Methone & d'Olynthe : qu'il a defrayé à ses pro-
 pres cousts & despens les danfes & les ieux public-
 ques, quād la lignee des Pandionides faillit à four-
 nir de defrayeurs : qu'il aourny d'armes plusieurs
 pauvres citoiēs qui n'auoient pas de quoy en auoir :
 & qu'ayant esté par le peuple esleu commissaire E
 pour faire racoustrer les murailles de la ville, il y a
 employé trois talents de son argent, outre les dix
 mille drachmes qu'il emploia aussi du sien à faire
 faire deux trenchees alentour du port de Piree : &
 qu'apres la bataille de Cheronee il donna de son
 propre vn talent, & vn autre pour acheter du bled
 en la famine. Et que par ses persuasiōs & ses bien-
 faicts aiant induit les Thebains, les Euboïens, les
 Chorinthiens, les Megariens, les Acheïens, les Lo-
 criens, les Byzantins, les Messeniens à entrer en li-
 gue offensive & defensiue avec le peuple d'Athe-
 nes : il a assemblé vne armee de dix mille hommes
 de pied armez, & de mille cheuaulx, outre la con-
 tribution de deniers : qu'estant ambassadeur il a
 persuadé aux alliez & confederez de contribuer
 iusques à la somme de plus de cinq cents talents,
 outre qu'il a empesché les Peloponesiens de se-
 courir Alexandre alencontre des Thebains, don-
 nant de son argent, & allant luy mesme en ambas-
 sade

A fide: & pour plusieurs autres bons & grands ser-
uices qu'il a faicts, & plusieurs conseils qu'il a don-
nez au peuple, autant ou plus que nul autre qui se
soit entremis des affaires de son tēps, pour la con-
seruation de la liberté & de l'autorité du peuple.
Ioinct qu'il en a esté bāny de son pais par les sedi-
tieux vsurpateurs, qui supprimerēt pour vn temps
l'autorité du peuple: & finablement qu'il est mort
en la ville de Calauria, pour l'amour & bienueuil-
lance qu'il a tousiours portee au peuple, aiant en-
uoyé Antipater des soudards pour le prédre: non-
obstāt lequel peril il est tousiours demouré ferme
en sa bonne affection & bonne volonté enuers le
peuple, iusques à ne faire ny ne dire chose qui fust
indigne de la grandeur du peuple, encore qu'il fust
tombé en la main de ses ennemis, & prochain de
sa mort.

C E S T E P R E S E N T E A N N E E
que Pytharatus estoit Preuost,

L A C H E S fils de Demochares de Leuconee,
demāde en don au Senat & au peuple d'Athenes,
c pour Demochares fils de Laches Leuconien, vne
statue de bronze pour mettre sur la place, & bou-
che à court en l'hostel de ville, pour celuy qui sera
tousiours l'aîné de ses descendans, & preſeance en
tous spectacles & jeux publics: pour ce qu'il a
tousiours esté bienfaiteur & bon conseiller au
peuple, aiant bien merité du public, tant és choses
qu'il a escrites, mises en auant, negociées és am-
bassades, cōme en son administration publique, à

faire rebastir les murailles de la ville, faire prou- **D**
 sion d'armes, de traicts & d'engins de batterie &
 d'artillerie, & pour auoir bien fortifié la ville du-
 rant la guerre qui a duré quatre ans avec les Bœo-
 tiens, pour lesquelles causes il auroit esté dechassé
 hors la ville par les Tyrans qui oppressèrent l'au-
 thorité du peuple: & depuis qu'il fut rappelé par
 le peuple, l'annee que Diocles fut preuost, il fut le
 premier qui restraignit l'administration de ceulx
 qui espargnoient leurs biens, & qui enuoyoit
 ambassades vers Lyfimachus: & qu'il prit pour le
 bien public du peuple trente talents, & depuis au- **E**
 tres cent: qu'il meit en auant d'enuoyer ambassade
 deuers Ptolemeus en Ægypte, en laquelle ceulx
 qui allerent, rapporterent cinquante talents d'ar-
 gent au peuple. Et pour ce qu'il fut en ambassade
 deuers Antipater, duquel il receut vingt taléts d'ar-
 gent qu'il apporta au peuple en la ville d'Eleusine:
 & pour ce qu'il persuada au peuple de les prendre:
 & pour ce qu'il a esté banny à cause qu'il estoit de-
 fenseur & protecteur de la puissance & autorité
 populaire, & qu'il ne fut oncques participant d'au-
 cune faction des vsurpateurs, ne qu'il n'eut iamais **F**
 office ne magistrat depuis que l'estat populaire fut
 abbatu. Et pour ce que luy seul de tous ceux qui se
 sont entremis des affaires de son temps, ne s'est ia-
 mais estudié ny entremis de riē remuer au gouuer-
 nement de son pais, pour le reduire à autre estat
 que le gouuernement populaire. Et pour ce que
 par son cōseil & administratiō il a mis & entretenu
 en seureté les iugemēs, les loix, les biēs & facultez
 de

A de tous les Atheniens, par ses deportemens au maniement des affaires, & qu'il n'a iamais rien fait ny attenté qui ait aucunement preiudicié à l'estat du gouuernemēt populaire, ny en faict ny en parole.

LYCOPHRON fils de Lycurgus de Bute, a presenté requeste que bouche à court luy fust donnee en l'hostel de ville, selon le don & octroy qui en a par cy deuant esté fait à son pere Lycurgus, l'annee qu'Anaxicrates estoit Preuost, & la lignee Antiochade presidoit. Stratocles fils d'Euthydemus Diopithien proposa. Comme ainsi soit
B que Lycurgus fils de Lycophron de Bute, aiant receu de ses ancestres de main en main vne bienveillance & affection hereditaire enuers le peuple, & que ses predecesseurs Diomedes & Lycurgus en leur viuant ont esté estimez & honorez par le peuple, & apres leur trespas le peuple leur a donné l'honneur d'estre publicquement inhumez en la rue de Ceramicque, pour leur vaillance & preudhōmie: & que Lycurgus luy mesme s'entremettant des affaires de la chose publique, a mis en auant plusieurs belles, bonnes & honnestes loix
C pour son païs: & que estant tresorier general du reuenue de la chose publique, par l'espace de quinze ans, durant lesquels il a manié des deniers publiques iusques à la somme de dixhuit mille neuf cens talens: & qu'il a eu plusieurs sommes notables des particuliers en depost entre ses mains, pour la foy que lon auoit de sa loyauté: & qu'il a presté & auancé du sien à plusieurs diuers temps & affaires de la chose publique, iusques à la som-

me de six cens cinquante talents : & que pour-^D
 autant qu'il a esté tousiours en toute son admini-
 stration trouué tresfidele & loyal, & sy est porté
 en fort homme de bien, il a esté plusieurs fois cou-
 ronné par la ville. Et d'auantage pour ce qu'ayant
 esté esleu par le peuple superintendant des finan-
 ces, il a assemblé bonne somme de deniers dedans
 le chasteau : & qu'il a faict faire vn grand ornemēt
 à la deesse Minerue, à sçauoir des images de victoi-
 re toutes d'or, & des vases à porter en procession,
 d'or, & d'argent, & autres ioyaux d'or pour le ser-
 uice de la Deesse Minerue, iusques au nombre de^E
 cent paniers ou corbeilles d'or à porter sur la teste
 des filles en procession. Et qu'ayant esté aussi esleu
 commissaire pour les munitions & prouisions ne-
 cessaires à la guerre, il a assemblé grand nombre
 d'armes dedans la citadelle, & entre autres y a fait
 porter cinquante mille traicts. Qu'il a équipé &
 mis sus quatre cens galeres, les vnes qu'il a fait ba-
 stir tout de neuf, les autres qu'il a fait racourter. Et
 qu'en outre ayant trouué des ouurages imparfaits,
 l'arsenal, l'armurerie, & le Theatre de Bacchus, il
 les a fait paracheuer, & parfaire la carriere Pana-^F
 thenaïque, le parc aux exercices, le Lyceum : &
 qu'il a embelly la ville de plusieurs autres fabri-
 ques, & edifices publiques. Et cōme ainsi soit que
 le Roy Alexandre ayant desia subiugué toute l'A-
 sie, & voulant commander vniuersellement à tou-
 te la Grece, il auroit demandé Lycurgus, comme
 celuy qui estoit du tout contraire à ses desseins, le
 peuple ne luy ait point voulu liurer pour quelque
 crainte

A crainte qu'il eust de luy : & qu'ayant plusieurs fois esté appellé en iustice, pour rendre compte de son gouvernement & administration, il a tousiours esté trouué irreprehensible, non taré d'aucune concussion ny corruption en iugement de ville libre, & gouvernee en estat populaire: A fin qu'un chascun cognoisse que ceux qui sont ainsi bien affectionnez à la conseruation de la liberté, & de l'estat populaire, le peuple en fait grand compte tant qu'ils sont viuans, & apres qu'ils sont decedez leur en veut encore rendre graces immortelles: A la

B bonne heure & bonne rencontre, qu'il soit ordonné par le peuple que lon honore Lycurgus fils de Lycophon de Bute, à cause & pour le merite de sa vertu & iustice, & que le peuple luy face dresser & eriger vne statue de bronze dedans la place, excepté s'il y a quelque endroit où la Loy defende d'y en poser, & que lon decerne bouche à court à celui qui sera tousiours le plus aagé de ses descendants à perpetuité. Que les Decrets par luy proposez soient tous ratifiez, & par le greffier de la ville soient escriits en coulones de pierre dressées

C dans le chasteau ioignant les offrandes qui sont faites à la Deesse, & que pour faire escrire lesdites coulones, le Tresorier de la ville ait à fournir cinquante drachmes d'argent, des deniers qui sont destinez à despendre pour les decrets & ordonnances du peuple.

DE TROIS SORTES DE D
G O V V E R N E M E N T ,

Principauté, Estat populaire, & Seigneurie.

*C'est vn fragment d'une declamation, en presupposant
une autre exhortatoire à s'entremettre du gou-
uernement de la chose publique.*



COMME i'estois en p̄s̄ement d'ap-
porter & mettre au iugement de
ceste compagnie, les propos & de-
uis que ie teins hier deuant vous, il
me fut aduis que i'entendis la ver-
tu politique, ne sçay si c'estoit illu-
sion de songe ou essence de verité qui me dit,

Le fondement des disputes dorees,

Est preparé pour les Muses sacrees.

Nous auons ia posé le fondement du discours su-
dant & enhortant à s'entremettre des affaires de
la chose publique, & maintenant poursuiuons à
suredifier la doctrine qui est deuë apres vne telle
exhortation: car depuis qu'un homme a receu l'ad-
monition & exhortatiō à se mesler des affaires, on
luy doit consequēment bailler les preceptes de gou-
uernement, suiuant & obseruāt lesquels il pourra,
autant cōme il est possible à l'homme, profiter au
public, & ce pendant faire honnestement ses be-
songnes, avec telle seureté & tel honneur qu'il se-
ra conuenable. Premierement doncques il nous
faut discourir vn poinct, qui est preallable à ce que
nous

A nous deuons dire par cy apres , & qui depend de ce que nous auons dit par cy deuât : c'est à ſçauoir, Quelle ſorte de police & de gouuernement eſt la meilleure: car ainſi qu'il y a pluſieurs ſortes de vie des hommes particuliers , auſſi y a il du peuple , & la vie du peuple, c'eſt la police & le gouuernemēt. Il eſt doncques neceſſaire de declarer quelle eſt la meilleure, & l'homme d'eſtat choiſira celle la entre toutes: ou, ſ'il luy eſt impoſſible, il prendra d'entre les autres celle qui plus reſſemblera à la meilleure. Or y a il vne ſignification de ce mot de Police, qui ſignifie autant que bourgeoisie , c'eſt à dire, participation des droict̃s & priuileges d'vne ville: comme quand nous diſons, que les Megariens par ordonnance de leur ville donnerent à Alexandre le grand leur police , c'eſt à dire, leur bourgeoisie , & qu'Alexandre ſe prit à rire de l'offre qu'ils luy faiſoient: mais ils luy reſpondirent qu'ils n'auoient iamais decerné ceſt honneur qu'à Hercules ſeul, & depuis à luy: dequoy ſ'eſmerueillāt il accepta leur offre, la reputant honorable, d'autant qu'elle eſtoit rare. On appelle auſſi la vie d'vn perſonnage politique , qui ſe meſſe du gouuernement de la choſe publicque, la police, comme quand nous louōs la police de Pericles , ou de Bias, c'eſt à dire, la façon de leur gouuernement , & au contraire nous blaſmons celle d'Hyperbolus & de Cleon. Encore y en a il qui appellent vne action grande & memorable en l'adminiſtration de la choſe publicque, Police, comme la diſtribution d'argent , vn amortiſſement de guerre, vne introduction de quelque

Decret notable & digne de memoire. En laquelle **D** signification nous disons en vsage cōmun de parler, celuy la a ce iourd'huy fait police, si d'aduēturer il a fait quelque cas remarquable au gouuernement de la chose publicque. Outre toutes ces significations la il y en a encore vne autre, qui est l'ordre & l'estat par lequel se gouuerne vne ville, par lequel sont maniez & administrez les affaires, selon laquelle signification nous disons qu'il y a trois sortes de polices, c'est à dire, de gouuernemēs des villes, à sçauoir Monarchie, qui est principauté: Oligarchie, qui est Seigneurie: & Democratie, qui est estat populaire: desquelles Herodotus fait mention en son troisiēme liure, & les compare l'une avec l'autre: & semble que ce sont les plus generales qui soient, car toutes autres sortes sont cōme deprauations ou corruptions de celles cy, par peu ou par trop, comme es premieres consonances de la musique, quand on tend ou que lon lasche trop les chordes. Et si a departi ces trois gouuernemens par les nations qui ont eu tresgrād Empire, ou plus grand que nulle autre, comme les Perses ont tenu la Principauté ou Royauté, pour **P** ce que leur Roy auoir plein pouuoir de toutes choses, sans estre subiect d'en rendre compte à personne. Les Spartiates ont tenu le conseil d'un petit nombre des plus gens de bien, qui despeschoient tous affaires. Les Atheniens ont maintenu la domination populaire, franche & libre de toute autre mixtion. Esquelles administrations quand il y a des fautes, les transgressions & debordemens d'icelles

A d'icelles se nomment Tyrannies, oppressions des plus forts, licence effrenée d'une commune : c'est à sçavoir, quand le Prince qui a la Royauté se permet de faire outrage à qui il veut, sans vouloir souffrir qu'on luy en remonstre rien, il devient Tyran : La Seigneurie de peu de Senateurs, quand ils entrent en telle arrogance qu'ils mesprisent tous les autres, ils sont oppresseurs : L'estat populaire quand il apporte desobeissance, & l'égalité, licence desmesurée, & toutes ensemble temerité & folie. Ne plus ne moins doncq comme le bon Musicien

B se servira de toutes sortes d'instrumens à chanter dessus, en s'y accommodant selon que la qualité de l'instrument le pourra comporter, & sera propre à resonner, mais toutefois s'il veut suiure le conseil de Platon, il laissera les Espinettes, les Manicordions, les Psalterions, la Harpe, & preferera à tous autres la Lyre ou la Cithre. Au cas pareil le bon politique maniera dextrement la Seigneurie Laconique & Lycurgienne, accommodant à soy ses compagnons qui auront pareille autorité que luy, & peu à peu les attirant & amenant à soy : &

C se comportera aussi sagement en un estat populaire, comme en un instrument à plusieurs chordes & plusieurs sons, en laschant aller tantost quelque chose, & en se roidissant aussi quand il verra qu'il en sera temps, & s'attachant vivement, sçachant bien quand & comment il faudra resister & cōtre-dire : mais si on luy donnoit le choix, ne plus ne moins que d'instrumens de toutes sortes de gouvernemens, il n'en esliroit jamais d'autre que la prin-

cipauté, s'il veut adiouster foy à Platon, cōme celle
 qui seule à la verité peut supporter celuy plus par-
 fait & plus aigu son de la vertu, sans se laisser, ou
 par force, ou par grace & faueur, accommoder à
 l'vtilité : car toutes autres sortes de gouuernemens
 emmeinent autant, par maniere de dire, le poli-
 tique, comme luy les emmeine, & l'emportent
 autant comme luy les emporte, d'autant qu'il n'a
 pas puissance certaine sur ceux dont il a son au-
 thorité, ains bien souuent est contrainct d'excla-
 mer ces vers du poëte *Æschylus*, que souuent es-
 critoit le Roy *Demetrius* surnommé, Le preneur de
 villes, apres qu'il eut perdu son Royaume,

Tu as voulu premierement me faire,
 Et tu me veux, ce semble, ores deffaire.

SOMMAIRE DE LA COM- PARAI SON D'ARISTOPHANES ET DE MENANDER.



PARLER en general il pre-
 fere de beaucoup Menander
 à Aristophanes, mais pour ve-
 nir aux particularitez, voicy
 qu'il met en auant. Il dit que
 le langage d'Aristophanes est
 fascheux, qu'il sent son far-
 ceur, son triacleur, & son artisan mechanicque : là
 où celuy de Menander n'en tient nullement. Aussi

A vn ignorant & grossier qui n'aura nulles lettres
prendra plaisir à ce que celuy la dit, mais l'homme
docte s'en faschera incontinent. l'entens ces con-
tre-carres, termes opposez, ces finissans de mes-
me, ces allusions de noms : Car de toutes ces affet-
teries la l'un en vse bien peu souuent, & avec gran-
de raison & bon iugemēt, y prenant soigneusemēt
garde : mais l'autre en abuse à toutes heurtes im-
portunément, & avec bien froide & mauuaise
grace. Il est loué, dit-il, de ce qu'il a noyé les treso-
riers qui n'estoient pas tamies mais lamies : &, ce-
luy-cy respire ou malice, ou calomnie : il veit pour
son vêtre & pour ses entrailles, & pour ses boyaux :
&, à force de ris ie viēdray à rire : &, que te feray-ie
malheureuse cruche bannie en rais & en pieces ? &, ie
vous feray, ô femmes, des maux sauuages, com-
me celuy qui ay esté nourry parmy des herbes sau-
uages, mais ces tresses ont deuoyé ma motte : &,
apporte moy icy ma rondelle à la teste de Gorgo-
ne, & me donne vne rondelle de tarte : & plusieurs
autres tels langages. Il y a doncques en la tiffure de
ses paroles du tragicque & du comicque, du haut
& puis du bas, de l'obscur & puis du familier, de
l'enflé & esleué, & puis du babil & de la causerie
basse & fade en son langage : aiant tant de dissimi-
litudes & tant de differēces, il ne sçait pas attribuer
à chasque personne ce qui luy appartient & qui luy
est propre & bien seant : i'entens, cōme à vn Roy
la parole enflée, à vn Orateur le langage rusé, à
vne femme, simple, à vn homme sans lettres bas, à
vn marchād fascheux & importun : ains à chasque

personne les premiers venus à l'aduenture, & ne d
 ſçauois entrecognoistre ne diſcerner ſi c'eſt vn fils
 ou vn pere : vn villageois, ou vn homme de ville:
 ou vn Dieu, ou vne vieille qui parle. Là où le ſti-
 le & la phraſe de Menander eſt tellement polie &
 tellement contemperee en ſoy meſme, qu'eſtant
 proumencee par pluſieurs diuerſes mœurs, & di-
 uerſes paſſions, & ſ'accommodant à toutes per-
 ſonnes, neantmoins elle ſemble touſiours eſtre
 vne meſme, & retient ſa ſemblance à ſoy meſme
 en mots communs & familiers, & qui ſont tous les
 iours en vſage. Et ſi d'aduenture quelquefois ſelon B
 la matiere il eſt beſoin de quelque caquet extraor-
 dinaire, & de quelque bruit de paroles, aiant de-
 bouché, par maniere de dire, tous les trous de la
 fluſte, tout ſoudain il les recouure de bonne grace,
 & remet ſa voix en ſon naturel. Et combien qu'il y
 ait en tous meſtiers d'excellens artiſans, iamais il
 n'y eut ny cordonnier qui feiſt ſoulier, ny mercier
 qui feiſt maſque, ne couſturier qui feiſt robbe, qui
 fuſt propre & conuenable tout enſemble à vn hō-
 me & à vne femme, à vn adoleſcent & à vn vieil-
 lard, ou à vn vallet: mais Menander a vſé d'une fa- F
 çon de dire qui eſt proportionnee & ſortable à
 toute nature, à tout eſtat, & à tout aage: & ce aiant
 commencé à eſcrire eſtant bien ieune, & eſtant
 mort lors qu'il ne faiſoit que commencer à eſtre
 en ſa fleur & de compoſer, & de faire iouer & pu-
 blier ſes œuvres, en l'aage que le ſtile, comme dit
 Ariſtote, prend ſon plus grand accroiſſemēt à ceux
 qui ſont profeſſion de mettre par eſcript. Et ſi lon
 veult

A veut prendre garde aux premieres Comédies de Menander, & que lon les vucille confererauec celles du milieu, & celles de la fin, par là on pourra cognoistre, cōbien il y en eust peu adiouster d'autres s'il eust vescu plus longuement: pour ce qu'entre ceux qui mettent leurs œuures en lumiere, les vns escriuent pour la multitude du peuple & pour le vulgaire, les autres pour les gens d'honneur & d'entendement, & n'est pas facile d'en nommer vn autheur qui ait sceu bien obseruer le bien-seant & conuenable aux deux genres: mais quant à Aristophanes, il n'est ny plaisant à la commune, ny supportable aux gens d'honneur & de iugement, ains est sa poësie comme vne putain passée, qui veut contrefaire la femme de bien mariee: mais ny le peuple ne peut endurer son arrogance, & les gens de bien detestent son intemperance & sa malignité. Mais Menander au contraire, avec bonne grace a satisfait à tous, estant lecture, science, dispute, commune aux Theatres, aux escholes, aux ieux & passetemps, aux festins, mōstrant que la poësie est vne des belles choses que la Grece ait produittes, C faisant veoir que c'est & combien peut la dexterité & gentillesse du langage, allant par tout. avec vne grace attraiāte, dont on ne sçauroit eschapper, rauissant & gaignant toute aureille, & tout entendement qui a intelligence de la langue Grecque. Car pour qui faut il que l'homme docte prenne la peine d'aller au Theatre, sinon pour Menander? Quand est-ce que les Theatres sont pleins de gens de lettres, sinon quand on monstre des masques à

iouer Comédies? & aux banquetts, à qui est-ce n que plus iustement la table cede, & Bacchus donne lieu? & aux philosophes & gens qui trauaillent à l'estude, comme quand les peintres ont trauaillé leurs yeux sur couleurs trop viues & brillantes, ils les tournent sur celles qui sont verdoiantes, comme celles des herbes & des fleurs, pour les recreer & refaire: c'est Menander qui recueille l'entendement, comme en vn beau verger bien flory, où il y a de l'vmbrage & de la frescheur, des vens doux & gracieux. Que la ville d'Athenes porta en ce siecle plusieurs excellens ioueurs de Comédies. E Que les Comédies de Menander, sont pleines de graces & de sel amoureux, comme estant proprement fait de la mer, où Venus fut nee: là où les ieux salez d'Aristophanes sont d'un sel aspre & cuisant, & qui ont vne pointe & acuité qui mord & vlcere: & ne sçay en quoy est la dexterité & gentillesse que lon vante en luy, si c'est aux paroles, ou aux personnages. Certainement ce qu'il imite & contrefait, c'est tousiours en la pire partie, car les ruses & fineses n'y sont point gallantes, mais malignes, & la rusticité n'est point naïfue mais sottie, & ses rencontres pour faire rire ne sont point ioyeuses, mais plus tost dignes de mocquerie, les amours ne sont point gayes, mais dissolües. Bref il semble que cest homme n'a escrit sa poësie pour estre leüe de pas vn homme de bien: car ce qu'il y a de des-honneste & de luxurieux, c'est pour les abandonnez à toute dissolution, & les attaches & brocards, pour les enuieux & malings.

A ESTRANGES EVENEMENS
aduenus pour l'Amour.

EN la ville d'Aliarte situee au pais de la Bœoce fut iadis vne ieune pucelle d'excellēte beauté, nommee Aristoclea, fille de Theophanes : deux ieunes hōmes poursuiuoient de l'auoir en mariage, Straton Orchomenien, & Callisthenes Aliartien.

E Straton estoit le plus riche & le plus amoureux de la fille : car il l'auoit veuë comme elle se lauoit en la fontaine de Hercyne, qui est en Lebadie, d'autant qu'elle deuoit le lendemain porter à la procession de Iupiter Roy, la sacree corbeille. Mais Callisthenes auoit l'aduantage, d'autant qu'il estoit vn peu parent d'elle. Si ne sçauoit Theophanes ce qu'il auoit à faire : car il craignoit Straton, comme celuy qui estoit le plus riche & le plus noble de tout le pais de Bœoce, & en vouloit remettre le choix & option à l'oracle de Trophonius : mais

C Straton qui auoit entendu des domesticques de la fille, qu'elle inclinoit plus enuers luy, poursuiuoit que l'election fust remise au bon plaisir d'elle : mais comme le pere Theophanes luy eust demandé à la veuë de tout le monde, lequel elle aimoit le mieux auoir pour mary, & qu'elle eust preferé Callisthenes : Straton monstra bien sur l'heure qu'il estoit fort marry de ce rebut, mais deux iours apres il s'adressa à Theophanes & à Callisthenes,

disant qu'il vouloit demourer en bonne grace & D
 amitié avec eux, encore que quelque male fortune luy eust par enuie osté l'esperance du mariage de la fille. Eux trouuerent fort bon ce propos, tellement qu'ils le conuierent ensemble au festin des nopces, mais cependant il feit prouision d'un bon nombre de ses amis, & de grosse troupe de vallets qu'il distribua & cacha par les maisons de ses amis, iusques à ce que la fille selon la coustume du pais descendist à la fontaine, qui s'appelle Cissoessa, pour sacrifier aux Nymphes les sacrifices de deuant les espousailles. Lors ceux qui E
 estoient en embusche accourans de toutes pars se faisirent d'elle, mesmement Straton qui la tiroit à luy le plus qu'il pouuoit, Callisthenes au contraire la retiroit aussi de son costé, & ceux qui estoient avec luy, iusques à tant que lon ne se donna garde, que la pucelle trespassa entre les mains de ceux qui la tiroient les vns contre les autres deçà & delà, & ne sceut on que Callisthenes deuint sur le champ, s'il se tua luy mesme, ou s'il s'en alla en exil hors du pais de la Bœoce, tant y a que lon ne sceut iamais depuis qu'il deuint : mais F
 Straton à la veuë d'un chascun se tua luy mesme sur le corps de la pucelle.

2 Vn nommé Phidon pretendant se faire seigneur de tout le Peloponese, & voulant que la ville d'Argos, qui estoit son pais, dominaست toutes les autres, dressa premierement embusche aux Corinthiens: car il leur enuoya demander mille de leurs ieunes hommes des plus gaillards & des plus vail-
 lans

A l'ans de leur ville. Les Corinthiens les luy enuoyèrent sous la conduite de l'un de leurs Capitaines nommé Dexander. Or estoit l'intention de ce Phidon de desfaire ceste troupe, à celle fin que la ville de Corinthe en fust d'autant affoiblie, & qu'il s'en seruist, comme d'un boulevart fort opportunément assis, pour tenir sous ioug tout le Peloponese. Si communiqua ceste sienne deliberation à quelques uns de ses amis, entre lesquels estoit un nommé Abron, lequel estant hôte de Dexander, luy reuela la conspiration: ainsi les mille
B ieunes hommes, avant qu'ils fussent chargez, se retirerent à sauueté dedans Corinthe. Parquoy Phidon s'efforçoit de trouuer celuy qui l'auoit descouvert & trahy. Ce que craignant Abron se retira à Corinthe, menant quand & luy sa femme & toute sa famille en un bourg du territoire de Corinthe, qui s'appelle Melisse, là où il engendra un fils auquel il donna le nom du lieu mesme de Melisse. Ce Melissus engendra un fils qui eut nom Acteon, le plus beau & le plus honneste de son aage, duquel plusieurs furent amoureux, mais entre les autres un nommé
C Archias qui estoit de la race des Heraclides, & en biens & tout autre credit & autorité le premier de tous les Corinthiens. Et pource qu'il voioit que de gré il ne pouoit rien gagner ny obtenir de ce ieune enfant, il se delibera de le forcer & de le rauir. Si s'en alla comme pour iouer en la maison de Melissus, menant quand & luy troupe grde de ses amis & de ses domestiques, & se mit en effort d'emmener l'enfant, mais le pere & ses amis le retenas à

l'aide des voisins qui accoururent au secours tirans **D** alencôtre: l'enfant fut si bien tiré deçà & delà, qu'il mourut entre leurs mains, & ainsi s'en allerēt tous les autres. Mais le pere Melissus en portant le corps sur la place de Corinthe, demanda iustice de ceux qui auoient commis vne telle forfaiture. Les Corinthiens ne firent rien plus que luy môstrer, qu'ils auoient compassion de sa fortune. Et ainsi s'en retournant sans rien auoir fait, il obserua & attendit l'assemblée generale des ieux Isthmiques, & montant sur le tēple de Neptune, il se prit à crier alencontre de la race des Bacchiades, & rememora le **E** benefice que leur auoit iadis fait son pere Abron, & apres auoir demandé vengeance aux Dieux, il se precipita luy mesme du haut en bas des rochers. Peu de temps apres vne grande seicheresse & famine saisit la ville, & comme les Corinthiens enuoyassent deuers l'oracle, pour sçauoir par quel moien ils en pourroïēt estre deliurez, Dieu leur feit responce, que c'estoit vn courroux de Neptune qui ne seroit point appaisé iusques à ce qu'ils eussent vengé la mort d'Acteon. Ce qu'entendāt Archias, qui auoit esté deputé à ceste ambassade, ne retour- **F** na pas à Corinthe, ains nauiguāt en Sicile, y fonda & bastit la ville de Syracuse, là où il engēdra deux filles Ortygia & Syracusa, & à la fin y fut tué en trahison par vn Telephus, duquel il auoit autrefois abusé en son enfance, & qui aiant la cōduitte d'vne nauire l'auoit fuiuy en la Sicile.

3 **V**N pauvre hōme nommé Scedafus demouroit à Leuctres, qui est vn petit village du territoire
de

A de Thespies, il eut deux filles qui s'appelloient l'une Hippo, & l'autre Meletia, ou comme les autres escriuent Theano & Euippe. Or estoit ce pauvre homme Scedafus bening, courtois & humain, mesmement aux passans estrangers, encore qu'il n'eust pas beaucoup de biens. Si receut humainement en sa maison deux ieunes hommes Spartiates, lesquels esprits de l'amour de ces deux ieunes filles furent retenus de rien attéter contre leur pudicité pour la bonté & courtoisie de leur pere, & le lendemain matin ils prirent leur chemin vers la ville
B de Delphes, à l'oracle d'Apollo Pythique: car ils estoient partis expressement pour faire ce voiage. Et apres auoir enquis de l'oracle ce qu'ils vouloiēt, reprirent leur chemin pour s'en retourner en leur pais. Et passans à trauers la Bœoce s'en allerent de rechef loger chez Scedafus, lequel pour lors n'estoit pas à Leuctres, mais ses filles pour l'accoustumance où elles auoient esté nourries, receurent ces deux hostes en leur logis. Et eulx les voians toutes seules, les violerēt à force, puis apres le faict voians qu'elles estoient si amerement courroucees
C de l'iniure qu'ils leur auoient faite, qu'ils ne les pouuoient appaiser, ils les tuerent toutes deux, & les ietterent dedans vn puy, & s'en allerent. Scedafus estāt retourné ne trouue point ses filles, mais bien trouue il tout ce qu'il auoit laissé en sa maison sauf & entier, & ne scauoit que c'estoit à dire, iusques à ce que son chien se plaignant, & tantost accourant à luy, & tantost le menant au puy, il commença à se doubter de ce qui estoit, & ainsi tira les

corps de ses deux filles: & entendant de ses voisins D
que le iour precedent ils auoient veu entrer les
deux ieunes hommes Lacedemoniens qui quel-
ques iours auparauant auoient logé chez luy, il se
douta incontinent que ce deuoit estre eulx qui
auoient commis le crime, mesinement qu'il se sou-
uenoit qu'à la premiere fois ils ne faisoient que
louer ses filles, disans qu'ils reputoient pour bien
heureux ceux qui les espouseroient. Si s'en alla en
Lacedemone pour en parler aux Ephores, & quād
il fut dedans le territoire d'Argos, la nuit le surpré-
nant, il se logea en vne hostellerie, dedans laquelle E
il trouua vn autre pauvre vieillard natif de la ville
d'Oree, en la contree Estiatide, lequel souspiroit &
gemissoit en maudissant les Lacedemoniens, Sce-
dasus l'ayant ouy, luy demanda que luy auoient fait
les Lacedemoniens qu'il les maudissoit ainsi. Le
vieillard luy conte, cōme il estoit subiect de Sparte,
& qu'aiāt vn Aristodemus esté enuoyé pour gou-
neur en la ville d'Oree, il y auoit vsé d'une grande
iniustice & grieve cruauté en son endroit. Car
estant deuenu amoureux d'un mien fils, dit il, &
voiant qu'il ne le pouuoit induire à sa volonté, il F
essaya de le forcer & de l'emmener par force hors
du lieu où il s'exerçoit avec ses compagnons à la
lucite. Le maistre de l'exercice empescha ce gou-
uerneur, à l'aide de plusieurs ieunes hommes qui
y accoururent au secours, tellement que pour
l'heure Aristodemus se retira. Mais le lendemain
ayant armé vne galere, il s'y en reuint & raut mon
enfant: & trauersant la mer iusques à l'autre riué,
il se

A il se mit en deuoir de le violer : ce que l'enfant n'ayant pas voulu souffrir, il le tua, puis s'en retourna à Oree, là où il fit vn banquet à ses amis. Ie fus aduertty de l'inconuenient, & allay faire les funeraillles de mon fils, & incontinent me mis en chemin deuers Sparte, où i'exposay le faict aux Ephores, mais ils n'en tindrent compte. Scedasus oiant ces paroles estoit en grande perplexité d'ennuy, pensant bien qu'ils ne feroient non plus compte de luy. Et de sa part raconta aussi sa desconuenue à l'estranger, qui luy conseilla de n'aller pas seulement iusques à Sparte, ny en parler aux Spartiates, ains s'en retourner en la Bœoece, & là faire dresser vn tumbeau à ses deux filles. Toutefois Scedasus ne le creut pas, ains alla iusques à Sparte, & parla aux Ephores, lesquels n'en firent autrement point de compte : puis s'adressa aux Roys, & apres aux particuliers bourgeois, en leur recitât le faict & lamentant son malheur. Mais voiant qu'il n'y gaignoit rien, il se prit à courir à trauers la ville, leuant les mains deuers le ciel, & frappant du pied contre la terre, il inuocqua les Furies à son secours, & finalement se tua luy mesme. Mais depuis les Lacedemoniens en payerent bien la peine : car estants si grands qu'ils commandoient à toute la Grece, & auoiēt mis des garnisons par toutes les villes, Epaminondas Thebain le premier couppa la gorge à la garnison qui estoit à Thebes, à raison dequoy les Lacedemoniens firent la guerre aux Thebains, lesquels leur allerent au deuant iusques au village de Leuctres prenans le lieu à bon presage, pource que

là mesme ils auoient autrefois esté deliurez, quand D
 Amphiçyon chassé par Sthenelus se retira en la
 ville de Thebes, & de là aiant subiugué les Chalci-
 diens, & rendu tributaires, aiant tué mesme le Roy
 de l'Eubœe Chalcodous, deliura les Thebains du
 tribut qu'ils payoient au parauât. Si aduint que les
 Lacedemoniés furent entieremēt deconfits & def-
 faicts aupres de la sepulture de ces deux filles. Et
 dit on que deuât la bataille Scedafus s'apparut en
 songe à Pelopidas l'un des Capitaines de l'armee
 Thebaine, qui estoit tout decouragé, à cause de
 quelques signes & presages qu'il iugeoit & inter-
 pretoit en male part, & l'admonesta d'auoir bon
 courage, parce que les Lacedemoniens venoient là
 pour y payer la peine qu'ils deuoient tant à luy,
 comme à ses deux filles, & luy commanda le iour
 de deuât la bataille d'immoler vne ieune poultre
 qu'il trouueroit toute preste sur la sepulture de ses
 filles. Pelopidas, comme les ennemis estoient en-
 core campez à Tegce, enuoya deuant à Leuctres
 enquerir de ceste sepulture, & en estant informé
 par ceulx du pais, il y mena hardiment son armee,
 & y gaigna la bataille. F

4 P H O C Y S estoit Bœotien de race, comme
 estant descédu de Clisante, & auoit vne fille nom-
 mee Callirhoé, belle, sage, & honeste à merueille.
 Si y auoit trente des plus gentils hommes de toute
 la Bœoce qui la demandoient en mariage : mais le
 pere alloit tousiours trouuât des remises de iour à
 autre, craignant d'estre forcé. Finablement se voiant
 pressé de ces ieunes poursuiuans, il resolut d'en re-
 mettre

A mettre l'election à l'oracle d'Apollo. Les ieunes gens irritez de ceste response, se ruerent sur luy & le tuerent:& en ce tumulte la fille eschappant s'enfuit à trauers le pais. Les Iouuenceaux coururent apres, mais elle trouua des labouréurs qui accoustroient & entassoient du bled dessus vne aire, & la coucherent dedás le bled, tant que les poursuiuans passerent outre sans l'appercevoir. Elle estât ainsi eschappee, attendit le iour de la feste & assemblee generale que lon appelle Pambœotia, pource que tous les habitans du pais de Bœoce y conuiennent:

B & s'en allant en la ville de Coronee, s'alla seoir en habit de suppliante aupres de l'autel de Minerue Itoniene, là où elle recita aux assistans la meschanceté que ces poursuiuans auoient commise, nommant chascun par son nom, & declarât dont estoit chascun d'eulx. Les Bœotiens eurent pitié d'elle, & furent fort asprement indignez cōtre les ieunes hommes. Ce que eulx entendans s'enfuirent en la ville d'Orchomene, mais les Orchomeniens ne les voulurent pas receuoir, au moien dequoy ils s'allerent ietter dedans la petite villette de Hippolis, qui

C est vne bourgade pres de Helicon, entre la ville de Thebes, & celle de Coronee. Les Thebains leur enuoyerent denōcer qu'ils eussent à liurer és mains de la iustice les meurtriers qui auoient tué Phocus. Ils n'en voulurent rien faire, au moien dequoy les Thebains, & les autres Bœotiens y allerent avec armee mettre le siege, soubs la cōduitte du capitaine Phœdus, qui lors estoit en estat de Capitaine à Thebes, & assiegea la bourgade qui estoit forte. Ils


forcerent à la fin ceulx qui estoient dedans, à faulte d'eau, lapiderent les homicides, & asseruirent & rendirent esclaves les habitans du lieu, rasans les murailles & les maisons, & distribuans entre les Thebains & les Corciriens leur territoire. Si dit on que le iour de deuant que le bourg d'Hippolis fust pris, on ouit vne voix venant du mont de Helicon, de quelqu'un qui disoit, Voy-me-cy, par plusieurs fois, & que les trente poursuiuâs recongneurent bien la voix, & dirēt que c'estoit celle de Phocus : & le iour qu'ils furent lapidez & accablez de pierres, on dit que le tūbeau du vieillard qui estoit à Clisante rendit du saffran coulant. Et ainsi comme le Capitaine des Thebains Phædus retournoit du camp & de la victoire, on luy vint apporter nouuelle, comme sa femme estoit accouchee d'une fille. Ce que prenāt à bon augure, il l'en appella Nicostrate, qui signifie victoire de l'armee.

5 ALCIIPPVS estoit Lacedemonien de nation, & aiant espousé vne dame nommee Democrita en eut deux filles, conseillant à son pais ce qui luy sembloit tousiours estre le meilleur, & les servant de sa personne en toutes occurrēces où le besoing s'en presentoit. Il suscita contre luy l'enuie de ses emuleurs au gouvernement, qui allerent seduire les Ephores par calōnies & faulx rapports, leurs donnans à entēdre que cestuy Alcippus vouloit subuertir les loix, & changer l'estat de Sparte, tant qu'ils le firent bannir du pais, & encore empeschoient Democrita de le suyure avec ses deux filles: & qui pis est, luy confiscuerent son bien, à fin que

A que les filles n'eussent pas dequoy estre mariees. Et comme neantmoins plusieurs ieunes gens les demandassent en mariage à cause de la vertu de leur pere, ses ennemis firent en sorte par leurs menées, que par decret public il fut defendu que lon ne les demandast en mariage, parce que leur mere Democrita auoit souuent fait priere aux Dieux, que bien tost ses filles portassent des enfans qui peussent venger l'iniure faite à leur pere. Parquoy Democrita se voyant de tous costez chassée, espia le iour d'une feste publique solennelle, en laquelle
B les femmes avec leurs filles, leurs seruantes & leurs petits enfans festoyoiēt, & celles des magistrats & hōmes d'honneur, à part en vne grande sale, veilloient & passoiēt toute la nuit. Si ceignit vne dague par dessoubs sa robbe, & prenant ses filles avec elle, quād la nuit fut venue s'en alla au tēple avec les autres. Elle attendit l'heure que toutes les Dames estoient occupees aux cerimonies du seruice diuin, & faisoient leur mystere : les portes estās toutes fermées, elle amassa alencōtre force bois, dont on auoit fait prouision pour le sacrifice de la feste, &
C mit le feu dedans. Et cōme les hommes accourussent de toutes parts au secours, Democrita tua ses filles, & dessus elles soy mesme. Parquoy les Lacedemoniens ne sachans plus sur quoy exercer leur courroux, enuoyerent ietter les corps de Democrita & de ses deux filles hors des confins de leur pais. Dequoy Dieu estant indigné, pour vengeance enuoya le grand tremblemēt de terre qui aduint en Lacedemone, ainsi que lon trouue par escript.

QUELS ANIMAUX SONT
LES PLUS ADVISEZ, CEUX
de la terre, ou ceux des eaux.

AUTOBVLVS.



N demanda quelquefois à Leonidas roy de Lacedemone, ce qu'il luy sembloit du poëte Tyrteus : à quoy il respōdit, Il me semble que c'est vn bon poëte pour aguïser les courages des ieunes hommes, pource que par les vers il imprime és cœurs des ieunes gens vne affection de ne s'espargner point aux perils de la guerre, pour acquerir honneur & reputation : aussi ay-ie peur, mes amis, que le discours à la louange de la chasse, qui fut hier leu en ceste compagnie, n'ait si fort excité oultre mesure noz ieunes gens qui aiment la chasse, qu'ils estiment desormais toutes autres choses accessiores, ou plus tost qu'ils n'en fassent à l'aduenir aucun compte, & qu'ils ne se laissent de tout poinct emporter à l'affection de chasser: veu que moy mesme de nouueau m'en retrouve plus chaudement affectiōné que ne porte mon aage, tellement que, cōme dit Phædra en Euripide,
Mon deduit est à pleine voix
Appeller chiens emmy les bois,
En suiuant les cerfs à la trace:
tant ce discours me toucha au vif, pour le grand nombre

A nombre des belles & vifues raisons qu'il deduisit.
 SOCLARVS. Tu dis la verité, Autobulus : car
 il me sembla qu'il feit vne grande preuue de son
 eloquēce ia par quelque temps discontinuee pour
 gratifier, à mō aduis, aux ieunes gēs qui assistoient,
 & s'esguayer avec eulx, mais ce qui plus me con-
 tenta en tout son discours, fut, quād il nous reprē-
 senta deuant les yeulx des escrimeurs combattans
 à outrance les vns contre les autres, en deduisant,
 que l'vne des raisons, pour lesquelles principale-
 ment la chasse est à louer, c'est pource qu'elle di-
 uertit vne certaine affection que nous auōs imprī-
 mee de nature, ou bien apprise par accoustumāce,
 de prēdre plaisir à voir combattre à coups d'espee
 des hōmes les vns contre les autres, & l'employant
 à ceste occupation nous donne à voir vn spectacle
 & passetēps pur & innocēt, du combat d'adresse
 conioincte avec hardiesse conduite par raison,
 alencontre d'vne force & violēce bestiale: en quoy
 faisant il nous a monstřé que bien digne de lou-
 ange est la sentence d'Euripide, quand il dit,

L'homme a bien peu de force corporelle,
 Mais sa prudence & raison naturelle
 Va iusqu'au fond de la mer, captiuant
 Tout ce qui est dedans les eaux viuant,
 Et sur la terre aussi iusqu'aux especes,
 Ou plus y a de ruzes & finesſes.

A V T O B V L V S.

Et touteſois, amy Soclarus, il y en a qui tiennent
 que ceste duretē inflexible & aspretē ſauuage, de
 ne ſe mouuoir de rien à pitié, est de là venue aux

cœurs des hommes, s'estas à la chasse accoustumez à tuer, & ayants appris à n'auoir point horreur de voir le sang & les bleceures des bestes qu'ils prenoient, ains estants bien aises de les voir mourir & de les mettre en pieces. Ne plus ne moins qu'en la ville d'Athenes, quand elle fut reduitte sous la tyrannie des trente Tyrans, le premier homme qu'ils feirent mourir fut vn calomniateur, & dit on lors que c'estoit bien employé, & qu'il l'auoit bien merité, autant en dit on du second & du troisieme: mais de là en auant ils commencerent petit à petit à passer oultre, iusques à s'attacher à des gens de bien, & finablemēt ne pardonnerēt pas aux meilleurs, & aux plus vertueux: aussi celuy qui tua le premier vn ours, ou vn loup, en fut estimé gentil compagnon, & le bœuf ou le pourceau qui auoient mägé de quelques choses que lon auoit preparees pour en faire offrande & sacrifice aux Dieux, en fut condamné comme digne de mort, puis apres les cerfs, les lièvres, & les cheureux que lon commença desia à mäger, conuierent à mettre sur table les chairs des moutons, voire en quelques lieux, celles des chiës mesmes, & celles des cheuaux. Mais ceux qui ont enseigné à desmembrer & tailler en pieces vn oyson priué, vn pigeon familier, vn coq & vne poule domestique, & encore non pour se nourrir & remedier à la necessité de la faim, comme font les belettes, les chats, & les fouyns, mais seulement pour plaisir & pour delices: ceulx là ont grandement fortifié ce qu'il y a de sanguinaire, & de cruauté bestiale en nostre nature, la rendans inflexible

A à la miséricorde, & au contraire affoibly & rebouché la plus part de ce qu'il y a de debonnaireté naturelle: comme à l'opposé les Pythagoriens vouloient que lon s'accoustumast à vser de mansuetude enuers les bestes, pour vn exercice de pitié & de miséricorde enuers les hômes, car l'accoustumance se familiarisant petit à petit à quelque passion ou affection, a vne merueilleuse efficace de poulser l'hôme fort auant. Mais ie ne sçay cōment estants entrez en propos, nous nous sommes oubliez de nous attacher à ce qui fut hier cōmencé, & qui se doit continuer au iourd'huy: car hier cōme tu sçais, aians arresté que toutes sortes d'animaux ont en eulx quelque peu de discours & de raison, nous dōnâmes vne belle occasion & matiere de dispute docte & plaisante à nos ieunes hommes qui aimēt la chasse, à sçauoir quelles bestes terrestres ou aquatiques ont plus d'entendement: laquelle question nous deuons ce me semble decider au iourd'huy, si Aristotimus & Phædimus persistent aux defiances & prouocations qu'ils se donnerent hier l'vn à l'autre: car l'vn promet à ses compagnons qu'il soustiendroit que la terre produit & porte des animaux qui ont plus de sens & d'entendement, & l'autre au contraire que c'est l'eau. **S O C I A R.** Ouy, Autobulus, ils persistent voirement en leur volonté de disputer, & seront icy tous deux bien tost pour cest effect, car ie les ay veuz qui s'apprestoient des le matin: mais si vous voulez en attendant que nous oyons le combat de la dispute, reprenons vn petit ce qui deuoit hier estre discours,

& ne le fut pas, pource que le temps ny le lieu n'e-
 stoient pas à propos, ou bien qu'il ne fut pas traitté
 à bon escient, d'autant que c'estoit à la table: car il
 y eut quelqu'un qui ietta à la traaverse vne oppo-
 sition bien pertinēte, venant de l'eschole des Stoi-
 ques. C'est, que comme le mortel est opposite à
 l'immortel, & le corruptible à l'incorruptible, & le
 corporel à l'incorporel, aussi fault il cōfesser que le
 raisonnable est opposite à l'irraisonnable, & que si
 l'un est en estre l'autre y doit estre aussi, & que ce-
 ste couple de contraires entre tant d'autres n'estoit
 pas seule defectueuse ny imparfaitte. A V T O R. Et
 qui voudroit dire cela, amy Soclarus, qu'estant le
 raisonnable en nature & en estre, l'irraisonnable
 n'y doive estre aussi: car il y en a, & en giāde quan-
 tité, mesmement en toutes les creatures qui n'ont
 point d'ame, & n'est point de besoing de chercher
 autre opposition à ce qui est raisonnable, par ce
 que tout ce qui est sans ame, incontinent est aussi
 opposite à ce qui avec ame a vsage d'entendement
 & de raison, & si l'y a quelqu'un qui maintiene
 que la nature ne soit point pour cela defectueuse
 ny imparfaitte, par ce que toute substance qui a
 ame, est ou raisonnable ou irraisonnable. Vn autre
 luy dira aussi, que la nature animée n'est point de-
 fectueuse voirement, par ce que ou elle a imagina-
 tion, ou elle est sans imaginatiō, ou biē elle est sen-
 sitive, ou sans aucun sentimēt, à fin qu'elle ait à ses
 costez, ces deux oppositions ou priuations, faisant
 cōtre-pois l'une à l'autre alentour du mesme gēre,
 comme deux brāches opposites, sortans d'un mes-
 me

A me tronc: & fil luy semble que celuy soit impertinent qui demande qu'on luy concède, que de la nature animée vne branche soit sensitive, & vne autre sans sentiment, & l'une imaginative, & l'autre sans imagination, pource qu'il estime que toute nature animée soit incontinent & sensitive & imaginative, pour cela n'aura il pas plus d'apparence à demander qu'on luy suppose pour véritable, que tout ce qui a ame soit ou raisonnable ou irraisonnable, en discourant avec gens qui ont opinion que rien n'ait sentiment qui n'ait quant &

B quant aussi entendement, & qu'il n'y ait pas vne espece d'animal qui n'ait quelque manière d'opinion, & quelque discours de raison, tout ainsi qu'il a le sentiment & l'appétit de nature: car la nature que lon dit véritablement faire toutes choses pour quelque cause, & à quelque fin, n'a point fait l'homme sensitif pour simplement sentir passivement, ains cōme ainsi soit qu'il y ait innombrables choses qui luy sont propres, & d'autres qui luy sont contraires. il ne pourroit pas durer ny subsister vn moment de temps, s'il ne sçauoit se servir & accommoder des vnes, & se garder des autres. Or est-il

C que le sentiment donne à tout animal la cognoissance autant de l'un comme de l'autre également, mais la discretion puis apres, qui accompagne le sentiment de recevoir ou prochasser ce qui leur est profitable, ou bien de fuir & reietter ce qui leur est pernicieux & dommageable: il n'y auroit apparence quelcōque de dire que les animaux l'eussent, s'ils n'auoient aussi ensemble quelque moien &

aptitude naturelle de discourir, de iuger, de com-
 prendre & de retenir : & à ceulx à qui vous aurez
 de tout poinct osté le pouuoir attendre, se souue-
 nir, choisir, se prouuoir & preparer, & outre l'esper-
 rer, le craindre, le desirer, & le refuzer, à ceulx la ne
 seruira plus de rien auoir des yeulx ny des aureil-
 les, ny aucun autre sens naturel, ny apprehension
 ou imagination, attédu qu'elle n'aura pas le moien
 d'en vser ny de s'en seruir: & vaudroit mieulx qu'ils
 en fussent de tout poinct destituez & priuez,
 que de pouuoir souffrir trauail, douleur & tristesse,
 & n'auoir pas dequoy s'en defendre & s'en garder: **E**
 combien qu'encore y a il vn discours du philoso-
 phe naturel Straton, par lequel il monstre qu'il
 n'est pas possible de sentir mesme, sans quelque
 discours de raison. Car nous courons bien sou-
 uent de l'œil des lettres, & oyons le son des paro-
 les qui nous donnent aux aureilles, sans que nous
 les entendions ny comprenions, & nous fuyent,
 pourautant que nostre entendement est ailleurs,
 lequel reuenant à soy court apres & tasche à les re-
 prendre, repassant & repetant vn chascun poinct:
 à l'occasion dequoy il n'a pas ancienement esté **F**
 mal dit, l'Entendement voit, l'entendement oyt,
 tout le reste est sourd & auengle: comme s'il vou-
 loit dire, que le souffrir des yeulx ou des aureilles
 ne fait pas le sentiment, si l'entendement n'y est.
 Et pourtant Cleomenes Roy de Lacedemone e-
 stant quelque iour à vn festin en Ægypte, où il fut
 recité quelque compositiō qui agrea fort à la com-
 pagnie, comme on luy demanda ce qu'il luy en
 sembloit

A sembloit, & si l'auoit pas trouuee bien faite, le m'en rapporte à vous, dit il, & vous en laissez le iugement, car quant à moy, mon entendement estoit ce pendant au Peloponese: de maniere qu'il est doncques necessaire, que toute creature qui a sentiment ait aussi ensemble discours & entendement, puis que par l'entendre nous venons à sentir naturellement. Mais posons le cas, que le sentiment n'eust point besoing de l'entendement pour exercer sa fonction & son operation naturelle, apres que le sentiment a fait le deu de son office, qui est de discerner ce qui est propre & commode à l'animal, & ce qui luy est contraire: cela passé, qu'est-ce qui en conserue la memoire, qu'est-ce qui craint les choses nuisibles & offensiuës, & qui desire & appete les agreables & vtilës, & qui cherche le moien de les auoir & iouir, quand elles ne sont pas presentes? Qu'est-ce qui prepare des forts & des retraittes, des engins à prendre, ou au contraire des ruses pour eschapper quand on est pris? Et toutes fois ils nous rompent la teste à force de definir à tout propos en leurs Introductions, que c'est que *προθεσις*, c'est à dire, propos deliberé, designation de mettre à effect. Que c'est que entreprise, *πρόληψις*, appetit deuant appetit. Que c'est que *παρασκευή*, prouision, action deuant action. Que c'est que *μνήμη*, memoire, cōprehension d'une proposition affirmatiue ou negatiue passée; dōt la verité presente a esté autrefois cōprise par le sentiment: car de toutes ces choses la, il n'y en a pas vne qui ne soit raisonnable, ie veulx dire, qui ne procede du discours

de la raison, & neantmoins toutes conuiennent & se treuuent en tous animaux. Comme aussi ils desfinissent *νοῦς*, pensee, intelligence reseruee & mise à part : & *δυναμις*, pensement, intelligence qui est encore en mouuement : & les passions communément & en general, mauuais iugemens & faulses opinions. C'est merueille donc comment ils passent par dessus tant d'effects & tant de mouuements que lon voit és animaux, les vns procedents de courroux & de cholere, les autres de peur, voire de ialouzie & d'enuie, & qu'ils ne s'auisent pas que eulx mesmes punissent leurs chiës & leurs cheuaux quand ils leur font des fautes, & si ne le font pas en vain à la volée, ains en intention & volonté de les rendre plus sages, leur imprimant vne desplaisance procedant de douleur, laquelle nous appelons repentance. Quant est aux voluptez, celle qui se reçoit par les oreilles ils l'appellent enchantement, & celle qui se reçoit par les yeulx esblouissement : ils vsent de l'vne & de l'autre sorte alencontre des bestes, car c'est chose certaine que les cerfs & les cheuaux s'esiouissent d'ouir le son des flustes & des aubois, & fait on à force sortir de leurs trous les cancres squinades avec des trompettes & clairons : aussi dit on que l'aloise oyant des hommes chanter, & battre des mains les vnes contre les autres, vient au dessus de l'eau & en sort dehors : d'auantage le Duc estant enchanté à voir des personnes qui se resiouissent à baller & dâser, se laisse prendre en les cuidât contrefaire, & remuant les espaulles à la cadence comme eulx. Et quant à ceulx qui

parlent

A parlent de cela si lourdement & si impertinemment, que de dire que les animaux ne se resjouissent, ny ne se courroucent, ny ne craignent point, que l'arondelle ne fait point de provision, & que l'abeille n'a point de memoire, mais qu'il semble seulement que l'arondelle vse de prouoyance, que le lion semble se courroucer, & la bische trembler de peur: ie ne sçay pas qu'ils respondroient à ceux qui leur mettroient en auant, qu'il faudroit doncques aussi dire, qu'ils ne voyent & qu'ils n'oyent point, & qu'ils n'ont point de voix, mais seulement qu'il semble qu'ils voyent, & qu'ils oyent, & qu'ils ont voix: & bref qu'ils ne vivent pas, mais qu'il

B semble qu'ils vivent: car dire l'un ne seroit pas plus contre toute manifeste euidence, que l'autre.

S O C L A R. Ie suis bien de ceste mesme opinion, Autobulus: mais de comparer les mœurs, les vies, les actions, & les deportemens des hommes à celles des bestes, outre ce que ie voy en cela beaucoup d'autre indignité, encore ne puis-ie entendre comment la nature leur auroit baillé le commencement de la raison, veu qu'elles ne peuuent atteindre à la fin qui est la vertu à laquelle la raison se refere, attendu qu'il n'y a piece d'elles qui montre aucun signe qu'elle y tende, qu'elle y profite, ne qu'elle en ait enuie. **A V T O B.** Voire mais cela, amy Soclarus, ne semble pas estrange ny hors de verité à ces mesmes Stoïques là: car ils mettent l'amour & la charité naturelle que nous auons enuers ce qui est engendré de nous, pour le fondement de la société ciuile, & de la iustice: mais com.

Bien qu'ils la voyent bien euidente & bien puissante
 re és bestes brutes, si est-ce toutefois qu'ils nient
 fort & ferme qu'elles aient aucune part en la iusti-
 ce: & qui plus est les mules & mulets n'ont point
 faite des instrumens requis à la generation, car na-
 ture leur a donné aux mâles les membres masculins,
 & aux femelles des matrices, & si sentent en les
 employant la mesme volupté que les autres ani-
 maux, & toutefois ils ne peuuent arriuer à la fin de
 generation. Et d'autre part pren garde que ce ne
 soit vne lourdisse digne de mocquerie à tels philo-
 sophes, de maintenir que vn Socrates & vn Platon
 ne soient de rien moins vicieux que le plus meschât
 esclau qui se pourroit trouuer au monde, & dire
 qu'ils soient tout autant ou fols, ou luxurieux, ou
 iniustes, pour ce que tous pechez leur sont egaux,
 & puis accuser que la source de vertu ne soit pas
 pure ne parfaite en elles, comme si ce n'estoit pas
 vn defect & vne imbecillité de raison, mesmemēt
 qu'ils confessent eux mesmes estre imperfection
 d'usage de raison, dont toutes les bestes sont plei-
 nes, car nous voions manifestemēt qu'il y a en au-
 cunes de la couardise, de l'intemperance, de l'iniu-
 stice, & de la malignité. Or celuy qui affirme que
 ce qui n'est pas apte ny habile à receuoir droite
 raison, ne soit pas simplement capable de raison,
 premieremēt c'est tout autant comme s'il mainte-
 noit que le singe ne fust pas capable de laideur, ny
 la tortue de tardité, d'autāt que ces animaux la ne
 sont pas susceptibles de beauté ny de viffesse. Et
 puis il n'entend pas la difference qu'il y a entre rai-
 son

A son droitte, & raison simple : raison simplement vient & procede de nature, mais droitte raison viét de soing, d'estude & de diligēce: & pourautāt toutes creatures qui ont ame sensitive sont capables & susceptibles de discipline, par le moien de ceste faculté de discourir & de raisonner: mais ceste droitte raison que nous cherchons, qui n'est autre chose que la Sapience, ils ne sçauroient pas nōmer vn seul homme qui oncques l'ait eüe, comme il y a difference de veuë à veuë, & de vol à vol, par ce que vn esparuiet voit bien autrement que ne fait B vne fourmis, & autrement vole l'Aigle que ne fait pas la perdrix: aussi toute creature qui a capacité de raison n'a pas la viuacité ny la prōptitude de pouuoir penetrer iusques à la cyme. Car on voit és animaux assez de signes tous manifestes de iustice en société, de hardiesse, de ruze & de finesse en leurs prouisiōs, & en leurs mesnages: cōme au contraire aussi y voit on des indices de violēce iniuste, de lourderie & de sottise, cōme tesmoigne ce qui a maintenant esmeu la contention de dispute entre noz ieunes hommes, par ce que tous deux supposent que naturellement il y a difference: mais les C vns maintiennent qu'il y a plus d'auancement à la vertu és animaux de la terre, & les autres és animaux de la mer: ce qui est bien manifeste qui voudra comparer les cicognes aux cheuaux de riuiere, par ce que les vnes nourrissent leurs peres quād ils sont deuenus vieux, & les autres les tuent, pour pouuoir saillir & couvrir leurs meres: & aussi qui conferera les pigeons avec les perdrix, par ce

que les pigeons cassent les œufs, & tuent quelque-
 fois les femelles ce pendant qu'elles couuent leurs
 œufs, d'autant qu'elles ne les veulent pas alors en-
 durer ny receuoir, là où les perdrix masses prennēt
 sur eux part de la sollicitude de couuer les œufs, &
 les eschauffent à leur tour, & qui plus est, sont les
 premiers qui apportent la becquee à leurs petits
 quand ils sont esclos, & si d'aduenture la femelle
 demeure trop hors du nid, le masse la bat à coups
 de bec, & la contraint de retourner à ses œufs &
 à ses petits. Et Antipater qui reproche aux asnes &
 aux moutons leur ordure & negligence de se tenir
 nettement, ne sçay comment il a oublié à parler
 des onces & des arondelles, car les onces cherchēt
 vn lieu à l'escart pour vriner, & y cacher vne pierre
 fine, qui s'engendre de leur vrine, & s'appelle Lyn-
 gursion: & les arondelles enseignent à leurs petits à
 se tourner le derriere pour ietter hors de leur nid
 leur fiante. Et puis pourquoy est-ce que nous ne
 disons pas que vn arbre soit plus ignorant que vn
 autre, comme nous disons bien qu'un mouton est
 plus simple qu'un chiē, ny que vne herbe soit plus
 timide qu'une autre, là où nous disons bien que le
 cerf est plus couard que n'est le lion? & tout ainsi
 qu'entre les choses immobiles, nous ne dirions ia-
 mais que l'une fust plus tardiue que l'autre, ny en-
 tre celles qui ne rendent son quelconque, que l'un
 eust la voix plus gresle ny plus grosse que l'aut-
 re: aussi ne dira lon iamais l'une plus rusée, ny plus
 lourde, ny plus grossiere, ny plus intemperante que
 l'autre, sinon entre celles qui par nature ont quel-
 que

A que habilité & aptitude à vser du discours de la raison, mais ceste puissance estant donnee aux vns plus, aux autres moins, c'est cela qui fait la difference. Voire mais il n'y a point de comparaison, dira quelqu'un, de l'homme avec les bestes, tant il les auance & precede en toute subtilité d'entendement, en iustice & equité de ciuile société: aussi, luy diray-je, mon amy, y en a il plusieurs qui en grandeur & force de corps & legereté de pieds, en vigueur des yeux, & subtilité de l'ouye, laissent derriere tout tant d'hommes qu'il y a au monde, mais

B pour cela ce n'est pas à dire que l'homme soit impotent de pieds ny de mains, qu'il soit auégle ny sourd: & ne nous a point la nature priuez de grandeur de bras & de corps, & toutefois ce n'est rien de nostre force, au pris de celle des Elephans & des Chameaux. Semblablement aussi dirons nous des animaux, s'ils discourent plus lourdement & plus grossièrement que ne fait l'homme, ce n'est pas à dire pourautant qu'ils n'aient du tout point de discours ny de raison naturelle: car ils en ont, mais elle est foible & trouble, ne plus ne moins qu'un

C œil qui est obscurcy & terny. Et si n'estoit que ie m'attens tresbien que noz ieunes hommes qui sont doctes, studieux, & bien versez és liures anciens, nous allegueront tantost un nombre infiny d'exemples, l'un de la terre, & l'autre de la mer, Ie ne me pourrois pas tenir que ie ne vous recitasse des exemples & des preuues innumerables, tant de naturelle subtilité que de docilité des bestes, que la belle cité de Rome nous bailleroit aisément à pui-

fer à seaux & à bacquets abondamment des ieu^x & spectacles que font faire en pleins Theatres les Empereurs. Mais laissons leur ceste matiere toute fresche & entiere à ces ieunes gens, pour tantost embellir leur discours, & orner leur eloquence, & ce pendant ie veux à loisir examiner & considerer vn poinct avec toy: car i'estime qu'en chasque partie & puissance naturelle de nostre corps il peult aduenir quelque defectuosité ou mutilation & maladie, comme en l'œil auéglement, en la cuisse le clocher, en la langue le beguoyer, & ce qui est propre à vne partie n'aduiant point à l'autre, par ce que lon ne peut dire qu'une partie soit deuenue auégle qui n'a iamais eu puissance de veoir, ny boiteuse qui ne fut iamais ordōnee pour cheminer, & n'y a homme qui iamais appellast begue ou parlant gras vne chose qui n'a point de langue, ou qui ne rend point de son: au cas pareil aussi ne pourroit on proprement & veritablement appeller fol, furieux ou enragé, ce qui de sa nature n'est pas capable d'entendement, de discours, ny de raison: car il est impossible que vne partie se puisse dire interessée ny maleficiée qui n'a iamais eu l'aptitude, ne la puissance naturelle de receuoir diminution, ou priuation, ou mutilation, ou totale destruction: & toutefois ie ne doute point que tu n'ayes quelquefois veu des chiens enrager, quant à moy i'ay veu des cheuaux qui l'estoient, & y en a qui disent d'auantage que les bœufs mesmes enragent, & les regnards, comme les chiens: mais l'exemple des chiens qui est sans au-

Aucune doute, suffit, & porte tesmoignage que ceste espece de beste a sens & entendement, & non pas petit, mais quand il aduient qu'il se trouble & qu'il se confond, alors leur vient la maladie que lon appelle la rage & folie, là où lon n'apperoit point qu'ils aient la veuë ny l'ouïe alteree. Mais, ainsi comme d'un homme trauaillé d'humeur melancholique, & transporté hors de son bon sens, qui diroit que son entendement ne fust point tourné, & sa ratiocination deuoyee, & sa memoire gastee, il seroit fort impertinent, pour ce que l'ordinaire & la coustume des fols & furieux nous monstre euidentement qu'ils sont hors d'eux mesmes, & ont perdu tout discours de raison: aussi celuy qui cuideroit que les chiens enragez souffrissent autre mal qu'une perturbation & confusion de la partie qui parauant souloit en eux imaginer, discourir & souuenir, de maniere que quand ils sont fols & espris de la rage, ils ne cognoissent plus les personnes que plus ils cherissoient, & fuyent les lieux où plus ils souloient hanter & demourer, & ne voyent pas ce qui se presente deuant eux: celuy là me sembleroit opiniastre contre la verité, à faute de comprendre ce qui de là s'en ensuit. S O C L A. Il m'est aduis que ta coniecture est bone. Mais les philosophes Stoïques & Peripatetiques resistent fort & ferme alencontre de ce propos là, disans que la iustice ne pourroit auoir autrement naissance, & que du tout il seroit impossible de soustenir qu'il y eust iustice en ce mode, si lon confesse que les bestes soient aucunement capables de

raison: par ce qu'il est neceſſaire ou que nous com-
mettions iniuſtice en ne les eſpargnant pas, ou ſi
nous ne nous en ſeruons à noſtre nourriture, que
noſtre viure en demeure miſerable & deſtitué des
choſes dont il ne ſe peut bonnement paſſer, &
brief que nous viuions vne vie ſauuage & agreſte,
ſi nous reiettons les profits & commoditez que
nous receuons des animaux. Car ie laiſſe les mil-
liers innombrables de Troglodytes & Nomades,
qui ne cognoiſſent autre nourriture que la chair
ſeule, & non autre choſe: mais nous qui ſemblons
mener vne vie douce, ciuile & humaine, quelle
ſorte d'ouurage nous reſtera plus à faire en la ter-
re, quelle en la mer? quel meſtier à exercer parmy
les montagnes? quel ornement & embellifſement
y aura il plus de noſtre vie, ſi nous prenons ceſte le-
çon pour vraye, qu'il nous faille reſpecter les ani-
maux, & vſer de toute equité enuers eux, comme
eſtans raiſonnables & de meſme extraction que
nous: certainement il ſeroit bien mal-aiſé de le di-
re. Il n'y a doncques reſponſe ny ſolution quel-
cōque à ceſte doubte & difficulté qui oſte ou l hu-
manité, ou la iuſtice de la vie de l'homme, ſi nous
ne gardons l'anciene borne & loy qui ſepare, com-
me dit Heſiode, les natures, & diſtingue à part l'un
de l'autre les deux genres,

Manger l'un l'autre eſt propre des oiſeaux,

Des animaux de la terre & des eaux,

Car point n'y a parmy eux de iuſtice,

Aux hommes ſeuls Dieu en donna notice.

Or puis qu'ils ne peuvent vſer de iuſtice enuers
nous,

A nous, il est tout certain qu'aussi ne pouuons nous
vser d'iniustice enuers eux : & ceux qui reiettent
ceste conclusion & resolution, ne laissent vsage
quelconque, non pas le chemin simplement, par
où la iustice peust entrer parmy nous. A V T O B V.
Certainement amy, tu as bien dit cela au gré &
selon le cœur de ces hommes la, toutefois si ne leur
faut il pas ainsi conceder, ny faire comme lon fait
aux femmes qui sont en trauail d'enfant, ausquel-
les on attache quelque drogue pour les aider à se
deliurer vistement de leurs enfans, en concedant à
B ces philosophes la, qu'ils enfantent ainsi facilemēt
& sans peine la iustice, attendu mesmement que
és points les plus importans de toute la philoso-
phie, eux ne veulent pas donner ny conceder à E-
picurus vne si petite & si legere chose, comme est
la moindre declinaison & deuoyement d'un seul
atome, c'est à dire, des petits corps indiuisibles,
pour luy laisser introduire en ce monde les estoil-
les, les animaux & la fortune, & pour sauuer nostre
liberal arbitre : car il faut prouuer & démonstrer
ce qui est douteux, ou supposer ce qui est de foy
C tout manifeste, non pas cest article touchant les
animaux, pour establir la iustice, puis qu'on ne
leur concede point, ny eux ne le demonstrēt point
autrement : car il y a vne autre voye & autre che-
min pour amener la iustice entre les hommes, qui
n'est ne si dangereux, ne si roide, ny ne passe atra-
uers la subuersion & destruction des choses toutes
euidentes, ains par vn autre sentier plus doux, que
mon fils, l'un de tes familiers, Soclarus, l'ayant

appris de Platon, enseigne à ceux qui ne veulent point opiniastrément contester, ains suiure la raison, & apprendre. Car que l'homme ne soit pas totalement exempt & net d'iniustice, en traittant les animaux ainsi comme il fait, Heraclitus & Empedocles le reçoient comme veritable, se plaignans en plusieurs endroits, & reprochans à la nature, qu'elle est vne force & vne guerre qui procede par contrainte, qui n'a rien de simple, ny de pur & de net, ains fait ses operations avec plusieurs & iniustes accidens, attendu qu'ils tiennent que la generation mesme se fait avec iniustice, par conionction du mortel avec l'immortel, s'eslouiissant ce qui est engendré d'oster & arracher contre nature les membres à ce qui l'engendre : toutefois cela semble vn peu trop cru & trop aspre. Mais il y a vne autre conciliation & solution plus gracieuse, qui n'oste pas du tout l'usage de la raison aux animaux, & sauue la iustice en ceux qui en vsent ainsi qu'il appartient : laquelle moienne voye aiant iadis esté introduite par de bons & sages hommes, a depuis esté reiettee & de tout point destruite par la conspiration de la gourmandise & de la friandise, encore l'a depuis voulu remettre sus Pythagoras, enseignant aux homes à se seruir des bestes, & en tirer vtilité, sans vser d'iniustice, ny leur faire tort. Car ceux qui punissent & font mourir les bestes sauues qui n'ont aucune societé ny communication avec l'homme, ains luy font beaucoup de dommage, ceux la ne cōmettent aucune iniustice : aussi ne sont pas ceux qui drellent & qui domtent les priuees

Auees & familiares, en se seruant d'elles, & les em-
ploiant aux seruices où elles sont de leur nature
plus propres, comme cheuaux, asnes, bœufs, & tau-
reaux, lesquels Prometheus en vne tragedie d'Æs-
chylus dit, nous auoir esté donnez par Iupiter pour
nous seruir & aider en noz labeurs: ny ceux qui
vsent des chiens pour garder leurs troupeaux de
chéures & de brebis, ny ceux qui en tirent le lait,
ou en tondent la laine, mesmement de celles qu'ils
paissent & qu'ils nourrissent: car ce n'est pas à dire
que lon destruisse ny que lon ruine la vie des hom-
Bmes, fils n'ont les plats pleins de poissons, & les
foyes des oyes, & fils ne decouppent par pieces les
bœufs & les cheureaux pour faire leurs festins, & si
pour passer leurs temps aux ieux des Theatres, ou
se dōner du plaisir à la chasse, ils ne contraignēt les
vnes de combattre à eux maulgré qu'elles en aient,
& ne font mourir les autres qui n'ont point de de-
fense, & ne leur peuuent faire aucune resistance.
Car celuy qui se veut iouer & prendre son plaisir,
il faut par raison, ce me semble, qu'il le face avec
ceux qui se iouēt, & s'esjouissent du mesme pas-
Csetemps comme luy, non pas faire comme disoit
Bion, que les petits enfans se iouoient à ietter des
pierres aux grenouilles, mais que les grenouilles
ne prenoient point de plaisir à ce ieu la, d'autant
qu'elles en mouroient à bon escient: aussi ne fau-
droit il pas chasser ne pescher pour prendre plaisir
de la douleur, & encore moins de la mort d'au-
truy, ny à emmener les fans & les petits à leurs me-
res, chose qui est pitoyable à veoir, car ce ne sont

pas ceux qui vsent des bestes qui cōmettent iniusti-
ce, mais ceux qui en abusent outrageusement sans
respect quelconque, & cruellemēt. S O C L A. Ar-
reste toy vn petit, Autobulus, & remets à vne au-
tre fois ton accusation : car ie voy venir plusieurs
ieunes hommes tous grands chasseurs, & aimans
le deduit de la chasse, lesquels il ne seroit pas aisé de
remettre à vne autre assignation, & si n'est ia be-
soin de les ennuyer. A V T O B V L V S. Tu dis la
verité, & treuve bon ton aduis. Ie cognois bien
Eubiotus & mon nepueu Ariston, & les deux en-
fans de Dionysius de la ville de Delphes, Æacides
& Aristotimus, & puis Nicander fils de Euthy-
damus,

Tous entendus à la chasse de terre,
comme dit Homere. Et pour ceste cause ils seront
tous du costé de Aristotimus : comme aussi au cō-
traire ces autres cy qui sont nez dedans les Isles, ou
bien au long de la marine, Heracleon de la ville de
Megare, & Philostratus de l'Isle d'Eubœe,

Se cognoissans au faict de la marine,
Suiuent & accompagnent ton Phēdimus,

De Tydides on ne scauroit iuger,

Desquels plustost il se voudra rengier.

i'entens d'Optatus nostre compagnon d'aage, qui
souuent a honoré Diane des primices de la chasse,
tant des montagnes que de la marine : aussi l'ap-
pelle lon tantost Agrotera, comme qui diroit chā-
pestre, à cause de la chasse des forests & des chāps:
& tantost Dictynna, c'est à dire, aimant les fi-
lets, à cause de la chasse de la mer. Voy-le-cy ve-

A nir droit à nous, comme celuy qui ne se veult ren-
ger plustost d'un costé que de l'autre. Ne conie-
cturons nous pas bien Optatus que tu seras arbi-
tre & iuge commun entre ces ieunes gens? O P T.
Tu as fort bien deuiné, Autobulus, car il y a desia
long temps que la loy de Solon est abolie, laquelle
punissoit celuy qui en vne sedition ciuile ne se ioi-
gnoit à l'une des parties. A V T O B. Vien d'ocicy te
seoir aupres de nous, à fin que si nous auons besoin
de tesmoignage il ne nous faille point aller feuille-
ter les liures d'Aristote, par ce que nous nous en

B rapporterons & tiédrons à ce que tu en diras, pour
la grande cognoissance que tu en as, & ainsi nous
iugerons iustement & veritablement. Or sus ieu-
nes seigneurs, auez vous faict quelque accord en-
tre vous, touchant l'ordre à qui il touchera de par-
ler le premier? P H A E D I M V S. Ouy, Soclarus,
nous en auons assez longuemēt debattu, & à la fin
le sort, enfant de la fortune, comme dit Euripides,
a voulu que la cause des bestes de la terre fust la
premiere plaidee deuât celle des bestes de la mer.
Il est doncques temps, Aristotimus, que tu com-
C mences à parler, & nous à ouir.

*En cest endroit y a vne grande defectuosité en l'origi-
nal Grec, qui ne se peult remplir sans le secours de
quelque vieil exemplaire.*

Le barreau est pour ceux qui plaident. Les autres
perdent leur semence & geniture, en courant
apres leurs femelles lors qu'elles sont prestes à
faire leurs petits. Et y a vne espee de mulets, que
lon appelle Pardiens, qui se nourrissent de leur

morce. Le Poulpe se mange soy mesme, demourant tout l'hyuer

En maison froide, & vie miserable, tant il est paresseux, grossier & gourmand, ou le tout ensemble. C'est pourquoy Platon en ses loix defend, ou plus tost souhaite, que les ieunes gens ne s'addonnent point à la chasse de mer, d'autant qu'il n'y a point d'espreuve de hardiesse ny d'exercice d'entendement, & n'employe lon point ny la force, ny la vistesse, ny l'adresse du corps à combattre contre les Bars, les Congres ou les Scares, comme lon fait à la chasse de terre, là où les bestes courageuses exercent la hardiesse de ceux qui les combattent, les ruses aguissent & excitent la prudence, le soing & la diligence de ceux qui entreprennent de les auoir, les legeres & vistes espreuent la disposition du corps & patience aux labeurs de ceux qui les poursuivent, & c'est ce qui rend la chasse honnestes & recommandable, là où au contraire le pelcheur n'a rié qui le puisse mettre en reputation d'honneur: aussi ne voit on point qu'il y ait eu des Dieux qui se soient fait appeller Congroctonos, comme qui diroit, tueur de Congres, ne qui en aient fait gloire, comme lon nomme Apollon Lycoctonos, qui signifie tueur de Loups: ny Triglobolos, c'est à dire, tirant aux Rougets barbez, comme lon surnomme Diane Elaphebolos, c'est à dire, tirant aux cerfs. Et n'est pas de merueille, par ce que mesme il est plus honorable à vn gentilhomme de prendre vn sanglier, vn cerf, ou cheureul, voire vn lieure, que non pas de l'achepter: & au

con-

A contraire il luy est plus honeste d'aller à la place
achepter vn Thon, vne Langouste, ou vn Boni-
ton, par ce que leur couardise, faute de sens, de cō-
duitte & d'entendement, en rend la prise vtile,
mais non louee, requise ny estimee. Mais en som-
me, pource que les preuues & argumens, dont les
philosophes vsent pour prouuer que les bestes
ont quelque discours & vsage de raison, sont leurs
elections de preferer vne chose à vne autre, leurs
prouisions & preparatifs, leurs souuenances, leurs
affections, le soing qu'elles ont de leurs petits, leurs
B recognoissances vers ceux qui leur font du bien,
leur haines & rancunes alencontre de ceux qui
leur ont fait du mal, l'industrie de trouuer les cho-
ses qui leur sont necessaires, apparée de vertu, cō-
me de hardiesse, d'equité, de temperance & de ma-
gnanimité: Considerons les animaux maritimes, si
nous y verrons rien qui soit de tout cela, sinon vn
bien peu de ressentiment, en quelques vns, encore
fort obscur & fort difficile à apparcevoir, quelque
diligence que lon face de le rechercher, là où aux
terrestres on en peult veoir & remarquer infinis
C exemples & preuues toutes euidentes, claires &
certaines en chascune d'icelles vertus. Premiere-
mēt voyons les premisses & preparatifs, que font
les Taureaux auant que d'entrer au combat, com-
ment ils iettent & respandent la poulciere alen-
tour d'eux, & les sangliers, quand ils aguissent leurs
defenses, & les Elephans, pource que l'vne de leurs
dents, avec laquelle ils fouillent, arrachent &
tondent les herbes, plantes & racines, dont ils se

nourrissent, en est ordinairement mouffe, vsee & despointee, ils cõtregardent tousiours l'autre pointue & affilee, pour s'en seruir aux combats: & le Lion, quand il chemine par les champs, marche tousiours avec les pieds clos, pour cacher ses ongles au dedans, de peur qu'estans vsez ils ne viennent à perdre leur pointe, & aussi de peur qu'il ne laisse aucune cognoissance à ceux qui le suyuent à la trace: car à peine trouuerez vous iamais la trace de l'ongle du lion, ains seulement de petites marques de son pied bien peu apparentes, à fin que ceux qui vont apres les faillent, & ne les puissent rencontrer. Vous auez assez ouy dire de l'Ichneumon ou rat de Pharaon, comment il s'arme, ne plus ne moins que feroit vn champion qui iroit pour combattre en champ clos, tant il munir son corps, l'enduit & le crouste tout alentour d'un fort halecret ou cuyrassé de limon, quand il veut combattre le crocodile. Nous voions tous les iours les prouisions que font les hirondelles auant que faire leurs petits, comment elles mettent dessoubs premierement les plus gros & plus durs festus, pour faire le fondement, & puis y entrelassent d'autres plus deliez: & fils voient que leur nid ait besoing de limon gluant & collant, elles volent à fleur d'eau sur les eaux des riuieres ou de la mer, mouillans vn petit leurs eiles, tant qu'elles en soient seulement vn peu moittes, & non pas chargees d'humidité, & puis prenās de la poulciere, elles en plastrent & lient ce qui se lasche en leurs nids, ou qui menasse de ruine: & quant à la

forme

A forme & figure, elles ne les font point à plusieurs faces ny à plusieurs encongneures, ains egalelement vnys par tout, approchant le plus qu'elles peuuent de la forme ronde, comme est vne boule, pource que c'est la plus propre pour faire tenir fermemēt, & la plus capable au dedans, & qui donne moins de prises aux autres bestes qui leur voudroiēt courir sus du dehors. Et les ouurages de l'aragnee, dōt les femmes ont pris le patron pour ourdir leurs toiles, & les chasseurs pour brocher leurs pans de rets, font grandemēt à esmerueiller pour plusieurs

B raisons: premierement pour la subtilité des filers, qui ne sont point distincts l'un de l'autre, ny régez tout du long, comme l'estaim à la tiffure d'une toile, ains s'entretiennent, comme vne taye toute vnies, collee avec ie ne sçay quelle humidité gluante, qui est imperceptiblement meslee parmy, & puis le taint & la couleur qui fait paroïr de loing que ce ne soit qu'un air espais & obscur, à fin que moins on s'en apparçoïue, mais sur tout la conduitte & le gouuernemēt de celle machine & pantherre, quād quelque bestiole de celles qui s'y peuuent prendre

C vient à donner dedans, elle le sent incontinent, & sçait aussi tost tirer & amener tout le pan de rets ensemble, comme sçauroit faire le plus habile & le plus suffisant veneur qui soit au monde: tout cela, pource qu'on le voit, & qu'il se presente tous les iours deuant les yeulx, on le croit: autrement on estimeroit que ce fust vne fable, aussi bien que celle des corbeaux de la Barbarie, lesquels quand ils ont soif, & que l'eau où ils veulent boire est trop

basse, ils iettēt des pierres dedās pour la faire monter iusques à telle haulteur qu'ils y puissent atteindre: aussi me suis ie quelquefois grandement esmerueillé, voiant vn chien dedans vne nauire, pendant que les mariniers n'y estoient pas, ietter des petits cailloux dedans vne cruche qui n'estoit pas du tout pleine d'huyle, m'esbahissant cōme il pouuoit faire ce discours en son entendement, que l'huyle monteroit par force, quand les cailloux qui estoient plus pesants seroient deuallez au fond de la cruche, & que l'huyle qui estoit plus legere leur auroit cedé la place. Autant en pourroit on dire des abeilles de Candie, & des oyes de la Cilicie: car celles la aians à doubler vne pointe de terre sur la mer, qui soit vn peu subiecte aux vents, portent sur elles de petites pierrottes pour s'affermir, ne plus ne moins que lon met l'estage au fond des nauires, pour les tenir fermes & droittes, à fin que le vent ne les emporte oultre leur gré: & celles cy craignans les aigles qui ont leurs aires dessus les haults rochers, quand elles veulent trauerser le mont de Taurus, prennent en leur bec chascune vne assez grosse pierre pour brider de ceste façon de mors leurs bouches, pource que de leur nature elles sont cryardes, & aiment à caquetter, à fin que sans ietter aucun son, ny aucun cry, elles puissent passer oultre la montagne seurement. L'ordonnance mesme que les grues gardent en leur vol fait à esmerueillir grandement, car quand l'air est trouble, & qu'il fait grand vent, elles ne volēt pas comme quand il fait beau temps, & que l'air est calme

A & ferein, toutes de front, ou bié en forme de croissant, ains au partir se rengent en triangle, & avec la pointe fendent le vent qui soufflé alentour, à fin que leur ordonnance rengee ne puisse estre rompue : puis quand elles sont posees en terre, celles à qui il touche de faire le guet la nuit se soustienent de bout sur vne seule iambe, & de l'autre pied tiennent vne pierre en l'air, car le serrer du pied pour retenir la pierre les maintient longuement sans dormir, & quand elles viennent à lascher prise, la pierre tombant les esueille : de maniere qu'après auoir veu cela, ie ne m'esmerueille pas fort d'Hercules, si aiant son arc dessous son aixelle, & l'embrassant de son fort & puissant bras,

Il dort tenant sa massue ferree

En sa main droicte estroittement serree.

Comme aussi peu suis ie esbahy de celuy qui premier s'aduisa du moien de faire ouurir vne huytre close, car il l'auoit appris de la ruse du heron, lequel quand il a auallé vne huytre ou vne coquille close, encore qu'elle luy face mal, il l'endure & la tient dedans son gisier, iusques à ce qu'il sent qu'elle se famollit, & s'ouure pour la chaleur, & lors il la reuomit toute ouuerte, & en tire ce qu'il y a de bon à manger. Quât aux prouisiôs & aux mesnages des fourmis, d'expliquer le tout par le menu il seroit presque impossible, ou à tout le moins bié difficile : mais aussi de passer par dessus, sans en dire rien du tout, seroit vne trop lasche negligéce, pource qu'en toute la nature n'y a point de si petit mirouer qui represente de plus belles & de plus grandes cho-

ses, estant là, comme en vne goutte pure & net-^D
 te, la naïfue representation de la vertu toute entie-
 re. Là se voit l'amitié, la societé, là se voit l'image
 de vaillance & de prouesse en leur patience de la-
 beur, là se monstrent plusieurs semences de conti-
 nence, plusieurs marques de prudence, & plusieurs
 apparences de iustice. Le philosophe Cleanthes,
 encore qu'il maintienne que les bestes n'ont point
 d'usage de raison, raconte neantmoins qu'il s'est
 trouué present à voir vn tel spectacle: il dit qu'il y
 auoit vn nombre de fourmis qui alloient à vne au-
 tre formilliere que la leur portans le corps d'vn ^E
 fourmi mort, quelques vns de la formilliere sorti-
 rent au deuant d'eulx, comme pour parler à eulx,
 lesquels vn peu apres redescendirent dedans, &
 puis remonterent, & firent cela par deux ou trois
 fois iusques à ce que finablement ils apportèrent
 d'abas vn verin, comme pour la rençon du mort,
 que les autres chargerét dessus leurs espaules, apres
 auoir rendu le mort, & s'en retournerét chez eulx.
 Au demourant c'est chose que tous les iours chas-
 cun peult voir à l'œil, l'honnesteté grande, dont ils
 vsent les vns enuers les autres quand ils s'entrenten-^F
 contrent, comment ceulx qui ne sont point char-
 gez cedét le chemin à ceulx qui le sont, & leur font
 voye pour passer, & comment ils rongent les far-
 deaux qu'ils ne peuuent porter tous entiers, tant
 qu'ils les mettent en pieces, à fin qu'ils les,puissent
 plus aiseemét porter & transporter de lieu à autre,
 estants plusieurs. Aratus en ses prognostiques met
 pour vn signe de pluye, quand ils estandent au de-
 hors

A hors à l'air leurs grains & semences pour les euen-
ter, refreschir & seicher :

Où les fourmis de soigneuse maniere,

Portent leurs œufs hors leur creuse tasiere:

cōbien qu'en ce passage, aucūs ne lisent pas *où*, qui
est à dire œufs, mais *où*, comme s'ils vouloient dire
leurs biens, c'est à dire les biēs qu'ils ont amassez &
ferrez pour leur prouision, quand ils voient qu'ils
cōmencent à se moyrir, & à sentir le rance, & qu'ils
craignēt qu'ils ne se corrópent & pourrissent, mais
la caution & preuention, dont ils vsent à ronger le
B grain du froment, surpasse toute imagination de
prudence humaine, par ce que le froment ne de-
meure pas tousiours sec, ny sain, ains s'amollit, & se
résout & detrempe cōme en laiēt, se tournāt à ger-
mer & produire: parquoy de peur qu'il ne deuiēne
semence, & perde sa nature & propriété de moni-
tion pour leur nourriture, ils rongēt le bout par où
le germe a acoustumé de sortir. Quant à moy, ie
ne reçoÿ pas tout ce que disent ceulx qui ont fait
comme vne anatomie de leurs formillieres, mais
ils disent qu'il n'y a pas vne sente toute droite
C pour descendre par tout au dedans, & qui soit fa-
cile à vne autre beste, ains a plusieurs tours & re-
tours par secrettes allees & pertuis obliques, qui se
vont à la fin terminants en trois creux & concaui-
tez, dont l'vne est comme leur maison commune,
où ils se tiennent tous ensemble: l'autre est leur
cellier, où ils serrent & retirent leurs prouisions: &
la tierce, où ils mettent à part leurs morts. Si me
semble que vous ne trouuerez point impertinent,

si apres les fourmis nous mettons en auant les Ele-^D
 phans, à fin que mieux nous cognoissions la nature
 de l'entendement, tant és plus grands, comme és
 plus petits corps des bestes, & que nous cognois-
 sions que si cela apparoiſt bien aux vnes, il ne de-
 fault point aux autres. Or y en aura il qui ſeſba-
 hiront de ce que lon monſtre à l'Elephant, & de
 ce qu'il apprend, ainſi que lon apparçoit par les
 preuues qu'il en fait voir és Theatres, comme les
 cadences d'un bal, les diuers compartiments des
 danſes, qui ne ſont pas aux hommes meſmes bien
 faciles à retenir pour leur ſubtilité & grande diuer-^E
 ſité, quelque peine qu'ils mettent à ſ'y exercer:
 mais quant à moy, il m'eſt aduis que ie voy plus
 clairement la prudence de ceſt animal és paſſions,
 affectionſ & mouuements qu'il prend de luy meſ-
 me, ſans qu'on les luy enſeigne, comme eſtans plus
 naiſſ & plus ſimples: car il n'y a pas long temps
 qu'à Rome on en exercitoit un bon nombre à ſe
 remuer, aller, venir & arreſter, de mouuements &
 arreſts fort difficiles, eſtranges & mal aiſez à de-
 meſſer: mais entre les autres il y en auoit un plus
 groſſier & plus tardif à comprendre, & à retenir,^F
 que les autres, à raiſon de quoy il en eſtoit à tout
 propos iniurié, tenſé & battu ordinairement, il fut
 quelquefois trouué la nuit à part, repetât ſa leçon
 à la lune, & recordant ce qu'on luy auoit enſeigné.
 Agnon recite qu'il y a quelque téps qu'en la Syrie
 on en nourriſſoit un en vne maiſon priuee, ſon
 gouuerneur auoit par chaſcū iour certaine meſure
 d'orge du maiſtre de la maiſon pour le nourrir,
 mais

A mais il luy en soubrayoit & deroboit tous les iours la moitié : aduint que vn iour le maistre de la maison le voulut voir penser, le gouuerneur adonc luy versa deuant la mesure toute entiere : & l'Elephânt le regardât de mauuais œil, separa auec sa trompe, & meit à part la moitié de l'orge, declarât le mieux qu'il pouuoit à son maistre le tort que luy faisoit son gouuerneur. Il racôte aussi qu'un autre, voiant que son gouuerneur luy mesloit de la terre & des pierres parmy son orge, pour faire croistre la mesure, s'approcha du pot où il faisoit au foyeu cuire **B** sa chair pour son disner, & le luy emplit de cédres. Vn autre estant importuné & irrité par de petits garçons, qui luy picquoient sa trôpe avec des poinçons, il en saisit vn par le milieu du corps, qu'il enleua de sorte, que lon pensoit qu'il le deust creuer, tellement que ceux qui le veirent, se prirent incontinent à cryer, mais il le remeit tout doucement au mesme lieu où il l'auoit pris, & passa outre sans luy faire autre mal, comme iugeant que c'estoit assez de punitiō pour vn tel enfant, que de luy auoir fait belle peur. Et quant aux sauages qui viuent **C** my les champs, en pleine liberté, on en recite des choses merueilleuses, mesmemēt quant au passage des riuieres : car le plus ieune & le plus petit d'entre eulx, se hazardant pour tous les autres, passe le premier : les autres le regardent faire de dessus la riuē, faisans leur cōpte, que si luy qui est le moindre & le plus bas, surmōté de sa hauteur la profondeur de la riuē, eulx qui sont plus grāds & plus haults, n'aurent occasion quelconque de rien craindre,

& qu'il y aura toute feureté pour eulx. Mais puis D
 que ie suis tombé sur ce propos, ie ne veux pas ou-
 blier à vous alleguer l'exemple du regnard, pour la
 conformité qu'il y a avec ceste ruze la. Ceulx qui
 ont inuenté les fables, disent, que durant le deluge
 Deucalion laschoit la coulombe, quand il vouloit
 sçauoir quel temps il faisoit, par ce que fil faisoit
 encore tēpeste & temps de pluies, elle s'en retour-
 noit en l'arche, & quand le beau temps fut reuenu,
 elle s'en vola du tout, & ne retourna plus : mais les
 Thraciens encore iusques au iourd'huy, quand ils
 veulent entreprendre de passer quelque riuiera E
 gee par dessus la glace, ils prennent vn regnard
 pour leur guide à sonder si la glace est assez forte &
 puissante pour les porter: ce regnard s'approchant
 de la riuiera, apporte l'oreille tout contre la glace,
 & si par le bruit de l'eau courante dessous la glace
 bien pres de son oreille il cōiecture qu'elle ne soit
 pas assez espesse & assez profondement gee, il
 s'arreste ou s'en retourne, si on luy permet : au con-
 traire, s'il n'entend point bruire l'eau courante des-
 sous, il passe outre hardiment. Or ne sçaurions
 nous dire que cela soit seulement vne viuacité du F
 sentiment de l'ouye, sans aucun discours de raison:
 car c'est vne ratiocination & consequence tiree du
 sens naturel en ceste sorte, Ce qui fait bruit se re-
 mue, ce qui se remue n'est pas gelé, ce qui n'est pas
 gelé est liquide, ce qui est liquide plie sous le faix,
 & ne tient pas ferme. Les Dialecticiens mesmes
 tiennent que le chien se trouuant en vn carrefour
 diuisé en plusieurs chemins vse de l'argumētation
 qui

A qui s'appelle, suffisante enumeration des parties, discourant ainsi en soy mesme, Il fault que la beste que ie chasse soit passée par l'un de ces chemins icy: or n'est elle pas allée par celuy la, ny par celuy la, elle est doncques passée par cestuy cy: car le sentiment du nez ne luy dōne intelligence que des premisses, & le discours de la raison luy donne à entendre la necessité de la consequence & de la conclusion. Mais le chien n'a que faire de ce tesmoignage des Dialecticiens, car il est faulx & mensonger, par ce que c'est l'odorement & sentiment du nez qui par la trace du pied, & par la fluxion de l'odeur issant de la beste luy monstre par où elle a fuy, sans se soucier des propositions diuisees ne conioinctes, ny de la suffisante enumeration des parties: mais par plusieurs autres effects, passions, offices & actions qui ne procedent ny du sens de la veüe, ny de celuy de l'odorement, ains seulement de l'intelligence & du discours de la raison, peut on assez apperceuoir & comprendre quelle est la nature du chien, duquel si ie voulois presentement alleguer & deduire deuant vous la creance, l'obeissance, les ruzes, la patience & tolerance de traualx à la chasse, ie me ferois mocquer, attendu que vous le voyez, l'experimentez & le pratiquez vous mesmes tous les iours: mais bien allegueray-je, que durant les guerres ciuiles à Rome, aiant vn citoyen Romain esté tué, les meurtriers ne luy peurent iamais couper la teste, que premierement ils n'eussent fait mourir son chien à coups de pointe, qu'ils luy donnerēt tout alenuiron. Pyrrhus allant

par pais rencontra vn chien qui gardoit le corps de son maistre que lon auoit tué, & entendant des habitans qu'il y auoit desia trois iours qu'il estoit au pres sans en bouger, & sans boire ny manger, commanda que lon enterrast le mort, & amenast le chien quand & luy, & qu'on le traittast bien. Quelques iours apres on vint à faire la monstre & reueüe des gents de guerre, passants par deuant le Roy qui estoit assis en sa chaire, & auoit le chien au pres de luy, lequel ne bougea aucunement iusques à ce qu'il apperceut les meurtriers qui auoiēt tué son maistre, ausquels il courut sus incontinent avec grands abbois & grande aspreté de courroux, en se retournant souuent deuers Pyrrhus, de maniere que non seulement le Roy, mais aussi tous les assistans entrèrent en suspicion grande, que ce deuoient estre ceux qui auoient tué son maistre: si furent arrestez prisonniers, & leur proces fait ladesus, ioinct quelques autres indices & presumptions que lon eut d'ailleurs alencontre d'eulx, tellement qu'à la fin ils aduouèrent le meurtre, & en furent punis: autant en feit le chien, du sage Hesiode, à ce que lon dit aiant conuaincu les enfans de Ganystor Naupactien d'homicide commis en la personne de son maistre. Mais ce que noz peres ont veu pendāt qu'ils estoient aux estudes à Arhenes, est encore plus euident que tout ce que nous auons dit. C'est, qu'un sacrilege f'estant coulé dedās le tēple d'Æsculapius y derobba les plus beaux & les plus riches ioyaux d'or & d'argēt qui y fussēt & pensant n'auoir esté descouuert ny apperceu de
 personne

A personne, trouua moien de s'en sortir : le chien qui estoit pour la garde du temple que lon appelloit Capparos feit bien son deuoir d'abbayer , mais voiant que personne des margueilliers ne venoit, il se meit à poursuiure & aller apres le sacrilege qui s'en fuyoit : & combien qu'il luy iettaist des pierres, nō pour cela il ne laissoit pas de le poursuiure tousiours: quand le iour fat venu , il ne s'approcha pas pres de luy, ains le suyuit tousiours de l'œil , ne le perdant iamaïs de veüë : s'il luy iettoit du pain à māger, il n'en vouloit point: s'il se couchoit la nuict

B pour dormir, il demouroit toute la nuict aupres de luy, puis quand il se leuoit le matin pour cheminer, il se remettoit à le suyure : aussi s'il rencontroit des passants, il les caressoit, & leur faisoit feste à tous de la cueüë : & au contraire il abbayoit fort asprement au larron, & luy couroit sus: quoy entendu, ceulx qui eurent la charge d'aller apres pour chercher le sacrilege, s'informans de ceulx qu'ils rencontroient par le chemin, de quelle grandeur & de quel poil estoit le chien , continuerēt leur poursuite de tant plus chaudement, tant qu'ils attraperent le larron en la ville de Crommyon, de là

C où ils le ramenerent à Athenes, le chien marchant denant eulx, faisant la plus grande feste, & demenant la plus grand' ioye du monde, comme s'il se fust glorifié d'auoir esté cause de faire prendre le larron. Les Atheniens aians entendu toute la verité du faict, ordonnerent qu'il auroit du public certaine mesure de bled pour le nourrir, & enioignirent aux presbires du temple d'en auoir le

soing tant qu'il viuroit, suyuant en cela l'humanité & liberalité dont leurs ancestres vsèrent iadis enuers vn mulet : car lors que Pericles faisoit bastir le temple de Minerue, appelé Hecatompodon, dedans le chasteau, on y conduisoit tous les iours les pierres & matieres avec force chariots, & charrettes qui estoient tirees par des mules & mulets, comme il est ordinaire : & y en auoit qui autrefois auoient bien seruy, mais pource que lors ils estoient vieux & caduques, on les laissoit aller paistre là où ils pouuoient : entre lesquels y en eut vn qui s'en venoit tous les iours en la rue Ceramique, se mettre deuant ceulx qui trainnoient les pierres à mont & marchoit quand & eulx, comme s'il leur eust donné courage, & les eust excité à trauailler. le peuple d'Athenes louant le gentil cœur de ceste beste, commanda qu'il fust nourry aux despens du publique, luy ordonnant prouision pour viure, ne plus ne moins qu'à vn vieil soudard, qui pour sa vieillesse ne pourroit plus seruir. Pourtant fault il dire que ceulx qui tiennent que nous n'auons aucune communication & societé de iustice avec les animaux, disent verité quant aux aquatiques & marins, qui viuent és profonds abysses des eaux, avec lesquels nous ne pourrions auoir aucune conference d'amitié ny d'affection, comme bestes totalement esloignees de tout sentiment de douleur & de benignité : au moien dequoy Homere parlant d'un homme de nature cruel & farouche, sans aucune participation de bonté, dit sagement, Tu as esté engendré de la mer,

comme

A comme voulant nous donner à entendre, que la mer ne porte ny ne produit animal aucun où il y ait rien d'amour ny de douceur. Mais qui voudroit appliquer ce propos la aux bestes de la terre, il seroit luy mesme sauuage & cruel, sil vouloit nier qu'il n'y ait eu quelque reciprocation d'amitié & de iustice entre le Roy Lysimachus & son chien Hyrcanus, lequel demoura tousiours seul aupres de son corps apres qu'il fut mort, & quand on le brusta, il prit sa course de luy mesme & se ietta dedans le feu, où il fut brulé avec luy: autant

B en fait vn autre, comme lon dit, que Pyrrhus auoit nourry, non pas le Roy, mais vn homme priué: car quand son maistre fut mort, il ne bougea iamais de dessus son liect, & quand on le porta il se laissa enleuer quand & luy, & finalement luy mesme se lancea dedans le feu, & se fait brusler avec luy. Le Roy Porus aiant esté griefuement blecé en la bataille que luy dōna Alexandre le grand, l'Elephant sur lequel il combattoit luy tiroit tout doucemēt, de peur de luy faire mal, avec sa trompe, les dards & tronçons de iauelots, dont il estoit nauré, & ne

C se rendit iamais, que premierement il n'eust senty le Roy son maistre s'esuanouissant, pour la grande quantité de sang qu'il perdoit de tous costez: car alors craignant qu'il ne tombast de sa haulteur à terre, il se baissa tout bellement, à fin de luy donner moien de se coucher par terre sans se faire mal: & le cheual d'Alexandre, Bucephal, quand il estoit nud enduroit bien que le palefrenier montast à poil dessus luy, mais quand il estoit paré de ses har-

nois royaux, & de ses riches colliers, il n'en souffroit pas vn monter sur luy, qu'Alexandre tout seul: & si d'autres s'efforçoient d'y monter, il leur couroit sus en ronflant & hennissant, & se charbroit contre eux, & les fouloit aux pieds s'ils ne se hastoient bien vistement de se tirer arriere, & de s'en fuir. Je sçay bien que ces exemples vous auront à l'aduenture semblé meslez d'une varieté confuse, mais il n'est pas facile de trouuer aucune action des nobles animaux qui ne nous represente qu'une seule vertu: car parmy leur amitié se voit ne sçay quoy de cupidité d'honneur, atravers leur ^E generosité se voit vne sagesse, & leur ruze & finesse n'est point sans vne courageuse magnanimité: toutesfois qui les vouldra separer & diuiser les vnes des autres, les lions nous monstrent exemple de cœur humain & hault tout ensemble, quand ils se destournent & passent oultre ceulx qui s'abaissent & s'humilient deuant eulx, suyuant ce que dit Homere en vn passage,

Avec grands cris les autres accoururent,

Mais Vlysses assis ne s'en esmeut,

Ains de la main le sceptre à bas luy cheut. ^F

Car ils ne combattent plus contre ceux qui se prosternent deuant eulx, & qui monstrent semblant de s'humilier. On raconte d'un chien Indique, des plus excellents qui fussent en tout le païs, que l'on enuoya par singularité, pour le faire combattre deuant le Roy Alexandre, que quand on luy lascha vn cerf premierement, & puis vn sanglier, & puis vn ours, il n'en fit compte, & ne s'en daigna pas remuer

A remuer de sa place, mais quand il veit vn Lion qu'on luy presenta, alors il se dressa incontinent sur ses pieds & se prepara pour le combattre, declarant manifestement qu'il estimoit celuy la seul digne de combattre contre luy, & qu'il mesprisoit tous les autres: & quant aux nostres ceulx qui courent les lieures s'ils les tuent eulx mesmes, ils sont bien aises de les deschirer, & en lechent & lappent le sang bien gouluëment, mais si le lieure se desesperant comme il aduient souuentefois employe tout ce qu'il a d'halene en l'effort d'une derniere

B course, tant qu'il estouffe sur la place, les chiens le trouuans mort n'y veulent point toucher, ains se tiennent tous alëtour remuans la queue, côme s'ils vouloient dire, que ce n'est pas pour en māger la chair, mais pour gaigner le pris de la course, qu'ils ont combattu contre luy. Quant aux ruses & astuces, d'autāt qu'il y en a infinis exēples, ie laisseray celles des regnards, des loups, des grues, & des geais, pour ce que chascun les sçait & les voit, mais i'ameneray seulement le tesmoignage du sage Thales, le plus ancien des sept, qui fut fort aise d'auoir descouuert

C & affiné la ruse d'un mulet: car il y auoit vne troupe de mulets qui portoient du sel de lieu à autre, entre lesquels vn en passant vne riuiera tomba par cas fortuit dedans l'eau: le sel aiant esté trempé dedans l'eau se fondit pour la plus part, de maniere que le mulet se releuant se trouua fort allegé de sa charge, & en cōprit aussi tost la cause, qu'il imprima bien en sa memoire, tellement que toutes & quātes fois qu'il passoit la riuiera il se baissoit expressément,

& trempoit les vaisseaux où estoit contenu le sel **D**
 qu'il portoit, en se couchant tout de son long sur
 vn costé & puis sur l'autre. Thales aiant entendu
 sa malice, commanda au muletier qu'au lieu de sel
 on luy emplist ses vaisseaux d'autant pesant de lai-
 ne & d'esponges, & qu'on les luy chargeast sur le
 dos, & qu'on le chassast quand & les autres: il ne
 faillit pas à faire comme il auoit accoustumé, &
 aiant rempli ses vaisseaux & sa charge d'eau, il co-
 gneut que sa ruse luy estoit dommageable, de ma-
 niere que de là en auât il se teint debout, & se don-
 na bien garde qu'en passant la riuiera ses vaisseaux **E**
 ne touchassent pas seulement au dessus de l'eau,
 non pas mesme mal-gré luy. Les perdris vsent d'v-
 ne autre astuce, qui procede d'vne amour & chari-
 té maternelle enuers leurs petits, auxquels quâd ils
 sont encore si foibles qu'ils ne peuuent voler pour
 fuir, & qu'on les poursuit, elles enseignent à se iet-
 ter sur le dos à la renuerse, & à se parer de quelque
 motte de terre, ou de quelque paille & chose sem-
 blable, & elles ce pendât destournent ailleurs ceux
 qui les poursuuēt, & les attirēt apres elles en volât
 deuant eulx çà & là, & se trainnant comme si elles **F**
 estoient arrenées, & qu'elles eussent peine à se leuer
 seulement hors de terre, pour faire penser qu'elles
 soiēt toutes prestes à estre prises, iusques à ce qu'el-
 les aient ainsi esloigné les poursuuans bien loing
 arriere de leurs petits. Et les lièvres se retirans en
 leurs gistes portēt leurs petits leuraux l'un d'un co-
 sté l'autre d'un autre, tant qu'il y a bien souuent vn
 arpēt de distâce entre les deux, à fin que si d'aduen-
 ture

A ture il y suruient homme ou chien, ils ne soient pas en danger d'estre pris tous à vn coup, & eulx apres auoir bien esgaré leur trace en courât & racourant çà & là, à la fin ils font vn grand sault le plus loing qu'ils peuuent de leur trace, & puis se couchent en leur giste. Semblablement l'ours quand il se sent espris de la maladie que lon appelle Pholia, qui est vne graisse endormie, deuant qu'il soit du tout oultré & deuenu si pesant qu'il ne se puisse plus remuer, il nettoye le plus qu'il peut le trou auquel il propose de se retirer, & quand il y veut descendre il chemine le reste du chemin le plus legerement à pas suspendus qu'il luy est possible, ne touchant à terre que du bout des pattes seulement, puis quand il en est pres, il se met sur le dos, & trainne ainsi son corps iusques au dedans de sa cauerne. Les bisches font ordinairement leurs fans au long des grands chemins, pour ce que les bestes rauissantes qui viuent de proye n'y hantent pas ordinairement, & les masses quand ils se sentent trop gras & chargez de venaison, ils forpaissent, prouoyans à la seureté de leur vie par se cacher, c quand ils n'ont plus de fiance au courir. Quant aux herissons de terre, la prudence dont ils viuent pour se garder & defendre a fait naistre le proverbe qui dit,

Le regnard sçait de bons tours vn millier,
 Le herisson vn seul, mais singulier :
 car quand il sent le regnard approcher,
 Il vest son corps arondy comme au tour
 D'vn espineux chardon tout alentour,

Si feurement qu'il n'y a aucun ordre
De le pouuoir pincer au vif ne mordre.

D

Mais encore est plus ingenieuse la prouoyāce dont il vse pour paistre ses petits, car sur l'Automne environ le temps des vendanges il se coule deffous les ceps de vigne, & avec les pieds secouē les grappes des raisins, tant qu'il en fait tomber les grains à terre, puis se roulant dessus, les fiche aux bouts de ses espines: tellement que quelquefois à plusieurs que nous estions le regardans il feist sembler que c'estoit vne grappe de raisin qui rampoit ou qui marchoit, tant il estoit couuert tout alentour de grains de raisins, & puis se coulant dedans sa tasniere il en bailla à ses petits à manger, & à ser-
rer pour leur prouision. Sa tasniere a deux pertuis, l'un tourné deuers le Midy, l'autre deuers le Septentrion: & quand il cognoist qu'il y doit auoir mutation d'air & changemēt de temps, ne plus ne moins que les maistres des nauires chāgent la voile selon le temps, aussi bouche il le trou de sa tasniere qui regarde contre le vent, & ouure celuy qui est à l'opposite: ce que quelqu'un de la ville de Cyzique aiant iadis apperceu, acquit la reputation de
sçauoir bien predire de luy mesme de quel costé deuoit souffler le vent. Quant à la foy & l'amour sociale, les Elephans (ainsi comme le Roy Iuba es-
crit) en monstrent vn grand exemple, pour ce que ceux qui les chassent ont accoustumé de leurs creuser de profondes fosses, lesquelles ils couurent par dessus, avec quelques menues brossailles, & quelques pailles bien legeres. Quand doncques
il y a

E

A il y a quelqu'un qui tombe dedans, ainsi comme ils marchent tousiours plusieurs ensemble par les champs, les autres apportent force pierres & force bois qu'ils iettent dedans la fosse taschât à la remplir, à fin que leur cōpagnon ait moien d'en sortir. Il raconte aussi qu'ils vsent de prieres enuers les Dieux, en se purifiant avec l'eau de la mer, & adorant le Soleil leuant, en haulsant contremont leur trompe, comme si c'estoit leur main, le tout sans que personne leur ait enseigné à ce faire, aussi est-ce le plus deuot & le plus religieux de tous les animaux, ainsi comme le Roy Ptolomeus, surnommé Philopator, iadis le tesmoigna : car apres auoir desfait Antiochus, voulant rendre graces condignes aux Dieux d'une si glorieuse victoire, il leur immola plusieurs victimes & hosties, & entre autres leur sacrifia quatre Elephans : mais depuis se trouuant inquieté & trauaillé la nuict de songes, luy estant aduis que Dieu le menassoit en cholere, pour auoir vsé d'un si estrange sacrifice, il chercha de l'appaiser par plusieurs autres offrandes propitiatoires, & entre autres feit dresser quatre grans Elephans de bronze, au lieu de ceux qu'il auoit immolez. Les Lions aussi ne monstrent pas moins de bonté & d'equité compagnable entre eux, car les ieunes dispos & gaillards meinent quand & eux en queste ceux qui sont desia vieux & pesans, lesquels, quand ils se treuuent las, s'arrestent & se reposent ce pendant que les ieunes vont au loing chasser, & s'il aduient qu'ils rencontrent & qu'ils prennent quelque proye, ils les

appellent avec vn hurlement semblable au mugissement d'un taureau, ce que les vieux entendent incontinēt, & tirant celle part deuorent ensemble la proye qui a esté prise. Quant à leurs amours plusieurs y ont esté farouches & furieux, les autres y sont plus doux & plus gracieux, comme fut celui qui fut corriual du grammairien Aristophanes en l'amour d'une ieune boucquetterie en la ville d'Alexandrie, & ne monstra pas l'Elephant moins son affection que l'homme, car se promenant par le marché où lon vendoit des fruićs, il en prenoit avec sa trompe & les luy portoit, & puis se tenoit long temps deuant elle, & luy mettoit quelquefois sa trompe dedans le sein par deffoubs son collet, comme si c'eust esté vne main, & luy tastoit le tectin & ce qu'elle auoit de beau sur l'estomac. Il y eut aussi vn Dragon qui fut amoureux d'une ieune fille d'Ætolie, & la venoit veoir la nuict, se coulant tout doucement au long d'elle, & l'entortilloit sans luy faire mal ny desplaisir aucun, ny volontairement, ny autrement, & puis se departoit d'avec elle tout bellement enuiron l'aube du iour, & comme il continuast à retourner tous les iours ordinairement, à la fin les parens de la fille l'enuoyèrent arriere de là: le dragon fut trois ou quatre iours sans venir à la maison, errant çà & là pour la chercher, cōme il est à croire, & finablement l'ayant rencontrée il luy lia les mains contre le corps avec les nœuds du sien, & du reste de sa queue il luy battoit les iambes, monstrant vn courroux amoureux, auquel il y auoit plus d'affection de pardonner

A ner que d'enuie de punir. Je ne vous parleray point de l'Oye qui fut amoureux d'un ieune enfant, en la ville d'Asope, ny du bellier aussi qui feit l'amour à vne ieune menestriere, nommee Glaucia, pour ce que ce sont choses toutes notoires, & que desormais ie pense que vous soyiez las d'ouir des côtes. Mais les merles, les corbeaux & les perroquets qui apprennent à parler, & qui baillent à ceux qui les enseignent leur voix & halene si souple & si maniable pour la former & l'estraindre à certain nombre de lettres & de syllabes à leur volonté, me
B semblent plaider assez & defendre suffisamment la cause des autres animaux, nous enseignans par maniere de dire, en apprenant de nous, qu'ils sont capables non seulement du discours interieur de la raison, mais aussi de l'exterieur proferé au dehors par la parole & la voix distincte & articulée, de maniere que c'est vne grande mocquerie de vouloir faire comparaison d'eux à autres sortes de bestes qui n'ont pas tant de voix qu'elles puissent seulement hurler ou gemir, & se plaindre, là où aux
C rames & chants naturels de ceux-cy, qu'ils sonnent d'eux mesmes, sans les auoir appris d'aucuns maistres, il y a de la grace & de la douceur beaucoup, ainsi que le tesmoignent les meilleurs chantres & les plus suffisans poëtes, lesquels comparent leurs poëmes & leurs chansons aux chants des cygnes & des rossignols. Et pour ce que l'enseigner monstre encore plus grand vsage de la raison que ne fait pas l'apprendre, il est bien force de croire que les bestes en ont, attendu qu'Aristote mesme

tesmoigne qu'elles monstrent & enseignent les vnes aux autres : car il escrit que lon a souuent veu des rossignols qui monstroient à chanter à leurs petits, à quoy luy pourroit bien seruir de tesmoignage ce que lon a souuent veu par experience, que les rossignols qui ont esté pris ieunes dedans les nids auant qu'ils fussent acheuez de nourrir par leurs meres, n'en chantent pas si bien, par ce que ceux qui sont nourris par les meres sont quant & quant enseignez, & y apprennent non pour pris d'argent, ny pour la gloire, mais pour ce qu'elles prennent plaisir à bien chanter, & qu'elles aiment mieux la beauté que non pas l'vtilité de la voix: auquel propos ie vous veux reciter vne histoire que j'ay entéduë de plusieurs, tant Grecs que Romains, qui auoient esté presens. En la ville de Rome au deuant du temple que lon appelle Grecoctasis, ou la place des Grecs, vn barbier qui tenoit sa bouttique vis à vis, nourrissoit vne pie qui faisoit merueille de chäter & de parler, contrefaisant la parole des hommes, la voix des bestes, & les sons des instrumens, sans que personne la contraignist à ce faire, ains s'y estant accoustumee d'elle mesme, & faisant gloire de ne laisser rien à dire ny à contrefaire. Or aduint il que lon feit les funerailles de l'vn des plus gros & plus riches personnages de la ville, & emporta lon le corps par la deuant, avec force trompettes & clairons, qui marchoiert deuant : aduint que le conuoy feit vne pause en cest endroit la, & s'y arrestèrent les trompettes faisans grand deuoir de sonner & bien longuement. Depuis

A puis cela tout le lendemain la pie demoura muette, sans siffler ny parler, ny ietter seulement sa voix naturelle, ny son ramage accoustumé en ses ordinaires & necessaires passions, tellement que ceux qui au parauant s'esbahissoient de sa voix & de son parler s'esmerueilloient encore plus alors de son silence, trouuans estrange de passer par la deuant sans luy ouir rien dire, de sorte que lon eut quelque soupçon alencontre des autres maistres du mestier, que lon ne l'eust empoisonnee, toutefois la plus part des personnes estimoient que ce fust la violence du son des trompettes qui luy eust estourdy l'ouyë, & qu'avec l'ouyë la voix ne fust aussi quant & quant demouree estainte: mais ce n'estoit ny l'un ny l'autre, ains estoit, ainsi qu'il apparut depuis, vne estude profonde, & vne retraite en soy mesme, son esprit s'exercitant & preparant sa voix comme vn instrument de musique: car à la fin la voix luy reuint, & se resueilla tout soudain, ne disant rien de tout ce qu'elle auoit accoustumé au parauant de dire ou de contre-faire, sinon le son des trompettes, avec les mesmes reprises, les mesmes pauses, les mesmes muances, & les mesmes cadences: chose qui confirme de plus en plus ce que i'ay dit au parauant, que les animaux montrent plus d'usage de raison à s'enseigner soy mesme, que non pas à apprendre d'autrui: toutefois si ne me puis-je tenir, que ie ne vous recite encore en cest endroit ce que i'ay veu moy mesme apprendre à vn chien. Ce chien seruoit à vn basteleur qui iouoit vne

fiction à plusieurs mines & plusieurs personnages, & y representoit le chien plusieurs choses conuenables à la matiere subiette, mesmemēt l'espreuue que lon faisoit sur luy d'une drogue ou d'une medecine qui auoit force de faire dormir, mais que lon supposoit auoir force de faire mourir, il prit le pain où la drogue estoit meslee, & peu d'espace apres l'auoir auallé il commença, ce sembloit, à trembler & branler cōme s'il eust esté tout estourdy, finablement s'estendant & se roidissant comme s'il eust esté mort, il se laissa tirer & trainner d'un lieu à autre, ainsi que portoit le subiect de la farce: puis quand il cogneut à ce qui se faisoit & disoit, qu'il estoit temps, alors il commença premiere-ment à se remuer tout bellemēt, comme s'il se fust reuenu d'un profond sommeil, & leuant la teste regarda cà & là: dont chascun des assistans fut fort esbahy: & puis se leuant du tout, s'en alla deuers celui qu'il falloit qui le receust, & le carressa: de sorte que tous les assistans, & l'Empereur mesme (car Vespasian le pere y estoit en personne dedans le Theatre de Marcellus) en demourerent tous resiouis. Mais à l'aduenture meriterons nous d'estre **P** mocquez, louans ainsi hautement les bestes, de ce qu'elles sont dociles à apprendre, veu que Democritus mōstre & preuue que nous auons nous mesmes esté leurs apprentifs & disciples és choses principales dont nous auons affaire, comme de l'araignee en la tissure & cousture, de l'arondelle en l'architecture, du cygne & du rossignol en la musique, l'aians apprise à les imiter. Quant est des trois parties

A ties de la medecine, nous en voions la plus grande partie, & ce qu'il y a de plus genereux & de plus noble, en la nature des animaux: car ils n'vsent pas seulement de la partie qui ordonne les drogues pour purger les mauuaises humeurs du corps, cōme les tortues prennent de l'origane, autrement les bellettes quand elles ont mangé d'un serpent prennent de la rue: & les chiens mesmes quand ils sont malades de la cholere ils se purgēt avec l'herbe que lon appelle l'herbe aux chiens: & le Dragon qui esclarcit & fourbit ses yeux avec du fenouil, quād il les a vn peu ternis & esblouis. L'ours sortant de sa cauerne va chercher l'herbe qui s'appelle Arum sauuage, pour ce que le ius d'icelle qui est fort & aspre luy ouure le boyau quand il est estressi & comme pris ensemble: autrement quād il se treuve languissant & degousté pour estre trop gras, il s'en va chercher des formillieres, & s'assiet aupres, tirant vne langue molle & grasse d'une liqueur doulce & gluante, iusques à ce qu'elle soit toute pleine de fourmis & de leurs œufs, puis la retirant il les aualle & s'en guarit. Aussi dit on que c les Ægyptiens ont obserué que l'oiseau qu'ils appellent Ibis, qui est vne Cigogne noire, se donne à elle mesme vn clystere avec de l'eau de la mer, ce que depuis ils ont imité en leurs corps mesmes. Et est certain que leurs prestres prennent de l'eau pour se asperger & sanctifier, dont elle a beu: car si l'eau est enuenimee, ou autrement maleficiée, & dāgereuse & mal saine, elle n'en boit iamais. D'autres animaux se guarissent par abstinence & par

diète quand ils se trouuent mal, comme les loups **D**
 & les lions, quand ils ont trop mangé de chair, ils
 se couchent tout coy, & se reschauffent eux mes-
 mes. On conte aussi d'un Tigre à qui lon auoit
 baillé vn petit cheureau, qu'il ieuna deux iours de-
 uant que de luy toucher, & qu'encore au troisiéme
 iour aiant faim il demāda autre pasture, en deschi-
 rant la cage où il estoit enfermé, ne se voulāt point
 prendre au cheureau, comme estant ia son dome-
 stique & familier cōpagnon. Qui plus est les Ele-
 phans semblent vser de l'art de chirurgie, car ils ti-
 rent les trōçons de lances, & les traicts & iauelots **E**
 des corps des hommes blecez, sans les tourmen-
 ter, & si dextremēt qu'ils ne leur font mal ny dou-
 leur quelconque: & les chéures de Candie quand
 elles sont frappees d'un coup de traict, elles vont
 manger de l'herbe appelée Dictame, dont elles
 font tomber facilement les traicts, & ont par ce
 moien enseigné aux femmes enceintes à se faire
 auorter: car si tost qu'elles se sentent frappees, elles
 s'en courēt trouuer ceste herbe, & n'ōt point d'au-
 tre remede. Ces choses sont merueilleuses certai-
 nement, mais non pas toutefois par dessus toute **F**
 creance, pour des natures qui sont capables d'en-
 tendre les nombres, voire de tenir compte, com-
 me font les Bœufs de Suse qui sont ordōnez à tirer
 l'eau pour arroser les iardins du Roy avec ces grā-
 des rouës & ces petits bacquets tournans: ils ont
 leur compte combien ils doiuent tourner de tous,
 car ils en doiuent tirer tous les iouts iusques à cent
 chascun, & n'est possible de leur en faire tourner
 d'auan-

A d'avantage, ny de gré, ny de force, pour ce que depuis qu'ils ont fait leur tasche ils s'arrestent tout court, & n'est pas possible de les faire passer oultre: ce que lon a bien voulu essayer, mais il n'y a ordre, tant ils sçauent bien exactement compter & retenir leur compte, ainsi cōme Ctesias le Gnidien a laissé par escript. D'avantage les Lybiens se moquent des *Ægyptiens*, de ce qu'ils vont racontant, comme pour vne singularité grande, que la beste qu'ils appellēt *Oryx*, iette vne voix & crie le iour mesme & à l'heure propre que l'estoile nommee
B par eux *Sothen*, & par nous l'estoile caniculaire, se leue, pour ce qu'ils disent que toutes leurs chœurs ensemble, à l'instant mesme que ceste estoile monte sur leur orizon avec le Soleil, se tournent toutes deuers l'Orient: & tiennent que cela est vn tref-certain indice de la reuolution de cest astre la, & qui se conforme tref-certainement avec les regles & les obseruations des *Mathematiciens*. Mais à fin que nous mettons le couronnement à ce propos, en l'acheuant, venons à toucher, comme lon dit en commun prouerbe, à la ligne sacree, en par-
c lant vn peu de leur diuinité & naturel prophetique: car il est tout certain que l'vne des plus grandes, des plus nobles, & plus anciennes parties de l'art de deuiner, est celle qui se tire du vol des oyseaux, d'autant que leur naturel, qui est leger, remuant & spirituel, & qui pour sa subtilité se plie aisément, & s'accommode à toute demonstration, sert à Dieu cōme d'vn instrumēt propre à tourner ainsi qu'il veult, tantost en vn mouuement, tan-

tost en quelque voix & quelques gazouillemens, &
 tantost en quelque geste & quelque port, les vnes
 pour retenir, les autres pour poulsier & haister, ne
 plus ne moins que des vens, par lesquelles voyes il
 retient & empesche aucunes de ces actions & af-
 fections, & dirige les autres iusques à leur fin & ac-
 complissement. C'est pourquoy Euripides appelle
 tous les oiseaux en general les herauts & messagers
 des Dieux, & en particulier Socrates se nomme
 conseruiteur des Cygnes, comme aussi entre les
 Roys Pyrrhus estoit bien aise quand on l'appelloit
 l'Aigle, & Antiochus le Sacre: mais au contraire
 quād nous voulons nous mocquer d'un lourdaud,
 qui n'a ny sens ny entendement, & que nous le
 voulons iniurier, nous l'appellons poisson. Bref il y
 a cent mille choses que les Dieux nous monstrent,
 nous predisent, & nous prognostiquent par le
 moien des animaux tant de la terre que de l'air:
 mais celuy qui a entrepris de plaider la cause de
 ceux des eaux n'en sçauroit alleguer vne toute seu-
 le, car de leur part tout y est sourd & aueugle, priué
 de toute preuoyāce diuine, ietté en vn arriere fond
 & abyssme Titanique, où il n'y a communication
 quelcōque avec les Dieux, ne plus ne moins qu'en
 l'enfer où sont les esprits damnez, là où la partie
 raisonnable & intellectuëlle de l'ame est de tout
 point estainte: & le reste desirémpé & comme
 noyé, par maniere de dire, en la plus basse & plus
 vile partie du sentiment, semble plus tost palpiter
 que non pas viure. HERACL. Leue tes sour-
 cils, amy Phedimus, ouure les yeux, & te refueille
 pour

A pour nous defendre nous autres pauvres insulaires & maritimes : car ce n'est pas vn ieu que ce discours icy, mais vn plaidoyer elabouré & propensé, vne oraison pleine d'artifice de Rétorique, qui meriteroit d'estre prononcée en vn parquet d'audience iudicielle, ou bien en vne chaire & tribune aux harengues publiques. PHÆDIMVS. Mais bien est-ce vne surprise, Seigneur Heracleon, & vne tromperie toute manifeste: car ce vaillant orateur icy estant à ieun, sobre, & ayant estudié sa harangue toute la nuict, nous vient surprendre d'abrupt, & nous assaillir à l'improueu estans tous pe-
B fians du vin & de la bonne chere que nous feismes hier : toutefois si ne faut il pas reculer ny resliuer pour cela, car estant grand amateur du poëte Pindare, ie ne veux pas que lon me puisse avec raison opposer ceste sentence de luy,

Quand le combat est présenté,
Celuy qui cherche quelque excuse,
Iette en profonde obscurité
Le bruit de sa vertu confuse.

car nous sommes tous de grand loisir, estans non
c les danfes seulement à repos, mais aussi les chiens & les cheuaux. voire les rets & la seinne, ayant pour ce iourd'huy esté trefue generale dōnée à tous animaux, tant de la mer que de la terre: pour vacquer à ouïr ceste dispute. Mais quant à vous mes Seigneurs, n'ayez point de peur ny de doubte: car ie feray ma responce courte, & ne vous allegueray ny les opinions des Philosophes, ny les fables des Ægyptiens, ny les contes des Indiens, ou des Lybiës,

sans aucune preuue de tesmoings, ains vous reci-^D
 teray & produiray choses toutes notoires, qui se
 peuent veoir à l'œil & par tout, & qui vous serōt
 tesmoignees & certifiees par tout tant d'hommes
 qu'il y a qui trauaillent en la mer. Je vous en recite-
 ray peu d'histoires, combien que des preuues qui
 se font par les animaux dessus la terre, il n'y a rien
 qui empesche de les veoir, ains en est la veuë tou-
 te descouuerte, & presentee à noz yeux : là où la
 mer nous laisse mal-aiseement & peu souuēt veoir
 les effects qui se font au dedans d'icelle, & nous ca-
 che la plus part des generations & des nourritures ^E
 des poissons, & des moiens d'affaillir & de se de-
 fendre les vns des autres dont ils vsent, en quoy il y
 a plusieurs actes de prudēce, de memoire, de socie-
 té, iustice en communauté, lesquels necessairemēt
 sont ignorez, & à raison de ce nostre discours en
 demourera de tant moins riche & ample, & par
 cōsequent plus mal-aisé à soustenir & à defendre.
 Il y a d'auantage, que les animaux terrestres, pour
 estre par maniere de dire de mesme pais que les
 hommes, & pour conuerser ordinairement parmy
 eux, prennent aucunement les meurs & façons de ^F
 faire d'iceux, & en tirent la nourriture, l'apprentif-
 sage & l'imitation, laquelle addoucit toute l'amer-
 tume, toute l'austerité & aspreté de leur naturel, ne
 plus ne moins que l'eau douce se meslāt avec celle
 de la mer la rend plus douce, & tout ce qu'il y a
 de pesant, de lourd & mal-aisé à emouuoir, l'exci-
 te, estant esbranlé & poulsé par les mouuemens
 qu'ils ont, & qu'ils apprennent de la frequenta-
 tion

A tion des hommes: là où, au contraire, la vie des animaux maritimes, estant par longs & larges confins separee de la conuersation des hommes, & n'ayant rien adiousté de dehors ny d'appris par accoustumance, est propre à soy, ainsi que la nature l'a produitte, & non meslee ny composee de meurs estrangeres, à cause du lieu où ils habitent, & non pas pour la qualité de leur naturel: car la nature receuant & contenant en elle autant qu'il y peut entrer de cognoissance & de science, nous exhibe & met en auant plusieurs anguilles que lon appelle

B sacrees, toutes priuees & familiares à l'homme, cōme entre autres, celles qui sont en la fontaine Arctuse, & en plusieurs autres lieux des poissons qui obeissent quād on les appelle par leurs noms, ainsi que lon dit de la Murene de Crassus, laquelle estant venue à mourir, Crassus en plora: & comme vn iour Domitius luy reprochast par mocquerie,

» N'as tu pas ploré ta Murene morte? il luy repliqua
» sur le champ, N'as tu pas eu le cœur si dur que de
» ne point plorer pas vne de tes trois femmes que
» tu as enterrees? Et les crocodiles non seulement

C entendent la voix des prestres, quand ils les appellent, & endurent qu'ils les touchent: mais, qui plus est, ouurans la bouche, leur baillent leurs dens à nettoyer & à eiluyer avec des linges. Il n'y a pas long temps que Philinus hōme de bien & d'honneur, retournant de son voyage d'Ægypte, où il estoit allé pour desir de veoir, nous raconta auoir veu en la ville d'Anteus, vn crocodile couché, & dormant bien honestement au long d'vne vicille

femme dessus vn petit liët: & treuve lon par escript, que iadis vn des Roys Ptolomeës, appellant le sacre crocodile, il ne voulut pas venir ny obeïr à la voix des prestres qui le careussoient de paroles, & le prioient de venir, & que cela fut estimé vn prognostique & presage de la mort qui peu de temps apres luy aduint: tellemēt que par ce moien la natiō des animaux aquatiques n'est pas du tout incapable ne priuee de la sacree & tant estimee science de deuiner & predire les choses à aduenir, attendu mesmement qu'au pais de la Lycie, entre les villes de Phelte & de Myre, y a vn village que lon appelle vulgairement Sura, aupres duquel les habitans s'asseient à contempler les poissons nageans en l'eau, cōme ailleurs on contemple les oyseaux volans en l'air, considerans les tournoyemēs de leurs aguets & embusches, leurs fuittes & leurs pourfuittes, & en predifans par ie ne sçay quel art les choses à aduenir: mais cela suffise pour enseigner & indice que leur naturel n'est pas de tout poinct estrange, & n'ayant aucune communication avec nous. Au reste quant à leur propre prudence naturelle, où il n'y ait rien de meslange empruntee d'ailleurs, cecy en commun en est vn grand argument, qu'il n'y a aucune creature nageāte & aquatique, si ce ne sont d'aduēture celles qui sont tenātes & attachees aux pierres & aux rochers, qui soit si facile à prédre à l'homme, cōme sont les asnes aux loups, les abeilles aux mauuis, & les cigales aux arôdelles, ou les serps aux cerfs, qui se laissent ainsi emmener à eux, dōt ils ont eu le nom de Elaphos,

non

A non pour leur legereté, mais pour leur propriété de tirer les couleuvres & serpents hors de leurs trous. Le mouton attire, en maniere de dire, & connue le loup par le trac de son pied, comme lon dit que le Leopard attire la plus part des autres bestes, qui s'approchent de luy pour le plaisir qu'elles prennent à sentir son odeur, mesmement le singe entre autres. Mais les animaux maritimes tous en general ont vn presentiment qui les rend soupçonneux de toutes choses, & les fait tenir sur leurs gardes contre les aguets que lon leur dresse, par vne

B intelligence naturelle: ce qui fait que la pescherie, & l'art de les prédre & chasser, n'est point vne petite industrie ne simple & grossiere, ains a besoing d'un grand nombre d'engins de toutes sortes, de ruzes, & de finessees subtiles pour les affiner, comme il est tout notoire, parce que nous les auons tous les iours entre les mains. Premièrement la canne ou rouseau, dont on fait la ligne à pescher, ne doit pas estre grosse, encore qu'il faille qu'elle soit forte & roide, pour enleuer les poissons qui se debattent quād ils sont pris, & fault plus tost choisir

C celle qui est deliee & menue, de peur que iettāt vne vmbre large, elle n'excite la doubte & suspicion des poissons: & puis ils ne veulent pas qu'il y ait beaucoup de nœuds à la ligne, ains veulent qu'elle soit toute plaine & vnie sans aucune aspreté, pource que cela leur baille desiance de quelque tromperie: & si dōnent ordre que les seies qui touchent à l'hameçon, soient blanches, d'autant qu'elles en sont moins aperceues dedans l'eau, à cause

de la cōformité de couleur: car ce que le poëte dit, D

Au fond de l'eau l'hameçon va baissant,

Comme du plomb la ligne trauersant

Du bœuf rural la corne transparente,

Qui aux poissons porte la mort latente:

aucuns entendans mal ces vers veulent inferer de là, que les anciens vsoient des poils de la cueuë de bœuf à faire leurs lignes, disans que ce mot Céras, qui communément en Grec signifie corne, en ce lieu la signifie poil: & que de là vient que Céira-sthæ signifie tondre, & Courà signifie tonsure: & que de là semblablement Archilochus appelle vn ^E muguet & mignon, qui s'amuse trop curieusement à peigner & testonner sa perruque, Ceraplastes: mais cela n'est pas veritable, car ils vsoient comme nous du poil & seie de cheual, & non pas de iument, par ce que les iuments trempās à tous coups leurs cueuës avec leur vrine, en rendent le poil moins fort, & plus aisé à rompre: & Aristote mesme escrit qu'en ces vers il n'y a rien qu'il faille curieusement & subtilement rechercher de docte intelligence, par ce qu'à la verité les pescieurs enfilent en leur ligne vn petit bout de corne au deuāt ^F de l'hameçon. Et puis ils vsent des hameçons ronds à prendre les mulets & les bonitons, pource qu'ils ont la bouche petite, & se gardent de celuy qui est long & droict: & bien souuēt le mulet souspeçonnant celuy mesme qui est rond, va nageant alentour, frappant avec sa cueuë ce qu'il y a de bon à manger, & décrochant ce qui en apparoit dehors, & si l'en peult venir à bout par ce moien, alors estrois-

A estroiffissant sa bouche, & la ferrant, il touche du bout des léures, & ronge l'appast tout alétour: mais le loup de mer, quand il se sent pris de l'hameçon, fait plus genereusement que ne fait l'Elephant, tirant & arrachât le traict, non du corps d'un autre, mais du sien propre, secouant sa teste çà & là, tant qu'il eslargit la playe, endurant magnanimement la douleur de ce deschirement iusques à ce qu'il ait ietté l'hameçon hors de son corps. Et le regnard marin, le plus souuent n'approche pas de l'hameçon, ains s'en recule & fuit l'embusche, mais si par B fortune il aduient qu'il se treuve pris, il se rebourse incontînét pour la force, agilité & humidité de son corps, qui est telle qu'il le retourne facilement à l'enuers, de maniere que le dedans sortant dehors, il est force que l'hameçon tombe & lasche prise. Ces premiers exemples la monstrent vne intelligence, & quant & quant vne execution ingenieuse & subtile de ce qui est expedient promptement au besoing: mais il y en a d'autres qui avec la prudence nous dōnent à cognoistre vne amour de societé, & vne charité des vns enuers les autres, cōme C font les Barbiers & les Scares, car quād vn Scare a auallé l'hameçon, les autres ses cōpagnons saultent alétour & rongét la ligne, & si d'aduéture il y en a vn qui ait dōné dedans la nasse, ses compagnōs luy baillét la cueue par dehors, & luy la ferre tant qu'il peult à belles dents, les autres tirét tant qu'ils l'entraignent dehors: mais les Barbiers secourent leurs compagnōs encore plus magnanimemēt, car metrans la ligne contre leur dos, ils drellent vne espine

qu'ils y ont dentelee comme vne sie, & s'efforcent ^D
 de la fier & couper avec icelle: là où il n'y a pas
 vn animal de terre, au moins que nous cognois-
 sions, qui ait le cœur & la hardiesse de secourir son
 compagnon estant en peril de sa vie, ny l'ours, ny
 le sanglier, ny la lionne, ny le leopard: ils s'amassent
 bien tous ensemble, ceulx qui sont d'une mesme
 espece, & courent les vns avec les autres alentour
 de l'arene des amphitheatres: mais de s'entrese-
 courir l'un l'autre, ils n'en sçauent pas le moien, ny
 n'ont pas le courage de ce faire, ains s'enfuient &
 faultent, se tirants le plus arriere qu'ils peuuent de ^E
 celuy qui est blecé, & que lon tue deuant eulx. Et
 quant à l'histoire que tu as alleguee des Elephans,
 mon bel amy, qu'ils iettent dedans la fosse tout ce
 qu'ils peuuent fouiller & arracher, pour faire com-
 me vne leuee à leur compagnon qui est tombé de-
 dans, à fin de l'aider à sortir, elle est merueilleuse-
 ment estrange & de fort loingtain pais: aussi nous
 commâde elle, comme par edict royal, venans des
 liures du Roy Iuba, de la croire: mais quand bien
 elle seroit verirable, il y a assez d'exemples des ma-
 ritimes, qui monstrent que quât à l'estre sociables ^F
 & bien aduisez, ils ne cedent en rien aux plus sages
 des terrestres, mais quant à leur communauté &
 societé, nous en traiterons à part. Au demourant
 les pescheurs s'apperceuant que la plus part des
 poissons se mocquoient de la ligne & de l'ha-
 meçon, ne plus ne moins que des ruzes esuentees
 & descouvertes, se sont tournez à la force, les en-
 fermans dedans vne seinne, comme font les Perles
 à la

A à la guerre, faisants leur compte, que quand ils seroient pris dedans les rets, il n'y auroit discours au monde ny sagesse qui leur peust donner moien d'en eschapper: car avec les pans de rets, & les troubles on prend les mulets, les donzelles, les Mormyres & les Sarges, les Gouiers de mer & les Loubines: mais ceulx qui plongent au fond, que lon appelle pour cela Bolistiques, cōme les rougets barbez, la dorade, le scorpion de mer, on les enveloppe avec des engins qui s'appellent esparuiers & seinnes. Homere appelle ceste sorte de rets *Panagra*, qui vault autant à dire, comme, tout prenāt: mais toute fois encore ont ils ingenieusement trouué remede à cela, la Loubine & le chien marin entre autres: car quād ils sentent que lon tire l'engin, ils ouurent à force la terre au fond de l'eau, & la battent tant qu'ils la creusent, puis quand ils ont fait vne fosse grande assēz pour se cacher contre le rauage du rets, alors ils se fourrent & se tapissent dedans iusques à ce que le bord du rets soit passé, mais le daulphin se trouuant enfermē dedans la seinne, l'endure constamment sans s'estonner de rien, ains au contraire il s'en esiouit, pource qu'il prend & deuore la dedans tant qu'il veult de poisson qui est prisonnier quand & luy, sans qu'il ait peine à les chasser, puis quand il sent qu'on l'approche de terre, il ne fait que rompre & ronger le rets & s'en va: & si d'aduenture il ne peut le faire assēz tost, & qu'il vienne à estre pris, pour cela ne le fait on pas mourir à la premiere fois, ains seulement luy coust-on vn ionc atrāuers la peau au lōg

de la crête, & le laisse lon aller, mais sil se laisse reprendre vne autre fois, alors il est battu & puny à coups de baston, car on le recognoist à la cousture du ionc: mais cela n'aduient pas gueres souuent, par ce que quand on leur a pardonné vne fois, ils recognoissent, la plus part, la grace qu'on leur a faite, & se gardét de là en auant de mal faire. Mais y aiant infinis autres exemples de ruzes & fines inuentions pour se donner garde, preuoir vn dāger, & sortir d'un mauuais passage, celuy de la Seche est bien digne d'estre recité, & non passé soubs silēce: car aiant au pres du col, vne grosse vessie qui propremēt s'appelle Myttis pleine d'une humeur noire, laquelle pour ceste cause on nōme ancre, quand elle se sent surprise en vn filé, elle iette son ancre dehors, à fin que noircissant la mer alentour d'elle, & se couurant d'une obscurité tenebreuse, elle se puisse sauuer & eschapper de la veuë de celuy qui la chasse, en quoy elle imite les Dieux d'Homere qui retirent & derobben en vne nuce noire ceulx qu'ils veulent respiter de danger. Mais à tant est-ce suffisamment parlé de ce propos, & au reste quant à leur astuce & subtilité d'affaillir, & de quester, on en peult voir des exemples de bien grande ruze en plusieurs. Celuy que lon nomme Estoile. sçachant bien que tout ce à quoy il touche se dissout & se fond, abandonne son corps à manier & toucher, & se seuffre taster aux passans, & à ceulx qui en approchent. Quant à la Tromble, autrement ditte torpille, vous sçauēz tous assez sa puissance, qui est, que non seulement elle endort & rend sans senti-

ment

A ment les membres qui la touchent, mais aussi atravers des filets de la seinne elle transmet vne pesanteur endormie & amortie aux mains de ceulx qui la remuent & manient: & y en a qui disent encore d'avantage, aians experimenté sa vertu plus auât, que si pendant qu'elle est viue on respand de l'eau dessus, lon sent ceste passion qui gaigne contremont iusques à la main, de laquelle elle amortit & endort l'attouchement atravers l'eau, qui est desia tournée & alteree, comme il est vraysemblable: aiant doncques vne cognoissance de ceste

B vertu nee avec elle, elle ne combat ny ne se hazarde iamais de front contre vn autre poisson, mais enuironnât celuy qu'elle veut auoir & prendre, elle iette atravers l'eau son influence, comme si c'estoient flesches, charmant l'eau premierement, & puis apres le poisson par le moien de l'eau, tellement qu'il ne peult ny se defendre ny s'en fuir, ains est arresté & fiché, comme s'il estoit attaché avec des liens. Celuy que lon appelle la grenouille peschereffe est assez cogneu de plusieurs, & luy a lon donné ce surnom pour sa façon

C de faire, de laquelle finesse Aristote mesme escrit que la Seche vse, car elle iette de son col vn boyau long comme vne ligne, qu'elle estend au loing en le lâchâr, & le retire à soy tout entierement quâd elle veut. Quand doncques elle apperçoit aupres d'elle quelque petit poisson, elle luy laisse mordre le bout de ce petit boyau, estant elle cachee dedans le sable, ou dedans la vase, & petit à petit elle le retire iusques à ce que le petit poisson soit si pres

d'elle, qu'en faultât elle le puisse engloutir. Quant d
au poulpe qui change de couleur, c'est chose toute
notoire, & Pindare le celebre par ces vers,

Que ton sens souple & maniable
Soit au poisson de mer semblable,
Qui tousiours va couleur changeant,
Pour hanter avec toute gent.

& le poete Theognis aussi,

Aies le sens du poulpe, lequel tainct
Sa peau d'une autre & puis d'un autre tainct,
Prenant tousiours la couleur de la roche
Où de ses pieds estendus il s'accroche.

Il est vray que le Chameleon change bien aussi
de couleur, mais c'est sans desseing d'aucune ru-
ze, & non point pour se cacher, mais de peur
tant seulement, estant de sa nature couard & timi-
de, oultre ce qu'il est plein de vent, ainsi comme
l'escriit Theophraste: car il ne s'en fault gueres que
tout son corps ne soit plein de poulmon, par où
lon coniecture qu'il a beaucoup de vent, & con-
sequemment qu'il est propre à telles mutations &
changements de couleur: mais quant au poulpe,
c'est vne action & non pas vn changement de pas- f
sion: car il change de couleur avec certaine science
& de propos deliberé pour se cacher de ce qu'il
craint, & pour attrapper ce dōt il se nourrit, & par
le moien de ceste ruze il prend ce qui ne s'en fuit,
& fuit ce qui passe oultre. Or de dire qu'il man-
ge ses pieds ou ses bras, c'est chose faulse, mais il est
bien certain qu'il craint fort la Murene & le Con-
gre, pource que ces poissons la luy font beaucoup
de mal,

A de mal, & il ne leur en peult faire, d'autât qu'ils luy
eschappent en glissant : & au contraire la langou-
ste le desfait & le met en pieces quand il vient aux
prises avec elle, pource que sa peau lisse ne luy
peult de rien servir contre la cocque de l'autre qui
est dure & aspre : mais aussi si le poulpe la peult
vne fois tenir & estraindre entre ses bras, elle est
morte. Voyla comme la nature leur donne ceste
vicissitude de fuir & d'assaillir les vns les autres,
pour vn exercice de cōbattre, & pour vne espreuve
de leur sens & de leur prudence. Voire mais Ari-
B stotimus a allegué, cōme le herisson de terre a vne
preuoyance & presentiment des vents & a mis en
ligne de merueille le vol des grues qui volent en
triangle : quant à moy ie n'allegueray point le he-
rison de mer d'aucun lieu particulier, comme de
Byfance ou de Cyzique, mais en general, tous ceux
qui sont par tout, & en toutes mers, quand ils sen-
tent qu'il doit auoir tempeste & tourmente en la
mer, ils se chargent eulx mesmes avec de petites
pierres, de peur qu'ils ne soient renuersez & iettez
çà & là par les flots de la mer, & demeurēt fermes
C en leur lieu, par le moien de l'estage de ces petites
pierres dont ils se chargent. Et quant aux grues qui
changent leur ordre de voler selon le vent, ie dis
que ceste prudence la n'est peculiere ny propre à
vne sorte de poissons, ains est cōmune à tous, qu'ils
nagent tousiours contre vent & maree, & se don-
nent bien garde que le vent ne leur donne iamais
en cueuë, & par derriere, de peur qu'il ne leur en-
leue leurs escailles, & ne leur offense & face frisson-

ner le corps descouvert & denué : c'est pourquoy **D**
ils ont tousiours le museau dedans le vent, par ce
que la mer estant ainsi fendue en teste, leurs bran-
ches & escailles viennent à se coucher contre leurs
corps, & coulant par dessus les ferre toutes vnien-
ment, & ne leur enléue rien qui les face herisser :
cela dis-ie est vniuersellemēt commun à tous pois-
sons, excepté celuy qui se nomme Ellope, lequel
de sa nature nage à vau le vent & la maree, ne crai-
gnant point que le vent luy rebourse ses escailles,
d'autāt qu'elles ne sont pas couchees vers la cueuë,
ains contremont vers la teste. Et le Thun sçait, & **E**
fent si bien les solstices & les equinoces, que mes-
me il les enseigne à l'homme, sans que pour cela il
ait besoing de regles d'Astrologie : car il demeure
au lieu où le solstice d'hyuer le surpren, & n'en
bouge iusques à l'equinocce ensuiuant. Mais c'est
vne grande sapience à la grue, d'empoigner avec
son pied vne pierre, à fin que venant à la lascher
elle s'esueille souuent : & combien doncques, mon
bon amy, est plus sage le Daulphin qui ne peult
iamais arrester ny cesser de courir, pource que son
naturel est d'estre en perpetuel mouuement, finis- **F**
sant sa vie avec son mouuoir : mais quand il a be-
soing de sommeil, il pousse son corps contre-mont
iusques au dessus de l'eau, & là se tournant le ven-
tre dessus, se laisse aller à la renuerse au fond, estant
bersé de l'agitation de la mer, comme s'il estoit
branslé en vne brandilloire, iusques à ce qu'il vien-
ne à toucher, & donner contre la terre, & ainsi se
resueillant, il se relance vne autrefois au dessus de
la mer,

A la mer, là où de rechef il se laisse aller à bas, aiant par ce moien trouué vne inuention de mouuement entre-meslé de repos: on dit que les Thuns en font tout de mesme, & pour vne mesme cause. Mais pource que nous auons desia exposé la Mathématique & Astrologique prescience, & cognoissance qu'ont les poissons de la conuersion du Soleil, laquelle est confirmee par le tesmoignage mesme d'Aristote, escoutez maintenant comment ils scauent bien aussi la science d'Arithmetique, ou bien certes premierement la perspective, dequoy il semble que *Æschylus* mesme ait eu cognoissance, par ce qu'il dit en quelque passage,

Clignant l'œil gauche, ainsi que fait le Thun, pource qu'ils ont la veüe de l'autre œil debile. Et pourtant quand ils entrent en la mer de Pont ou Mer-maiour, ils tirent à main droite, au long de la terre, & quand ils en sortent à main gauche, faisans en cela prudemment & sagement, de commettre la garde de leur corps au meilleur œil: & pource qu'ils ont besoin de l'Arithmetique à cause de leur société, ils scauent ceste science des nombres parfaitement pour le plaisir qu'ils ont d'estre tousiours ensemble en grosse troupe, & font tousiours leur bade de figure cubique, c'est à dire quarree en tout sens, & en dressent vn corps de bataillon solide, clos & environné tout alentour de six faces toutes egales, puis nagent en ceste ordonnance quarree, autant large derriere que deuant, sans la rompre nullement, de sorte que celuy qui est au guet pour espier leur venue, sil peult seulement

nombrer certainement, combien ils sont en la face **D**
 qui luy apparoit, peult incontinent dire combien
 ils sont en tout le corps de la troupe, estant asseuré
 que le nombre de la profondeur est egal à la lar-
 geur, & la largeur à la longueur. Les Bonitons que
 lon appelle en Grec Hamies, ont leur nom de ce
 qu'ils sont poissons de compagnie, pource que
 Hama signifie ensemble, & les Pelamydes à mon
 aduis aussi: quant aux autres especes de poissons
 compagnables, qui se treuvent & vivent tousiours
 ensemble par grosses troupes, on n'en sçauroit
 dire le nombre: parquoy il vault mieux venir aux **E**
 particulieres societez & compagnies inseparables,
 qu'aucuns ont entre eulx, comme le Pinnothere
 qui a tant cousté d'ancre au philosophe Chrysip-
 pus pour le descrire, car c'est tousiours le premier
 qu'il amene en ieu en tous ses liures tant naturels
 que moraux: quant au Spongotherie ie croy qu'il
 ne l'auoit pas veu, autrement il ne l'eust pas ou-
 blié. Or ce Pinnothere doncques est vn petit ani-
 mal de la sorte d'un cancre, à ce que lon dit, lequel
 vit & se tient tousiours avec la Pinne, qui est ceste
 espece de grâde coquille que nous appellôs Nacre, **F**
 & demeure tousiours cômme vn portier assis à l'ou-
 uerture de ceste coquille, laquelle il tient continu-
 ellemēt entre-baillee & ouuerte, iusques à ce qu'il
 y voye entrer quelques petits poissons de ceulx
 qu'ils peuuent bien prendre: car alors il entre au
 dedans de la Nacre & luy mord la chair, elle in-
 continent ferme sa coquille, & lors eulx deux
 ensemble mangent leur proye enfermee dedans
 leur

A leur fort. Quant au Spongothere, c'est vn autre petit animal, non semblable à vn cancre comme l'autre, mais plus tost à vne araignee, qui garde & gouuerne l'esponge, laquelle n'est pas du tout sans ame ny sans sang & sans sentiment, ains comme plusieurs autres animaux marins, est attrachee contre les rochers, & a vn propre mouuement de se restraindre au dedans de soy, & de s'estandre au dehors : mais pour ce faire elle a besoing de la conduite & de l'aduertissement d'autrui, par ce qu'estant rare, lasche & molle, à cause de plusieurs petits pertuis vuides à faulte de sang, ou bien de sentiment qu'elle a fort mouffe, elle ne sent pas quād il entre quelque substance bonne à māger dedans ces trous & espaces vuides, ce que le petit animal luy fait sentir, & incontinent elle se resserre & le deuore: ce qu'elle fait encore bien plus quād l'homme s'approche d'elle, & qu'il la touche : car alors estant bien mieulx aduertie & atteinte au vif, elle se herisse de frayeur, & se referme en serrant & espessissant son corps, tellement que les plongeurs qui la cherchent & la chassent, ont bien de la peine

C à la couper par deslous, & à l'arracher hors du rocher. Et les pourpres assemblees en troupe, composent en commun leur gofre, cōme font les abeilles en maniere d'vne ville, & dit on que c'est là dedans qu'elles engendrēt & qu'elles font leurs petits, & ce qu'elles ont serré & préparé pour leur munition de viures, cōme de la mouffe ou de l'algue, herbe toute commune en la mer, elles le tirēt dehors de leurs coquilles, & le presentent à māger

à leurs compagnes en rond, ne plus ne moins que ^D
 si c'estoit vn banquet qu'elles fissent chascune à
 son tour, l'une paissant & nourrissant ainsi l'autre
 par dehors: mais ce n'est pas grande merueille si l'y
 a societé amiable & communaulté entre elles, veu
 que le plus farouche animal, & le plus cruel qui vi-
 ue en toutes les riuieres, en tous les lacs & estangs,
 & en toutes les mers, le crocodile, se monstre mer-
 ueilleusement social & compagnable en ce qu'il a
 à demesler avec le petit roytelet, qui est vn petit
 oyselet, hantant ordinairement au long des maretz
 & des riuieres. Il fait le guet, & sert de garde au cro- ^E
 codile, non pas à ses despens, mais au despens du
 crocodile, car il vit de son dessert, & quand il voit
 que l'Ichneumon s'arme & se plastre le corps de li-
 mon, comme vn champion de luidte, qui se poul-
 dre les mains à fin d'auoir meilleure prise sur son
 compagnon, pour assaillir d'aguet en surprise le
 crocodile dormant, il l'esueille de son chant, & de
 son bec dont il le va piccotant, & le crocodile est si
 doux & si priué enuers luy, qu'il luy ouure la
 gueule grāde, & le laisse entrer dedans, estant bien
 aise qu'il aille recueillant les petits morceaux de ^F
 chair qui luy sont demourez entre les dets, & qu'il
 les arrache tout doucement avec son bec: puis
 quand c'est assez à son gré, & qu'il veut refermer
 sa bouche & la clorre, il baiste vn petit sa machouë-
 re de dessus, luy monstrant par signe qu'il sorte,
 & ne la rabat iamais du tout, qu'il ne sente que le
 petit oyselet s'en soit enuolé. Et celuy qui s'appelle
 la guide, qui est vn petit poisson de grandeur & de
 façon

A façon presque semblable au goujon de mer, à ce que lon dit, excepté que par dehors il ressemble à vn oyseau qui se herisse de peur, tât il a les escailles droittes & leuees, il est tousiours avec quelque grande Baleine nageant deuant pour la diriger & conduire, cōme vn pilote, de peur qu'elle ne s'aggrauē en quelque platis où la mer soit basse, ou en quelque vase, ou qu'elle ne donne en quelque destroit, dont elle ne puisse sortir puis apres. La baleine le suit, se laissant mener & tourner à luy, aussi facilement que le timon fait tourner la nauire. Toute

B autre chose qui entre dedans la bouche de ce mōstre marin, soit beste, ou vaisseau, ou pierre, est incontinent engloutty & perdu au fond de cest abyssine, mais cognoissant ce petit poisson, elle le reçoit en sa bouche, comme si c'estoit vne ancre: car il dort la dedans, & le monstre s'arreste ce pendant qu'il repose, puis quand il sort, il se remet à le suiure sans iamais l'abandonner, ny iour ny nuict, autremēt il s'esgare & va errāt çà & là sans cōduire, & y en a eu plusieurs qui se sont ainsi perdues, aians donné atrauers la coste, cōme vn vaisseau qui

C n'a point de gouuernail, car nous mesmes en auōs veu en l'Isle d'Anticyre il n'y a pas long tēps: & dit on que par cy deuāt y en eut aussi vn autre qui fut ietté par les flots de la mer sur le riuage non gueres loing de la ville de Bunes, qui se pourrit, & meit la peste en tout le païs aléuiron. Est il dōcques maintenant raisonnable de comparoir à ces societez la si estroittes & si conioinctes, les amitez des regnards avec les serpens, pour la guerre qu'ils ont cōtre leur

commun ennemy, qui est l'aigle, ou celle des otar-
des avec les cheuaux, par ce qu'elles prennent plai-
sir a estre aupres d'eux, pour gratter & fouiller leur
fiante? Quant à moy ie ne voy point que les abeil-
les ny les fourmis aient tant de soing les vnes des
autres. Il est bien vray qu'elles trauaillent toutes
en commun pour accroistre le bien public, mais
qu'elles visent au bien particulier, ny qu'elles aient
cure du salut les vnes des autres particulierement,
il n'y en a point d'exemple: encore verrons nous
mieulx ceste difference la si nous venons à parler
du deuoir des principaux & plus grands offices de
societé, i'entens de la generation & procreation
des enfans. Premièrement tous poissons qui han-
tent les mers prochaines des marets, ou qui reço-
uent de grandes riuieres, quand ils se sentent pres
de faire leurs petits mōtent contremont, cherchāts
l'eau douce, la plus tranquille, & la moins agitée
qu'ils peuuent, d'autant que la tranquillité est fort
necessaire & requise à l'enfantement, oultre ce que
dedās les marets & riuieres coustumieremēt il n'y
a point de ces grands mōstres marins, de maniere
que leurs petits en sont en plus grāde seureté. Voi-
la pourquoy il y en a si grāde quātité qui vont faire
leurs petits en mer maieur, par ce qu'elle ne nour-
rit point de Balenes ny d'autres grādes bestes, excep-
té le veau marin, encore y est il bien mince, & le
Daulphin qui y naist bien petit, & puis la descente
de plusieurs grosses riuieres qui se desgorgent de-
dans, rendēt la tēperature de l'eau fort benigne &
fort à propos pour les meres qui ont des petits:

mais

A mais sur tout est admirable le naturel de celuy qui se nôme le Barbier, lequel Homere appelle le poisson sacré : combien que les vns veulent dire, que sacré en ce lieu la signifie grand, comme quand on dit l'os sacré, c'est à dire le grād, & le mal caduc, qui est vne grande maladie, on l'appelle aussi la maladie sacree: autres interpretent sacré cōmunément, c'est à dire, voué & dedié à quelque Dieu, ou bien abandonné & laissé à l'abandon: toutefois il semble que Eratosthenes appelle ainsi la Dorade,

Leger au cours, au beau sourcil doré,

B C'est celuy la qui est poisson sacré.

plusieurs estiment que c'est l'esturgeon que lon appelle Helops, pour ce qu'il est rare à trouuer & difficile à prendre, toutefois il se voit souuent en la coste de la Pamphylie : & quand les pescheurs le peuuent rencontrer ils sont courōnez eux & leurs barques de festons & chapeaux de fleurs, & quād ils retournent au port ils y sont receuz & honorez avec grands crys de ioye & battemens de mains de tous les assistans. Mais la plus part estime que le barbier Anthias est celuy qui s'appelle poisson sacré, & tenu pour tel, d'autant que là où il est il n'y a point de beste venimeuse ny rauissante, tellemēt que les plongeurs qui vont au fond de la mer arracher les esponges, se plongent hardimēt aux endroits où ils en apperçoient, & les autres poissons y sont aussi asseurement leurs petits, comme aians celuy la pour plege & pour respondant de toute franchise & de toute seureté : la cause en est bien mal-aisée à trouuer, si c'est pour ce que les bestes

rauissantes & venimeuses le fuyent naturellemēt, D
 cōme les Elephans fuyēt le pourceau, & les Lions
 le coq, ou si c'est qu'il y ait certains signes des lieux
 où telles bestes ne puissent resider, & que luy les
 cognoisse & s'en donne de garde par vne pruden-
 ce, & par vne memoire naturelle qu'il a. Cela est
 bien commun à toutes meres d'auoir soing & so-
 litude de ses petits, mais les masses entre les pois-
 sons en ont encore telle cure, que iamais ils ne mā-
 gent ce qui est de leur semence, ains demeurent
 aupres de ce que leurs femelles ont enfanté, & gar-
 dent leurs œufs, ainsi comme Aristote mesme a es- E
 crit: les autres apres leurs femelles les arrosent d'un
 peu de liqueur, par ce qu'autrement ce qu'elles ont
 fait ne deuient point grand, ains demeure impar-
 fait & sans croissāce. Mais particulieremēt ceux
 qui s'appellent Roquaux Phycides forment leur
 nid avec l'herbe de la mer qui s'appelle Algue, &
 en munissent alentour & couurent leurs petits cō-
 tre les flots de la mer. Les chiens de mer ne cedent
 en sorte que ce soit aux plus priuees & plus doul-
 ces bestes du monde, en charité, amour & dile-
 ction enuers leurs petits: car ils sont premierement F
 l'œuf, & puis apres le petit, & non point hors de
 leurs corps mais dedans, le nourrissent & portent
 dedans leurs propres corps, comme fils le retour-
 noient à engédrer & à enfanter vne autrefois: puis
 quand il est deuenu vn peu plus grand, ils le met-
 tent dehors, & luy mōstrent à nager tout ioignant
 d'eux puis le reçoient encore par la bouche au
 dedans de leur corps, qui leur sert de demeure, de
 nour-

A nourriture, de retraitte & de refuge, iusques à ce qu'il soit si grand qu'il leur puisse aider. Aussi y a il vne merueilleuse sollicitude de la Tortue en la generation, nourriture & conseruation de ses petits: car elle sort de la mer & va pondre ses œufs sur le riuage: mais ne pouuant pas les couuer long temps ny demourer en terre hors de la mer, elle met ses œufs dessus la gréue, & puis amasse dessus le plus menu & plus delié sable qu'elle peult, puis quand elle les a bien cachez & couuers seurement, aucuns disent qu'elle imprime quelques rayes ou quelques points dessus avec ses pieds, à fin de pouuoir trouuer & recognoistre le lieu puis apres. Les autres disent que les masles renuersent leurs femelles sur le dos, & y laissent la forme de leur cocque, cōme de leur anneau imprimee dedans le sablon: ce qui est encore plus admirable, elle observe le quarantième iour, car en autant de iours se meurissent & seclouent leurs œufs, & vient recognoistre son depost, qu'elle ouure avec aussi grāde aise & grād'ioye, comme sçauroit faire l'homme la cachette là où il auroit ferré & caché son or & son argent. Les

C crocodiles font bien à peu pres toutes autres choses semblables, mais à quelles marques ils peuvent retrouver le lieu, il n'en a point laissé à l'homme moien d'en imaginer ny colliger la cause, tellemēt que lon veult dire par cela, que c'est plus tost vne precognoissance à ceste beste, procedente de diuination, que de ratiocination: car sans aller ny plus hault ny plus bas, il pose ses œufs iustement à la hauteur que la riuere du Nil doit deborder, &

iufques où il doit courir la terre, de forte que le D
 paifan qui premier les rencontre de fortune, fçait
 & predict à fes compagnons iufques où le fleue
 doit monter & fortir hors de fon liêt l'efté enfui-
 uant, mefurant & compaffant iufteement ce qui
 doit eftre couuert & bagné, à fin que luy fans eftre
 bagné puiſſe couuer ſes œufs. Au demourant,
 quād les petits ſont eſclos ſ'il y en a vn qui au ſortir
 de la cocque ne happe incontinent en ſa gueule ce
 qui ſe preſentera le premier deuant luy, ſoit vne
 mouſche ou vne formy, ou vn ver de terre, ou
 vne paille, ou vne herbe, la mere le deſchirant à E
 belles dents le fait mourir ſur l'heure: mais ceux
 qui ſe monſtrent courageux & prompts à la rapi-
 ne & execution, elle les aime & les careſſe chere-
 ment, faiſant comme les plus ſages hommes iugent
 qu'il faut faire, de colloquer ſon amour par raiſon,
 & non pas par paſſion. Les veaux marins meſmes
 ſont bien leurs petits ſur la terre, mais peu à peu el-
 les les attirent en la mer, & la leur ſont gouſter, puis
 tout à coup les en retirent, & ſont cela ſouuent les
 vns apres les autres, iufques à ce que par accouſtu-
 mance ils ſ'aſſeurent & commencent à aimer le F
 viure dedans la mer. Les grenouilles quand elles
 commencent à entrer en amour elles ſ'entreappel-
 lent avec vn chant de nopces, & vne voix amou-
 reuſe, que lon appelle proprement Ololygon, puis
 quand le maſle avec ceſt appeau a fait venir ſa fe-
 melle, ils attendent la nuit enſemble, pour ce que
 dedans l'eau ils ne peuuent pas habiter ny auoir
 compagnie l'un de l'autre, & ſur terre ils craignent
 le

A le iour, mais quand l'obscurité de la nuit est venue, alors sortans de l'eau seurement ils s'entr'embrassent: au demourant quād elles sentent la pluye venir, elles chantent d'une voix plus claire, & est cela vn des plus certains signes qui scauroit estre de pluye. Mais, ô seigneur Neptune, quelle faute & quel erreur ay-ie cuidé commettre, combien eust il esté impertinent & digne de mocquerie, si en m'amusant à parler des veaux marins, & des grenouilles, j'eusse oublié & laissé en arriere le plus sage animal & le plus aimé des Dieux, de tous ceux

B qui frequentent la mer? car quelle musique des Rossignols est à comparer à celle des Halcyons? quelle fabrique des arôdelles, quelle amitié & charité des coulombes, ne quel artifice des abeilles merite d'estre cōferé avec celui des oiseaux de la marine qui se nomment Halcyons? de quelle espece d'animaux ont iamais les Dieux tant honoré les couches, les naissances, & les enfantemens? car on dit qu'il n'y eut que vne seule Isle de Delos qui receust l'enfantement de Latone, laquelle Isle estant au parauant vagante, en a depuis esté affermie, là

C où Dieu a voulu que toute la mer fust arrestee, affermie & applanie sans vagues, sans vents, & sans pluye, ce pēdant que l'Halcyone fait ses petits, qui est iustement enuiron le Solstice le plus court iour de l'année: au moien de quoy il n'y a point animal que les hommes aiment tant que cest oiseau, par lequel ils ont sept iours & sept nuits au fin cœur d'huyet qu'ils peuvent sans crainte nauiguer seurement, leur estant lors le chemin par la mer plus asséuré

que celuy de la terre, & s'il faut dire vn peu de
chascune des vertus qu'elle a, la femelle aime si
fort son mary, qu'elle demeure avec luy, non
pour vne saison seulement, mais tout au long de
l'annee, & reçoit la compagnie de son malle, non
pour ce qu'elle soit honteusement subiecte à ceste
volupté, car elle ne se mesle iamais avec autre mas-
le, ains seulemēt pour l'amour & affection qu'elle
luy porte, ne plus ne moins que feroit vne honne-
ste dame mariee à son mary: car quand son mas-
le vient à estre debile pour l'aage, & pesant, de
forte qu'il ne la peut plus suiure, alors elle le sou-
stient & le nourrit en sa vieillesse, ny iamais ne le
laisse, ny ne l'abandonne seul en façon que ce soit,
ains le chargeant sur ses espaules, le porte par
tout, a soing de le seruir, demeure avec luy ius-
ques à la mort. Mais pour l'affection qu'elle por-
te & le soing qu'elle a du salut de ses petits, quand
elle se sent pleine incontinent elle se met à bastir
& construire son nid, non point gachant de la
bouë pour l'attacher à des parois & à des couuer-
tures, comme font les harondelles, & n'employant
pas toutes ou le plus des parties de son corps à la
besongne, comme fait l'abeille, laquelle entrant de
tout son corps dedans sa goffre, & touchant de ses
six pieds tous ensemble à l'œuure, diuise tout le
lieu en cellules de six angles chascune, là où l'Hal-
cyon pour tous instrumens, pour tous outils &
pour toutes sortes d'armes, n'ayant que son bec
seulement, sans autre chose quelconque qui le se-
cours en son trauail, il seroit bien mal-aisé à croire,
qui

A qui ne l'auroit veu à l'œil, ce qu'elle compose, ou pour mieux dire qu'elle fabrique, comme vn maître charpentier bastissant vne nauire d'vne forme, qui seule entre toutes ne se scauroit renuerser ny enfondrer en la mer: car elle va premierement recueillir les espines & arestes d'vn poisson qui se nomme aiguille, qu'elle conioint & lie ensemble, les entrelassant les vnes de long, les autres de trauiers, ne plus ne moins que sur l'estaim on iette la trame, y adioustant des courbes & arrondissemens l'vne dedans l'autre, tellement qu'elle en forme à

B la fin vn seiour rond, qui pour la haulteur ressemble proprement à vn verueu de pescheur, puis quand elle a paracheué de le construire, elle le porte au battement du flot marin, là où la mer la battant tout doucement luy enseigne à radoubber ce qui n'est pas bien lié, & à le mieux fortifier és endroits où elle voit que sa structure se dément & se lasche pour les coups de mer: & au contraire ce qui est bien ioint, le battement de la mer le vous estraint & le vous ferre de sorte qu'à peine le scauroit on rompre, dissouldre, ny endominager à coup

C de fer ny de pierre: & ce qui plus encore fait à admirer, c'est la proportion & la figure de la concavité du dedans du vaisseau: car elle est composée & proportionnée, de maniere qu'elle ne peut recevoir ny admettre autre chose que l'oiseau qui l'a bastie: car à tout autre chose elle est impenetrable, close & fermee, tellement qu'il n'y peut rien entrer, non pas l'eau de la mer seulement: ie croy qu'il n'y a personne de vous qui n'ait veu plusieurs

fois ce nid la, mais quant à moy qui l'ay veu, mandé & tenu plusieurs fois, il me vient en fantasie de dire & de chanter,

Au temple saint du Dieu Phœbus en Dele,

J'ay autrefois veu vne chose telle:

j'entends l'autel qui est composé de cornes, renommé & célébré entre les sept miracles du monde, pour ce que sans aucune colle ny autre sorte de ligature, il est tout basti & construit de cornes du costé droict seulement. Si prie à ce Dieu qu'il me soit propice, & me vueille pardonner, si estant & Musicien & Insulaire, ie me mocque doucement de la Sirene de mer que lon celebre tant, & ensemble de ces belles interrogatoires que me font ceux icy en se gaudissant, Pourquoy c'est qu'Apollo ne s'appelle point tueur de Congres, ne Diane tirant aux Surmulets, sachant que Venus fait emmy la mer ses sacrifices à couuert, & qu'elle n'a point à plaisir que lon tue rien. Et puis vous sçavez qu'en la ville de Leptis les presbtres de Neptune ne mangent chose aucune venant de la mer, & qu'en la ville d'Eleusine ceux qui sont receuz & admis en la religion des mysteres, honorent le Surmulet, & que mesme en la ville d'Argos la religieuse de Diane s'abstient par honneur d'en manger, pour autant que les Surmulets tuent & exterminēt le plus qu'ils peuuent le lieure marin, qui est venim mortel à l'homme, à raison de quoy ils sont là honorez & conseruez comme estans amis & salutaires à l'homme, & neantmoins encore y a il en plusieurs villes de la Grece des temples & des autels dediez à Diane,

A à Diane, surnommée Dictynna, comme qui diroit aimant les rets, & à Apollo Delphinien, & est certain que le lieu, qu'il a particulièrement choisy sur tous autres pour sa demeure les descendans des Cretes vindrent habiter, conduits par vn Daulphin, non que luy se fust transformé en vn Daulphin, comme disent ceux qui escriuent les fables, mais il y enuoya vn Daulphin pour guider leur nauigatiō, & les adresser en la baye de Cyrtha: aussi escrit on que ceux qui furent enuoyez par le Roy Ptolomeus surnommé Soter, en la ville de Sinope, B pour en apporter le Dieu Serapis & leur capitaine Dionysius, coururent fortune, & furent emportez par vn vent violent oultre leur gré, par dela le promontoire de Malea, aians le Peloponese à la main droite: & comme ils alloient ainsi errans par la mer, sans sçauoir où ils estoient, pensans estre perdus, il leur apparut deuant la prouë de leur vaisseau vn Daulphin qui sembloit les appeller, les guidant aux endroits de la coste où il y auoit bon & seur abry pour les vaisseaux, iusques à ce que les cōduisant, & accompagnant ainsi de lieu en lieu leur nauire, il les rendit finalement en la ville de Cyrtha, C là où apres auoir fait sacrifice pour leur salut, ils entendirent que de deux statues qu'il y auoit là, il leur falloit emporter celle de Pluto, & prendre le moule seulement de celle de Proserpine, & la laisser là. Si est vray semblable que Dieu porte affection à ceste beste, d'autant qu'elle aime la musique, à raison dequoy le Poëte Pindare se comparant à elle, dit qu'il est prouocqué par la saillie du Daulphin,

Comme le Daulphin s'achemine
 Courant la part de la marine,
 Dont il oyt le son retentir
 Des aubois aimable à sentir,
 Quand la haulte mer applanie
 Sans vagues est plaine & vnice.

ou plustost est il à croire que Dieu luy veut bien,
 d'autant qu'il aime l'homme: car c'est le seul ani-
 mal qui aime l'homme seulement pour ce qu'il est
 homme, là où entre les animaux terrestres les vns
 n'en aiment pas vn, & les plus priuez caressent seu-
 lement ceux qui les nourrissent & qui leur sont fa-
 milieres, cōme le chien, le cheual & l'Elephāt: mais
 les harondelles estans receuës en noz maisons, & y
 aiant tout ce dont elles ont besoing, comme l'vm-
 bre, & la retraite necessaire pour leur seureté,
 fuyent neantmoins & redoubtēt l'homme, ne plus
 ne moins que si c'estoit vne beste sauuage, là où le
 Daulphin seul entre tous les animaux du monde
 est celuy qui porte telle amitié à l'hōme, tant cher-
 chee & desirée de tous les plus grāds philosophes,
 par instinct de son naturel, sans en tirer aucun pro-
 fit: car n'ayant besoing quelconque de l'homme en-
 rien qui soit, il est neantmoins amy & bien-veul-
 lant à tous, & en a secouru plusieurs au besoing,
 comme peult faire foy l'histoire d'Arion, si cele-
 bree qu'il n'y a celuy qui ne la lasche: & toy mes-
 me, mon bel amy, nous en as fait souuenir d'un
 autre exemple d'Hesiodē, mais tu n'as pas acheuē
 le propos: car si tu voulois qu'on creust ton conte
 du chiē d'Hesiodē, il falloit que tu ne laissasses pas
 aussi

A aussi derriere les Daulphins : c'estoit certainement vn indice fort maigre & fort, douteux du chien, qu'il abbayast & qu'il courust sus aux meurtriers qui auoient tué son maistre. Alentour de la ville de Nemée, les Daulphins aians trouué le corps d'un homme mort flottant çà & là dessus la mer, le chargerēt dessus leur dos, & le baillans les vns aux autres à mesure qu'ils estoient las, de grande affection ils feirent tant qu'ils l'apporterent iusques au port de Rium, & là feirēt veoir que lon l'auoit tué. Myrtilus le Lesbien escrit que Enalus Æolien estāt amoureux de la fille de Phineus, laquelle suiuant l'oracle de la Deesse Amphitrite auoit esté par les filles de Pentheus precipitee dedans la mer, se ietta luy mesme aussi apres, & qu'il y eut vn Daulphin qui le receut, & le sauua iusques à l'isle de Lesbos. Au demourant l'affection & bien-veillance qu'un Daulphin porta à vn ieune garçon de la ville de Iase fut si vehemente & si grande, que lon estima qu'il en fust amoureux : car il se iouoit & nageoit tous les iours avec luy, & se laissoit toucher & manier à luy, & quand le garçon vouloit monter dessus il ne s'en fuyoit point, ains estoit bien aise de le porter, tournant là où il vouloit, en la presence de tous les Iasiens, qui accouroient bien souuent tous sur le port, pour veoir ce miracle : mais vn iour qu'il suruint à l'improuueu vn grand orage de pluye vehemente meslee avec de la gresle, le garçon tombant se noya, & le Daulphin le prenāt sur son dos le ietta tout mort, & luy quant & quant sur le riuage, & ne se partit

iamais d'aupres du corps, tant que luy mesme y demourut, iugeant estre raisonnable qu'il participast à la mort, dont il sembloit auoir esté cause: & pour memoire de cest accident les Iasiens en portét encore auiourd'huy l'histoire grauee en leur monnoye, vn garçon cheuauchant vn Daulphin. Ce qui rend desormais croyable ce que lon cõte touchant Cœranus, il estoit à ce que lon dit natif de l'Isle de Paros, & se trouuant à Constantinople, regardât pescher, il veit à vn traict de Seinne qu'il y auoit beaucoup de daulphins pris que lon vouloit tous assommer, il les achepta, puis les laissa tous aller: peu de temps apres il aduint qu'il retourna sur mer dedãs vne fuste à cinquãte rames, où il y auoit des brigants, laquelle par fortune se rōpit dedans le canal, qui est entre l'Isle de Naxos & celle de Paros, de sorte que tous les autres hõmes se perdirent & se noyerent, excepté luy, que vn Daulphin recueillit & l'enleua sur son dos, l'emportant iusques au deuât d'vne cauerne de l'Isle de Zacynthos, que lon monstre encores auiourd'huy, & l'appelle lon de son nom Cœranion: aussi dit on que c'est de luy que Archilochus escrit,

Neptune en vn cruel orage

Sauua Cœranus de naufrage,


Seul entre cinquante autres hommes.

Depuis estant ledit Cœranus venu à mourir, ses parens bruslerent son corps aupres de la mer, là où se presenterent plusieurs Daulphins le long de la coste, comme montrans qu'ils estoient là venus pour honorer ses funerailles, car ils y demourerent tant que

A que tout fut parachené. Qui plus est Stesichorus
 escrit que l'escu d'Ulysses auoit pour image & en-
 seigne vn Daulphin, & la cause pourquoy les Za-
 cynthiens la declarent en ceste sorte, ainsi que tes-
 moigne vn historien nommé Critheus. Telema-
 chus estât encore bien ieune tomba en vn endroit
 de la mer, où l'eau estoit fort profonde, & fut sau-
 ué par le moien de quelques Daulphins qui le re-
 ceurent en tombant, & le porterent hors de l'eau:
 parquoy le pere depuis pour en rendre graces &
 honorer cest animal, feit grauer l'image d'un Daul-
 B phin dedans le chaton de l'anneau dont il sceelloit,
 & le porta pour ornement à son escu. Mais pour
 autant que ie vous auois protesté au commence-
 ment que ie ne vous alleguerois aucune fable, &
 neantmoins ie ne sçay comment sur le propos de
 ces Daulphins ie suis allé donner insques à Ulysses
 & à Cœranus, vn peu trop loing de verisimili-
 tude, ie me condamne moy mesme à l'amende, qui
 sera qu'en cest endroit ie mettray fin à mon dis-
 cours: & pourtant messieurs les Iuges pouuez vous
 C sentence. SOCLA. Quant à nous il y a ia bonne
 piece qu'il nous semble ce que dit Sophocles,
 Voz argumens qui se battoient n'aguères,
 Sont ores ioints ensemble comme freres.
 car si vous mettez l'un avec l'autre les argumens,
 preuues & raisons que vous auez deduittes d'une
 part & d'autre, vous cōbattrez ensemble tresbien
 alencontre de ceux qui veulent priuer les animaux
 de l'usage de discours & de raison.

SI LES ATHENIENS ONT ^D
ESTE PLUS EXCELLENS
en Armes qu'en Lettres.

*Ceste declamation n'a ne commencement ne fin,
& au milieu est toute laceree.*



Leut bien raison de dire cela
quant à luy, aux Capitaines
qui vindrent depuis luy, aus-
quels il donna entree à faire
les choses qu'ils feirent puis ^E
apres, aiant chassé de la Gre-
ce ce grād Roy Barbare Xer-
xes, & deliuré les Grecs du danger de seruitude:
mais aussi le pourroit on dire à bon droit à ceux
qui se glorifient de leurs lettres: car si vous ostez
ceux qui font les beaux faiçts d'armes, il ne sera
plus besoing de ceux qui les reduisent par escript.
Ostez le gouuernemēt de Pericles, & les Trophées
des victoires que Phormion obtaint par mer, pres
du promontoire de Rium, & les prouesses de Ni-
cias alentour de l'Isle de Cythere, & deuant la ville ^F
de Megare, & celle de Corinthe, & le fort de Pyles
de Demosthenes, & les trois cents prisonniers de
Cleon, & Tolmidas qui alla escumer toute la coste
du Peloponese, & la bataille que Myronides gai-
gna au lieu d'Oenophytes contre les Bœotiens:
voila tout Thucydides effacé. Ostez les vaillantises
d'Alcibiades alentour de l'Hellespont, & celles de
Trasylus, pres l'Isle de Lesbos, & l'abolition de la
tyran-

A tyrannie des trente Tyrans faicte par Theramenes & Thrafybulus & Archippus, qui avec foixante & dix compagnons eurent la hardiessé de se soulever alencontre de la principauté de ceux de Sparte, & Conon qui derechef feit remonter les Atheniens sur la mer, vous ostez toute l'histoire de Cratippus: car quant à Xenophon il a esté luy mesme son historien, aiant mis par escript les gestes qu'il auoit faicts & cōduits à chef. Et dit on que Themistogenes Syracusain escriuit de ce mesme subiect, à fin que Xenophon apparust plus vraysemblable, B escriuant de soy-mesme, comme d'un tiers cedant à un autre, & luy gratifiant le moien de se faire honneur par lettres. Au reste tous les autres historiens, comme un Clinodemus, un Diylus, un Philochorus, un Philarchus, n'ont esté que des reciteurs & ioueurs de faicts d'autrui, comme si c'estoient Comédies redigeans par escript les gestes des Roys, Princes & Capitaines, en se glaceant par dessoubs leurs memoires, à fin qu'ils participassent de leur lumiere & clarté: car il y a cōme vne image & espece de gloire qui reuerbere & reiaillit de C ceux qui ont fait les grands & vertueux actes, à ceux qui les mettent bien par escript, ne plus ne moins que dedans un mirouer. Si a esté ceste ville d'Athenes, mere & nourrice benigne de plusieurs autres arts, les vns qu'elle a la premiere inuentez & mis en lumiere, & aux autres a donné accroissement, honneur & autorité: mesmemēt la peinture, à laquelle elle a donné grand auancement & grand ornement. Car Apollodorus, le premier de

tous les hommes qui a inuenté les diffiniffemens & couloremens des vmbres, estoit Athenien, sur les ourages duquel il y auoit escrit,

On l'ira plus tost regrattant,

Que lon ne l'ira mitant.

Et Euphranor, & Nicias, & Asclepiodorus, & Plitenetus frere de Phidias, dont les vns ont peinct les Capitaines victorieux, les autres des batailles, les autres des demi-Dieux, cōme Euphranor peignit Theseus & le mit au parangon de celuy qu'auoit peinct Parrhasius, disant que celuy de Parrhasius auoit mangé des roses, & le sien de la chair de bœuf. Car à dire la verité celuy de Parrhasius est bien mignonnement peinct, & ressemble, comme il disoit, à la rose: mais qui verroit celuy d'Euphranor, il pourroit dire bien à propos ces vers,

D'Ereçtheus le peuple magnanime,

Lequel Pallas la fille du sublime

Iupiter a eleué & nourry.

Il a aussi peinct le cōbat à cheual de deuant la ville de Mantinee contre Epaminondas, qui rait ceux qui le regardent hors de soy, & en est l'argument tel. Epaminondas Thebain, apres la bataille qu'il gaigna en la plaine de Leuctres, voulut passer sur le ventre de la ville de Sparte qu'il auoit abattue, & fouller aux pieds le grand cœur & la reputation d'icelle: & premieremēt entrant dedans la Laconie avec vn exercite de soixante & dix mille combattā, il pilla & saccagea tout le plat païs, & retira les peuples circonuoisins de leur confederation & alliance, & pūts deuant la ville de Mantinee, il leur

presen-

A presenta la bataille, laquelle ils ne voulurent & n'oserent pas accepter, attédans le secours qui leur deuoit venir d'Athenes. Parquoy luy partant la nuict sans que personne sceust où il vouloit aller, descendit en la Laconie, & peu s'en fallut qu'il ne surprit en sursault la ville de Sparte vuyde d'hommes de defense, & qu'il ne s'en saisit. Mais les alliez de Lacedemone l'aiants apperceu, & y estants accourus au secours, il monstra semblant de se vouloir de rechef mettre à courir & fourrager le plat pais, & par ceste ruse aiant abusé & endormy les ennemis, il se partit la nuict de la Laconie, & aiant en diligence couru ce qu'il y a de pais entre deux, il se presenta à l'improuueu aux Mantiniens, qui ne se doubtoient de rien moins, ains consultoient & deliberoient entre eulx d'enuoyer du secours en Lacedemone. Si commanda soudainement aux Thebains de prédre leurs armes: parquoy les Thebains, qui estoient courageux & braues en armes, leur coururent sus incontinent, & enuironnerent la ville de Mantinee tout alentour. Les Mantiniens se trouuerent bien estonnez, se lamentans, & courants les vns deça, les autres dela, ne se sentans pas forts assez pour soustenir & repoulsier vne si grosse puissance, qui comme vn torrent venoit tout à vn coup les enuahir, dont ils estoient si esperdus qu'ils ne pensoient pas seulement à se defendre. Sur ce poinct de temps & de fortune, les Atheniens se monstrerent descendans des coustaux en la plaine de Mantinee, ne sachants rien de ceste surprise ny de la soudaineté de ce danger, ains cheminans à

leur aise tout bellement. Mais comme quelqu'un d'estant eschappé de la ville fust accouru en diligence les en aduertir, estants en petit nombre au regard de la grande multitude des ennemis, & lassez du trauail du chemin, sans que nuls autres de leurs alliez les secondassent, neantmoins ils se presenterent incontinent en ordonnance de bataille aux ennemis, qui estoient plusieurs contre vn, & eulx rangeans aussi leurs gens de cheual en bataille, en cheuauchât iusques sur les portes mesmes, & ioingnant les murailles de la ville, donnerent vne bataille à cheual, qui fut fort aspre & roide, en laquelle aians eu du meilleur, ils deliurerent & oste-
 rent la ville d'entre les mains d'Epaminondas. Euphranor peingnit ce combat la, & voit on en ce tableau la charge de la rencontre, & le choc plein de grand effort & de grand courage, les hommes & cheuaux souffilās à grosse haleine. Mais à mon aduis vous ne prefererez pas le iugement du peintre à celui du Capitaine, & ne supporterez pas ceulx qui preposent ce tableau au trophée, ny l'vmbre de la representation à la reale essence de la verité, encore que Simonides die, que la peinture soit vne
 poésie muette, & la poésie vne peinture parlante. Car les actions que les peintres monstrent comme presentes, & alors qu'elles se font, les lettres les racontent & composent comme aians esté faictes, & si les vns le monstrent avec couleurs & figures, & les autres avec paroles & dictions, ils different en matiere, & en maniere d'imitatiō, mais aux vns & aux autres y a vne mesme fin proposee, & est

A tenu pour le meilleur historien celuy qui sçait
 mieulx peindre vne narration, comme vn tableau
 de diuerſes affectiōs, & de diuerſes conditions de
 perſonnages, comme de pluſieurs images. Qu'il
 ſoit vray, Thucydides eſt touſiours apres ceſte di-
 lucidité d'oraïſon, taſchant à rendre l'auditeur par
 ſes paroles, comme ſpectateur, & deſirāt imprimer
 aux lecteurs les meſmes paſſiōs d'eſtonnement,
 d'eſbahiffement & d'agonie que font les choſes
 meſmes, quād on les voit faire à l'œil. Car Demo-
 ſthenes qui ſur la grēue meſme de l'Iſle de Pyle
B dreſſe le bataillon des Atheniens, & Braſiadas qui
 haſte le gouuerneur de ſa galere de donner de la
 prouë en terre qui ſ'en va ſur la planche, qui y eſt
 blecé, qui rend l'eſprit & ſe laiſſe aller ſur le tillac
 de la galere, & les Lacedemoniens qui combattent
 deſſus la mer, comme fils auoient le pied ferme en
 la terre, & au contraire les Atheniens qui combat-
 tent deſſus la terre comme fils euſſent eſté dedans
 les Galeres: & de rechef en la guerre de la Sicile, la
 deſcription qu'il fait des deux armées de terre qui
 ſont ſur le riuage de la mer, à voir combattre leurs
C gens en bataille nauale, la victoire eſtant longue-
 ment en balance ſans incliner plus en l'vne qu'en
 l'autre partie, aiant vne intolerable agonie, deſtref-
 ſe & trauail, à cauſe des chocs & charges diuerſes,
 ſe communiquant l'effort de la contention aux
 corps meſmes des regardans, ſoufflans d'ahan en
 auſſi grande peur & peine, que ceulx meſmes qui
 combattent, la diſpoſition par ordre & figuratiue
 narration qu'il en fait, tout cela eſt vne claire

representation de peinture. Parquoy fil n'est pas **D** raisonnable de comparer les peintres aux capitaines, ny comparons doncques pas non plus les historiens. Celuy qui apporta la nouvelle de la bataille & victoire de Marathon, ainsi comme escrit Heraclides Pontique, fut Therisippus natif d'Eroë, ou ainsi que plusieurs autres le mettent, ce fut vn Euclees qui accourut tout bouillant de la bataille avec ses armes, & battant aux portes des premiers & principaux de la ville d'Athenes, ne peult dire autre chose sinon, Resiouissez vous, nous vaincons: & cela dit, l'halene luy faillant, il trespassa tout soudain: mais encore celuy la vint luy mesme annoncer la victoire de la bataille, en laquelle il auoit combattu. Mais ie vous demande fil y auoit quelque chéurier ou quelque bouuier qui de dessus quelque butte, ou de dessus quelque eschognette, eust veu de tout loing ce grád chef d'œuvre la, que lon ne scauroit suffisamment exprimer de paroles, & qu'il en vint apporter la nouvelle en la ville, sans estre blecé ne sans auoir espandu vne seule goutte de son sang, & puis qu'il demâdast les mesmes honneurs & mesmes recompenses que iadis **E** eut Cynægirus, Callimachus & Polyzetus, pour autant qu'il auroit annoncé les haultes prouesses, les grands coups, & les meurtres qu'auroient faicts ces vaillans hommes la: ne vous sembleroit il pas excéder toute impudence, veu mesmemét que lon dit que les Lacedemoniens, à celuy qui leur alla porter la nouvelle de la bataille gaignee deuant Mantinee, que Thucydides a descrite, pour toute recom-

A recompense luy enuoyerent vne piece de chair de
 leurs conuiues, & toutefois les historiens ne font
 autre chose que messagers des faicts & gestes d'ar-
 mes, aians bonne & haulte voix, & qui par leur
 beau parler & leur eloquence les donnent aux hõ-
 mes à entendre, ausquels doiuent le loyer des bon-
 nes nouuelles ceux qui premierement les lisent &
 les voiet: mais aussi veritablemēt en sont ils louez,
 quand on en fait mention, & les lit on pour sça-
 uoir ceulx qui ont bien faict. Car ce ne sont pas
 les belles paroles ny le beau langage qui font les
 vaillances, & que lon desire plus ouïr: car la poësie
 mesme a grace, & est estimee & prisee, d'autant
 qu'elle recite les choses comme si elles auoiet esté
 faictes, ainsi comme Homere mesme le dir,

Il les tenoit leur contant plusieurs fables,

Qui ressembloient à choses veritables.

& dit on qu'il y eut vn iour quelqu'un des fami-
 liers de Menander qui luy dit, Les festes Baccha-
 nales, Menander, sont bien prochaines, & tu n'as
 pas encore fait la comedie. Menander luy respon-
 dit, Si ay, ainsi m'aidēt les Dieux, ie l'ay composee:
 car la disposition & ordonnance en est toute tail-
 lee & proiettee, il ne reste plus qu'à y adiouster des
 vers: pour autant que les poëtes mesmes reputent
 les choses plus necessaires & plus principales que
 non pas les paroles ny le langage. La courtisane
 Corinna reprit vn iour Pindare qui estoit encore
 ieune, & se glorifioit vn peu trop superbement de
 son sçauoir & de ses lettres, luy disant qu'il estoit
 homme de mauuais iugement, d'autant qu'il n'in-

uentoit point de fables, ce qui est le propre de la poësie: & puis la lāgue y adioust des figures de Rhetorique, des chāts, des mesures, & des rythmes, qui ne sont qu'adoucissements & embellissements des choses. Pindare à par luy aiant pensé vn peu plus attentiuement à ces propos, fit ce cantique,

D'Ismenus la lance doree,
Cadmus & la race sacree
Des vaillans champions semez,
Les nerfs de force renommez
Du grand Hercules ie surmonte:

& l'ayant monstré à Corinna, elle s'en prit encore plus à rire, disant qu'il falloit semer avec la main, & non pas à pleine poche: car à la verité aussi aiant ramassé & accumulé force semence de fables, il les a toutes espendues en ce cantique la. Or que la poësie consiste à bien inuenter des fables, Platon mesme l'a escrit, & la fable est vne narration faulse ressemblant à vne vraye, & pourtant est elle bien esloignee du faict, sil est ainsi que l'oraison soit image du faict, & la fable vmbre & image de l'oraison: & d'autant cedent ceulx qui controuuent & fignent des faicts d'armes à ceulx qui les escriuent au vray, comme sont inferieurs ceulx qui les recitent à ceulx qui les font. Or n'a la ville d'Athenes iamais eu d'excellēt ouurier de poësie, non pas mesme de la Lyricque, car Cinesias semble auoir esté vn maigre & fascheux poëte de cātiques bacchanales, en estant farcé & moqué par les poëtes Comicques, dont il acquist vn mauuais bruit & sinistre reputation. Et quant à celle qui est à per-
sonnages

A sonnages de la Comédie, ils en faisoient si peu d'estime, & la dedaignoient si fort, qu'il y auoit vne ordonnance laquelle defendoit expressément que nul Sénateur du conseil d'Arcopage n'eust à composer aucune Comédie. Et au contraire la Tragedie fut en vogue & en pris, pour le plus agreable spectacle, & le recit le plus recomadable que peussent auoir les hommes de ce siecle la, donnant aux fictions & aux affections vne force de tromper, de laquelle tromperie, ce disoit Gorgias Leotin, celuy qui trôpoit estoit plus iuste que celuy qui ne trompoit point, & celuy qui estoit trompé plus sage & mieux aduisé que celuy qui n'estoit point trompé: car celuy qui trompoit de celle sorte estoit plus iuste, d'autant qu'il faisoit ce qu'il auoit promis: & celuy qui estoit trompé plus sage, car ceulx qui ne sont pas du tout grossiers & lourdaux, sont ceulx qui plus aisément se prennent par le plaisir & la volupté des lettres. Quel profit doncques est-ce que ces belles Tragedies ont apporté à la ville d'Athenes, qui soit comparable à celuy que luy apporta le bon sens de Themistocles, qui fut cause d'y faire rebastir les murailles de la ville, ou la vigilance & sollicitude de Pericles qui orna le chasteau de tât de beaux edifices, ou Miltiades qui la deliura du peril de seruitude, ou Cimō qui luy acquit la seigneurie & principauté de la Grece? Si la sapience d'Euripide, ou l'eloquēce de Sophocles, ou le beau parler d'Æschylus, l'eussēt deliuree de quelque inconuenient, ou luy eussent acquis quelque gloire, il seroit paraduēture bien raisonnable de paragonner

les poëtiques inuentions aux triomphes & tro-
phées, & le conseil des capitaines au Theatre, & les
prouesses & haults faicts d'armes à la science de
côposer & faire iouer de belles Comédies & Tra-
gédies. Voulez vous que nous introduisions en
place les personnages mesmes, en attribuant à cha-
cun d'eux l'entree qui leur est cōuenable, avec les
marques & enseignes de leurs faicts? Viennent
dôcques en auant d'vn costé, les Poètes au son des
flustes, des lyres & violons, disans & chantans, Sei-
gneurs il faut faire silence, & se tirer arriere qui ne
fait profession de noz lettres, qui n'a la lāgue pure **E**
& nette, qui n'a ny chanté ny ballé aux saintes
cerimonies du seruice des Muses gentilles, & qui
n'est point profes és saints mysteres Bacchiques
de Cratinus le grand māgeur. Qu'ils portēt quant
& eulx tout leur equipage, les habillements des
ioueurs, les masques, les autels, qui sont dressez sur
les eschaffaux, les feintes & engins à faire descēdre
les Dieux, les Tripieds d'or pris de leurs victoires:
& apres eulx leurs ioueurs, comme vn Tragus, vn
Nicostratus, vn Callipides, vn Meniscus, vn Theo-
dorus, vn Polus, les supposits & satellites qui cour- **F**
risent & accompagnent la Tragedie, cōme vne ri-
che & sumptueuse Dame, ou bien des recuiseurs,
doreurs & peintres d'images qui la suiuent, & que
lon face prouision de robbes, d'habillements de
ieux, de masques, de braguesques & chausses de
pourpre, d'engins à employer les feintes sur la Sce-
ne, de baladins & de satellites, de tout ce peuple la
malaisé à manier qui sert à tels ieux, & dont le de-
fray

A fray est de grande despense. Aquoy regardant vn Laconien rencontra fort bien quand il dit, Que les Atheniens s'abusoiēt & faillioient bien lourdement de despendre tant, & de faire à bon escient pour iouer : c'est à dire, de consumer les deniers qu'il faudroit à mettre sus vne grosse armee de mer, & à soudoyer & entretenir vn puissant exercite de terre, à faire iouer des jeux en vn Theatre : car qui voudra faire le compte, combié leur a cousté chascune Comédie, il se trouuera que le peuple Athenien a plus despédu à faire iouer les Tragédies des **B** Bacchantes, ou des Phœnissēs, ou des Oedipes, ou Antigone, ou faire représenter les actes d'une Medea, ou d'une Electra, que non pas à faire la guerre aux Barbares, pour acquerir Empire sur eulx, ou pour defendre leur liberté contre eulx : car les Capitaines bien souuēt menoient leurs hommes aux batailles, leur aians fait commandement de porter des viures, ausquels il ne fallust point de feu. Et certainement les Capitaines des galeres aians fait prouision de farines seulement, & pour viande d'oignons & fromage, pour leurs hommes de rame, ils **c** les embarquoient dedans les galeres : là où les entrepreneurs qui faisoient les jeux & les dâses à leurs despens, donnoient à leurs baladins des anguilles, des tendres laictues, des saulses où il entroit de l'ail & de la moëlle, & les festoyoient ainsi delicieusement & longuement pour leur exercer la voix. Or de ces defrayeurs la ceulx qui demouroient vaincus n'en auoient autre chose, sinon qu'ils en estoient mocquez, farcez & iniuriez : & à ceux qui

y estoient victorieux, il ne leur en restoit pas vn tri-
pié ny vne autre marque de la victoire, comme di-
soit Demetrius, mais vn seruir d'exemple de ceulx
qui ont follement despensé le leur, & ont laissé
leur maison cōme vne sepulture vuyde: telles sont
les fins à quoy conduit les hommes la despense de
la poësie, & rien de plus honorable. Mais d'autre
costé regardons aussi maintenant passer de deça
les Capitaines, & cependant qu'ils passeront à la
verité il fault bien faire silence, tenir sa langue, & se
tirer arriere, mesmement ceulx qui viuent sans rien
faire, sans se mesler du gouuernement de la chose
publique, & sans aller à la guerre ny porter les ar-
mes: fil y a aucun qui n'ait pas le cœur assez ferme,
ny la volonté pure & nette, & qui ne soit point or-
donné & receu en la sainte confrairie, ou de Mil-
tiades le boucher des Medois, ou de Themistocles
le meurtrier des Perses. C'est vne danse Martiale
que ceste cy meslee de batailles sur la terre, & de
flottes de vaisseaux sur la mer, chargée de des-
pouilles ensemble & de trophées. Escoute moy
Enyo fille de la guerre. voyla vn preambule de lā-
ces & de picques. Ambrassez, ô gens de bien, la
mort sacrée, comme disoit Epaminondas le The-
bain, en vous exposant à treshonorables & trefillu-
stres combats pour la patrie, pour les sepultures de
vozancestres & pour les choses saintes. Il m'est
aduis que ie voy leurs victoires venir en proces-
sion, lesquelles ne tirent point apres elles, pour
leur pris & loyer, vn bœuf ny vn bouc, & qui ne
sont point couronnées de feuilles de herbe, & ne
sentent

A sentent point la lie du vin ny le moust, comme les Bacchanales, ains des villes & citez: toutes prouinces sont à eulx, les Isles, les terres fermes tant mediterranees que maritimes, des colonies nouuelles de dix mille hōmes. Ils sont courōnez de trophēes, de triōphes & de despoilles de toutes sortes, dont les marques, les statues & images sont de beaux tēples, comme le Parthenon, ou l'Hecatompodon à Athenes, les murailles de deuers midy, vn Arsenal à loger les nauires, les portiques, la prouince de la Cheronese, la ville d'Amphipolis. La plaine de

B Marathon accompagne la victoire de Miltiades, la Salamine celle de Themistocles marchant par dessus le bois & naufrage de mille vaisseaux, & celle de Cimon apporte cent galeres Phœniciēnes de la riuiere de Eurymedon, & celle de Demosthenes & de Cleon de l'isle de Sphaeterie, la rôdelle de Brasidas capitaine, & ses soudards liez & enferrez, celle de Conon rebastit les murs de la ville, & celle de Thrasylulus ramena le peuple victorieux du fort de Pyle, celles d'Alcibiades, apres la Sicile, releuent la ville qui estoit tombee par terre, & des batailles

C de Neleus & d'Androclus en la Lydie & en la Carie, la Grece vit toute l'Ionie soubleuee. Et si lō demande à chascune des autres quel bien est aduenu à la ville par elle, l'vne dira l'Isle de Lesbos, l'autre celle de Samos, l'autre celle de Cypre, l'autre la mer de Pont, l'autre cinq cents galeres, l'autre dix mille talēts, sans la gloire & l'hōneur des trophēes. Ce sont les causes pour lesquelles la ville solennise & celebre plusieurs festes, c'est pourquoy elle

fait des sacrifices aux Dieux, non pas pour les victoires d'Æschylus, ou de Sophocles. non pas quand Carcinus coucha avec Aerope ou Astydamas avec Hector, ains le sixieme du mois de May iusques au iourd'huy la ville celebre la victoire de la iournee de Marathon, & le sixieme du mois * * elle fait offrande de vin aux Dieux en remerciement de la bataille nauale que gagna Chabrias pres l'Isle de Naxos, & le douzieme ils sacrifient aussi aux Dieux en action de graces pour la liberte recouuree, pour autant qu'à mesme iour ceulx de Phyle descendirent en la ville. Le troisieme de Mars ils gagnerent la bataille de Platées, & consacrerent le sixieme à Diane, auquel iour celle d'elle reluisit en pleine Lune aux Grecs victorieux deuant l'Isle de Salamine, & la victoire qu'ils gagnerent deuant la ville de Mantinee a fait le douzieme iour de Septembre plus saint & plus solennel, auquel tous les autres alliez estants forcez & tournez en fuitte, eulx seuls aians gagné de leur costé, dresserent vn trophée sur leurs ennemis vainqueurs. Voyla ce qui a eleué la ville en gloire, voyla qui l'exalte en grandeur. C'est cela pour quoy Pindare a appellé la ville d'Athenes le soutien de la Grece, non pour autant que par les Tragedies de Phrynichus, ou de Thespis elle redressast les Grecs, mais pource que, ainsi que luy mesme dit ailleurs, au long de la coste d'Artemise,

Ceux d'Athenes ont planté
Le glorieux fondement
De la Grecque liberte:

A Et depuis à Salamine, à Mycale, & à Platées, l'aiants confirmee fort & ferme, comme vn diamant, la baillerent de main en main aux autres hommes. Mais bien vrayement pourra lon dire que ce n'est que ieu que des Poëtes, mais que les Orateurs ont quelque chose pourquoy on les doit comparer aux Capitaines, & pourquoy *Æschines* se moquant de *Demosthenes*, dit, Il est vraysemblable que la tribune aux harengues intête proces contre le palais des Capitaines. Est il donques pas raisonnable de preferer l'oraison Plataïque d'*Hyperides*,
 B à la victoire que gaigna *Aristides* deuant la ville de Platées? ou la harengue de *Lyfias* alencontre des trente tyrās, à l'execution & occision qu'en feirent *Thrafiybulus* & *Archias*, ou bien celle d'*Æschines* contre *Timarchus*, accusé de conspiration & ligue conspiree, au secours que porta *Phocion* à ceux de la ville de *Byzance*, par lequel secours il empescha les *Macedoniens* d'insolentement & oultrageusement abuser des enfans des alliez & confederez d'*Athenes*? Ou bien comparons l'oraison de *Demosthene* de la couronne, aux couronnes public-
 C ques que receut *Themistocles* pour auoir deliuré la Grece du peril de seruitude, attendu mesmemēt que l'vn des passages plus remarquable & plus eloquent d'icelle oraison, est quād il coniure les ames de leurs ancestres, qui en la bataille de *Marathon* exposerent leurs vies pour le salut de la Grece: ou bien ceulx qui monstrent par les *Escholes* la Rhetorique aux enfans, comme vn *Isocrates*, vn *Antiphon*, vn *Isēus*. Mais la ville a honoré ces vaillants

hommes la de sepultures publiques, en recueillât D
honorablement les reliques de leurs corps, & les a
deifiez, là où l'orateur qui iuroit par eux, ne les imi
roit pas. Et Isocrates qui en exaltant & louant
haultement ceulx qui auoient combattu & exposé
leurs vies au peril de la mort, en la bataille de Ma-
rathon, disant qu'ils faisoient si peu de compte de
leurs vies, qu'il sembloit que leurs ames fussent à
autrui, en celebrât leur hardiesse & le peu de com-
pte qu'ils faisoient de leurs vies, & neantmoins
estant ia deuenu fort vieil, il respondit à quelqu'un
„ qui luy demandoit comment il se portoit, Comme E
„ vn homme qui a plus de quatre vingts & dix ans,
„ & qui pense que le plus grand mal du monde soit
„ la mort. Car il estoit enuieilly, non en affilant son
espee, non en aguissant sa lâce, non en polissant son
armet, non en portant les armes au camp, non en
maniant la rame dessus les galeres, mais en com-
posant & collant, par maniere de dire, des figures
de Rhetorique, & des clauses semblables, des oppo-
sites, des finissans de mesme, polissant & vnissant
ses clauses à la raspe presque, & au rabot. Com-
ment donc n'eust cest homme la redouté le clic- D
quettis & le bruit des armes, ou le choc de deux ar-
mees, veu qu'il craignoit de heurter vne voyelle
avec vne autre, & de proferer vne clause où il y
eust defectuosité d'une seule syllabe? car Miltiades
apres auoir gaigné la bataille en la plaine de Ma-
rathon, le lendemain s'en reuint à la ville avec son
armee victorieuse, & Pericles aiant domté & sub-
ingué les Samiens en l'espace de dix mois, se pre-
feroit

A feroit à Agamemnon, qui à peine au dixieme an auoit pris la ville de Troie la grãde, là où Isocrates consuma presque l'espace de trois olympiades, qui font quinze ans, à escrire & composer son oraison, qu'il appelle Panegyrique, sans qu'il ait iamais durant ce temps esté à la guerre, ny en ambassade, ny basti aucune ville, ny esté Capitaine de galere, encore que ce temps la ait porté des guerres innombrables: ains ce pendãt que Timotheus deliuroit l'Isle d'Eubœe, que Chabrias gaignoit la bataille nauale de Naxos, & Iphicrates tailloit en pieces tout vn regiment de Lacedemoniens, pres le port de Lechem, & que le peuple d'Athenes aiant affranchy toutes villes, donnoit à toute la Grece autãt de voix & de suffrages en l'assemblée des estats generaux, cõme elle en retenoit pour elle: il estoit assis en sa maison à agencer les mots, & approprier les dictions de son liure, durant tout le temps que Pericles bastissoit les grands portiques, & le beau temple d'Hecatopedon, combien qu'encore Cratinus le Comicque se mocque de cest œuure, comme allant bien laschement & lentement en besongne, parlant de la muraille du milieu,

De parole il auance bien,

Mais de faict il n'auance rien.

Considerez vn peu ie vous prie la bassesse de cœur & d'esprit de ce Sophiste qui despensoit la neuueme partie de sa vie à composer vnẽ seule oraison. Mais il n'est pas raisonnable de conferer mesme les oraisons de Demosthenes l'orateur, aux faicts d'armes de Demosthenes le Capitaine, cõme celle

LEQUEL EST PLUS VTILE,

qu'il a escritte contre Cimon, aux trophées que ^D
l'autre erigea deuant Pyle : celle qu'il a escritte à
Amathusius des esclaves, aux Lacedemoniens que
l'autre prit & rendit esclaves, ny d'autant qu'il
escriuit vne harengue pour faire donner droict de
bourgeoisie à ceulx qui estoient venus s'habituier à
Athenes, pour cela il ne merite pas autant d'hon-
neur comme Alcibiades, qui associa les Mātinien
& les Eliens en ligue, alencontre des Lacedemo-
niens. Qui plus est, ses oraisons publiques sont en
cela reputées admirables, que és Philippiques il ex-
horte les Atheniens à prendre les armes, & louë ^E
l'entreprise de Leptines.

LEQUEL EST LE PLUS V-
TILE, LE FEU OV L'EAV.

L'EAV est le meilleur element,
Et l'or, cōme le feu flamman,
Reluit sur toute autre che-
uance,
ce dit le poëte Pindare: par où
il appert manifestement qu'il ^F
donne le second lieu au feu.
Et semble qu'Hesiodé s'accorde aussi à cela quand
il dit,

Le Chaos a premier que tout esté:
car il est certain que la plus part des anciens a ap-
pellé l'eau Chaos, à cause qu'elle s'espand facile-
ment: mais s'il n'estoit question que de tesmoins,
la preuue seroit presque egalle d'un costé & d'au-
tre,

Atre, pource qu'il y en a assez qui estiment que le feu soit le principe de toutes choses, & comme la semence qui de soy produit toutes creatures, & les reçoit aussi toutes en soy par la generale inflammation: mais laissons là les tesmoignages des hommes, & considerons les raisons d'une part & d'autre, pour veoir en quelle part elles nous tireront d'avantage. N'est il doncq pas raisonnable de iuger plus vtile ce dequoy nous auons tousiours & continuellement affaire, & en plus grande quantité, comme d'un outil & instrument necessaire, &

B comme vn amy de tout temps & de toutes heures, comme lon dit, qui tousiours se presente à nous faire seruice? Or est il que le feu ne nous est pas tousiours vtile, ains au contraire quelquefois il nous fasche, & nous nous en eloignons, là où l'eau nous sert en hyuer & en esté, quand nous sommes malades & quand nous sommes sains, de nuict & de iour, & n'y a iamais temps ny saison que l'homme n'en ait affaire: c'est pourquoy nous appellons les trespassez Alibantas, comme priuez de toute liqueur & humeur, & par consequent aussi priuez

C de la vie: d'avantage l'homme a esté longuement sans feu, mais sans eau iamais. Or est il que ce qui a esté des le commencement, & des la premiere creation des hommes, est plus vtile que ce qui a depuis esté inuenté: car il est tout manifeste que nature nous l'a donné comme necessaire, & l'autre la fortune ou l'industriel l'a trouué comme accessoire. Or ne scauroit on dire en quel temps les hommes n'auoient point d'eau, & ne lit on point que

pas vn des Dieux ou demi-Dieux en ait esté l'in-
 uenteur : car elle a esté en mesme instant qu'eux,
 voire elle leur a donné l'estre, là où l'vsage du feu a
 esté trouué hyer ou deuât hyer, en maniere de di-
 re, par Prometheus, ainsi

Sans feu pouuoit, non sans eau, la vie estre.

Et que ce ne soit point vne fiction poëtique con-
 trouuée à plaisir, la vie presente en fait pleine foy,
 car il y a encore auiourd'huy par le monde des na-
 tions qui s'entretiennent sans feu, sans maison,
 sans foyer, viuans à l'air à descouuert:& Diogenes
 le Cynique n'vsoit point de feu, tellemēt qu'ayant
 auallé vn Poulpe tout crud, Voila, dit-il, ô hōmes,
 comment ie me hazarde pour vous: mais sans eau
 iamais homme n'estima qu'il fust ny honnestes ny
 possible de viure. Et quel besoing est il que ie m'ar-
 reste à rechercher ainsi par le menu la nature de
 l'homme? Car y ayant plusieurs, & pour mieux di-
 re, presque innumerables especes d'animaux, il n'y
 a que celle des hommes presque qui ait cognois-
 sance de l'vsage du feu, toutes les autres ont leurs
 vies & leurs nourritures sans feu. Ceux qui brou-
 tent, qui paissent, qui volent, qui se trainnent par
 terre, leur viure est de manger des herbes, des raci-
 nes, des fruiçts, de la chair, le tout sans feu: mais sans
 eau, il n'y a beste, ny terrestre, ny aquatique, ny de
 l'air qui puisse viure. Il est bien vray qu'Aristote es-
 crit qu'il y a quelques bestes de celles qui deuorēt
 la chair, lesquelles ne boient point, mais cōment
 que ce soit, si se nourrissent elles de quelque humi-
 dité. Cela doncques est plus vtile sans lequel nul-
 le sar-

A le sorte de vie ne peut consister ny durer. Passons plus outre, des animaux qui vsent, aux choses dont ils vsent pour sustenter leurs vies, comme sont les plantes & les fruiçts. Entre iceux il y en a qui n'ont du tout point de chaleur, les autres si peu que lon ne le peut appercevoir: au contraire l'humidité est celle qui fait germer toutes semences, qui les fait croistre, & à la fin porter fruiçt: car qu'est il besoin que i'allegue à ce propos le vin & l'huile, ny autres liqueurs que nous cueillons & vendangeons, ou bien que nous tirôs des pis des bestes, & que nous

B chastrons es grossires des abeilles, veu que le froment mesme, qui semble estre de nourriture seiche, se procreë par transmutation, putrefaction, & diffusion de l'humidité: Et puis cela est le plus vtile, qui ne porte iamais dommage: or est il que le feu gaignant & s'estendant est le plus mortel & le plus pernicleux du monde, là où la nature de l'eau de soy ne fait iamais mal: & puis de deux choses celle est la plus profitable qui est plus simple, & qui sans aucun preparatif & appareil peut exhiber le profit qu'elle apporte: & le feu **a**

c besoing de secours & de matiere, c'est pourquoy les riches en participent plus que les pauvres, les Roys que les priuez: là où l'eau a encore **cela** d'humanité qu'elle se donne egallement à toutes sortes de gens, elle n'a point besoing d'outils ne d'instrumens: c'est vn bien complet & parfait en soy mesme, sans emprunter rien au dehors de soy. D'auantage, ce qui estant multiplié perd son profit & sa cōmodité, est par consequent moins vtile:

Et le feu est tel, ne plus ne moins qu'une beste ravissante qui deuore tout, & consomme tout ce qui approche de luy, de maniere que c'est plustost par industrie & artifice de celuy qui en sçait vsuer avec moderation, que de sa nature, s'il fait aucun bien, là où l'eau n'est iamais effroyable. Et puis ce qui peult profiter seul, & en compagnie d'autre, est plus utile : or est il que le feu ne reçoit point en sa compagnie l'eau, ny ne profite point par la participation d'icelle : là où l'eau est profitable avec le feu, comme lon voit que les fontaines d'eau chaude sont medicinales, & en sent on visiblement la guarison que lon en reçoit. Lon ne sçauroit trouver du feu humide, là où l'eau autant chaude comme froide, est tousiours profitable à l'homme. Il y a plus, que l'eau estant l'un des quatre Elemens elle en a produit un cinquième, par maniere de dire qui est la Mer, non moins utile presque que pas un des autres, tant pour plusieurs autres causes, que principalement pour le commerce : car estant parauant la vie de l'homme sauuage, & sans communication des uns aux autres, cest element la liaison coniointe & rendue parfaite, apportant communication & amitié des uns aux autres par mutuels secours & reciproques donations des uns aux autres. Heraclitus dit en un passage, Si le Soleil n'estoit la nuit ne seroit point : aussi pourroit on bien dire, Si la mer n'estoit point, l'homme seroit le plus sauuage animal, le plus necessiteux, & le moins respecté du monde : là où maintenât elle a apporté des Indes la vigne iusques en la Grece, & de la Grece iusques

A iusques és prouinces plus loingtaines, & de la Phœnicie l'vsage des lettres pour la conseruation de la memoire des choses : elle a conduit par deça le vin & les fruiçts, & a empesché que la plus grâde partie du môde ne demourast ensepuelie en ignorance. Cômement doncques ne sera l'eau plus vtile quâd elle nous fournit vn Element d'auantage ? Mais au contraire à l'aduenture pourroit on de là commander à insister alencontre, en disant que Dieu, comme vn ouurier, aiant eu les quatre Elemens pour la fabrique de ce monde, lesdits Elemens repugnâs les vns aux autres, la terre & l'eau ont esté mis dessoubs, comme la matiere qui se laisse former & mouler, & qui reçoit ordonnance, disposition & force de produire & d'engendrer telle, cômme elle leur est departie par les autres deux, l'air & le feu, qui sont ceux qui façonnent, forment & moulent, & qui excitêt les deux premiers à generation, lesquels autremêt iusques à là demouroiêt morts sans aucun mouuement, mais de ces deux la derechef le prince & le maistre c'est le feu. Ce que lon pourra manifestemêt cognoistre par ceste induction, car la terre, si elle n'est eschauffee d'vne essence chaleureuse, demeure sans produire ne porter aucun fruiçt, mais quand le feu s'espand & coule dessus, il la rend grosse & preste à engendrer : car autre cause ne scauroit on rendre pourquoy les rochers & montagnes arides sont steriles, sinon d'autant qu'ils n'ont du tout point ou bien peu de participation de la nature du feu. En somme tant s'en faut que l'eau soit de soy suffisante pour se

conferuer soy-mefme, ou pour engendrer d'autres D
creatures, qu'elle eft caufe de fa ruine & corru-
ption fans l'aide du feu: car la chaleur eft celle qui
tient en eftre & conferue en fa propre fubftance
l'eau, comme toutes autres chofes, & là où elle eft
abfente, & qu'elle defaut, elle fe pourrit & fe cor-
rompt, de façon que la ruine & deftructiō de l'eau,
c'eft default de chaleur, comme on peut veoir par
les eaux des marets, & toutes fortes d'eaux crou-
piffantes & qui font retenues en des creux & con-
cauitez fans yffues, car elles deuiennent mauuaifes,
& à la fin fe pourriffent & empuantiffent, pour au- E
tant qu'elles n'ont point de mouuement, lequel
aiait cefte propriété d'exciter ce qu'il y a de cha-
leur en chafcune chofe, conferue plus les eaux qui
font courantes & qui coulent fort, d'autant que ce
remuemēt conferue ce qu'elles ont en elles de cha-
leur: c'eft pourquoy nous appellons le viure ζῷον,
pour ce que ζῆν fignifie bouillir. Comment donc-
ques pourra lon dire, que de deux, celuy qui don-
ne l'eftre à l'autre, ainfi que fait le feu à l'eau, ne foit
plus vtile? Et puis ce qui pour eftre de tout point
dehors, eft caufe que l'animal perit, eft le plus vtile, F
car il eft tout manifefte que cela, fans lequel on ne
peut eftre, a donné caufe de l'eftre, & voit on qu'ès
corps mefmes des animaux, les parties qui ont
moins de la nature du feu font les plus infenfibles,
comme font les os & les cheueux, & les parties
qui font plus efloignees du cœur, & prefque la dif-
ference qu'il y a entre eux des grands aux petits,
procède de la prefence du feu: car ce n'eft pas l'hu-
midité

A midité qui produit les plantes , & les fruiçts , mais bien la chaude humidité: auffi font les eaux froides ou du tout steriles , ou bien peu fecondes & fertiles: & toutefois si l'eau de sa nature propre estoit fructueuse & fertile , il faudroit doncques qu'elle peust toute seule, & en tout temps , produire des fruiçts, mais au contraire elle leur est nuisible pour vn autre raison . Et puis pour nous seruir de feu comme feu, nous n'auons point besoing d'eau, ains à l'opposite elle y nuit , car elle l'estaint & le perd: au rebours plusieurs y en a qui ne se sçauroient ser-

B uir d'eau sans feu , car quand elle est chauffee elle en est plus saine, & en son naturel elle est nuisible. Celuy doncques des deux qui peut profiter de soy mesme sans auoir besoing du secours d'autrui , est le meilleur & le plus profitable. D'auantage l'eau n'est vtile qu'en vne seule sorte , qui est par attouchement, quand on s'en laue, ou qu'on la touche, là où le feu sert & profite à tous les cinq sens de nature, car il est propre & au toucher de pres, & au veoir de loing, de maniere que outre les autres moiens de profiter on y peut compter la multipli-

C cité: car de dire que l'homme peut aucune fois estre sans feu, il est totalement impossible , mais il y a en cela differēce entre les nations, cōme en autres choses : la mer mesme est rendue plus vtile par la chaleur, cōme estant plus courante & plus agitee , car d'elle mesme elle ne seroit point differente des autres eaux. Et ceux qui n'ont point besoing de feu de dehors, ce n'est pas à dire qu'ils n'en aient du tout point de besoing , mais pour ce qu'ils ont abon-

dance & foison de chaleur naturelle en eux, de sorte qu'en ce poinct la mesme l'vtilité du feu doit estre estimee plus grande par raison vray-semblable: car l'eau n'est iamais telle, qu'elle n'ait aucunement besoing de secours de dehors, & le feu pour son excellence est content de soy mesme, sans auoir besoing d'autrui. Tout ainsi doncques qu'un Capitaine seroit meilleur & plus excellent qui scauroit tellement ordonner sa ville, qu'elle n'auroit point affaire d'alliez de dehors: aussi faut estimer qu'entre les Elemens celuy la soit le plus digne, qui se peut plus souuent maintenir sans le secours & l'aide d'autrui. Autant en faut il dire des animaux qui ont moins de besoing, combien que au contraire on pourroit à l'aduéture dire, que cela soit plus vtile, duquel nous vsons seuls, mesme-ment que par le discours de la raison nous pouuons choisir ce qui est le meilleur: car qu'est il plus vtile ny plus profitable aux hommes que la raison? & toutefois elle n'est point és bestes brutes. Que s'en- suit il pour cela? Est-ce à dire qu'elle ait esté moins vtilement inuentee par la prouidence de Dieu? Mais puis que nous sommes tombez en ce propos qu'est il plus vtile à la vie humaine que les arts? or n'y a il art presque que le feu n'ait inuentee, ou pour le moins qu'il n'entretiene: c'est pourquoy on fait Vulcain le prince & le maistre d'icelle. Il y a plus, que le temps & l'espace de vie estant donné fort court & fort bref à l'homme, encore le dormir, comme dit Ariston, ne plus ne moins qu'un gabelleur, luy en oste la moitié: il est vray que l'homme

A me pourroit veiller sans dormir toute la nuit, mais ie puis biẽ dire, que le veiller ne luy seruiroit de rien, si n'estoit que le feu luy apportast les commoditez du iour, & luy ostant la difference qu'il y a entre les tenebres de la nuit, & la lumiere du iour. Si doncques il n'y a rien qui soit plus profitable aux hommes que le viure, comment ne iugera lon le feu la plus vtile chose qui soit au monde, puis qu'il augmente & multiplie la vie? D'auantage, ce dequoy les cinq sens de nature participent le plus, est le plus vtile: or est il tout euident qu'il n'y a nul des sens naturels qui se serue de la nature de l'eau à part, sans l'air ou sans le feu meslé parmy, là où tout sentiment participe du feu, comme d'une vertu viuifiante, mesmement la veuë, qui est le plus soudain & le plus aigu de tous les sens corporels, & comme vn feu allumé qui nous confirme la foy & assurance qu'il y a des Dieux, & comme dit Platon, par le moien de la veuë nous pouuons conformer nostre ame au mouuement des corps qui sont au ciel.

c DV PREMIER FROID.



L faut qu'il y ait, ô Phatorinus, vne premiere puissance & substance du froid, cōme du chaud est le feu, par presence & participatiō de laquelle chascune des autres choses soit froide: ou plustost il faut dire, que le froid est priuation de chaleur, cōme lon dit que les tenebres sont pri-

uation de lumiere, & station de mouuement, at-^D
 rendu mesmement qu'il semble que le froid soit
 stationnaire, & le chaud motif, & le refroidissement
 des choses chaudes ne se fait point par entree d'au-
 cune puissance froide, ains par departement de
 chaleur: car aussi tost comme elle est toute depar-
 tie, ce qui demeure est tout refroidy: car la vapeur
 que les eaux bouillantes rendent, sort quand & la
 chaleur qui s'en va, & pourtant la refrigeration
 diminue la quantité, par ce qu'elle chasse ce qu'il y
 a de chaud, sans qu'il y rentre rien d'autre. Ou
 bien ceste opinion pourroit estre suspecte, premie-^E
 rement, d'autant qu'elle subuertit & oste plusieurs
 puissances, comme si elles n'estoient pas qualitez
 ou habitudes realement subsistentes, ains seule-
 ment priuations de qualitez & d'habitudes, com-
 me le pesant du leger, le dur du mol, le noir du
 blanc, l'amer du doux, & ainsi des autres sembla-
 bles selon que chascune est en puissance contraire
 à l'autre, non pas comme à l'habitude est contraire
 priuation. Et puis, d'autant que toute priuation
 est oisifue & sans action quelconque, cōme auen-
 glement, surdité, silēce & mort, par ce que ce sont ^F
 dechassemens de formes, & especes & aneantisse-
 mens de substances, non pas natures ny substan-
 ces reelles à part, là où nous voions que la froideur
 depuis qu'elle s'imprime dedans les corps, n'y en-
 gendre pas moins d'accidens & d'alterations que
 fait la chaleur: car plusieurs choses s'y figent & ge-
 lent par le froid, plusieurs s'y arrestent & retiennēt,
 & s'y espessissent: & sa stabilité mal-aisée à emou-
 uoir

A uoir n'est point pourtant oiseuse, ains est graue & ferme, aiant force & vigueur d'arrester & de cōtenir. Et pourtant priuation est vne defaillance & departemēt de puillāce contraire, là où plusieurs choses se refroidissent, encore qu'elles aient beaucoup de chaleur au dedās, & y en a quelques vnes que le froid serre & estraint, d'autant plus que plus ils les trouuent chaudes, comme, pour exemple, le fer que lon trēpe. Et les Philosophes Stoïques tiennent que les esprits naturels enclos dedans les corps des petits enfans venās de naistre, par la froideur de l'air enuironnant s'acerent & affinent, & qu'ainsi changeans de nature ils deuient ame, toutefois cela est subiect à dispute: mais veu que lon voit que la froideur est cause efficiente de plusieurs autres effects, il n'est pas raisonnable de penser que ce soit priuation. D'auantage la priuation ne reçoit point de plus ou de moins, comme de deux qui ne voiet aucunemēt, l'un n'est point plus auengle que l'autre, & de deux qui ne parlēt point, plus muet que l'autre, ny de deux qui ne vivent point, plus mort que l'autre: mais entre les choses

c froides il y en a biē de plus & de moins, & du trop & non trop, & generally des roidissēmens & relaschemens, aussi bien comme entre les chaudes, & pourtant la matiere selon qu'elle seuffre plus ou moins par ses contraires puillāces, produit d'elles des substances plus ou moins froides ou chaudes les vnes que les autres, car il ne se peut faire mixtion ny cōposition d'habitude avec priuation, & n'y a pas vne puillāce qui reçoie ny admette

sa contraire qui luy apporte priuation, n'y n'en
 fait iamais sa compaignie, ains luy cede. Au con-
 traire le froid demeure bien meslé avec le chaud
 iusques à quelque degré, comme le noir avec le
 blanc, le hault avec le bas, le doux avec l'amer, &
 par ceste association, meslange & accord des cou-
 leurs, des sons, des drogues, des saveurs, produi-
 sent des compositions, grandement agreables &
 plaisantes: car l'opposition, selon habitude & pri-
 uation, est du tout ennemie sans aucun moien de
 reconciliation, estât l'essence de l'un la destruction
 de l'autre: là où celle qui est de deux puissances con-
 trairees, prise à propos & en saison, & les arts s'en
 seruent bien souuent, & la nature encore plus, tant
 en autres productions qu'es changemens & muta-
 tions de l'air: pour le reglement & ordonnance
 desquelles, Dieu, qui les gouuerne, s'appelle Har-
 monique, non pour accorder le haut avec le bas,
 ny pour faire que le blanc & le noir conuersent
 amiablement ensemble, mais pource que par sa
 prouidence il dispose si bien l'accord & discord de
 la chaleur & de la froideur au monde, qu'avec
 moderation & sans excès, ils se battent & se re-
 concilient ensemble, en ostant à l'un & à l'autre ce
 qu'il y a de trop, & reduisant les deux en telle
 temperature & tel estat qu'il appartient: & puis
 on sent le froid tout aussi bié que lon fait le chaud,
 là où lon ne sçauroit ny veoir, ny ouïr, ny tou-
 cher, ny par aucun autre sentiment cognoistre la
 priuation: car il faut que ce soit quelque substan-
 ce pour la pouuoir sentir: & là où il n'apparoit
 aucune

A aucune substance, là on entend qu'il y a priuation, qui est negation de substance, comme aueuglement est negation de veuë, silence de voix, vuyde solitude de corps. Car on n'apperçoit pas le vuyde par le sens de l'attouchement, mais là où il n'y a point d'attouchement de corps, là entend on qu'il y a vuyde: aussi n'oyons nous pas le silence, mais quand nous n'oyons rien, nous entendons que c'est siléce. Autant en faut il dire des aueugles, des nuds & des desarmeés, on n'en a nul sentiment, ains, negation du sentimēt: aussi faudroit il dōcques

B que lon ne sentist point le froid, ains seulement que là où defaudroit le chaud on entédist le froid, si ce n'estoit que priuation du chaud. Mais s'il est ainsi que comme le chaud se sent par le hale du cuir, & la dilatation de la chair, aussi le froid se sent par le resserrement & condensation d'icelle, il appert manifestement qu'il y en a vn propre & particulier principe & source, comme de la chaleur. D'auantage la priuatiō en chascune espee est vne & simple, mais les substances ont plusieurs differences & plusieurs puissances. Car le silence n'est que d'une

C sorte, là où la voix est diuerse, tantost faschant, tantost resiouissant. Le sentiment, les couleurs & les figures semblablement ont pareilles differēces, qui disposent & affectionnent tantost d'une sorte & tantost d'une autre, le subiect qui s'en approche: mais ce qui est non palpable, non coloré, & generally non qualifié d'aucune qualité, n'a point de diuersité, ains est tout semblable. Or maintenāt doncques le froid ressemble il à ces priuatifs là, de

sorte qu'il ne face aucune diuersité en ses accidets: D
 Ou si tout au contraire, il vient quelquefois au
 corps de grandes & vtiles voluptez du froid, & au
 rebours aussi quelquefois de grâds dommages, de
 grands maux & de fascheuses pesanteurs, ausquel-
 les qualitez du froid le chaud ne cede pas ny ne
 s'enfuit pas tousiours, ains bien souuent estant re-
 tenu & arresté dedans le corps il resiste & combat
 alencontre, & ce combat des deux contraires s'ap-
 pelle horreur, & tremeur, ou tremblement. Mais
 quâd la chaleur est du tout vaincue, alors il succede
 l'estre gelé ou trâsy, & la victoire du chaud appor- B
 te au corps vne tiedeur & vne dilatation avec plai-
 sir, ce que proprement Homere appelle *ταπεινωσις*.
 Mais cela est euident à tout le monde, & par iceux
 accidés autât ou plus que par nuls autres argumés,
 il se monstre & preuue que le froid est opposé au
 chaud, côme substance à substance, ou comme pas-
 sion à passion, non pas comme priuation à habitu-
 de, ou negation à affirmation, & que ce n'est point
 la corruption & destruction du chaud, ains vne na-
 ture & puissance corrompante, autrement il fau-
 drait oster l'hyuer du nombre des saisons de l'an- F
 nee, & la bise du nombre des vents, comme estans
 seulement priuation des saisons chaudes, & des
 vens du midy, & dirôs qu'ils n'ont point de propre
 & peculiere source & principe. Et toutefois y aiant
 en tout l'vniuers quatre premiers corps, lesquels à
 cause de leur pluralité & de la simplicité de leurs
 puissances, aucuns appellent elemens, & les suppo-
 sent estre principes de tous autres corps, le feu,
 l'eau,

A l'eau, l'air, & la terre, il est force qu'il y ait aussi quatre premieres & simples qualitez. Et qui sont elles, sinon la chaleur, la froideur, la siccité, & l'humidité, moiennant lesquelles les elemens souffrent & font toutes choses: Et cōme és elemens de la gram-
maire il y a les breues & les longues, & en la musi-
que les notes basses & hautes, dont les vnes ne sont pas priuation des autres: aussi faut il estimer que és
corps naturels les elemens sont les contrarietez de
l'humide contre le sec, & du froid contre le chaud,
si nous voulons adiouster foy & à la raison, & à ce
B que les sens naturels nous monstrent clairement:
ou bien ainsi que l'ancien Anaximenes estimoit, ne
pensons pas qu'il y ait rien ny chaud ny froid ab-
soluëment en substance, ains croyons que ce sont
passions communes de la matiere, qui suruiennent
apres les mutations. Car il dit que ce qui se serre,
espeslit & estraint en la matiere, c'est ce qui est
froid: & ce qui se rarefie & se lasche, car il vse de ce
propre terme *χαλκός*, il dit que c'est le chaud. Voy
la pourquoy ce n'est pas sans propos que lon dit
quel'hōme de sa bouche souffle & froid & chaud,
C car l'haleine s'enfroidit quand elle est pressée &
serree des léures, mais quand elle sort de la bouche
arriere-ouuerte, alors elle est chaude, à cause de la
rarité & laxité. Toutefois Aristote tient que c'e-
stoit ignorance à luy de dire cela, par ce que quād
nous soufflons la bouche toute ouuerte, nous
soufflons l'air chaud qui est dedans nous mesmes,
c'est à dire dedans nostre corps: mais quand nous
soufflons les léures serrees, nous ne poulsons pas

l'air qui sort de nous, ains celuy qui est deuant D
 nostre bouche, lequel est froid, & est le premier
 que lon sent. Mais sil est necessaire pour tant de
 raisons, de laisser vne substance du froid & du
 chaud. ramenons nostre discours à la continua-
 tion de nostre premier propos, cherchans quelle
 est la substâce, la nature & la source de la froideur.
 Ceulx donc qui disent que le geler de froid, trem-
 bler, herisser & dresser le poil, & autres choses
 semblables à telles passions sengendrent des for-
 mes triangulaires à costez inegaux, qui sont dedans
 noz corps, encore qu'ils faillent és particularitez, si E
 est-ce qu'ils prennent leur commencement de là
 où il le fault tirer, pource qu'il fault que le fonde-
 ment & l'origine de ceste inquisition parte cōme
 de la deesse Vesta, ainsi que lon dit en cōmun pro-
 uerbe, de la nature de l'vniuers. Et c'est en quoy
 il semble que differe le plus le philosophe du mede-
 cin, du laboureur, & du ioueur de flustes, & autres
 semblables particuliers ouuriers, ausquels il suffit
 de sçauoir & entendre les dernieres causes. Car
 prouueu que le medecin cognoisse & cōprenne la
 plus voisine & plus prochaine cause de la maladie F
 de son patient, cōme de fiebure, que ce soit obstru-
 ction ou incidence du sang tōbant des venes és ar-
 teres: & le laboureur, de la bruine des bleds le so-
 leil ardent apres vne pluye: & le ioueur de flustes
 de la bassesse de ton, soit de baisser les flustes & les
 approcher les vnes des autres, il suffit à chasque
 ouurier pour son propre ouurage & mestier: mais
 au philosophe naturel cherchant la verité des
 choses

A choses seulement pour la comprendre, la cognoissance des dernières causes n'est pas la fin, ains plus tost le commencement, pour aller iusques aux premières & plus haultes causes. Et pourtāt ont bien fait Platon & Democritus, lesquels recherchant les causes de la chaleur & de la pesanteur, n'ont pas arresté le cours de leur inquisition au feu ny à la terre, ains referans les choses sensibles aux intelligibles, ont procédé iusques aux moindres parcelles, cōme aux premières semences. Toutefois il vault mieux manier premierement ces choses sensibles, **B** esquelles Empedocles & Straton, & les Stoïques mettent les principes des puissances : les Stoïques attribuant la première froideur à l'air, & Empedocles & Straton à l'eau, & vn autre à l'adventure supposeroit que ce seroit plus tost la terre : mais examinons premierement les sentences de ces autres là. Puis qu'il est donc ainsi que le feu est ensemble chaud & luyfant, il est force que la nature qui luy est cōtraire, soit froide & obscure, car l'obscur est contraire au clair, tout autant que le froid au chaud : & ainsi comme l'obscur & tenebreux **C** confond & empesche la veüe, aussi le froid confond & empesche le sens de l'attouchement, là où la chaleur espad & resiouit le sens de celuy qui touche, ainsi comme la clarté de celuy qui voit : parquoy il fault dire que ce qui est premierement obscur & tenebreux, est aussi premierement froid en nature. Or que l'air soit le premier tenebreux, les poëtes mesmes ne l'ont pas ignoré, car ils appellent l'air tenebres,

L'air si espais sur les naues estoit,
Que le regard de la Lune il ostoit
Luyfante au ciel.

Et en vn autre passage,
Il dissipa tout incontinent l'air,
Et le brouillas fait aussi en aller:
Lors le Soleil commença à reluire,
Et la bataille en veuë se reduire.

Oultre cela on appelle *νεφες*, l'air qui n'est point enluminé de clarté, comme qui diroit *νεφες*, c'est à dire vuyde de lumiere, & *νεφες*, c'est à dire nuee, vn air espais & grossy, ainsi appelé par negation de lumiere. Il s'appelle aussi *ἀέρας* & *βούχραν*, qui signifie brouillas, & tout ce qui empesche la veuë de voir atrauers sont toutes differences d'air, & pour autāt qu'il ne se peult voir, ne qu'il n'a aucune couleur, il en est surnōmé Ades & Acheron. Ainsi donc comme l'air demeure tenebreux quand la lumiere en est ostee, aussi quand le chaud s'en est allé, ce qui demeure est air froid, & non autre chose, c'est pourquoy il est appelé Tartarus. à cause de la froideur, ce que le poëte mesme Hesiode nous enseigne, quād il appelle Tartarus aëré, & le trembler & estre secoué de froid s'appelle *παραδείσει*. Voyla les raisons que lon pourroit alleguer à ce propos la. Mais pource que la corruption est mutation de chascune chose en son contraire, considerons si cela est vray que lon dit communément, la mort du feu est generation de l'air : car le feu se meurt aussi bien cōme l'animal, ou estainct à force, ou bien lāguissant de soy mesme, mais l'extinction du

▲ du feu monstre bien plus manifestement qu'il se muë en air, car la fumee est vne espece d'air selon Pindare,

Vapeur en l'air vain consumee,

Regibbant contre la fumee:

mais toutefois encore le peult on voir quand la flamme s'esuanouit & meurt à faulte d'entretene-
ment & de nourriture, comme és lampes que la cyme se va dissipant en vn air obscur & tenebreux: encore le peult on suffisamment appercevoir par la vapeur qui s'enuole contre-mont de noz corps,
B apres que lon s'est bagné ou estuë & que lon se fait ietter de l'eau froide dessus, que le chaud venant à se corrompre se tourne en air, comme estât par nature opposé & contraire au feu: à quoy il s'ensuit par consequent, que l'air est premierement tenebreux & froid. Mais qui plus est la plus vehemente & plus violente impression qui se face és corps par la froideur, c'est la congelation, qui est passion de l'eau & action de l'air. Car l'eau d'elle mesme s'espand fort, n'estant ny solide ny ferree de sa nature, mais elle se roidir & se constipe, estant
C ferree par l'air, moiennant le froid. Voyla pourquoy lon dit en ver assez commun,

Quand au midy le Nort succedera,

Incontinent apres il negera,

par ce que le vent de midy prepare la matiere, qui est l'humidité, & l'air de la bise qui vient apres, la gele: ce qui apparroist manifeste és neiges, lesquelles si tost qu'elles ont rendu & exhalé vn peu d'air delié & froid, se fondent & coulent incontinent.

Et Aristote escrit que les cueux de plomb se fondent & coulét de froid & de la rigueur de l'hyuer, aussi tost que lon approche l'eau d'elles, & l'air serrant & pressant les corps par la froideur les casse & les rompt. D'auantage l'eau tiree hors de la fontaine se gele plus tost, d'autant que l'air a plus de force sur vne petite quantité que sur vne grande. Et si lon puise vne petite quâtité d'eau froide d'un puis dedans quelque vaisseau, & que lon la redescende puis apres au puis, en sorte que le vaisseau ne touche point à l'eau, ains demeure suspendu en l'air, & qu'il y arreste non trop long temps, l'eau en fera plus froide que celle du puis : par où il appert bien manifestement, que la premiere cause de la froideur n'est pas en l'eau, mais en l'air. Qu'il soit ainsi, iamais les grâdes riuieres ne gellent au fond, d'autant que l'air ne peult pas penetrer ne descendre par tout : mais ce qu'il peult embrasser de sa froideur en y touchant ou en approchant, il l'arreste & le congele. Voyla pourquoy les barbares, quand ils veulent passer à pied les grandes riuieres geleees, ils enuoyent deuant eulx des regnards : car si la glace n'est pas espaisse, ains seulement superficielle, les regnards le sentās bien au bruit que mène la riuiere courant par dessoubs, s'en retournent. Et y en a qui peschent en creuant & fendant la glace avec de l'eau chaulde, & puis deualent leur ligne par l'ouuerture, car les poissons mordēt alors l'hameçon : ainsi le bas de la riuiere n'est aucunement alteré de la gelee, combien que le dessus en soit si fort pris de glace, que l'eau, à force de se reserrer &

restrain-

A restreindre en soy mesme, rompt les batteaux, comme nous racontent mesmes ceulx qui ont hyuerné n'a gueres sur la riniere du Danube avec l'Empereur. Mais toute fois ce qui aduient en noz corps mesmes, en porte assez suffisant tesmoignage. Car apres que nous nous sommes bien estuuez, & que nous auons bien sué, nous en sommes plus frilleux, d'autant que noz corps relaschez, ouuerts & estandus par la chaleur, en recoiuent plus de froid, qui y entre quand & l'air, autant en aduiét il à l'eau mesme, laquelle se refroidit plus & plus tost, quād elle

B a esté vn peu premierement eschauffee, en deuenant plus aisee à alterer à l'air, attendu que ceulx mesmes qui iettent contre-mont & espandent de hault l'eau bouillante, ne font autre chose que la mesler avec beaucoup d'air. L'opinion doncques de ceulx qui attribuent la premiere cause du froid à l'air, Phauorinus, est fondee sur telles apparètes & vray semblables raisons: mais celle qui l'attribue à l'eau, prend aussi de semblables principes, par ce que Empedocles dit ainsi,

Voy le Soleil tousiours clair & luyfant,

c La pluye noire, & tousiours froid faisant.

Car en opposant le froid au chaud, comme le noir au luyfant, il nous donne occasion de colliger & inferer, que comme le chaud & le luyfant appartiennent à vne mesme substâce, aussi font le froid & le noir. Or que le noir procede non de l'air, mais de l'eau, l'experience mesme des sens nous en fait foy, pource que rien ne noircit par l'air, mais tout par l'eau: car si vous plongez dedans l'eau de

la laine ou quelque drap le plus blanc qui puisse **D**
estre, il apparoitra au sortir de l'eau noircy, & de-
mourera tel, iusques à ce que par la chaleur l'hū-
midité soit toute deseichée, ou bien qu'avec des
presses ou quelque fardeau pesant, on l'ait toute
esprainte. Et la terre, quand elle vient à estre arro-
fee de la pluye, les endroicts qui sont touchez & at-
taincts des gouttes de l'eau tombant noircissent, le
reste de la terre demourant de semblable couleur
qu'il estoit au parauāt. Et de l'eau mesme celle qui
est plus profonde semble plus noire, d'autant qu'il
y en a plus en quantité: au contraire tout ce qui **E**
s'approche de l'air est incontinent esclairé, & rit à
l'œil. Des autres substances humides, celle qui est
la plus transparente, c'est l'huyle, comme celle où il
y a plus d'air, dequoy est vn certain signe sa lege-
reté, qui fait qu'elle nage sur toutes autres liqueurs,
estant portee au dessus, par le moien de l'air. Il y a
plus, qu'elle fait calme & tranquillité en la mer,
quand elle est espendue par dessus, à cause de sa po-
lissure glissante, ainsi comme Aristote a escrit. Car
la vague battue de quelque humeur que ce soit,
s'applattit & s'espend: mais cela est propre & pecu- **P**
lier à l'huyle, qu'elle fait vne clarté, & dōne moien
de voir au fond des eaux, l'humidité se fendant &
donnant ouuerture à l'air. Car non seulement aux
plongeurs, qui vont cherchant & arrachant les es-
ponges la nuit, il fait clarté & lumiere, quand ils
ne sont qu'au dessus de la mer, mais aussi aux plus
profondes fosses, quand ils la soufflēt hors de leur
bouches. L'air donques n'a point plus du noir que
que

A que l'eau, mais moins du froid. Qu'il soit ainsi,
 l'huyle qui entre les liqueurs participe plus de l'air,
 n'est aucunement froide, & se prend mollement,
 d'autant que l'air qui est incorporé dedans, ne per-
 met pas que la prise ou caillure se puisse faire dure.
 Et les artisans ne trempent pas les aiguilles ny les
 boucles & agraffes de fer avec de l'eau, ains avec
 de l'huyle, craignans la trop grãde froideur de l'eau
 qui les rendroit torfes. Car il est plus raisonnable
 d'examiner ceste dispute par telles marques &
 preuues que non pas par les couleurs, attendu que
 B la nege, la grêle & la glace, sont tout ensemble &
 tresclaires & tresfroides, & à l'opposite la poix est
 plus chaulde que le miel, & neantmoins est plus
 obscure. Toutefois ie m'esbahis de ceulx qui veu-
 lent que l'air soit froid, d'autāt qu'il est tenebreux,
 comme ils n'apperçoient que d'autres l'estiment
 & le iugent chauld, d'autāt qu'il est leger : car la te-
 nebrofité n'est pas si familiere ne si cousine à la
 froideur que la pesanteur & la stabilité luy sont
 propres, pource qu'il y a plusieurs choses du tout
 exemptes de chaleur qui participent de splendeur
 C & de clarté: mais il n'y a rien de froid qui soit leger
 ny agile, ny tendāt contre-mont: car les nuees tant
 qu'elles tiennent plus de la nature de l'air, s'esleuēt
 contre-mont, mais si tost qu'elles se tournēt en na-
 ture de liqueur, incontinent elles tombent, & per-
 dent non moins la legereté & l'agilité que la cha-
 leur, quād la froideur viēt à sy mettre: & au cōtrai-
 re, quād la chaleur y suruient, elle chāge son mou-
 uement tout à l'opposite, la substance mōtant con-

tre-mont tout aussi tost qu'elle est muee & tournée en air. Qui plus est, la supposition de la corruption n'est pas veritable, car toute chose qui perit ne se muë pas en son contraire, mais bien toute chose s'estainct & se perd par son contraire, comme le feu estainct par l'eau, se tourne en air. Car le poëte *Æschylus*, encore que tragicquement, si est-ce que veritablement il appelle l'eau le chastiemēt du feu, & *Homere* oppose en la bataille le fleuve à *Vulcain*, & *Neptune* à *Apollo*, non tant fabuleusement que naturellement: & *Archilochus* parlant d'une mauuaise femme, qui auoit volenté toute contraire à ce qu'elle monstroït, dit de bonne grace,

La faulſe femme en vne main portoit

L'eau, & le feu en l'autre presentoit.

Et entre les Perſes la plus vrgente & plus preſſante façon de ſupplier, & que lon ne pouuoit eſconduire ny reſuſer, eſtoit quand le ſuppliant entrant en la riuierẽ tenant du feu en la main, menaſſoit de ietter le feu en l'eau, ſi on ne luy octroyoit ce qu'il requeroit: car lors on luy concedoit bien ce qu'il auoit requis, mais apres l'auoir obtenu, il eſtoit puny pour la menaſſe dont il auoit vſé, comme eſtant malheureuſe & meſchante, & contre la nature. Et meſme ce que lon dit à tout propos en commun prouerbe, quand on veult ſignifier vne choſe impoſſible, Meſler le feu avec l'eau: ſemble teſmoigner aſſez que l'eau eſt l'ennemy mortel du feu, qui luy fait la guerre, le fait perir, & le chaſtie en l'eſtaignant, non pas l'air qui ne le deſtruit pas, ains

recueille

A recueille & reçoit sa substance quand il est alteré.

Car si ce en quoy se tourne ce qui perit, est son contraire, le feu ne se trouuera point plus contraire à l'air que fera l'eau : car il se tourne en eau quand il s'espaillit, & en feu quand il se subtilize, comme aussi au cas pareil, l'eau par rarefaction se resout en air, & par condensation elle deuient terre, non pour inimitié ny contrariété qu'elle ait avec tous les deux, comme i'estime, mais plus tost pour affinité & parenté qu'elle a avec l'un & l'autre. Et en quelle sorte que ce soit des deux qu'ils le dient, ils destruisent & gastent leur intention. Mais de dire
B que ce soit l'air qui gele & glace l'eau, il n'y a propos ny raison quelconque, veu que nous voions que l'air mesme ne se gele ny ne se durcit iamais : car les brouillas & nuages ne sont pas glacemens de l'air, ains seulement espaissemens & grossissemens d'un air humide & vaporeux, mais le vray air qui n'a vapeur quelconque & est tout sec, ne reçoit point de refrigeration qui puisse produire en luy iusques à vne telle alteration : car il y a des
C mōtagnes qui ne reçoient ny nuees, ny brouillas, ny rosee, d'autant que de leurs cymes elles atteignent iusques à un air tout pur, exempt de toute humidité : par où il appert tout manifestemēt, que cest espaisissement & grossissement qui se fait au bas de l'air, luy prouient de la froideur & de l'humidité qui luy est meslee d'ailleurs. Et quant au fonds des grandes riuieres qu'ils ne se gelent pas il y a grande raison, par ce que le deslin qui est glacé ne laisse pas traueser l'exhalation qui se lēue du

Comme
 ment d'O
 l'imp de
 la cyme p
 se la moy
 ne regto
 l'air. No
 le sur de
 caulus A
 mylus.

bas, & elle retenue enclose & rebattue contre bas, engendre quelque chaleur en l'eau qui est au fond, dequoy fait bien claire demōstration ce que quād la glace vient à se rompre, il sort de l'eau & s'ellēue contre-mōt beaucoup de vapeur & d'exhalation. Voyla pourquoy les ventres & les concauitez qui sont dedās les corps des animaux sont plus chauds en hyuer, pource qu'ils retiennent la chaleur que la froidure de l'air enuironnant repoulse au dedans, & le puyser & haulser l'eau en l'air n'en oste pas seulement la chaleur, mais aussi la froideur : & parrant ceulx qui veulent auoir l'eau bien froide, ne remuent iamais ny l'eau ny la nege que lon met alentour pour la refroidir, car le mouuemēt chasse la froideur de l'un & de l'autre. Mais que cela soit la puissance interieure de l'eau, & non pas de l'air qui le face, on le pourroit ainsi de nouueau discourir. Premièrement il n'est pas vray-semblable que l'air estant proche voisin du feu elementaire, touchant & estant touché de sa reuolution flambāte, ait vne puissance & nature toute contraire, ny n'est pas possible, attendu que leurs deux extremitēz s'entretouchent & s'entretiennent : & n'est point accordant ny conforme à la raison que la nature ait rengé tout d'un tenant, le perdant & le perdu, le consumant & le consumé, comme si elle n'estoit pas ouuriere & mediatrice de paix & accord entre eulx, mais plustost de noise, debat & discord : & n'a pas la nature accoustumē de ioindre front à front les substances totalement contraires, ny apertemēt repugnantes l'une à l'autre, ains de mettre entre
deux

A deux celles qui tiennent de l'une & de l'autre, aiant vne situation & disposition qui ne tend point à destruction, ains à association des deux contraires au milieu entrelassée. Telle situation & region a eu l'air en l'univers, estant espandu au dessous du feu, & deuant l'eau pour s'accommoder à l'un & à l'autre, & les assembler tous deux, n'estant de luy mesme ne chaud ne froid, ains vn attremplement & vne meslange des deux meslez ensemble, non d'une mixtion pernicieuse, ains douce & gracieuse, qui mollement y introduit & reçoit les extremités contraires, & puis l'air est par tout egal: & toutefois l'hyuer n'est pas par tout semblable ny froid, ains y a vne partie du monde qui est froide & fort humide, & l'autre fort chaude & fort seiche, & ce non point fortuitement, ains d'autant que c'est vne mesme substance susceptible du froid & du chaud: car la plus grande partie de l'Afrique est chaude & aride, sans eau: & ceulx qui ont esté par le país de la Scythie, de la Thrace, & de Pont, racontent qu'il y a de grands lacs, & qu'ils sont arrosez de plusieurs grands & profonds fleuves, & que les contrees qui sont au milieu, & ce qui est prochain de ces grands lacs & marets est fort froid, à cause des euaporations qui sortent des eaux. Mais Posidonius disant que la cause d'icelle froideur est, que l'air palustre est recent & humide, ne soult pas la verisimilitude de la doubte, ains plustost la rend plus vray-semblable: car l'air ne sembleroit pas tousiours de tant plus froid que plus il seroit recent, si le froid ne prenoit sa genera-

tion de l'humidité, & pourtant a miculx dit Homere,

Tousiours est froid le vent d'une riuere.

D'auantage le sentiment nous deçoit & trompe souuent, comme quand nous touchons de la laine, ou des draps froids, & qu'il nous semble que nous les touchons moittes & humides, d'autant qu'il y a vne substance commune à toutes les deux qualitez, & que les deux puissances sont voisines & familières: & és climats du monde où l'hyuer est fort aspre & fort rude, le froid y rompt beaucoup de vaisseaux de cuyure & de terre, mais pas vn vuide, E ains tous pleins, l'eau les forçant par sa froideur, combien que Theophrastus estime que c'est l'air qui rompt les vaisseaux, se seruant de l'humidité comme d'un clou. Mais prenez vous garde que cela ne soit dit plus gentilement que veritablemēt, car il faudroit que les vaisseaux pleins de poix se rompissent plustost par l'air, ou pleins de lait: mais il est plus vraysemblable que l'eau soit froide par elle mesme, & premierement, car elle est contraire à la chaleur du feu par sa froideur, comme à sa siccité par son humidité: brief le propre du feu généralement est de dissiper, diuiser & segreger, mais de l'eau au cōtraire le naturel est de ioindre, & de coller & assembler, congelant & caillant par son humidité. Et c'est ce qui fait penser, qu'Empedocles pour ceste occasion appelle le feu à tout propos noise pernicieuse, & l'eau amitié tenante, car la nourriture du feu est cela en quoy il se tourne: or se tourne il en ce qui luy est plus propre & plus familier,

A milier, & ce qui est contraire est difficile à y tourner, comme l'eau, laquelle de soy mesme est, par maniere de dire, impossible à brusler, & si rend & l'herbe mouillée & le bois trempé difficile à enflammer : & si à fine force ils s'enflammet, encore en fera la flambe obscure, & toute morne & moufse, la verdeur combattant de sa froideur contre la chaleur, comme contre son naturel ennemy. Pesez doncques ces raisons la, & les conferez avec les autres: mais pour ce que Chrysippus estimât que l'air fust le premier froid, d'autant qu'il est obscur, a fait

B mention seulement de ceulx qui disent que le feu elementaire est plus esloigné & plus distât de l'eau que non pas l'air, & voulant dire quelque chose contre eux: Par ceste mesme raison, dit il, on pourroit dire que la terre seroit le premier froid, d'autant qu'elle est plus esloignée du feu elementaire: reiectant cest argument & raison comme faulse, & ne faisant aucunemēt à receuoir, il me semble que ie puis bien monstrier, que la terre mesme n'a pas faulte de preuues probables & vray-semblables, faisant mon fondement sur ce que Chrysippus a

cpris pour l'air. Et qu'est-ce? C'est qu'il est premierement obscur: car si prenant ainsi deux contrarietez de puissances, il estime que necessairement il faille que l'une suyue apres l'autre, il y a infinies oppositions & repugnances de la terre à l'air, lesquelles on pourroit dire qu'il faut que ceste-cy encore suyue: car elle ne luy est pas opposee comme pesante au leger, ny comme tendât à bas au montant à hault seulemēt, ny comme massifie au rare,

ny cōme tardiue & stable au soudain & remuant, D
ains comme tref-pesante au tref-leger, & tref-maf-
sifue au tref-rare, & finablement comme immo-
bile d'elle mesme à celuy qui se meut de luy mes-
me, & comme celle qui tient le lieu du milieu à ce-
luy qui se tourne tousiours en rond. Ne seroit il
dōcques pas hors de tout propos, de dire qu'à tant
& de si grandes oppositions celle de la chaleur &
de la froideur ne fust coniointe aussi? Ouy certes:
mais le feu est clair, & la terre non tenebreuse. Au
contraire c'est la plus obscure & la plus tenebreuse
qui soit: car l'air est celuy qui participe le premier E
de clarté & de lumiere, & qui le plus soudainemēt
se tourne, & tout aussi tost qu'il est emply de lu-
miere il la depart incontinent par tout, se donnant
& exhibant soy mesme, cōme le corps de la clarté:
car comme dit vn poëte qui a escrit des canticques
à l'honneur de Bacchus,

Si tost que dessus l'Orizon

Le Soleil en se leuant monte,

Il emplir la grande maison

Des vents d'une lumiere prompte:

mais puis apres en descendant il en enuoye vne F
partie aux lacs & en la mer, & les fonds des riuieres
rient de tant que l'air penetre iusques à eulx, mais
la terre est seule entre tous les corps qui iamais
n'est esclairee, & non iamais penetree des rayons
ny du Soleil ny de la Lune, bien est elle eschauffee
vn petit, & se presente à fomentier à la chaleur du
Soleil, qui penetre au dedans, iusques à quelque
petite partie: mais la clarté n'y entre iamais à cause
de sa

A de sa massifue solidité, ains est seulement enluminee superficiellement par le Soleil, & le dedans est appellé Nuiët, Chaos, Enfer & Erebus, qui n'est à dire à la verité autre chose que la terrestre obscurité, & les tenebres du dedans de la terre. Les poëtes feignent que la nuiët est fille de la terre, & les Mathematiciens demōstrent & prouuent par raison que ce n'est autre chose que l'vmbre de la terre opposee entre le Soleil & nous: car l'air est rempli de tenebres par la terre, comme de lumiere par le Soleil, & autant qu'il y a de l'air qui n'est point
B esclairé ny enluminé, c'est la grandeur de la nuiët, autāt cōme l'vmbre de la terre en occupe. Et pourtāt les hōmes & les bestes aussi se seruēt encore de l'air dehors des maisons, encore qu'il soit nuiët: car il y a beaucoup d'animaux qui vōt à leurs pasturages la nuiët, à cause que l'air a encore quelques reliques & traces de lumiere, & quelque influēce de clarté esparse çà & là: mais celuy qui est enclos dedans les maisons, & couuert du toict d'icelles, autāt que celuy qui est de toutes parts enuironé de terre, est de tout poinët obscur & tenebreux. Qui plus
C est les peaux & les cornes des animaux tāt qu'elles sont entieres ne transmettēt point la lumiere, mais quand elles sont ou siees ou ratiffées, elles en deuient transparentes, d'autāt qu'il y a de l'air qui se mesle parmy: & pēse que c'est pourquoy les poëtes à tout propos appellēt la terre noire, voulans dire obscure & sans aucune clarté: tellemēt que la plus importāte & principale opposition d'entre le clair & l'obscur, se trouue plustost en la terre que non

pas en l'air, mais celle la est separee de la question D
que nous traittons : car nous auons monstré qu'il
y a plusieurs choses froides qui sont claires, & plu-
sieurs chauldes qui sont brunes & obscures. Mais
ces autres puissances la sont plus propres à la froi-
deur, comme la pesanteur, la stabilité, la solidité, &
l'immutabilité, desquelles l'air n'en a pas vne, &
l'eau en participe de toutes. Il y a d'auantage, que
la froideur est ce qui plus sensiblement est dur, &
rendant les choses dures & solides : car Theophra-
ste escrit que les poissons qui sont gelez par la
grande rigueur du froid, qui les laisse tomber à ter- E
re, se rompent & se brisent en pieces, ne plus ne
moins que des vaisseaux de verre, ou de terre : &
toy mesme as peu entendre de ceulx qui monte-
rent sur la montagne de Parnasse pour secourir les
femmes Bacchâtes, qui y auoiēt esté surprises d'un
mauuais vent & de la neige, leurs manteaux par la
force de la froidure deuindrent si roides & tenans
de la durescé du bois, qu'ils rompoient & cassoient
incontinent que lon les estendoit. Qui plus est, la
grāde froideur rend les nerfs si tendres que lon ne
les peut plier, & la langue sans parler, glaceant & F
gelant par sa durescé, à faulte de mouuemēt, les hu-
mides & molles parties du corps : ce qui se voiant
par experience, say dōcques maintenant ceste con-
séquence, Toute puissance qui est plus forte a ac-
coustumé de tourner & muer en soy ce qu'elle sur-
monte, car ce qui est vaincu par le chauld, deuient
feu, & ce qui est vaincu par le vêt deuient air, & ce
qui tombe en l'eau, si n'en sort, il se dissout & se
fond

A fond à la fin en eau. Il est dōques force aussi que les choses qui se refroidissent fort, se muent en ce qui est le premier froid. Or l'excessiue froidure est quand il gele, & le grād refroidissemēt que sçauroit souffrir quelque chose que ce soit, est quand elle glace, & ce glacemēt se termine en vn entier changemēt de nature, que la chose deuient dure comme pierre, quand le froid estant du tout le maistre, l'humour se glace, & tout ce qu'il y a de chaleur, s'espraint & se chasse. Voila pourquoy la terre vers son centre au plus profond est toute gelee & glacée, par maniere de dire, par ce que le froid excessif & qui ne s'amollit & ne se lasche iamais, y demeure tousiours, estant reculé & repoulsé en ce fond là, au plus loing du feu elementaire. Et quant aux rochers, pierres & croppes des montagnes qui apparoiſſent au dehors de la terre, Empedocles estime qu'ils aient esté caillez, concreez & poussez contremont, & soutenus dessous par la violence d'un certain feu bouillant, qu'il dit estre aux entrailles de la terre: mais il semble plustost que les choses dont tout le chaud a esté espraint, & s'en est enuolé, sont congelees & glacees par le froid. C'est pourquoy on appelle ces croppes la de mōtagne, Pagi, comme qui diroit, glaces, dont on en voit plusieurs noircis à la cyme, alendroit par où le chaud s'en est enuolé, tellement qu'il semble à les veoir qu'elles aient autrefois esté brulées: car le froid serre & gele les choses, les vnes plus, les autres moins, mais par dessus toutes les autres, celles auxquelles il est premierement par

nature inherent: car ainsi comme si le naturel du D
 chaud est allegé, il est force que le plus chaud soit
 aussi le plus léger, & si le naturel de l'humide est
 amollir, que le plus humide soit ce qui est le plus
 mol: aussi si le propre du froid est de faire prendre
 & glacer, il est nécessaire par consequent, que ce
 qui est le plus serré & glacé, soit doncques aussi le
 plus froid, cōme est la terre, & ce qui est tres-froid,
 il l'est de nature, & le premier froid. Parquoy il
 fault doncq conclure que la terre est & par nature
 froide, & le premier froid, ce qui est euidant & ma-
 nifeste mesme au sentiment: car la fange est plus B
 froide que l'eau, & quand on veut bien suffocquer
 & estaindre le feu, on iette de la terre dessus: & les
 forgerons & feronniers qui font le fer, quād il est
 bien enflammé & fondu, ils iettent & sement par
 dessus des morceaux de marbre, & du chappelis
 des pierres de taille, pour engarder qu'il ne coule
 trop, & pour le refroidir: & la poulsiere que lon
 iette dessus les corps des luiçteurs les refroidit, &
 reprime les sucurs. Et puis la commodité qui par
 chascun an nous remue & nous fait changer de
 logis, que veut elle dire? l'hyuer nous faisant cher- F
 cher des logis hauts & loing de la terre, & à l'op-
 posite l'esté nous attachant aux salles basses, nous
 faisant descendre & appeter propres & conuen-
 ables retraittes, de maniere qu'elle nous feroit vo-
 lontiers habiter dedans le sein mesme de la terre.
 Ne faisons nous pas cela estās conduits par le sen-
 timent naturel à chercher & recognoistre ce qui
 par nature est le premier froid? Et pourtant quand
 l'hyuer

A l'hyuer nous cherchons les habitations prochaines de la mer, c'est vne maniere de fuir la terre autant que nous pouuõs, à cause du froid: car nous mettõs alentour de nous l'air de la marine qui est chaud, & à l'opposite l'esté, pour la vehemente chaleur, nous desirons les lieux plus au dedans de la terre & arriere de la mer, non que l'air de soy y soit froid, mais pour ce qu'il germe & pullule, par maniere de dire, de ce qui est par nature, & le premier froid, & trempé de la puissance qui est dedans la terre, ne plus ne moins que lon trempe le fer: car mesme
B entre les eaux courantes, celles qui sortent des roches & descendent des mōtagnes, sont les plus froides, & entre celles des puyx mesmes, celles qui sont des plus profonds: car pour la grande profondeur, l'air ne se mesle plus avec elles au dehors, & les autres passent attrauers la terre fraîche, & non meslee, comme aupres du chef de Tēnarus en la Moree, l'eau qu'ils appellent Styx, qui degoutte bien petitement de la roche, elle est si froide qu'il n'y a vaisseau au mōde qui la puisse tenir, sinon la corne du pied d'un asne, car par sa froideur elle fend & rōpt
C tout autre vaisseau où lon la puisse mettre. D'auantage nous entendons dire aux medecins, que toute terre, à parler generalemēt, restraint, resserre, & refroidit, & nous comptent plusieurs drogues que lon tire des entrailles de la terre, qui ont vertu restraintsiue & resserâte en la medecine. Aussi leur element n'est point, ny incisant, ny esmouuant, ny attenuant, ny aiant des acuitez perçantes, ny molliant, ny facile à s'espandre, ains ferme & stable,

comme le corps quarré & arrestant, dont vient D
qu'elle a la pesanteur & la froideur. S'il est ainsi
que sa puissance & faculté naturelle soit espaisir,
serrer, estraindre les humiditez, & engendrer és
corps des herissemens d'horreur, & des tremble-
mens pour son inegalité, & si elle vient à gaigner
le dessus, la chaleur s'en estant de tout poinct fuye
ou estainte, elle y imprime vne habitude glatee,
amortie, & comme purifiée: de là vient que la ter-
re ne se bruste aucunement ou bien petitement, &
à grand' peine, là où l'air de luy mesme bien sou-
uent rend & iette de la flambe, & coule & esclaire B
tout enflambé, & l'humidité sert de nourriture &
de pasture à la chaleur: car ce n'est pas ce qui est
solide, mais ce qui est humide & liquide, qui se
bruste au bois, mais quand ceste humidité est tou-
te resoluë & euaporee, alors ce qui est de nature
solide demoure, qui est la cendre. Et ceux qui s'e-
studient & efforcent de monstrier que cela aussi en
fin se tourne & se consume, & pour ce faire l'ar-
rosent par plusieurs fois d'huile, ou le meslent avec
de la graisse, & puis le remettent au feu, n'avan-
cent rien: car quand ce qu'il y a de gras & vnctueux F
est brulé, alors il reste & demeure tousiours ce qui
est terrestre. Et pourtant n'est elle pas seulement
immobile quant au regard de son lieu & de sa si-
tuation, mais aussi est immuable quant à sa sub-
stance: & quelquefois les anciens l'ont appelée
Vesta, comme demourant ferme en la maison des
Dieux, à cause de sa fermeté stable, & de son glace-
ment, duquel le froid est le lien, ainsi que disoit
Arche-

A Archelaüs le philosophe naturel, veu que rien ne la destrempe ny ne la mollifie, quand elle est vne fois cuitte au feu, ou halee au Soleil. Mais ceux qui disent qu'ils sentent bien le vent froid & l'eau, mais moins la terre, ceux la regardent ceste terre qui est la plus prochaine d'eux, qui n'est autre chose qu'une meslâge & composition de l'air, des eaux, du Soleil, de la chaleur : & me semble qu'ils font tout ainsi comme qui diroit que le feu elementaire ne seroit pas le premier chaud, ains l'eau bouillante, ou bien le fer tout rouge de feu : d'autât que **B** lon peut bien toucher ceux la, & en approcher, & que du premier feu pur & celeste, ils n'en ont aucune sensible experience ny cognoissance par atouchement, comme aussi n'ont ils de la terre qui est aupres du centre, que lon peut imaginer estre la vraye, pure & naturelle terre, comme la plus esloignée & separee de toutes les autres, mais bien en pouuôs nous icy auoir quelque indice par les grosses roches, lesquelles de leur profondeur rendent vne vehemente froideur & non facile à supporter : & ceux qui veulent boire plus froid, ils iettent des **C** petits cailloux dedans leur eau, laquelle en deuient plus fraische, & s'en aiguise, par maniere de dire, par la froideur grande & recente qui sort desdits cailloux. Si faut estimer que quand les anciens hommes doctes & sages ont supposé qu'il n'y pouoit auoir mixtion ne meslange des choses terrestres avec les celestes, ils ne visoient pas aux lieux, ny au haut & au bas, comme aux bassins d'une balance, ains à la difference & diuersité des puissan-

ces, attribuant les qualitez de chaleur, de clarté, d'agilité & de legereté à celle immortelle & eternelle nature, mais la froideur, l'obscurité & la tardité, prononçant estre le partage & le sort mal-heureux des trespassez, & de ceux qui sont là bas aux enfers: car le corps mesme d'un animal pendant qu'il respire & est florissant en verdure, comme disent les poëtes, il a vie & chaleur, mais aussi tost qu'il est destitué de ces deux puissances là, & delaisé en la seule portion & possession de la terre, il devient aussi tost roide & froid, comme étant la chaleur en tout autre corps plustost selon nature, qu'en un

Il appert, par ce lieu & plusieurs autres, que Plutarque estoit de secte Academique.

corps terrestre. Compare, Seigneur Fauorin, ces argumens là avec les raisons des autres, & si tu trouues que les vnes ne cedent ny ne surpassent gueres les autres en probable verisimilitude, laisse moy là l'opiniastreté d'espouser aucunes particulieres opinions, estimant que le surseoir & retenir son iugement en choses obscures & incertaines, est fait en plus sage philosophe, que non pas de prester & adiouster à l'une ou à l'autre partie son consentement.

* *
*

L E S

LES CAUSES

Naturelles.



O V R Q V O Y est-ce que l'eau de la mer ne nourrit pas les arbres? Est-ce point pour la mesme raison qu'elle ne nourrit pas non plus les animaux de la terre, parce que la plante est vn animal terrestre ou de terre, se-

Dlon l'opinion de Platon, d'Anaxagoras, & de Democritus? car si bien elle nourrit & abreue les plantes qui croissent dedans la mer, comme elle fait aussi les poissons, ce n'est pas à dire que pour cela elle nourrisse les arbres, ny les plantes qui naissent en terre arriere de la mer, d'autant qu'elle ne peut percer ny penetrer iusques aux racines, pour ce qu'elle est grosse, ny monter contremont, pour ce qu'elle est pesante. Et qu'il soit vray qu'elle est grosse, pesante & terrestre, il appert & se preuue par plusieurs autres raisons, & mesmement par ce qu'elle porte & soustient plus les vaisseaux, les nageurs & plongeurs. Ou bien est-ce point pour ce qu'il n'y a rien qui offense plus les arbres que la seicheresse, & l'eau de la mer deseiche? Voila pourquoy le sel resiste à la putrefactiō, & pourquoy les corps de ceux qui se sōt lauez dedās l'eau de la mer ont incontīnēt le cuir sec & rude. Ou bien, seroit ce point pour ce que l'huile est naturellement ennemie de toutes plantes, & fait mourir toutes celles

qui en sont ointes & frottées? or l'eau de la mer D
tient du gras, & est vinctueuse, de maniere qu'elle
s'enflamme & augmente le feu: c'est pourquoy lon
defend d'en ietter dessus la flamme quand vn feu
est embrasé. Ou bien est-ce point pour ce que l'eau
de la mer est amere, & non pas bonne à boire, à
cause de la terre bruslee qui est meslee parmy, cō-
me dit Aristote, ne plus ne moins que la lexiue,
quand on iette de l'eau douce dessus la cendre,
pour ce que ce coulemēt & passément-la atrauers
la cendre gaste & corrompt ce qu'il y a de bon à
boire en l'eau douce, tout ainsi que dedans noz Z
corps l'ardeur de la fiebure tourne ce qu'il y a de
douce humeur en cholere? Et quant aux plantes
& arbres que lon dit qui croissent dedans la mer
rouge, ils ne portent point de fruit, & sont nour-
ris des riuieres qui y portent force limon & force
vase, aussi ne naissent ils pas auant dedans la mer,
ains pres de la terre.

2 Pourquoy est-ce que les arbres, les graines &
semences se nourrissent mieux des eaux de pluye
que d'autres eaux dont on les puisse arroser? Est-ce
point pour ce que la pluye en tombant du coup F
qu'elle donne, ouure la terre, & fait de petits per-
tuis, par où l'eau penetre iusques aux racines, ainsi
que disoit Letus? ou si cela est faulx, & ne s'est pas
Letus aduisé que les plantes palustres & qui crois-
sent aux estangs, comme la Masse, le Roseau, le
Ionc, demeurent sans croistre ny ietter & ver-
doyer, quand il ne vient point de pluies en la sai-
son? Et est vray ce que dit Aristote, que l'eau de la
pluye

A pluye est toute nouvelle & fraichement faite, là où celle des lacs & des estangs est vieille & croupie. Ou bien si cela a point plus d'apparence que de verité: car il est certain que les eaux des fontaines, des ruisseaux, & des riuieres sont aussi neufues & fraichement venues, par ce que lon ne scauroit entrer deux fois en mesmes riuieres, comme disoit Heraclitus, d'autant qu'il suruient tousiours de nouvelle eau, qui flue continuellement: & neantmoins celles la nourrissent encore moins que celles des pluyes. Est-ce point doncques pour ce que

B l'eau du ciel est legere, subtile & aëree, meslee avec de l'esprit, qui pour sa subtilité penetre facilement, & est aisément conduite iusques à la racine de la plante? C'est pourquoy elle fait en tombant de petites bouteilles, à cause de l'air & de l'esprit qui est meslé parmy. Ou bien nourrit elle point d'auantage, pour ce qu'elle est plus facilement alteree & vaincue par cela qu'elle nourrit, ce qui est proprement la concoction & digestion, & au contraire la crudité & indigestion est quand les eaux sont si dures qu'elles ne peuuent pas facilement estre alterees

C & vaincues: or celles qui sont deliees, subtiles, simples, & sans saueur, s'alterent plus facilement & plustost, comme est l'eau de la pluye, pour ce que s'engendrant en l'air & au vent, elle tombe pure & nette, là où celles des fontaines ressemblent à la terre, & aux lieux par où elles passent, & en acquierēt plusieurs qualitez qui les rendent plus mal-aisees à alterer, & plus tardiues à reduire par cōcoction en la substance de ce qui est nourry par elles: & au

contraire, que les eaux pluuiiales soiēt aisees à alterer & transmuier, il appert par ce qu'elles se corrompent & se pourrissent plus aisément que celles des riuieres ny des puy. Or la concoction semble vne maniere de pourriture & putrefaction, comme tesmoigne Empedocles quand il dit,

Le vin se fait de l'eau se pourrissant

Dedans le bois sous l'escorce,

Ou biē la plus certaine & la plus claire raison que lon en sçauroit alleguer, est ce point la douceur des eaux pluuiiales, & la bôté, soudain qu'elles sont enuoyees par le vêt & tōbees à terre? à l'occasion de-
quoy les bestes en boiuent plus volontiers que de nulles autres, & les grenouilles sentans la pluye venir en chātent de ioye plus hautemēt, & en renforcent leurs cris, s'attendans bien qu'elle adoucira les eaux croupissantes de leurs maretz, & leur fera semēce de douceur: car Aratus mesme cōpte ce signe la entre les signes & presages de la pluye disant,

Lors des Serpens la miserable proye,

Crient tref-haut, les grenouilles, de ioye.

3 Pourquoi est-ce que les bergers baillent du sel à leurs brebis & moutons? Est-ce comme la plus part des gens estiment, à fin qu'ils en mangent d'auantage, & conséquēment qu'ils en deuienēt plus gras, d'autant que l'acuité du sel prouoque l'appetit, & ouurant les pores & petits pertuis de la chair, donne voye à la nourriture pour se digerer & distribuer plus aisément par tout le corps: à raison dequoy le medecin Apollonius, fils de Herophilus, vouloit que lon nourrist les hommes gres-
les

- A** les & maigres, non de viandes douces, ny de pain blanc de fleur de froment, mais de salures & de choses confites en sel, dont l'acuité deliée estant comme vn grattement ou frottement à faire venir le poil, conduit la nourriture par les petits pertuis à chasque partie du corps. Ou bien plustost ils accoustument leurs moutons à lescher du sel pour la santé, à fin de restraindre vn peu le trop de graisse, d'autant qu'ils deuiennent malades quand ils sont trop gras, & le sel consume la graisse & la dissout: au moien dequoy encore quand on les a
- B** tuez, on les en escorche plus facilement, d'autant que la graisse qui colloie & attacheoit leur peau à la chair, en deuient plus deliée pour l'acrimonie du sel, ioinct que le sang se subtilise, & deuiet plus delié & plus liquide de ceux qui leschent le sel, & n'y a rien qui se fige & se cõstipe au dedans, quand il y a du sel meslé. Il pourroit estre aussi qu'ils le font pour les rendre plus enclins & plus habiles à engendrer: car les masles & les femelles en deuiennent plus chauds, & en appetent plus à s'assembler: car les chiennes mesmes deuiennent plustost chauldes, & conçoient plustost, quand elles ont mangé quelques salures, & les batteaux où lon porte le sel, pour la mesme raison produisent plus de fouris, d'autant qu'elles se meslent plus souuent ensemble.

4 Pourquoy est-ce qu'entre les eaux des pluyes celles qui tombent avec tonnerre & esclairs, que lon appelle pour ceste cause *à gramma*, c'est à dire eaux ou pluyes d'esclairs, s'õt meilleures pour arro-

ser? Est-ce point pource qu'elles sont venteuses & D
 pleines d'esprit, à cause du trouble & de la combustion de l'air, & l'esprit du vent esmouuant ceste humidité l'enuoye & la distribue mieux? Ou bien est-ce point pource que la chaleur cōbattant alencontre de la froideur, fait & cause les tonnerres & les esclairs en l'air? Voyla pourquoy en hyuer on oit bien peu souuent des tonnerres, & en la primevere, & en l'automne: au contraire, bien souuent, pour l'inegalité & inconstance de la temperature de l'air, & la chaleur cuisant l'humidité la rend plus amiable & plus profitable aux plantes de la terre. E
 Ou bien pource qu'il tonne & esclaire principalement & plus souuent en la saison de la primevere pour la cause susdite, & les pluyes de la primevere sont plus necessaires aux grains, herbes & semences auant l'esté. C'est pourquoy les païs où il pleut souuent & à bon escient au printemps, comme est l'Isle de la Sicile, produisent beaucoup & de bien bons fruiçts.

5 Pourquoy est-ce que de huiçt faueurs qu'il y a en tout, nous voyōs qu'il n'y en a qu'une seule, à sçauoir la salee, qui ne soit engendree en quelque F
 fruiçt? Car quant à la faueur amere, l'oliue l'a produite la premiere: quant à la verte, le raisin l'a du commencement, puis quand ils viennent à se tourner, l'amere faueur de l'oliue se change en grasse & vinctueuse, & la verte du raisin en vineuse. Semblablement aussi l'aspre és dattes, & l'austere és grenades, se tourne en douce, & y a bien quelques grenades & quelques pommes aussi qui ont simplement

A plement l'aigre: quant à l'acre & aiguë, elle est assez frequente en plusieurs racines & semences. Est-ce point pource que la saueur salee n'est pas primitive, ny ne s'engendre pas originairement, ains est seulement corruption des autres primitives saueurs, & pourtant ne peut elle seruir à nourrir aucun animal qui viue, ou d'herbe, ou de grain, mais bien sert elle de saulce à quelques vns, par ce qu'elle empesche qu'ils ne se saoulent, ou ne se degoustent de ce qui les nourrit? Ou c'est que comme ceux qui font bouillir l'eau de la mer, luy ostent

B la salure & la qualité mordante qu'elle a, aussi és choses qui sont chaudes de nature, la salure viét à estre effacee & amortie par la chaleur. Ou bien est-ce point pource que la saueur, ainsi comme dit Platon, est eau coulee & passée à trauers le tronc ou la tige de quelque plante, & la mer coulee & passée, perd aussi sa salure qui est le plus terrestre & le plus gros qui y soit: d'où vient que quand on creuse & fouille au lōg des riuages de la mer, on y trouue de petits esgouts d'eau douce, & y en a plusieurs qui tirēt de la mer mesme de l'eau douce &

C bonne à boire, estant coulee à trauers des vases de cire, en estant espraint & separé ce qu'il y a de plus terrestre & plus salé: & brief l'argile & la coulature rendent l'eau de la mer passée à trauers, bonne à boire, d'autāt qu'elles ne laissent pas passer ce qu'il y a de terrestre, ains le retiennent en soy: ce qui estant ainsi, il est vray-semblable que les plantes ny ne recoiuent du dehors la salure ou saueur salee, ny si d'aduenture elle s'engendrait au dedans, elles

ne la transfondent & transmettent point en leurs D
fruits, parce que les conduicts des pores estans
trop estroicts & trop petits ne peuuent traitter ne
transmettre ce qu'il y a de gros & de terrestre. Ou
bien il faut dire que la saueur salee est vne partie de
la saueur amere, ainsi comme Homere mesme le
donne à entendre en ces vers,

Salute amere hors sa bouche il iettoit,

Et tout son chef à force en degouttoit.

Et Platon dit que l'vne & l'autre saueur deseiche
& restrainct, mais moins le fait la salee, comme cel-
le qui est moins aspre, & se trouuera que le salé est E
different de l'amer en excès de seicheresse, car le
salé est bien aussi aucunement desiccatif.

6 Pourquoi est-ce que ceux qui cheminent
ordinairement parmy des arbres ou des plantes
baignees de rosee, les parties de leurs corps qui y
touchent en deuiennent aspres & galeuses? Est-ce
comme disoit Letus, pource que ceste humeur de
rosee pour sa subtilité deliée, racle & perce le cuir?
ou bien pour autant que tout ainsi comme la
rouille prend aux graines & semences qui sont
mouillees, aussi les plus tendres parties de la peau F
estans par dessus, en maniere de dire, vn peu desflo-
rees & scarifiées par la rosee, il en sort vn peu
d'humour qui remplit la superficie d'vne fleur qui
luy fait dommage? Car s'attachant aux parties qui
ont peu de sang, comme sont le bas des iambes &
les pieds, en mord & escorche le dessus: car qu'il
soit vray qu'il y ait en la rosee quelque qualité de
propriété esraignante & mordante, il appert, par ce
qu'elle

A quelle rend ceux qui sont gras plus gresles, tesmoing ce que sont les femmes qui sont par trop en bon poinct, lesquelles vont recueillant la rosee avec quelques linges & quelques laines, & s'en frottēt pour restraindre & resserrer ce qu'elles ont trop de charnure & de corpulence.

7 Pourquoi est-ce que les batteaux l'hyuer vont plus lentement sur les riuieres, qu'ils ne font en autre tēps, mais non pas ainsi sur la mer? Est-ce point pource que l'air des riuieres, estant tousiours gros & pesant, malaisé à esmouuoir, l'hyuer est encore **B** plus espaisly, à cause de la froideur de l'air circonstat qui empesche les nauigans? Ou si cest accidēt la aduient plus tost aux riuieres que non pas à l'air, parce que la froideur reserrant l'eau, la rend plus pesante & de corps plus solide, ainsi que lon peut apperceuoir aux orloges à eau, là où elle coule plus lentement & plus tardiement l'hyuer, qu'elle ne fait pas l'esté. Et eserit Theophrastus qu'il y a au pais de Thrace pres du mont appellé Pangeon vne fontaine, de laquelle l'eau est deux fois plus pesante l'hyuer que l'esté, qui en pese vn mesme **C** vaisseau plein. Or que l'espaisissement de l'eau rédele cours de la nauigation plus lent, il appert par ce que les batteaux des riuieres portent plus grand fardeau en hyuer qu'ils ne font en l'esté, d'autant que l'eau estant espaislie, deuient aussi plus forte & soustient d'auantage, là où l'eau de la mer ne se peut espaisir en hyuer, à cause de sa chaleur, qui est la cause pourquoy elle ne gele point, & l'espaisissement est vne sorte de refroidissement.

8 Pourquoi est-ce que nous voions que les autres eaux en les remuant & agitant se refroidissent, & la mer agitée & tourmentée des vents s'eschauffe? C'est pource que s'il y a chaleur és autres eaux, elle est estrangere & venue d'ailleurs, aussi le mouuement l'en fait sortir & la dissipe: mais celle de la mer qui luy est propre & naturelle, les vents l'excitent & l'augmentent d'auantage. Or qu'il soit vray que la mer ait de la chaleur naturelle, la preuve en est toute euidente, par ce qu'elle est transparente, & qu'elle ne gele point, combien qu'elle soit terrestre & pesante. E

9 Pourquoi est-ce que l'hyuer l'eau de la mer est au goust moins amere? Car on dit que mesme Dionysius, lequel a escrit de la maniere de conduire les eaux, dit que l'amertume de l'eau de la mer n'est pas du tout sans aucune douceur, attendu que la mer reçoit tant & de si grâdes riuieres, & si bien le Soleil attire ce qu'il y a de doux & de bon à boire, à cause de sa subtilité & legereté, ce n'est que dessus tant seulement: encore le fait il plus en esté qu'en autre tēps, d'autant que l'hyuer il y touche plus laschement & plus debilemēt, à cause de l'imbécillité de sa chaleur: & la bonne portion de douceur qui y demeure, destrempe & dessalle ce qui y estoit excessiuement amer, & tenant de la drogue medicinale, ce qui mesme aduiēt aux eaux douces & bones à boire, parce qu'en esté elles sont pires au goust qu'en hyuer, d'autant que la chaleur resoult & dissipe ce qu'il y a de leger & de doux, mais en hyuer il en coule tousiours de nouuelle & toute
fraische,

A fraische, de laquelle il est bien force que la mer se sente, tant pource qu'elle est agitée, que pource que les riuieres qui y entrent sont plus grosses.

10 Pourquoi est-ce que lon verse de l'eau de la mer dedans les tonneaux de vin, & que lon conte communément qu'il y eut iadis des mariniers, lesquels apportèrent vn oracle, qui leur commandoit de plôger Bacchus en la mer, & ceulx qui sont loing de la marine, au lieu d'eau de mer y mettent dedans du plastre de Zacynthe cuit au fourneau? Est-ce point à fin que la chaleur luy aide alencontre du froid? ou si plus tost au contraire c'est point pour l'affoiblir en luy estaingnant & ostant de sa force? ou bien si c'est pource que le vin estant dangereux de se passer & tourner en eau, ou bien de fuesuenter: la matiere terrestre que lon iette dedās, estant sa propriété naturelle d'estraindre & de referrer, & la salure de l'eau de mer venant à subtiliser & consumer ce qu'il y a d'estrange, & non pas de la propre substance du vin, ce qui est superflu empesche qu'il ne sy mette aucune pourriture ou mauuaise senteur: & d'auantage tout ce qu'il y a de gros & de terrestre dedans le vin, s'attachant à ce qui va au fond, & en estant tiré contre-bas, fait vne residence de lie, & en laisse le reste du vin tant plus clair & plus net.

11 Pourquoi est-ce que ceulx qui nauignent sur la mer, ont plus de mal au cœur que ceulx qui nauignent sur les riuieres, encore que ce soit par beau & doux temps? C'est pource que ce qui plus cause & excite le mal de cœur entre les sentimens,

c'est l'odorement, & entre les passions la peur : car **D** si tost que l'apprehension du peril saisit les hommes, ils tremblent de peur, leur poil se herisse & se dresse, & le ventre leur lasche, là où il n'y a rien de tout cela qui trouble ny travaille ceulx qui nauignent dessus vne riuere, parce que l'eau douce & bonne à boire, est familiere & accoustumee à l'odorement, & la nauigation est sans danger: mais en la mer l'odeur de la marine estrange & non accoustumee les offense, & sont tousiours en peur, quelque beau temps qu'il face, ne se fians point à ce qu'ils voient present, par ce qu'ils ne sçauent ce qui **E** leur doit aduenir, & pourtant peu ou rien ne leur sert le calme du dehors, estant leur ame en tourmente au dedans, agitee de la peur & defiance, & tire le corps en semblable perturbation.

12 Pourquoi est-ce que la mer arrosée d'huile par dessus, il se fait vne clairté transparente, & vn calme & tranquillité au dedans? Est-ce pour-
 autant qu'Aristote dit, que le vent glissant par dessus l'huile qui est lissée & polie, n'a point de coup, & ainsi ne fait point d'agitation? Ou bien cela a quelque apparence pour le dessus & le dehors: **F** mais lon dit que les plongeurs qui plongent au fond de la mer, aians de l'huile dedans leur bouche, s'ils la soufflent quād ils sont au fond, ils voient clair à trauers l'eau, dequoy on ne sçauroit referer la cause au glissement du vent. Parquoy seroit-ce point plustost, pource que l'huile à cause de sa solidité fend & separe l'eau de la mer qui est terrestre & inegale, puis quand elle se resserre & se ras-
 semble,

A semble, encore demeure il de petits pertuis qui donnent aux yeux de la lumiere & transparence? Ou bien est-ce point pource que l'air qui est meslé parmy la mer, à cause de sa chaleur est naturellement lumineux, mais quand il est agité il en devient inegal & tenebreux? Quand doncques l'huile avec sa solidité viue vient à polir son inegalité, elle reçoit adonc polissure & transparence.

13 Pourquoi est-ce que les rets des pescheurs se pourrissent plustost en hyuer que nō pas en esté, combien que toutes autres choses pourrissent d'auantage l'esté? Est-ce pour autant que, comme Theophrastus estime, le chaud cedât au froid qui l'environne alentour, fait que le fond de la mer en est plus chaud, ne plus ne moins que de la terre? C'est pourquoy les eaux des fontaines sont plus tiedes en hyuer, & fument plus les lacs & les riuieres en hyuer qu'ils ne font pas en esté, par ce que le chaud est rangé au fond par le froid qui le surmonte. Ou bien il fault dire que ce n'est pas pourriture des rets, mais quand ils sont roides & gelez par le froid qui les a deseichez, ils en sont plustost rompus par la tourmēte, ne plus ne moins que s'ils estoient pourris: car ils trauiillēt plus au fond, tout ainsi cōme les nerfs qui sont fort tendus rompent, mesmement que la mer est en hyuer plus souuent tourmentee. C'est pourquoy ils les resserret & les restraignent avec des teintures, craignants qu'ils ne se laschent & ne se defacent: car s'ils n'estoient ainsi teints & frottez, ils trōperoiēt mieux les poissons, d'autāt qu'ils ne les apperceuroient pas si tost.

à cause que la couleur naturelle du fil, approchant **D** de l'air, est propre à deçeuoir en la mer.

14 Pourquoy est-ce que les laboureurs prient & souhaitent auoir mauuaise fenaïson ? Est-ce pource qu'il ne fault pas ferrer le foin quand il est mouillé ? car on le fauche qu'il n'est pas tout sec, mais encore verd, & fil est mouillé, il se gaste & pourrit incontînét, là où au contraire le bled estant mouillé de la pluye vn peu auant la moisson, en est grandemét aidé contre les vents chaulds du midy, lesquels ne permettent pas que le grain se tienne ferré en son espic, ains le delient & le relaschèt par **E** la chaleur, si ce n'est que la terre estant baignee, refraïschisse tousiours & tienne mol l'espic.

15 Pourquoy est-ce que la terre forte & grasse porte le froment, & la legere & sablonneuse porte l'orge ? C'est pource que entre les grains, ceulx qui sont plus forts & plus solides, ont affaire de plus de nourriture, & les plus foibles, de moindre & plus deliée. Or est l'orge plus foible & plus rare que n'est le froment, aussi ne nourrit elle & ne charge pas beaucoup l'estomach: ce que tesmoigne sa soudaine croïssance, par ce que elle est venuë en l'e- **F**space enuiron de trois mois, & mieux en terre seiche, pourautant qu'elle est moins solide, & a besoing de moins de nourriture, aussi arriue elle plus tost à sa perfection.

16 Pourquoy est-ce que lon dit communément, Semez le froment en bouë, & l'orge en poudre ? Est-ce pourautant que, comme nous auons dit, le froment a besoing de plus grâde nourriture, &

A & l'orge ne peut souffrir l'abondance d'humeur qui la noye? Ou pource que le froment estant dur, & approchant de la nature du bois, germé mieulx & plustost quand il est deltrempé & amolli dedans la bouë, & au contraire la seichereffe sur le commencement est plus à propos pour l'orge, à cause de sa rarité. Ou pource que la temperature de l'air, à cause de la chaleur, est mieux proportionnee & moins mal-faisante à l'orge, qui de soy mesme est vn peu froid. Ou bien ils craignent de semer le froment en seichereffe, à cause des fourmis, lesquels
B se mettent incontinent apres, là où ils ne peuvent pas si facilement porter les grains d'orge, d'autant qu'ils sont malaisez à remuer & à transmuier de lieu en autre, à cause de leur grosseur & grandeur.

17 Pourquoi est-ce que les pescheurs prennent plustost les seies & poils des queuës de cheual, pour faire leurs lignes, que ceulx des iuments? Est-ce pource que le masse, comme en toutes autres parties, encore au poil est plus fort que la femelle? Ou plus tost qu'ils pensent que les queuës des iuments, estants à tout propos baignees de leur
C vrine, en sont moins fortes?

18 Pourquoi est-ce que quand les callamars & cassérons apparoissent en la mer, c'est vn signe de grande tormente? Est-ce pourautant que tous poisons moulx, sont fort impatiens du froid & de la tormente, à cause qu'ils sont tout nuds, & ont la chair fort tendre, n'estant couuerte ny de cocque, ny de gros cuir, ny d'escaille, & au contraire, aiants ce qui est dur & ossu au dedans? C'est pourquoy

on les appelle Malacia, comme qui diroit moulx: D
& pour ceste cause nature a fait qu'ils presentent
bien tost & facilement le froid & la tempeste à ad-
uenir, d'autant que le froid leur fait mal, & la tour-
mente les offense. Parquoy quand le poulpe s'en-
court à terre, & s'attache aux petits rochers, c'est si-
gne qu'il y aura bien tost de grand vent: & le Cas-
feron saulte dehors, fuyant le froid & la tourmente
du fond de la mer, car entre tous les poissôs moulx
il a la chair fort tendre & fort molle.

19 Pourquoi est-ce que le poulpe change de
couleur? Est-ce pourautant que, comme dit Theo- E
phrastus, c'est vn animal timide de sa nature, au
moien dequoy, quand il est trauaillé du vent, il
change de couleur ainsi cōme fait l'homme? Voyla
pourquoy lon dit en commun prouerbe,

L'homme couard souuent de couleur change.
Ou bien y a il apparence en cela, quant au chan-
gemēt de couleur? mais ce n'est pas cause suffisante
pour faire ressembler, car il change de couleur, en
forte qu'il ressemble aux roches, desquelles il s'ap-
proche, suiuant ce que Pindare dit en ce passage,

Que ton sens souple & maniable
Soit au poulpe marin semblable,
Qui tousiours va couleur changeant,
Pour hanter avec toute gent.

Et Theognis aussi semblablement en ces vers,
Ayes le sens du poulpe, lequel teint
Sa peau d'vn autre & puis d'vn autre teint,
Prenant tousiours la couleur de la roche,
Laquelle avec ses longs pieds il accroche.

Aussi

A Aussi dit on, que ceulx qui sont excellents trompeurs, fins & cauteleux, ont ceste coustume, que pour se sauuer que lon ne les cognoisse, ils se font semblables au poulpe, & chāgent de couleur, c'est à dire de meurs, comme de robbe, en prenant de telles comme ils veulent. Est il doncques point ainsi, que le poulpe donne bien les cōmancements de ceste mutation de couleur par la peur qu'il a, mais au reste la principale cause vient d'ailleurs, & non pas de luy? & pource pecez vn peu ce que dit Empedocles,

B Tout ce qui est a ses defluxions.

Car non seulement il sort continuellemēt des defluxions des pierres, des animaux, des plantes, de la terre & de la mer, mais aussi du cuiure mesme, & du fer: car toute chose s'vse, toute chose rend quelque odeur par vne defluxiō qui se fait hors de son corps: & par ce que quelque partie s'en va & s'en deperit, tellement que lon suppose que par ces defluxions la, il se fait des attractiōs, des insultations, des embrassemēts, des frappemēs, des poussēmēs, & des enuironnemens: & si l'est vray ailleurs. encore plus vray-semblable est il, que des pierres & roches qui sont au long de la mer continuellement baignees & battues des vagues, il s'en aille tousiours quelques loppins & quelques rompures bien delices, lesquelles ne l'attachent pas aux autres corps, ains coulent alentour de ceulx qui ont les pores trop serrez, ou biē passent àtrauers ceux qui les ont trop rares & trop ouuerts, mais le poulpe à le voir seulement a la chair percee & pertuisée, cōme vne

goffre à miel, propre à receuoir toutes defluxions. **D**
 Quand doncques il a peur du vent, il serre & estrainct son corps, de maniere qu'il reçoit & conserue en la superficie de sa peau, les defluxions qui sortent de ce qui est aupres de luy, par ce que les rides de sa peau molle qui se fronce de peur, font des sillons tortus, propres à recueillir les defluxions des choses voisines qui viennent à donner contre luy, & ne se respendent point çà & là, ains s'amassans sur le cuir en rendent la superficie semblable de couleur. Et que cela en soit la vraye cause, ce en est vn grand signe, que ny le poulpe ne ressemble **E** pas en couleur à tout ce qui est aupres de luy, ny le cameleon à la couleur blanche, ains l'vn & l'autre seulemēt à ce dont les defluxions sont proportionnees à leurs pores & petits pertuis.

20 Pourquoy est-ce que les larmes des sangliers sont douces, & celles des cerfs salées & de mauuais goust? La chaleur & la froideur en sont cause, par ce que le cerf est froid de nature, & le sanglier chaud & bouillāt, comme feu: c'est pourquoy l'vn fuit, l'autre fait teste, & se defend quand on l'assault, & c'est principalement lors qu'il iette ses larmes, quand la chaleur grande luy monte aux yeux, comme nous auons dit,

Les seies droits, sa hure herissant,

Les yeux ardents d'aspre feu rougissant,
 ce qui en distille est doux: aucuns disent que comme le maigre sort du laiēt, aussi du sang trouble s'espraint la larme, entre lesquels est Empedocles: & pour autant que le sang du sanglier est noir &
 mordant

A mordant à cause de sa chaleur, & celuy des cerfs delié & cueux, il y a raison que ce qui s'escoule au courroux & en la peur de l'un & de l'autre, soit tel.

21 Pourquoy est-ce que les truyes priuees font des cochons plusieurs fois l'année, & les vnes en vn temps, les autres en vn autre, là où les layes sauvages ne font leurs marcaffins qu'une fois seulement, & presque toutes en mesmes iours, qui sont au commencement de l'esté, dont lon dit en commun prouerbe,

Depuis la nuit que la sauvage truye

B A cochonné, il ne fait plus de pluye?

Est-ce point pour la foison de nourriture, car à la verité, De la pance, comme lon dit, vient la danse: & l'abondance d'aliment cause la superfluité de la semence & geniture, tant és animaux, comme és plantes? Or les layes sauvages prochassent elles mesmes avec trauail & crainte leur nourriture, là où les truyes priuees en ont tousiours foison que la nature leur fournit d'elle mesme, ou que l'industrie du porchier leur procure & prepare. Ou bien est-ce point pource que les vnes sont tousiours en c oisuieté, & les autres en trauail, d'autât que les priuees sont paresseuses, & ne s'esloignent iamais gueres de leurs porchiers, les autres grauissant tousiours par les montagnes, & courant çà & là, emploient tout ce qu'elles mangent, & le consomment en corpulêce, & non point en semêce? Ou pource que les priuees sont tousiours en troupe ensemble avec leurs masses, ce qui les eschauffe & leur prouoque l'appetit de se mesler ensemble,

comme dit Empedocles des hommes en ces vers, D

Par le regard vient l'amoureux desir

De se mesler les personnes saisir:

là où aux sauvages, ce qu'ils vivent à part, & ne
 paissent point ensemble, fait qu'ils n'ont point d'a-
 mour l'un enuers l'autre, & leur emousse la pointe
 de l'appetit naturel de se mesler. Ou bien est-ce
 chose veritable, ce qu'escriit Aristote, qu'Homere
 appelle le sanglier Chlounes, qui vault autant à di-
 re, comme n'ayant qu'un genitoire, par ce que la
 plus part en se frottant contre les troncs des arbres
 se les brisent & froissent? E

22 Pourquoi est-ce que lon dit que la main de
 l'Ours est fort douce, & la chair d'icelle fort plai-
 sante à manger? C'est pource que les parties qui
 cuisent & digerēt mieulx leur nourriture sont plus
 delicates au goust: or cuisent mieux, & font meil-
 leure digestion les parties qui plus se meuvent, &
 qui font plus d'exercice, comme l'Ours se meut
 plus de ceste partie la: car avec ses mains, qui sont
 les pieds de deuant, il commence à marcher & à
 courir comme des pieds, & à prédre & saisir com-
 me des mains. F

23 Pourquoi est-ce qu'en la saison du prin-
 temps, les chiens ont moins de nez pour suiure les
 bestes à la trace? Est-ce point pourautant que les
 chiens, comme dit Empedocles,

Cherchants du nez le giste de la beste,
 reçoient les fumées & senteurs que les bestes lais-
 sent en passant parmy les bois, mais elles sont of-
 fusquées & amorties par plusieurs senteurs des ar-
 bres

A bres & des plâtes qui florissent alors, lesquelles tra-
uerfent & trompent le sentiment des chiens, & les
mettent en default, leur faisant perdre la trace de la
beste? C'est pourquoy lon dit qu'en la montaigne
d'Ætna en la Sicile personne ne chasse, d'autât que
tous les ans à la prime-vere il y croist grâde quan-
tité de violettes de mōtaigne, par les bois & praye-
ries, tellement que le pais estant tousiours remply
de celle souéue odeur, les chiens en perdent le sen-
timent des bestes. Et puis on raconte vne fable,
que Pluto rait là Proserpine, ainsi comme elle y
B cueilloit des fleurs: à raison dequoy les habitans
honorans & reuerās le lieu, comme saint & sacré,
ne courent point sus aux bestes qui y paissent.

24 Pourquoy est-ce que quand la Lune est au
plein, il est malaisé de suiure les bestes à la trace?
Est-ce pour la cause susdite, d'autant que la plaine
Lune engédre beaucoup de rosee? c'est pourquoy
le poëte Alcman appelle la rosee fille de Iupiter &
de la Lune,

De Iupiter & de la Lune fille

Dame Rosée:

c Car la rosee n'est autre chose qu'une foible & de-
bile pluye, aussi est la chaleur de la Lune imbecille,
d'où vient qu'elle la tire bien de la terre, comme
fait le Soleil, mais ne la pouuāt tirer ne monter en
haut, elle la laisse à bas sur la superficie de la terre.

25 Pourquoy est-ce que quand il fait gelee
blanche, malaisément peut on suiure les bestes à la
trace? Est-ce pour auant que l'huyuer les bestes
n'estloignent pas gueres leurs gistes & bauges, à

cause du froid, ainsi ne laissent elles pas beaucoup de marques: c'est pourquoy lon dit qu'elles esparignent ce qui est pres d'elles, de peur qu'elles ne soient contrainctes de prendre beaucoup de peine à aller au loing chercher leur proye & pasture en hyuer, ains qu'elles treuuent au mauuais temps pres d'elles dequoy se paistre. Ou c'est pource qu'il fault non seulement qu'il y ait trace du pied de la beste, mais aussi qu'elle esmeue le sentiment du chien: ce que les voyes des bestes font mieux quād elles sont vn peu dissoutes par la chaleur, là où l'air par trop refroidy & espessy alentour, restraint les odeurs, & ne les laisse pas couller ny se respendre au dehors pour esmouuoir les sentiments. Voyla pourquoy le vin & les parfums rendent moins d'odeur en hyuer quand il fait grand froid, d'autant que l'air espessy & pris de froid arreste les senteurs en elle mesme, & ne les laisse pas espendre au dehors.

26 Pourquoy & comment est-ce que les bestes quand elles sont malades, cherchent les remedes qui leur sont propres, comme les Chiens quād ils veulent vomir & rendre la cholere, mangent de l'herbe au chien, & les Pourceaux vont cherchant des escreuisses pour en māger, par ce que cela leur sert contre le mal de teste: & la Tortuë aiant mangé de la chair d'vn serpēt va chercher de l'origane, autremēt ditte de la mariolaine bastarde: & l'Ours quand il est deçousté, tire sa langue hors sa gueulle & la laisse toute couvrir de fourmis, & puis les auallant, il l'en guarit: & neantmoins de tout cela ils n'en

A ils n'en ont experience quelconque, ny ne l'ont point appris par cas d'adventure ? Est-ce doncq point l'odeur qui les esmeut, comme la senteur des goffres à miel excite les abeilles, & les charongnes attirent les Vautours de tout loing, aussi les escreuilles appellent les pourceaux, l'origane esmeut la tortuë, & les formillieres l'Ours, par odeurs & fluxions de senteurs qui leur sont propres, non pour ce que leur sentiment les esmeue par discours de raison à ce qui leur est vtile ? Ou bien est-ce point la temperature de leurs corps, apportant aux ani-

B maux, quād ils sont malades, & que leurs humeurs sont alterees des aigreurs ou des douceurs, & autres qualitez estranges non accoustumees, comme il appert és femmes grosses, lesquelles mangent quelquefois durant leur grossesse des pierres & de la terre, tellement que les bons medecins cognoissent par les appetits de leurs malades ceux qui doiuent mourir ou qui doiuent guarir ? Car à ce propos Mnesiteus recite que sur le commencement d'une inflammation de poulmōs, vn qui appetoit à manger des aulx guarit, & vn autre qui deman-

C doit des figues mourut, par ce que les appetits suivent les complexions du corps, & les complexions & dispositions viennent des maladies. Il est doncq vray-semblable que les animaux qui ne sont pas saisis de maladies mortelles ne dont ils doiuent mourir, ont ceste complexion & disposition en eulx, par laquelle ils prennent des appetits qui les meuvent & poulsent chascun à ce qui luy est vtile & profitable pour guarir sa maladie.

27 Pourquoi est-ce que le moust demeure ^D long temps doux, si le vaisseau qui le contient est enuironné du froid? Est-ce point pour autant que la mutation de la faueur douce en la vineuse est vne concoction du moust, & le froid empesche celle concoction qui vient de la chaleur? Ou au contraire est-ce point pour autant, que la propre faueur du raisin est la douce, & dir on que le raisin se meurit alors qu'il se tourne en faueur douce? Or la froideur ne laissant point le moust exhaler, ains repoussant sa chaleur au dedans, conserue la douceur. C'est pourquoy ceulx qui vendangent par ^E temps de pluye, le moust n'en boult pas si tost, d'autant que le bouillir vient de la chaleur, & le froid restraint & repousse la chaleur.

28 Pourquoi est-ce qu'entre les bestes sauua- ges l'Ours est celuy qui le moins dechire & rompt les toilles & pans de rets, là où les loups & les re- gnards les rongét bien souuent? Est-ce point pour ce qu'il a les crochets bien auant au dedans de la guenlle, de sorte qu'il ne peult auenir à mettre les cordes entre ses dents, d'autant que ses leures qui sont grandes & grosses, se mettât entre deux l'em- ^F peschent? Ou pour ce que aiant plus de force aux mains il les rompt & les dechire avec ses pattes, ou bien il vse des pattes & des dents tout ensemble, dechirant les toilles & les rets avec les pattes, & se defendant contre les veneurs avec les dents: mais plus encore luy sert que nulle autre chose le veau- trer, & pource quand il se sent pris dedans les rets il plonge & sort par deffoubs, se sauuant ainsi, sans qu'il

A qu'il ait befoing de fes mains ny de fes dents pour dechirer les toilles.

29 Pour quelle cause est-ce que nous ne nous esbahiffons point de voir des sources d'eau froide, & des chaudes si, combien que la froideur soit cause de celle la, comme la chaleur de ceste cy? car il ne fault pas dire, comme quelques vns estiment, que la chaleur soit l'habitude, & la froideur ne soit que priuation: pource qu'il seroit encore plus esmerueillable, commēt ce qui n'est point pourroit estre cause de ce qui est. Mais il semble que la nature
E donne la cause de la merueille à la rarité, & cherche lon pourquoy & comment se fait ce qui ne se fait pas souuent,

Vois-tu ce hault infiny firmament,

Qui en son sein liquide fermement

De tous costez la terre ronde embrasse?

combien il nous apporte de merueilles à voir la nuit, & combien de beauté il nous mōstre le iour?

Le commun des hommes, la nature d'icelles, *

les arcs en ciel, les diuerfes teintures des nuees, les esclairs qui se rompēt, comme des bouteilles, dont

C il est orné. * *

30 Pourquoy est-ce que quand les vignes & les ieunes plantes ne portent point de fruiēt, on appelle cela Tragan, cōme qui diroit boucquiner? C'est pource que les boucs qui sont par trop gras ne sont pas aptes à engendrer, & à peine peuuent ils de graisse faillir leurs femelles: car la semence genitale est vne superfluité vtile de la nourriture qui ne s'employe pas au corps. Quand doncq vn

animal ou vn arbre est en bon point & gras, c'est D
 signe que toute sa nourriture se consume en luy, &
 qu'il laisse biẽ peu ou du tout point de superfluité.

31 Pourquoi est-ce que la vigne arrosée de
 vin, mesmemẽt du sien, se deseiche & deuient tou-
 te aride? Est ce point pour autant que, comme aux
 grands yurongnes la teste deuient chauue, à cause
 que le vin par sa chaleur fait euaporer tout ce qu'il
 y a d'humeur? Ou bien est-ce que la liqueur vi-
 neuise vient de putrefaction, comme dit Empe-
 docles,

Le vin se fait de l'eau se pourrissant

E

Dedans le bois sous l'escorce?

Quand doncq la vigne vient à estre arrosée de vin
 par dehors, il y deuient feu, & corrompt la nature
 de l'humeur qui la deuoit nourrir: ou bien le vin
 pur aiant nature astringente, penetre iusques aux
 racines, là où il reserre les pores & les estraint, de
 maniere qu'il ne permet pas que l'eau & la sene
 dont la vigne a accoustumé de boutter & bour-
 geonner, puisse penetrer iusques à la tige du sep.
 Ou bien c'est pour ce que cela est contre nature à
 la vigne, que ce qui est sorty d'elle, retourne dere- F
 chef en elle, n'estant pas possible que l'humidité
 qui sort d'aucune plante, puisse plus retourner à
 estre partie ou nourriture d'icelle.

Tout le reste est perdu.

LES



OVRQVOY est-ce que Dieu auoit commadé à Socrates d'aider aux autres à enfanter, faisant office de sage femme, & defendu d'engendrer: ainsi comme il est escrit au traitté qui s'intitule Theætetus: car il ne fault pas

» penser que ce soit par mocquerie, ne par ieu, qu'il
 » soit dit, pour ce qu'il n'eust pas en tel endroit abu-
 » sé du nom de Dieu, ioinct encore qu'en ce mesme
 » traitté il attribue plusieurs autres propos haultains
 » & magnifiques à Socrates, comme est cestuy-cy
 » entre autres: Plusieurs, dit-il, sont de tel courage
 » enuers moy, qu'ils me mordroient & poindroient
 » volontiers, quand ie leur oste quelque folle opi-
 » nion, & n'estimét pas que ie le face pour bien que
 » ie leur veuille, se monstans en cela bien esloignez
 » d'entendre, que nul Dieu ne porte mal-veillance
 » aux hommes, comme aussi ne le fais-ie pour au-
 » cune mal-veillance que i'aye enuers eux: mais il
 » ne m'est aucunement loisible ny de conceder la
 » mensonge, ny de dissimuler la verité. Est-ce point
 » doncques qu'il appelle Dieu son naturel, qui estoit
 » fort vis à iuger, & fort second à produire & inuen-
 » ter, ainsi comme fait Menander en ce verset,

C'est vn vray Dieu que nostre entendement:
 Et Heraclitus,

Le naturel de l'homme est vn Démon?

D

Ou bien si ce fut à la verité quelque cause diuine & celeste, qui suggera & inspira à Socrates ceste forte de philosophie, par laquelle examinant & enquerant tousiours les autres, il les guarentissoit de toute presumptueuse fumee d'erreur & de vanité, & d'estre facheux & odieux à eux mesmes premieremēt, & puis à ceux de leur cōpagnie: car de fortune il estoit aduenue que parmy la Grece il y auoit de son temps vne grande volée de Sophistes, ausquels les ieunes hōmes payans grosse somme de deniers pour leur salaire, se remplissoient de grande opinion d'eux mesmes, & de vaine persuasion de science, & de desir des lettres, consumans leur tēps en disputes & contentions oyseuses, sans rien faire au demourant de beau ny de bon. Socrates doncques aiant le discours & la parole propre à refuter, arguer & conuaincre, cōme vne drogue laxatiue pour purger, estoit de tant plus creu en refutant les autres, qu'il ne prononceoit ny n'asseuroit iamais rien de foy, & touchoit de tant plus auant au cœur des escoutans, qu'il sembloit chercher la verité en commun, & non pas espouser ny fauoriser à vne siene particuliere opinion, par ce que l'engendrer empesche la faculté vtile à iuger, d'autant que l'amant est auengle alendroit de ce qu'il aime. Or n'y a il rien que lon aime tant au monde que les opinions & raisons que lon a engendrees & inuētees, car la distribution des enfans que lon dit communément estre tres-iuste, és raisons & opinions est tres-iniuste, pour ce qu'en celle la

F

la

A la chascune prend le sien, en ceste cy il faut prendre la meilleure, encore qu'elle soit d'autrui: & pourtant celuy qui en engendre de propres, en deuient plus mauuais iuge de celles d'autrui. Et cōme il y eut iadis vn Sophiste qui dit, que les Eliens feroient meilleurs gouuerneurs & iuges des ieux sacrez Olympiques, s'il n'y auoit pas vn Elie qui combatist esdits ieux: aussi celuy qui veut bien presider au iugemēt de diuerses sentences & opiniōs, il n'est pas raisonnable que luy mesme ait enuie de faire couronner la siene, ne qu'il soit vne des parties contendantes en ce iugement: car les capitaines des Grecs apres la defaite des Barbares, estans assemblez en conseil pour dōner leur voix sur l'adiudication des pris & honneurs de prouesse, tous se iugerent eux mesmes les premiers & plus vail-lans: & des philosophes il n'y en a pas vn qui ne face tout de mesme, excepté Socrates, & ceux qui luy ressemblent, lesquels confessent n'auoir ny ne tenir rien de propre: car ceux la sont ceux qui se monstrent seuls iuges entiers de la verité, non corrompus ne fauorables: car ainsi comme l'air qui est dedans les aureilles, s'il n'est ferme & arresté sans aucune voix propre à luy, & qu'il soit plein de son & de bruit, ne peult exactement bien comprendre ce que lon luy dit: aussi ce qui iuge les raisons en la philosophie, s'il y a quelque chose au dedans qui luy resonne, & qui luy retentisse, difficilement pourra il entendre ce que lon luy dira au dehors: car son opinion particuliere, qui luy est domestique & familiere, dequoy que ce soit qu'elle

traitté, sera tousiours la philosophie qui aura D
mieux rencontré la verité, toutes les autres n'au-
ront fait que cuidoier. D'auantage fil est ainsi que
l'homme ne puisse rien parfaitement compren-
dre ny sçauoir, à bonne cause donc luy defendoit
Dieu d'engendrer de ces faux germes la d'opiniõs
mensongeres & inconstantes, & le contraignoit de
reproouuer & refuter ceux qui en auoient de telles:
car ce n'estoit pas vn petit profit, mais tres-grand,
de luy donner vne parole qui sceust deliurer les
hommes du plus grãd mal qui soit, c'est à sçauoir,
d'erreur & d'illusion, & vanité de iugement, E

Dieu ne l'a pas donné mesme aux enfans
d'Asclepius:

car la medecine de Socrates n'estoit pas de guarir
les corps, ains de nettoier & purifier les ames cor-
rompues & pourries. Et à l'opposite aussi, s'il est
ainsi que la verité se puisse sçauoir, n'y aiant qu'v-
ne verité, celuy qui l'a apprise de celuy qui ne l'a
pas trouuee, n'en a pas moins que celuy mesme
qui l'a trouuee, & la prend mieux celuy qui ne s'est
point persuadé de l'auoir: car il prend ce qui est
le meilleur de tous, ne plus ne moins que celuy F
qui n'a point engendré d'enfans naturels, en préd
le meilleur qu'il peult choisir pour l'adopter.
Voyez si toutes autres sortes de lettres ne meri-
toient à l'aduenture pas qu'il y employast beau-
coup d'estude, comme la Poësie, les Mathemati-
ques, l'art d'eloquence, les opinions des Sophistes,
pourtant la Diuinité defendit à Socrates de les en-
gendrer: mais celle que Socrates estimoit seule Sa-
pience,

A pience, c'est à sçauoir, celle qui concerne Dieu & les choses spirituelles, que luy mesme appelle la Science amoureuse, ce ne sont point les hommes qui l'engendrent ne qui l'inuentent, car ils ne la font que remeniorer. Voyla pourquoy Socrates n'enseignoit rien, ains mettant seulement en auât aux ieunes hommes, des commencemens, des difficultez, des doubtes, comme des trêchees qui precedent l'enfantement, excitoit, esueilloit & pouelloit les intelligences nees avec eux: c'est ce qu'il appelloit l'art d'aider à enfanter, comme font les B ges femmes, laquelle n'apportoit pas de dehors l'entendement & le iugement à ceux qui conféroient avec luy, comme d'autres faisoient à croire, mais leur monstroient celuy qu'ils auoient dedans eux mesmes propre à eux, mais qu'ils nourrissoient confus & imparfait.

2 Pourquoy est-ce qu'il a appelé le souuerain Dieu, Pere & facteur de toutes choses? Est-ce pour ce qu'il est veritablement pere des Dieux qui ont esté engendrez, & des hommes, ainsi qu'Homere le nomme, & facteur des creatures qui n'ont ny c raison ny ame? car on n'appelle pas, ce dit Chrysippus, pere du liêt de l'enfant au ventre de la mere, celuy qui a fourny de semence, encore que ce liêt soit fait de la semence de l'homme. Ou bien est-ce par translation qu'il appelle figurément pere du monde, celuy qui est cause efficiente, suivant la façon accoustumee de parler, comme au dialogue intitulé le Bancquet, là où il nomme Phèdrus pere des propos amoureux, pour ce que ce fut luy

qui commancea à mettre en auant les deuis de l'a-
 mour: comme aussi au traitté qui est intitulé Calli-
 pidas, il appelle semblablement Callipidas pere
 des propos philosophiques, par ce que plusieurs
 beaux & bons propos furent tenus de la philoso-
 phie, luy en aiant baillé le commencement? Ou bien
 est-ce qu'il y ait difference entre pere & facteur, &
 entre generation & facture? car tout ce qui est en-
 gendré est aussi faict, mais non pas au reuers, tout
 ce qui est fait n'est pas engendré, & semblablement
 qui a engendré a faict: car generation est facture
 d'une creature animee, mais d'un facteur, comme
 est un maçon, un tissier, un faiseur de lyres, ou d'un
 statuaire, l'œuvre est distincte & separee de l'ou-
 urier, là où le principe mouuant, & la puissance de
 celuy qui engendre, est infuse en celuy qui est en-
 gendré, & contient sa nature, estant comme une
 partie distraitte de la substance de celuy qui a en-
 gendré: pour autant doncques que le monde ne
 ressemble pas à un assemblage de plusieurs pieces
 rapportees & collees ensemble, ains y a une gran-
 de portion de vie animale, & de diuinité, que Dieu
 y a infondue & meslee de sa propre nature & sub-
 stance en la matiere, c'est à bon droit qu'il est sur-
 nommé & pere & facteur du monde qui est ani-
 mé. Ce discours estant fort conforme à l'opinion
 de Platon, considerez un peu s'il y auroit pas aussi
 apparence à cestuy-cy: c'est que le monde estant
 composé de deux parties, à sçauoir de corps & d'a-
 me: l'une, qui est le corps, Dieu ne l'a pas engendré,
 mais la matiere s'estant exhibee, il l'a formee &
 moulee

A moulee, en liant & finissant de termes & figures propres l'infinité d'icelle : mais l'ame participante d'entendement, de discours de raison, d'ordre & d'harmonie, n'est pas seulement œuvre de Dieu, mais partie, & n'est pas par luy, mais de luy, issue de sa propre substance. En ses liures doncques de la chose publicque, aiant diuisé l'vniuers, ne plus ne moins que vne ligne en deux sectiōs inegales, il soubs-diuisse encore chasque sectiō en deux autres, par mesme proportion : car il fait deux genres de toutes choses, l'vn sensible & visible, & l'autre in-

B telligible, & attribue au genre des intelligibles, en premier degré les premieres formes & Idees, en second degré les Mathematiques : & quāt au gēre des sensibles, il y attribue en premier degré les corps solides, & en second lieu, les images & figures d'iceux, & donne à chascun de ces quatre mēbres de sa diuision, son propre iuge : pour le premier, l'entendement : pour les Mathematiques, la pensee : pour les corps solides, la foy : pour leurs images & figures, la cōiecture. A quelle fin dōcques & quelle intētion a il diuisé l'vniuers en deux sectiōs inegales,

C & laquelle des deux sectiōs est la plus grande, celle des choses sensibles, ou celle des intelligibles : car quāt à luy il ne l'a point declaré, mais sur le chāp il semble que la portion des sensibles soit la plus grande : car la substance indiuisible des choses intelligibles estant tousiours d'une mesme sorte, & sur vn mesme subiect, est reduite à bien peu, qui est pur & net, là où l'autre estant espendue & vague sur les corps, a fait la sectiō des sensibles. D'auātage le pro-

pre de l'incorporel, est d'estre terminé, & le corps, D
quant à sa matiere, est infiny & interminé, & se fait
sensible, quand par participation de l'intelligible il
vient à estre terminé. Oultre ainsi comme des cho-
ses sensibles, chascune a plusieurs images, plusieurs
vmbres, & plusieurs figures, & generalmente d'un
seul patron il se peut tirer plusieurs copies & plu-
sieurs exemplaires, imitez tant par art que par na-
ture, aussi est il force que les choses qui sont icy
sensibles, soient en plus grand nombre que celles
qui sont là sus intelligibles, selon l'opinion de Pla-
ton, supposant que les choses sensibles soient com- E
me images & exemplaires des originaux des Idees
intelligibles. Qui plus est, l'intelligence des Idees &
especes par abstraction & circoncision du corps,
les reduit au reng des Mathematiques, montant
de l'Arithmetique ou science des nombres, à la
Geometrie, qui est la science des mesures, & puis
apres à l'Astrologie, qui est la sciéce des estoiles, &
puis par dessus toutes les autres mettant l'Harmo-
nique, qui est la science des sons & accords : car le
subiect de Geometrie se fait, quand à la quantité,
en general s'adiouste magnitude de longueur & F
largeur: & de la Stereometrie, qui est la science de
mesurer les corps solides, quand à la magnitude de
longueur & largeur s'adiouste la profondeur: & le
propre subiect de l'Astrologie, quand à la magni-
tude solide s'adiouste mouvement: & le subiect de
l'harmonique ou musique, quand aux corps mou-
uans s'adiouste le son & la voix: d'ocques en soub-
strayant & retirant la voix des corps mouuans, & le
mou

A mouuement des solides, la profondeur des superficies, & la magnitude des quantitez, nous nous trouuerons és Idees intelligibles, lesquelles n'ont aucune difference entre elles, quant à l'un & le seul, parce que l'vnité ne fait point de nombre, si elle ne viét à toucher au deux indefiny : mais produisant ainsi le nombre, elle va aux points, & puis des points aux lignes, des lignes aux superficies, des superficies aux profondeurs, & des profondeurs aux corps, & puis aux qualitez des corps qui se font és alterations. D'auantage des choses intellectuelles il n'y a qu'un

B iuge, qui est l'entendement: car la pensée ce n'est autre chose que l'entendement appliqué aux Mathematiques, esquelles les choses intellectuelles apparoissent ne plus ne moins que dedés des mirours, là où pour la cognoissance des corps, à cause du grand nombre qu'il y en a, nature nous a donné cinq puissances & cinq diuers sentimens pour les iuger, encore ne peuuent ils pas suffire à les descouurir tous, ains y en a beaucoup qui pour leur petitesse fuyent noz sens, comme estât vn chascun de nous composé de l'ame & du corps: c'est bien petite chose

C que l'esprit & l'entendement qui est caché en vne grâde & grosse masse de chair: ainsi est il vray-semblable qu'il y a mesme proportion dedans tout l'uniuers, entre les choses sensibles & les intellectuelles, car les intellectuelles sont commencement des corporelles: or ce qui procede du commencement est tousiours plus en nombre & plus grand, que n'est le cōmancement. Mais au contraire pourroit on aussi dire, Premièrement, que en comparant les

choses sensibles & corporelles aux intellectuelles, & nous egalons aucunement les mortelles aux divines, car Dieu est entre les choses intellectuelles. Et puis, par tout le contenu est tousiours moindre que n'est le contenant: or la nature de l'univers dedans l'intellectuel comprend le sensible, car Dieu aiant mis l'ame au milieu, l'a estâdue par tout le dedans, & encore par dehors a caché & enueloppé tous les corps d'elle: or est l'ame invisible & imperceptible à tous les sentimens naturels, ainsi comme il est escrit aux liures des loix: & pourtât est vn chascun de nous corruptible, & le mode ne se corrompra point, pour ce qu'en chascun de nous ce qui est de façon mortelle & subiect à dissolution, contient en soy au dedans la force & puissance vivifiante: mais au monde c'est tout au contraire, car la principale puissance & nature qui est tousiours en vne sorte immuable, conserue la partie corporelle qu'elle contient & embrasse au dedans de soy. Et puis, en la nature corporelle l'individu & impartissable s'appelle pour sa petitesse, ce qui est si petit qu'il ne se peut diuiser, mais en la nature incorporelle & spirituelle, c'est pour sa simplicité, syncérité & pureté, laquelle est exēpte de toute multiplicité & toute diuersité, & autrement encore est-ce simple & sottise de vouloir coniecturer les choses incorporelles par les corporelles. Or est il que l'instant ou le maintenant s'appelle indivisible & impartissable, & toutefois il est ensemble par tout, & n'y a partie de la terre habitable qui soit sans luy, ains toutes les passions, toutes les actions, toutes les

A corruptions & generations qui sont par le monde, sont toutes cōprises en ce maintenāt: & l'instrumēt seul de iuger les choses intellectuelles, est l'entendement, ne plus ne moins que la veuë de la lumie-re, pour sa simplicité vniforme, & par tout ressemblant à soy mesme, mais les corps aians plusieurs diuersitez & plusieurs differences, aussi se cōprennent ils par diuers instrumens à iuger. Mais il y en a qui desestiment & rauallent comme trop petite, à tort, la puissance intellectuelle & spirituelle qui est en nous: car au contraire elle est belle & grande,

B comprenant tout ce qui est sensible, & attaignant iusques aux Dieux. Et qui plus est, luy mesme en son liure intitulé le Banquet, enseignant comment il faut vser de l'amour, en retirant l'ame de l'affection des beautez corporelles, & l'appliquāt à celles qui sont intellectuelles, il nous enhorte de ne nous asseruir ny assubiectir point à la beauté, ny d'un corps, ny d'une estude, ny d'une sciēce, ains en nous esleuant à mont de ceste bassesse, nous tourner & conuertir à la grāde & vaste mer de beauté.

3 Pourquoy est-ce que veu qu'il afferme tousiours que l'ame est plus ancienne que le corps, qu'elle est cause de la generation d'iceluy & son principe: à l'opposite il dit que l'ame n'eust pas esté sans le corps, ny l'entendement sans l'ame & qu'il fault que l'ame soit dedans le corps, & l'entendement en l'ame: car il semble qu'il y ait cōtradiction en cela, & que le corps soit & non soit, si est vray qu'il soit ensemble avec l'ame, & neantmoins qu'il soit engendré par l'ame. Est-ce point pour ce

que ce que nous disons souuent est vray, que l'ame **D**
 sans entendement, & le corps sans forme, ont tous-
 iours esté ensemble, & ny l'un ny l'autre n'a eu cō-
 mancemēt d'estre, ny principe de generation, mais
 quand l'ame vint à auoir participation d'entende-
 ment & d'harmonie, & qu'elle deuint sage par cō-
 sonance, elle fut cause de mutation en la matiere,
 & estant plus forte en ses mouuemens, elle attira
 & conuertit à soy les mouuemens d'icelle: voyla
 comment le corps du monde a eu sa generation de
 l'ame, par laquelle il fut formé, & fait semblable:
 car l'ame d'elle mesme ne produisit pas la nature **E**
 du corps, ny ne le crea pas de rien, ains d'un corps
 desordonné & sans forme quelconque, elle en feit
 un bien ordonné & bien obeïssant, comme qui
 diroit que la force de la graine est tousiours avec le
 corps, mais neantmoins que le corps du figuier ou
 de l'oluiuer est né de la graine, il ne dira rien qui
 soit desaccordant, car le corps mesme estant esmeu
 & alteré par la graine, est né & germé tel: aussi la
 matiere sans forme, & indeterminée, aiant esté fi-
 guree par l'ame, qui estoit dedans, a eu telle forme
 & telle disposition.

F
 4 Pourquoy est-ce que y aiant des figures &
 des corps composez, aucuns de lignes droittes &
 autres de lignes circulaires, il a pris le triangle à
 deux costez egaux, & celuy à trois inegaux pour le
 fondement & commencement de ceux qui sont
 composez de droittes lignes: desquels le triangle à
 deux iambes egales compose le corps quarré, qui
 est l'element & principe de la terre, & le triangle à

A trois costez inegaux compose la Pyramide: & l'Octaëdre, le corps à huit faces, & le Icosaëdre, le corps à vingt faces, l'un principe du feu, & l'autre de l'air, & l'autre de l'eau: & neantmoins il omet du tout les corps & figures circulaires, combien qu'il ait fait mention du rond comme vne boule, quand il dit que chascune des figures cy dessus nombrées, est apte à diuiser vn corps rond comme vne boule, en parties egales. Est-ce comme aucuns soupçonnent, pource qu'il attribuoit le Dodecaëdre, corps à douze faces, à la boule, en disant
 B que Dieu s'estoit seruy de ceste forme & figure là, en la composition du monde? car pour la multitude de ses elemens constitutans, & par ce que ses angles sont plus mouffes, il s'esloigne plus de la droite ligne, & se courbant facilement, & s'estendant alentour, comme les Sphères que lon compose de douze cuirs, il approche plus du rond, & en est de tant plus capable: car il a vingt angles solides, chascun desquels est enuironné & contenu de trois angles plats mouffes, estant chascun composé d'un droict, & d'une cinquième partie du
 C droict: outre cela il est composé & constitué de douze pentagones, corps à cinq faces, aians les angles & les costez egaux, desquels chascun est composé de trente, les premiers triangles à costez inegaux: à raison dequoy il semble qu'il ensuit le nombre des degrez du Zodiaque, & le nombre des iours de l'an en la distribution de ses parties constitutantes, qui sont egales en nombre. Ou bien est-ce que par nature le droict precede le rond? ou pour

mieux dire, il semble que le rond soit vne passion ^D
 & qualité du droict: car on dit que le droict se
 courbe, & le cercle se descript par le centre & la di-
 stance qu'il y a iusques à la circonference, qui est
 le lieu de la droite ligne, par laquelle il est mesuré:
 car la circonference est de tous costez egale-
 ment distante du centre, & puis le Conus, qui est la py-
 ramide ronde, & le Cylindre, qui est comme vne
 coulonne ronde, sont composez de figures à lignes
 droictes, l'un par vn triangle, dont l'un des costez
 demeure ferme, & l'autre avec la base tourne tout
 alenuiron, & le Cylindre par vne figure plus lon- ^E
 gue que large, à angles droits, dont l'un des costez
 demeure, & l'autre tourne de mesme. D'auantage
 ce qui est le moindre est le plus pres du comman-
 cement: or la moindre & la plus simple de toutes
 les lignes, est la droite, car de la ronde, le dedans
 est courbe, & le dehors bossu. Outre plus les nom-
 bres sont deuant les figures: car l'vnité ressemble
 au point, par ce que c'est vn point en situation &
 position: or est-il que l'vnité est triangulaire, par ce
 que tout nombre triangulaire par huit fois repe-
 té, y adioustant l'vnité, deuiant quarré, & cela ad- ^F
 uient aussi à l'vnité, par ainsi le triangle est deuant
 le cercle: & cela estant ainsi, adonc la ligne droite
 va deuant la courbe. D'auantage l'element ne se
 diuise iamais en ce qui est composé de luy, ains au
 contraire toute autre chose se diuise & se resoult
 en ses elemens, dont elle est composee. Si donc-
 ques le triangle ne se resoult en rien qui soit cour-
 be, & au contraire les deux diametres s'entrecroi-
 sans

A sans partissent le cercle en quatre triangles, c'est doncques à dire, que la figure à droite ligne va deuant celles qui sont circulaires. Qu'il soit ainsi que la droite ligne precede, & que la courbe suiue apres, Platon luy mesme l'a demonstté, en disant que la terre est cōposée de plusieurs corps quarrez, dont vn chascun est clos & contenu de superficies plattes à lignes droittes, en maniere disposees, que tout le corps & toute la masse de la terre semble estre ronde & de forme de boule, tellement qu'il n'est point de besoing de faire aucuns des elemés,
B dont le corps de la terre soit constitué rond: s'il est ainsi que de corps à droittes lignes, cōioincts & appliquez les vns aux autres en certaine sorte, ceste forme se soit produitte. D'auantage la droite ligne, soit petite, soit grande, garde tousiours vne mesme droitture, là où au contraire nous voions les circōferences des cercles, si elles sont petites, estre plus tournees, plus serrees, & plus estranglees, & au contraire si elles sont grandes, estre plus lasches & plus estandues, tellement que qui dresse les cercles tout de bout sur leur partie bossue dessus vne superficie
C plate, s'ils sont petits, ils n'y touchent que d'un seul point, s'ils sont grands d'une ligne, tellement que lon pourroit de là cōiecturer, que plusieurs petites lignes droittes, ioinctes les vnes aux autres qu'en à queuë, en certaine situation seroient la circonférence du cercle: mais à l'aduenture n'y a il par deçà ny cercle ny boule, qui soit en sa forme exquisément & exactement parfait: & en l'extension des droittes lignes & superficies tout alentour, pour la

petitesse des parties on n'apperçoit point la différence, ains nous en semble la figure circulaire & ronde: aussi n'y a il corps icy qui se meue naturellement, de mouuement circulaire, ains se meuent tous selon ligne droite: aussi le parfaitement rond n'est point element de corps sensible, ains de l'ame & de l'entendement, ausquels aussi il attribue le mouuement circulaire, comme leur appartenant par nature.

5 Pourquoy est-ce qu'il dit au liure intitulé Phèdrus, que la nature de l'ele, dont ce qui est graue & pesant se leue contre-mont, participe grandement du corps de Dieu? Est-ce pource que là il parle de l'amour, lequel est de beauté corporelle, & ceste beauté pour la similitude qu'elle a avec la diuinité emeut l'ame, & la fait rememorer? Ou bien plus tost il le faut prendre simplement, sans curieusement rechercher rien plus outre, que l'ame estant dedans le corps, a plusieurs facultez & puissances, dont celle du discours de la raison & de l'entendement participe de la diuinité, laquelle il a non improprement ny impertinemment appelée ele, pource qu'elle eleue l'ame des choses basses & mortelles à la cōsideration des celestes & diuines.

6 Comment & pourquoy est-ce que Platon dit, que l'Antiperistase, c'est à dire la circonstance contraire de mouuement alentour des corps (d'autant qu'il n'y a rié de vuide en nature) est cause des effects qui se font és ventoses des medecins, en auallant la viande, en iettant de gros & pesans fardeaux, és fluxions des eaux, és cheutes des foudres,
en

A en l'attraction que fait l'ambre, & la pierre de l'aimant, & en la consonance, & accord des voix : car il semble qu'il n'y ait point de propos, d'attribuer vne mesme & seule cause à tant d'effets, si diuers, & si different de genre : car encore, quant à la respiration des animaux, qu'elle se face par ceste mutuelle pulsion de l'air, il l'a suffisamment déclaré : mais des autres effets qui semblēt estre des miracles en nature, & ne sont rien, ce dit il, par ce que ce ne sont que les corps qui s'entrepoulsent les vns les autres à l'enuiron, & passent reciproquement es
B places les vns des autres, il nous a laissé à declarer comment cela se fait particulièrement en chascun exemple.

Pour le premier doncques, quant à la ventose, voicy comment il en va. L'air qui est compris au dedans de la ventose, ioignant la chair, estant par la chaleur enflammé, & deuenant plus delié & plus subtil, que ne sont les petits pertuis & pores du cuire dont est faite la ventose, en sort dehors, non pas en vn lieu vague ne vuide, car il n'y en a point, mais en l'autre air qui est tout alentour de la ventose, par dehors, & le poulse, & celuy là en poulse vn autre deuant luy, & ainsi de main en main, l'vn cedant, & l'autre poulfant, & se mettant au lieu vacant que le premier a laissé, ainsi reuenant à toucher alentour de la chair que la ventose a empoignée, & la bouillant, il en tire. espraint, & fait sortir l'humeur qui y est au dedans de la ventose. L'aualler de la viande se fait aussi tout de mesme, car les creux & cautez, tant de la bouche que de l'esto-

mach, sont tousiours pleines d'air: quand donc la ^D viande est poulsee au dedans du canal de la gorge, tant par la langue que par les glandules & muscles du gosier qui s'estendent, l'air estant pressé & espraint par la viande, la suit de pres à mesure qu'elle cede, & aide à la poulser à bas. Semblablement aussi les pesants fardeaux que lon iette, cōme grosses pierres & autres telles choses, fendent l'air en fortāt avec l'impetuosité du coup qu'on leur baille, & le mespartissant, & luy coulāt alentour, selon son naturel, qui est de poursuiure la place delaissee, & la remplir, le vuide suit apres la masse lancee, & ^E luy haste encore d'auantage son mouuement: les cheutes aussi de la foudre ressemblient ne plus ne moins aux lancements des fardeaux, car elle faulte enflammee hors de la nuë par la violence du coup en l'air, lequel ouuert & rompu luy cede, & puis se reioignāt ensemble au dessus, la poulse en bas contre sa nature, par force. Quant à l'ambre, il ne fault pas pēser qu'il attire rien de ce qu'on luy presente, non plus que fait la pierre de l'aimant, ne pareillement que rien qui en approche luy faulte sus de luy mesme: mais quant à la pierre, elle iette hors ^F de soy ne sçay quelles fluxions grosses, pesantes & flatueuses, par lesquelles l'air contigu venāt à estre entre-ouuert, poulse celuy qui est deuant luy, & ce luy la tournant alentour, & rentrant en la place vuidee, force le fer, & le poulse deuāt soy: & quant à l'ambre, il a bien ne sçay quoy de flambant & d'esprit flatueux, qu'il iette dehors, quand on le frotte par dessus, par ce que ses pores & petits per-

tuis

A tuis s'ouurent: ce qui en sortant fait le mesme effect que la pierre de l'aimant, & attire ce qui est aupres de luy, le plus leger & le plus sec, pource qu'il est plus gresle & plus debile, car il n'est pas assez fort, ny n'a pois, ny violéce, pour pouuoir pouls-fer & chasser vne grâde quantité d'air, avec lequel il puisse venir à bout des plus grandes choses. Mais comment donc est-ce que cest air ne poulse ny le bois ny la pierre, ains seulement le fer, & l'amene à la pierre? ceste doubte & difficulté est commune à ceulx qui cuident que cest assemblement de ces deux corps se face ou par attraction de la pierre, & par naturel mouuement du fer. Or le fer n'est ny trop rare, comme est le bois, ny trop ferré, comme l'or ou la pierre, ains a de petits trous, de petites voies, & des asperitez rabotteuses, à cause de ces inegalitez, bien proportionnees & sortables à l'air, tellement qu'il ne coule pas si aisément par dessus, ains a des arrests & des prises, où il se peult affermir, & prendre pied assez raisonnablement pour pouuoir pouls-fer en auant & forcer le fer, iusques à ce qu'il aille baiser la pierre. voyla les causes & raisons que lon pourroit rendre de ces effects la. Mais le coulement des eaux sur la terre, par quelle maniere de pouls-ferment il se fait, il n'est pas si facile à apperceuoir, ny à declarer: & fault entendre que és eaux des lacs qui ne bougent, & demeurent tousiours en vn lieu, c'est pour ce que l'air espendu alentour, & les estraingnant de tous costez, ne se mouuant point, ne leur laisse place aucune vuide. Par ainsi le dessus de l'eau, tant és lacs,

comme en la pleine mer, se remue & se courbe de D
vagues, selon que l'air est agité, par ce que l'eau suit
incontinent le remuement de l'air, & flue quand
& luy, pour ses inegalitez: car le coup donné au
bas fait le creux de la vague, & celuy d'enhault fait
la tumeur & enfleure d'icelle, iusques à ce que tou-
te la place qui contient l'humeur de l'eau soit tou-
te quoye & rassise, alors la vague cesse, & l'eau se
rassiet aussi. Les fluxions doncques des eaux qui
courent tousiours, se font par ce que les eaux suy-
uent tousiours & vont apres l'air qui leur cede,
estants chassées par celles qui les poulserent derriere, E
& ainsi se fait vn coulemēt perpetuel & continuel,
qui ne cesse iamais: c'est pourquoy les riuieres,
quand elles sont grosses à plein chantier, elles cou-
rent plus roide: mais au contraire, quand il y a peu
d'eau, elles vont aussi plus lentement, l'air ne leur
cedant pas, pource qu'elles sont trop foibles, &
qu'elles n'ont pas beaucoup de circonstances qui
les pressent, ne qui les chassent. Ainsi est il force
que les sources des fontaines sortēt sur la terre, par
ce que l'air de dehors entrant subtilemēt és places
vuides aux creux de la terre, en chasse l'eau de- F
hors. Le paué d'une maison fort obscure, contenant
vne air estouffé, sans qu'il y entre ny vent ny ha-
leine, si on respand de l'eau dessus, engendre du
vent & de l'esprit, estant l'air debouté de son lieu
par l'eau qui y tombe, & en estant frappé & battu,
ainsi comme leur propre naturel est de s'entre-
poulser & s'entre-ceder l'un à l'autre, n'y aiāt point
de place vuide, en laquelle l'un estant colloqué ne
puisse

A puisse estre subiect à se ressentir de la mutation & alteration de l'autre . Et quant à la consonance de l'harmonie , luy mesme a déclaré comment c'est que s'accorder les sons: car le vifte & leger est hault & aigu, & le tardif & lent est bas & gros: & pourtant les aigus frappent les premiers le sentiment de l'ouye: mais quand eulx ià languissans & finissans, les tardifs commencent à leur succeder, la meslange des deux, pour la conformité donne plaisir & volupté à l'oreille, laquelle se nomme consonance & accord, dequoy l'air est l'instrument, ainsi comme il est facile à voir par ce que nous auons desia dit : car la voix est le battement de ce qui sent par les oreilles, battu de l'air, à cause que l'air estant battu par ce qui le remue, bat aussi le sentiment de l'ouye, s'il est vehement, aiguëment: s'il est mouffe, mollement. Or celuy qui est battu avec vehemence & roidement, c'est celuy qui arriue le premier à l'ouye, mais puis apres tournât au contraire & venât à trouuer le tardif & lent, il suit & accompagne le sentiment.

7 Comment est-ce que Timæus dit, que les c ames sont semees parmy la terre, parmy la lune, & parmy les autres instruments du temps ? Est-ce pource qu'il auoit opinion que la terre se remuoit aussi bien comme le Soleil & la Lune, & les autres cinq planettes, qu'il appelle instrumens du temps, à cause de leurs conuersions, & tenoit qu'il ne falloit pas imaginer ne fabriquer la terre, comme si elle fust ferme & immobile sur l'aixieu qui passe atrauers tout le monde, ains l'imaginer mouuante

& tournante alentour, comme depuis Aristarchus & Seleucus l'ont demonsté, l'un en le supposant seulement, & l'autre l'affirmant à certes, oultre ce que Theophrastus escrit que Platon sur sa vieillesse se repentit d'auoir donné à la terre le milieu du monde, place qui ne luy estoit pas conuenable ? ou bien (pource que cela est directement contraire à plusieurs sentences que ce personnage sans doubte a tenues) s'il fault changer l'escripture, & mettre le datif au lieu du genitif, & entendant par les instruments du temps, non les astres ny les estoilles, mais les corps des animaux, ainsi comme Aristote a desfiny l'ame estre l'acte continuel du corps naturel instrumental, en puissance aiant vie, tellement que la sentence de ce passage la soit, Les ames par le temps ont esté semées en des corps, se seruant d'instruments conuenables. Mais cela encore est contre son opinion, parce que non en vn lieu seulement, ains en plusieurs, il a appellé les estoilles, instruments du temps, veu qu'il afferme que le Soleil mesme a esté fait pour la distinction & garde du nombre des temps, avec les autres planettes. Le meilleur doncques est entendre que la terre soit instrument du temps, non pource qu'elle soit mouuante, comme les estoilles, mais pource qu'elle demourant tousiours ferme en soy, elle donne aux astres qui se meuent alentour d'elle, le leuer & le coucher, par lesquels sont limitez le iour & la nuict qui sont les premieres mesures des temps: & pourtant l'a il luy mesme appelée gardiène & ouuriere veritablemēt du iour & de la nuict. Qu'il soit ainsi
les ai-

A les aiguilles des Horologes ne se remuans pas avec les vmbres, ains demourants fermes, sont instrumens & mesures du temps, representās l'obstacle de la terre, qui est au deuant du Soleil se mouuant alentour d'elle, ainsi comme a dit Empedocles,

La terre fait la nuit en s'opposant

Aux clairs rayons du Soleil reluisant.

voila l'interpretation que lon y peult donner. Mais à l'aduéture pourroit on trouuer cela estrange & hors de raison, de dire que le Soleil, la Lune & les Planettes aient esté faicts pour distinguer le
B temps, car d'ailleurs la dignité du Soleil est grande, & Platon mesme en ses liures de la R. P. l'appelle le Roy & le maistre de tout ce monde sensible, comme le Bien est seigneur & maistre du monde intelligible, & est le Soleil extraict de luy, donnant aux choses visibles non seulement le paroistre, mais aussi le subsister & l'estre, ne plus ne moins que le Bien donne aux choses intelligibles, & l'estre, & qu'on les cognoisse. Or qu'un Dieu aiant telle & si grande puissance, soit un instrument du temps, & mesure euidente de la difference qu'il y a de
C vstesse ou de tardité entre les huit Sphères des cieux, cela ne leur semble pas fort conuenable ny autrement raisonnable. Il fault doncques dire que ceux qui se troublēt pour ces considerations la, se trompent par ignorāce, cuydans que le temps soit ainsi que l'a definy Aristote, la mesure du mouuement, & le nombre selon deuant & apres, ou bien la quantité en mouuemēt, ainsi que l'a definy Speusippus, ou bien distance de mouuement, & non

autre chose, ainsi que les Stoïques le descriuent en **D**
 definissant vn sien accident, & n'entendans pas sa
 substance, laquelle il semble que le Poëte Pindare
 n'ait pas mal soupçonnée, quand il dit,

Le temps, qui de son estre vieux

Surpasse tous les autres Dieux :

& Pythagoras aussi, lequel enquis que c'estoit que
 le temps, respôdit : C'est l'ame du ciel: car le temps
 n'est point vn accident ny vne passion d'aucun
 mouuement quel qu'il soit, ains est la cause, la puis-
 sance & le principe de la proportion & de l'ordre
 qui contient toutes choses, selon laquelle la nature **E**
 du monde & de l'vniuers, qui est animee, se meut:
 ou plus tost celle mesme proportion & ordre se
 mouuant, est ce qui s'appelle le temps,

Qui cheminant sans faire bruit,

A son poinct iustement conduit

Toute chose qui est mortelle.

C'est pourquoy Platon a dit que le temps estoit né
 quand & le ciel, mais que le mouuement estoit
 deuant le ciel, lors qu'il n'y auoit point de temps,
 pource qu'il n'y auoit ny ordre ny mesure quel-
 conque, ny distinction, ains vn mouuement inde- **F**
 terminé, comme vne matiere sans forme ne figure
 quelconque: mais depuis que la nature eut vne fois
 ietté en couleur & en terme, la matiere de formes
 & figures, & le mouuemēt de reuolutions, elle feit
 tout ensemble l'vne le monde, & l'autre le temps,
 qui sont tous deux images de Dieu, c'est à sçauoir
 de sa substance le monde, de son eternité le temps:
 car Dieu en ce qu'il se meut, est le temps: en ce
 qu'il

A qu'il est, est le monde. Voyla pourquoy il dit qu'estants venus en estre tous deux ensemble, tous deux aussi seront ils dissoluts ensemble, si iamaïs il y aduient dissolution : car ce qui est engendré ne peult estre sans temps, comme ne ce qui est intelligible sans eternité, si l'un a à demeurer tousiours, & l'autre à ne se dissouldre iamaïs, depuis qu'une fois il a esté composé. Ainsi doncques le temps aiant vne necessaire liaison & entre-lassement avec le ciel, n'est pas simplement vn mouuement, ains, comme nous auons dit,

B vn mouuement ordonné par ordre, qui a sa mesure, ses fins & ses bornes, & reuolutions, desquelles le Soleil estant le superintendant, le gouverneur & directeur pour les limiter & diriger, & pour monstrier & quoter les mutations, & saisons de l'annee, lesquelles produisent toutes choses, comme dit Heraclitus, il fault confesser qu'il aide au premier & prince des Dieux, en choses qui ne sont pas petites, ne friuoles ou legeres, ains tresgrandes, & de principale consequence.

S Platon en ses liures de la chose publique a tresbien comparé les trois puissances de l'ame, à sçauoir la raisonnable, la concupiscible & l'irascible, à l'accord & harmonie d'une octaue, aiant vne quinte au milieu, dont la haulte & aigüe note s'appelle Nete, la moienne, Mese, & la basse s'appelle Hypate. Or quant à la situation & disposition des parties du corps, où telles puissances de l'ame ont leurs sieges, la partie courageuse & irascible est assise au milieu : & la raisonnable, qui est le discours

de la raison, tient le lieu de l'hypate, pource que les **D** anciens appelloient ce qui est au dessus & le premier, Hypaton: suyuant quoy Xenocrates appelle Jupiter l'air, qui est tousiours vn, & tousiours de mesme sorte, Hypatos, & celuy qui est au dessous de la Lune, Neatos: & deuant luy Homere a appellé le Dieu souuerain, prince des princes, Hypaton Crionton, qui vault autant à dire, comme le suprême ou le souuerain des regnants, & à bon droit la nature a donné à la partie qui est la meilleure, la plus haulte place, aiant logé le discours de la raison, comme le gouverneur, dedans la teste, & **E** a reculé bié loing de là, aux plus basses & inferieures parties, la partie concupiscible: car la situation d'à bas s'appelle Neate, comme le donnēt à entendre les appellatiōs & noms des morts, que lon appelle Nerteros & Eneros: & pour ceste mesme raison y en a qui disent que le vent qui souffle de dessous la terre des lieux qui ne nous paroissent pas, s'appelle Notos. Cōme ainsi soit donc que la partie concupiscible à la raisonnable a la mesme contrariété qu'il y a du premier au dernier, & du hault au bas, il n'est possible que la raison soit la plus **F** haulte, & la premiere, & qu'elle ne soit point l'Hypate, ains que ce soit vne autre: car ceulx qui luy baillent, cōme à la principale puissance, celle de la moienne, ils ne se prennent pas garde qu'ils luy ostēt celle qui est encore plus principale, c'est celle de l'Hypate, laquelle ne peult cōuenir ny à l'ire ny à la cupidité: car l'vne & l'autre est nee & faite pour suiure & estre commandee, & non pas pour
 comman-

A commander ny pour preceder la raison. D'auantage encore sembleroit il que plus tost l'ire deuroit auoir la place du milieu par nature, attendu que naturellement le commander conuient à la raison, & à l'ire le commander & estre cōmandé, estant subiecte d'un costé, au discours de la raison, & cōmandant de l'autre à la cupidité, & la punissant quand elle est desobeissante à la raison. Et comme entre les lettres, celles que lon appelle demy-voyelles sont moyennes entre les muettes & les voyelles, d'autant qu'elles ont plus de son que celles la, & B moins que celles cy: aussi en l'ame de l'homme l'ire n'est pas simplement passionnee, ains y a bien souuent vne apparéce du deuoir meslee avec l'appetit de vengeance. Et Platon luy mesme cōparant toute la substâce de l'ame à vn attelage de deux cheuaux cōduits par vn chartier qui les mène, il entend par le chartier, cōme il est tout notoire à vn chascun, le discours de la raison, & des deux cheuaux, celuy des cupiditez & voluptez est rebours, farouche, & indomtable du tout, ains les oreilles velues, à peine obeissant au fouet, ny à l'esperon, là où celuy de C l'ire pour la plus part est obeissant à la bride de la raison, & luy seruant. Cōme doncques en vn attelage de deux cheuaux, le chartier n'est pas en vertu & puissâce le milieu, mais l'un des cheuaux qui est pire que le chartier, & meilleur que son cōpagnon, avec leq̃l il est attelé, aussi n'a il pas attribué la place du milieu à la partie qui domine en l'ame, mais à celle où il y a moins de raisō, & plus de passiō qu'en la premiere, & plus de raisō & moins de passiō qu'en

la troisieme: car cest ordre & disposition obseruee D
la proportion qui est entre les accords de la partie
irascible à la raisonnable, comme à la haulte note,
vne quarte d'interualle, & à la concupiscible, com-
me à la note basse, vne quinte, & de la raisonna-
ble à la concupiscible, qui est comme de la note
basse à la haulte, vne octaue: là où si nous tirons
la raison au milieu, l'ire sera la plus esloignee de la
cupidité, laquelle neantmoins aucuns des philoso-
phes ont tenu estre vne & mesme chose, pour la si-
militude grande qu'il y a entre elles. Ou bien c'est
vne mocquerie que d'attribuer aux lieux, le pre- E
mier, le milieu, & le dernier, veu que nous voions
qu'en la lyre la note hypate tient le premier & le
plus hault lieu, & es flustes elle tient le plus bas &
le dernier: d'auantage la moienne en quelque en-
droit de la lyre qu'on l'accommode, on voit qu'el-
le sonne tousiours vn mesme son, plus aigu que
l'Hypate, & plus bas que la Nete: car l'œil mesme
n'a pas en tout animal mesme situation, mais en
tout animal, & en quelque lieu qu'il soit posé se-
lon nature, il est tousiours fait & ordonné pour
voir. Comme doncques le pēdagogue qui va der- F
riere & non pas deuāt ses enfans, les meine neant-
moins, ainsi que lon parle, & le Capitaine des Tro-
iens en Homere,

Qui paroissoit or' entre les premiers,

En commandant, or' entre les derniers.

& en l'vne & en l'autre part toutesfois il estoit
tousiours le premier, & auoit la premiere puissan-
ce: aussi ne fault il pas forcer & attacher par force

aux

A aux lieux les parties de l'ame, ny aux noms, ains fault en chercher la puissance & la proportion: car que le discours de la raison soit situé au corps de l'hôme, en premier lieu de situation, c'est par accidēt, mais il a la premiere & principale puissance, comme la moienne enuers la partie concupiscible, qui est la Note Hypate, & enuers l'irascible, cōme la Nete, en laschant ou tédant & faisant consonāce & accord, en ostant de l'vn & de l'autre ce qu'il y a de trop, & aussi à l'opposite, en ne les laissant pas aller du tout, ny s'endormir: car la moderation

B & cōmensuration se limite & definit par mediocrité, ou plustost pour mieux dire, c'est le chef d'œuvre de la puissance de la raison, de faire & imprimer és passions les mediocritez & moiēnetez, s'il fault ainsi parler, que lon appelle sainctes & sacrees, lesquelles consistent en vne temperature des deux extremittez avec la raison, & entre elles mesmes par le moié de la raison: car l'attelage de deux cheuaux n'a pas pour son moien en son milieu celui des deux qui est le meilleur, ny ne faut pas penser que le gouuernement du chartier en soit vne

C extremité, ains plustost faut estimer que c'est le milieu & la mediocrité entre la demesuree celerité & tardité des deux cheuaux, ne plus ne moins que la force de la raison qui retient les passions, quand elles s'esmeuent hors de mesure & de raison, & les accommodant alentour d'elle en mesure proportion, constitue vne mediocrité & vn moien entre le plus & le moins, & entre le peu & le trop.

9 Pourquoi est-ce que Platon dit, que l'orai-

son est temperee de noms & de verbes : car il semble que toutes les autres parties du parler sans ces deux la, ne soient du tout rien : & dit on qu'Homere par vne galaterie de ieunesse, s'estudia à les mettre toutes ensemble en ce vers,

Αὐτὸς ἰδὼν κλισίῳ δὲ τὸ σὸν γέρας ὅρρ' εὖ εἶδ' ἤς.

car il y a vn pronom, & vn participe, & vn nom, & vn verbe, & vne preposition, & vn article, & vne conionction, & vn aduerbe, pour ce que ceste particule *δε* est mise au lieu de la preposition *εις*, de sorte que ceste façon de dire *κλισίῳ δε* est telle, comme *ἀθιώας*. Que fault il doncques respondre pour Platon? Est-ce point pour ce que premierement on appelloit Logos, c'est à dire oraison, ce que les anciens appelloient proposition, & maintenant on appelle *ἀξιωμα* dignité : ce sont les paroles que premierement proferants les hommes, mentent ou disent verité, ce qui est composé de nom & de verbe, dont les Dialecticiens appellent l'un le cas, & l'autre le predicament : car quand nous oyons dire, Socrates enseigne, ou Socrates se tourne, nous disons que l'un est vray, & l'autre est faulx, sans en attendre rien d'auantage : car il est vray-semblable que les hommes du commencement eurent besoing de langage & de voix articulée, pour s'entredonner à entendre les vns aux autres les actions & ceulx qui les auoient faittes, & les passions & ceulx qui les auoient souffertes : pourautant donc que par le verbe nous exprimons suffisamment les actions & passions, & par les noms ceulx qui les font ou les souffrent, ainsi comme luy mesme a dit, il semble

Able que ce sont ces deux parties la d'oraison, qui les signifient : les autres, on pourroit dire qu'ils ne les signifient pas, non plus que font les gémissements & lamentations des ioueurs de Tragedie, voire vn ris, vn silence & vne retenue donnent bien quelquefois plus grande expression à la parole, mais toutefois ils n'expriment pas necessairement & principalement, comme font le nom & le verbe, ains par maniere d'accessoire, pour diuersifier vn peu le langage, côme lon diuersifie aussi les lettres, en y adioustant des esprits, aux vnes aspres, **B** aux autres doux, & en faisant les vnes longues, les autres briefues, qui sont plustost passions & accidens, & diuersitez d'elements, que elements distinguez & par soy differents, comme il appert manifestement, par ce que les anciens escriuoient suffisamment avec seize lettres. Mais d'auantage adiuons que nous ne prenions autrement les paroles de Platon, que comme il les a dittes, car il a dit que l'oraison estoit temperce de ces deux parties, non par ces deux parties, que nous ne facions la faulte que feroit celuy qui calomnieroit vn autre, pour **C** auoir dit que vn oignemēt seroit composé de cire & de galbanum, alleguāt qu'il auroit obmis à dire le feu & le vase, sans lesquels on ne sçauroit mesler lesdites drogues: aussi semblablement si nous le reprenions, pour autant qu'il auroit obmis à dire les conionctions, les prepositions, & autres telles parties: car le parler & l'oraison n'est pas composé de ces parties la, mais par icelles, & non sans elles: car comme celuy qui prononceroit battre ou estre

battu, ou d'ailleurs, Socrates & Pythagoras, encore D
donneroit il aucunement à entendre & à penser
quelque chose, mais celuy qui profereroit, car, ou
de, simplement & seulement, on ne pourroit ima-
giner qu'il entédist aucune chose ny aucun corps,
ains fil n'y a quelques autres paroles qui soiét pro-
ferées quant & quant, elles ressembleront à des
sons & des bruits, vains sans aucune signification,
d'autant que ny à par elles ny avec d'autres sem-
blables, elles ne peuuēt rien signifier, mais à fin que
nous conioignons, ou meslions, & assemblions
tout en vn, nous y adioustons des prepositions, E
conionctions, & articles, voulans en faire vn corps
de tout, autrement il semblera que nous bruions,
non pas que nous parlions, mais aussi tost que vn
verbe est ioinct à vn nom, ce qui en resulte est in-
continent vn parler & vne oraison. Voila pour-
quoy aucuns non sans quelque raison estimēt, que
ces deux soient propremēt les seules parties d'orai-
son, & c'est à l'aduēture ce que veult Homere don-
ner à entendre, quand il dit en plusieurs passages,

Ainsi parla, & en ce poinct nomma.

car il a accoustumé d'appeller le verbe Epos, com- F
me en ces vers,

Ce mot, ô femme, au vif le cœur me touche:
Et en cest autre,

A Dieu vous dis Seigneur mon hoste & pere,
Si quelque mot de ma langue legere
Possible yssu vous a fascheux esté,

Qu'il soit au vent ie vous prie ietté:

car ce n'est ny vne conionction, ny vne preposi-
tion,

A tion, ny vn article qui touche au cœur, ne qui soit
fâcheux à ouïr, ains vn verbe signifiant quelque
action honteuse, procedente d'aucune deshoneste
passion. Voila pourquoy nous auons accoustumé
de ainsi louer les poëtes & historiens, ou bien les
blasmer en disant, Celuy la vſe de noms Attiques
& de beaux verbes, ou au contraire de bas, ou il
fault dire que iamais Euripides & Thucydides ne
deuiserent en termes beaux & Attiques. Cômment
donc, pourra dire quelqu'un, ces parties la ne ser-
uent elles de rien à l'oraison? quant à moy ie tiens
B qu'elles y seruent autant comme le sel à la viande,
& l'eau à faire le pain. Euenus souloit dire que le
feu estoit la meilleure saulſe du monde, aussi sont
ces parties l'affaisonnement de nostre langage, ne
plus ne moins que le feu & le sel des breuuages &
viandes, dont nous ne nous ſçaurions passer, ex-
cepté que nostre parler n'en a pas tousiours neces-
sairement affaire, comme lon peut dire du langage
des Romains, duquel au iourd'huy tout le monde
presque vſe: car il a osté presque toutes les prepo-
sitions, excepté bien peu, & quant aux articles que
C lon appelle il n'en reçoit pas vn tout seul, ains vſe
de noms sans bordure, par maniere de dire, & ne
s'en faut pas esmerueiller, attendu qu'Homere,
qui en beauté de carmes surpasse tout le mon-
de, à peu de noms prepose des articles, comme si
c'estoient anses à des vases qui en euſſent beſoing,
ou des pennaches sur des morions, à raison de-
quoy les carmes où il le fait en sont remarquez,
comme est cestui-cy,

Αἶαντι δὲ πάντα δαΐφρονι θυμὸν ὄρειν,
τῷ Τελαμωνιάδῃ.

Sur tous d'Aïax le fils de Telamon
Fut le courage esmeu de ce sermon:

& cestui-cy,

πείνῃ ὄρεα τὸ κῆτος ὑπὲρ περφυγὼν ἀλέειτο.

Il le faisoit à fin que par la fuitte,

Du marin monstre il eschappast la fuitte:

Et y en a eu peu d'autres avec ceux la : mais en autres, qui sont innumerables, n'y aiât point d'article la phrase n'en est en rié diminuee, ny de beauté, ny de facilité & clarté, & toutefois il n'y a ny beste, ny instrument, ny armeure, ny autre chose quelle qu'elle soit au monde, qui par ablation ou priuation d'une siene propre partie, soit plus belle, plus active, ne plus douce que paravant elle n'estoit, là où l'oraison bien souuent, en estans les conionctions toutes ostees, a vne force & efficace plus affectueuse, plus active, & plus esmouuante, comme est ceste-cy:

Aiant vn vif, vn autre frais blecé,

Vn autre entier, vn autre trespasé,

En combattant par les pieds elle tire.

Et ce passage icy de l'oraison de Demosthenes

» contre Midias : Car celuy qui bat autruy peut faire
» beaucoup de choses, dont celuy qui les a souffertes
» n'en sçauroit aucunes exprimer & donner à entendre
» à vn autre, en son port, en son regard, en sa voix :
» quand c'est de brauerie, quand estant ennemy,
» quand c'est du poing, quand c'est sur la iouë : cela esmeut,
» cela transporte hors de soy les hom-

A hommes qui n'ont point accoustumé d'endurer
» outrage. Et en vn autre lieu apres, Mais non pas
» Midias, ains depuis ce iour la il harengue, il iniu-
» rie, il crye, il est esleu, Midias Anagyrrasien est
» nommé : il loge Plutarque en son logis, il sçait les
» secrets, la ville n'est pas assez grande pour luy.

C'est pourquoy ceux qui escriuent des figures de
Retorique louënt & prisent grandement celle
qu'ils appellent desliee, là où ceux cy qui sont trop
religieux & qui s'assubiettissent trop aux regles de
la Grammaire, sans ozer oster vne seule conion-
B ction de la commune façon de parler, en sont à
bon droit blasmez & repris, comme faisans vn stile
enerué, sans aucune pointe d'affection, & qui lais-
se & donne peine à ouir, pour estre tousiours d'v-
ne pareure semblable, sans iamais diuersifier. Or
que les Dialecticiens aient plus besoing de con-
ionctions, que nuls autres hommes de lettres, pour
la liaison & tiffure de leurs propositions, ou les
disionctions d'icelles, ne plus ne moins que les co-
chers ont besoing d'attelages pour atteler de front
leurs chevaux, ou comme Vlysses auoit besoing
C d'ozier, en la cauerne du Cyclops pour lier ses
moutons, cela n'argüe ny ne preuue pas, que la
conionction soit autrement partie d'oraison, mais
bien vn outil propre à conioindre, selon qu'elle en
porte nom, & à contenir & assembler non pas
toutes choses, ains seulement celles qui ne sont
pas simplement dites: si lon ne vouloit dire que la
chorde ou courroye dont vne balle seroit liee, fust
partie de la balle, ou la colle d'un papier, ou d'un

liure qui est collé, & les donnees & distributions ^D des deniers, partie du gouuernement: comme Demades disoit, que les deniers que lon distribuoit manuellement par teste à chasque citoyen d'Athenes, pour veoir les ieux, estoient la colle du gouuernement de l'estat populaire. Et quelle est la cōionction, qui face de plusieurs propositions vne, en les coufant & liant ensemble, comme le marbre fait le fer, quand on le fond avec luy par le feu, mais pour cela le marbre n'est pas pourtant, ny ne l'appelle lon pas partie du fer, combien que ces choses la qui entrent en vne composition, & qui ^E sont fondues avec les drogues que lon mesle, ont accoustumé de faire & de souffrir ne sçay quoy de commun, composé de tous les ingrediens: mais des conionctions, il y en a qui nient qu'elles facent vn ce qu'elles conioignent, ains tiennent que ceste façon de parler soit comme vne enumeration, comme qui compteroit de reng tous noz magistrats, ou les iours du mois. Et puis des autres parties d'oraison, il est tout manifeste que le Pronom est vne sorte de nom, non seulement en ce qu'il se decline par cas, comme fait le nom, mais aussi en ce qu'il fait vne tres-propre designation de ce que lon pense avec la nature, & que lon met dehors en choses terminees, & m'est aduis que qui dit, Socrates, ne montre point plus expressément la personne, que qui dit, cestuy-cy. Et celle que lon appelle participe est vne mixtion du verbe & du nom, & non point vne partie qui subsiste à par elle, non plus que les noms communs qui conuiennent aux masses

A masles & aux femelles, & se rengent ces participes à tous les deux, touchant aux noms par les cas, & aux verbes par les temps, & les appellent les Dialecticiens des reflexions, comme le prouoyant qui est reflexion du prudent, le temperant reflexion du temperé, comme aians la force & puissance de noms & d'appellations. Quant aux prepositions on les peut accompagner aux pennaches ou autres ornemens que lon met dessus les habillemens de testes, ou bien aux bases & soubbassement que lon met au dessoubs des statues, pour ce

B qu'elles ne sont pas tant parties d'oraison, comme alentour des parties, & prenez garde que ce ne soient comme des tronçons & des pieces de noms, comme ceux qui escriuent à la haste ne formét pas les lettres toutes entieres, ains font seulement des points & des tirets: car ces deux mots *εἰσέναι* & *ἐκέναι*, dont l'un signifie entrer, & l'autre sortir, sont deux manifestes syncopes & racourcissement de *εἰς τὸς εἶναι*, & de *ἐκ τὸς εἶναι*: & *περὶ μέντοι*, estre deuant, est vn racourcissement & abbreuiation de *περὶ τὸν μέντοι*: & *καθίζειν*, seoir, de *κατὰ τὸ ἵκειν*


C ne plus ne moins que *λίθοις βάλλειν* & *πύργοις ὀρύσσειν*, de *λίθοις βάλλειν*, ietter pierres, & *πύργοις ὀρύσσειν*. En se hastant de parler, on a ainsi serré & estraint ensemble ces dictions: & pourtant peut on bien dire, que chascune de ces dictions la apporte quelque aide & commodité au parler, & à l'oraison, mais pour cela elles ne peuuent estre dittes parties ny elemens de l'oraison: & n'y a que le nom & le verbe qui font celle premiere composition, con-

tenant la verité, ou la mensonge, que les vns appellent proposition, les autres dignité, & Platon a appellee oraison.

DE LA CREATION DE
L'AME, QUE PLATON DES-
CRIT EN SON LI-
ure du Timéus.

Le Pere à ses Enfans, Autobulus, & Plutarchus, s.

2



V i s qu'ainsi est que vous estes d'aduis, que ie doy recueillir ce que i'ay dit & escrit par cy par là en plusieurs lieux, touchât ce que ie pense que Platon a tenu, senty & entendu de l'ame, & que ie le doy declarer plus au long en vn traitté expres à parr, d'autant que ce n'est pas vne matiere qui autrement soit facile à manier, & que ce que i'en pense est contraire à l'opinion de plusieurs philosophes Platoniques mesmes, & pour ceste cause a besoing d'estre bien addoulcie & appuyee: Je mettray en auant premierement le texte de Platon mesme en propres termes, ainsi qu'il est en son liure du Timéus. De
» la substance indiuisible qui tousiours est, & tous-
» iours d'une mesme sorte, & de celle qui est diuisi-
» ble en plusieurs corps, il en composa vne tierce
espece

A espece de substance au milieu de ces deux, tenant
 » d'un costé de la nature du Mesme, & de l'autre co-
 » sté de l'Autre, & la posa au milieu entre l'indiuifi-
 » ble & la diuisible, par les corps, puis prenant ces
 » trois natures ensemble les mesla toutes en vne for-
 » me, en accõmodant par force la nature de l'Autre
 » fort mal-aisée à mesler avec celle du Mesme. Les
 » aiant meslees avec la substance, & des trois en aiant
 » fait vn suppost, derechef il le diuisa en portions tel-
 » les, comme il estoit conuenable. Chascune d'icelles
 » estât meslée du Mesme, & de l'Autre, & de la Sub-
 B stance: & commença sa diuision en ceste maniere.

Or premierement de vouloir declarer combien
 ces paroles ont apporté de disputes & de conten-
 tions à ceux qui les ont voulu exposer, ce me fe-
 roit maintenant vn labeur infiny, & autrement
 superflu, quant à vous, attendu que vous en auez
 veu & leu la plus part comme moy: mais pour au-
 tant que Xenocrates en a tiré plusieurs & des plus
 notables à son opinion, en définissant que la sub-
 stance de l'Amé estoit vn nombre se mouuant soy
 mesme, & que les autres se sont rengez à l'opinion
 c de Crantor de Soles, qui disoit que l'ame estoit
 meslée de la nature intellectuelle, & de la sensuelle
 subiecte à l'opinion: ie pense que ces deux sen-
 tences la bien desployees, nous donneront vne
 grande entree en l'intelligéce de ce que nous cher-
 chons, & certes il n'est pas besoing de beaucoup de
 paroles pour les expliquer toutes deux: car il y en
 a qui cuidoient qu'il n'entende autre chose que la
 generation du nombre par la meslange de l'indi-

uisible avec le diuisible, par ce que l'vnité est indi-
uisible, & la pluralité diuisible, & de ces deux est
engendré & produict le nombre, l'vnité termi-
nant la pluralité, & mettant fin à l'infy, qui est le
deux indeterminé. C'est pourquoy Zaratas le mai-
stre de Pythagoras appelloit le Deux la Mere, &
l'Vn le Pere des nombres, & pour ceste cause que
les meilleurs nombres estoient ceux qui ressem-
bloient à l'vnité, mais que ce nombre la pourtant
n'est pas encore l'ame, d'autant que le mouuant &
le mobile luy defaillent, mais quand le Mesme &
l'Autre furent meslez ensemble, dont l'un est le
principe de mouuement & de mutation, & l'au-
tre d'arrest & de station, l'ame alors vint en estre,
laquelle est aussi bien principe d'arrester & d'estre
arresté, comme de mouuoir & d'estre meu. Mais
Crantor estimant que le propre de l'ame estoit iu-
ger les choses intelligibles, & les sensibles, & les si-
militudes & dissimilitudes qu'elles ont, tant en
elles mesmes que les vnes enuers les autres, dit que
l'ame est composee de tout, à fin qu'elle puisse iu-
ger de tout, lequel tout consiste en quatre princi-
paux genres: le premier est la nature intelligible, F
qui est tousiours vne, & tousiours de mesme sorte:
le second est la nature passible & muable, concer-
nant les corps: le troisiéme la nature du Mesme: &
le quatriéme la nature de l'Autre, pour ce que les
deux premiers participent aucunemét & du Mes-
me, & de l'Autre. Et tous ceux la egalemét tiennent
que l'ame n'est point depuis certain temps n'y n'a
point esté engendree, mais qu'elle a plusieurs puis-
sances

A sances & facultez, esquelles Platon deliant & res-
 soluant sa substance, par maniere de dispute & de
 speculation, suppose de paroles seulement qu'elle
 ait esté engendree, meslee, & contemperee: di-
 sent d'auantage qu'autant en sentoient il du monde,
 pour ce qu'il sçauoit tres-bien qu'il estoit eternal
 & non engédré, mais que voiant qu'il n'estoit pas
 facile de cōprendre comment il est composé, ne
 comment il s'administre & gouuerne à ceux qui
 dès le commencement ne supposent point de ge-
 neration, ny des parties qui concourent à sa nais-
 sance, il auoit pris le chemin d'en parler ainsi. Voi-
 la en somme ce que ceux la en disent, & est bien
 d'auis Eudorus, qu'il y a de l'apparence au dire des
 vns & des autres, mais quant à moy il m'est aduis
 que ny l'un ny l'autre n'a touché au point de la
 vraye intelligence de Platon, si nous voulons vser
 de la reigle de verisimilitude, non pour bastir noz
 propres opinions, mais pour dire quelque chose
 qui s'accorde plus probablement à luy: car la mes-
 lange qu'ils disent de la substāce intelligible, & de
 la sensible, ne donne point à entendre, que ce soit
 la generation de l'ame, plustost que de quelque au-
 tre chose que lon pourroit dire: car ce monde mes-
 me & chascune des parties d'iceluy, est composé
 de substance intelligible, ou spirituelle, & sensible,
 & corporelle, dont l'une a fourny de matiere, &
 l'autre de forme & espece, au suppost composé: &
 la partie de la matiere qui vient à estre formee par
 participation, ou ressemblance de l'intelligible, de-
 uient incontinent palpable & visible, là où l'ame

ne se peut percevoir par aucun des sens naturels, D
& ne se trouuera pas que iamais Platon ait ap-
pellé l'ame nombre, mais bien tousiours, mouue-
ment se mouuant soy mesme, & la source & prin-
cipe de mouuement, bien est vray qu'il a embel-
ly & orné la substance d'icelle, de nombre, de
proportion, d'accord & harmonie qu'il a mis en
icelle, comme en subiect qui estoit capable & su-
sceptible de la plus belle espece qui scauroit estre,
s'y imprimant par ces qualitez la: quant à moy ie
ne pense pas que ce soit tout vn, de dire que l'a-
me soit composee par nombre, & que sa substan- E
ce soit nombre: car elle est bien composee par har-
monie, mais ce n'est pas à dire qu'elle soit pour-
tant harmonie, ainsi comme luy mesme l'a de-
monstré en son traitté de l'Ame, & outre ils ont
manifestement ignoré ce qu'a voulu dire Platon,
par le Mesme & l'Autre, car ils disent que le Mes-
me apporte à la generation de l'Ame la faculté
d'arrest & de station, & l'Autre la faculté du mou-
uement, là où Platon luy mesme en son liure, in-
titulé le Sophiste, met Ce qui est, le Mesme, l'Au-
tre, le Mouuement, & la Station, comme cinq
choses differentes l'une de l'autre, & les distingue F
à part, comme n'aians rien de commun ensen-
ble. Ce que toutefois ceux-cy d'un accord, & plu-
sieurs de ceux mesmes qui ont vescu avec Pla-
ton, redoubtans, & en estans fort faschez, ima-
ginent tout ce qu'ils peuuent, le detordent & tirét
par les cheueux, ainsi que lon dit, comme si c'estoit
quelque chose abominable, & qui ne se deult
point

A point dire, cuidans qu'il le faille, ou du tout nier pour son honneur, ou le couvrir & cacher, qu'il ait parlé de la generation ou creation de l'ame, & du monde, comme fils n'auoient pas esté de toute éternité, & que de temps infiny ils n'eussent pas leur essence, dequoy nous auons ailleurs particulièrement parlé, & pour maintenant il suffira de dire en passant, que la dispute & la contestation, de laquelle Platon luy mesme confesse qu'il a vsé, avec plus de vehemence que son aage ne portoit, alencontre des Atheistes, ils la confondent, ou

E pour mieux dire, ils l'abolissent du tout: car fil est ainsi que le monde soit éternel sans auoir eu generation, la raison de Platon s'en va à vau l'eau, que l'ame soit plus ancienne que le corps, principe & cause premiere de tout mouuement & de toute mutation, estant logee au dedās: mais que c'est que l'ame, que c'est que le corps, & comme il faut entendre qu'elle soit precedente, & plus ancienne que luy, le progres de nostre discours cy apres le declarera, pource que cela ignoré ou mal entendu, apporte grande difficulté, à mon aduis, de bien

C comprendre, & empeschement de croire la vraye opinion. Parquoy i'exposeray premierement ce que i'en pense, prouuant & fortifiant la verité de mon dire, qui de premiere rencontre semblera vn peu estrange par argumens vray-semblables, autant qu'il sera possible, & puis ie l'accommoderay aux paroles du texte, car la chose selon mon opinion est telle. Heraclitus dit, qu'il n'y a eu ny Dieu ny hōme qui ait fait ce monde, comme crai-

gnant que si nous desaduouions Dieu pour Crea-^Dteur, il ne fust incontinent necessaire de confesser que l'homme en eust esté l'architecte & l'ouurier: mais il vaut beaucoup mieux, suiuant la sentéce & aduis de Platon, que nous aduouions, voire chan-
tions, qu'il a esté fait & créé de Dieu, comme estât l'vn le plus grand chef d'œuvre qui iamais ait esté fait, & l'autre le plus excellent ouurier & la meilleure cause qui puisse estre, mais la substance & la matiere d'ot il a esté fait, n'a pas esté créée, ains a de tout temps esté subiecte à l'ouurier pour la dispo-
ser & ordonner, & la rédre le plus qu'il seroit pos-^Esible semblable à soy, car generation ne se peut faire de ce qui n'est point: mais de ce qui n'est pas bien, ou ainsi qu'il appartient, comme vne maison ou vn habillement, on en peut bien faire quelque chose de bon. Or auant la creation du monde l'vniuers estoit vn chaos, c'est à dire vn desordre confus, lequel toutefois n'estoit pas sans corps ny sans mouuement & sans ame, mais ce qu'il y auoit de corps estoit sans forme & sans consistance, & ce qu'il y auoit d'ame mouuâte estoit temeraire, sans entendement ny raison, ce qui n'estoit autre chose^F qu'vn desordre d'ame non regie par aucun iugement de raison. Car Dieu n'a point fait corps, ce qui estoit incorporel, ny ame ce qui estoit inanimé, cōme le Mulicien ne fait pas la voix, ny le baladin le mouuement, mais il rend bien la voix douce, accordante & harmonieuse, & le mouuement mesuré de bonne grace & bien compassé: aussi Dieu n'a pas fait la solidité palpable du corps, ny la puis-
sance

A l'ance mouuante & imaginative de l'ame: mais aiant trouué ces deux principes la, l'un tenebreux & obscur, l'autre insensé & turbulent, tous deux imparfaits, desordonnez & indeterminéz, il les a ordonnez & disposez tous deux, en sorte qu'il en a composé le plus beau & le plus parfait animal de tous. La substance du corps doncques, qui est la nature qu'il appelle susceptible de toutes choses, le siege & la nourrice de tout ce qui est engendré, n'est autre chose que cela. Quant à la substance de l'ame, il l'appelle au liure intitulé Philebus, infinie, qui est priuation de tout nombre, de toute mesure & de toute proportion, qui n'a en soy ne fin ne terme, ne plus ne moins, ne peu ne trop, ne similitude ne dissimilitude. Et celle qu'il dit au Timæus estre meslée avec l'indiuisible nature, & deuenir diuisible par les corps, il ne faut pas entêdre que ce soit ny multitude en vnité, ny longueur & largeur en points: car ce sont qualitez qui conuiennent plustost au corps, que non pas à l'ame, ains ce principe la desordonné, indefiny, se mouuant soy-mesme & aiant vertu mouuante, lequel il appelle

C en plusieurs lieux nécessité, en ses liures des Loix il l'appelle tout ouuertement, ame desordonnée, mauuaise & mal faisante. C'est l'ame simplement ditte à par soy, laquelle depuis a esté faite participante d'entendement, & de discours de raison & de sage proportion, à fin qu'elle deuint ame du monde. Et aussi ce principe la materiel qui reçoit tout, auoit bien magnitude, distance & place, mais de beauté de forme & figure proportionnée, & de

mesure, il n'en auoit point, mais il en eut quand il fut accoustré, à fin qu'il deuint corps de la terre, de la mer, des estoiles, & du ciel, des plantes, & des animaux de toutes sortes. Or ceux qui attribuent à la matiere, ce qu'il appelle au Timeus, Necessité, & au traitté de Philebus, infinité & immensité de plus & de moins, de peu & de trop, d'exces & de defaut, & non pas à l'ame: ils ne pourront pas maintenir qu'elle soit cause du mal, d'autant qu'il suppose tousiours que ceste matiere la soit sans forme ne figure quelconque, destituee de toute qualité & faculté propre à elle, la comparant aux huiles qui n'ont odeur quelconque siene, dont les perfumiers se seruent à faire leurs parfums: car il n'est pas possible que Platon suppose, que ce qui est de soy oyseux, sans qualité active, ny mouvement ou inclination à chose aucune, soit la cause & le principe de mal, ne qu'il la nôme infinité mauuaise & mal faisante, ny aussi la necessité qui en plusieurs choses repugne à Dieu, luy estant rebelle, & refusant de luy obeïr. Car celle necessité qui renuerse le ciel, comme il dit en son Politique, & le retourne tout au contraire: la concupiscence qui est nee avec nous, & la confusion de l'ancienne nature, où il n'y auoit ordre quelconque, auant qu'elle fust rengee en la belle disposition du monde qui est maintenant, d'où est-ce qu'elle est venue és choses, si le subiect qui est la matiere, estoit sans qualité quelconque, exempt de toute efficace de cause? Et l'ouurier estant de sa nature tout bon, desiroit autant qu'il est possible rendre toutes choses

A les semblables à soy: car il n'y a point de tiers, outre ces deux principes là, & si nous voulons introduire le mal en ce monde, sans cause precedente & sans principe qui l'ait engendré, nous tomberons és difficultez & perplexitez des Stoïques: car des principes qui sont en estre, il n'est pas possible que celuy qui est bon, ne celuy qui est sans force ne qualité quelconque, ait donné estre ny generation à ce qui est mauuais. Et n'a point fait Platon, cōme ceux qui sont venus depuis luy, lesquels à faute d'auoir veu & entendu le troisième principe, & troisième cause, qui est entre Dieu & la matiere, se sont laissez aller, & tomber en vn propos le plus estrāge, & le plus faux du monde, faisant ie ne sçay cōment venir de dehors casuellement la nature du mal par accident, ou bien de luy mesme, là où ils ne veulent pas cōceder à Epicurus qu'un seul Atome gauchisse, ny destourne tant peu que ce soit, pource qu'ils disent qu'il introduit temerairement vn mouuement, sans en supposer aucune cause precedente, & eux ce pendant disent que le vice, la meschanceté, & mille autres deformitez & imperfections des corps, aduiennent par consequence, sans qu'il y ait autre cause efficiente. Mais Platon ne dit pas cela, ains despouillant la matiere de toute qualité, & mettant bien au loing arriere de Dieu toute cause de mal, a ainsi escript touchant le

„ monde, en ses Politiques: Le monde a eu, dit-il,
 „ toutes choses bonnes de son autheur qui l'a com-
 „ posé, mais de son habitude exterieure du parauāt,
 „ tout ce qu'il y a de mauuais, de meschant & d'in-

„ iuste au ciel, il le tient de là, & puis il l'imprime
 „ puis apres ça bas aux animaux. Et apres, vn petit
 „ plus auant : Par traict de temps, dit-il, oubliance
 „ prenant pied, & s'imprimant en luy la passion de
 „ son ancien desordre & cōfution, y domine de plus
 „ en plus, & y a danger que venant à se dissouldre il
 „ ne s'en retourne de rechef plonger en sa fondriere
 „ vaste & infinie de diuersité. Or est il que dissimili-
 tude ne peut estre en la matiere, à cause qu'elle est
 sans qualité & sans nulle difference : ce que Eude-
 mus entre autres aiāt ignoré, se mocque de Platon,
 comme ne mettant pas pour cause, source & origi-
 ne premiere des maux, celle qu'il appelle en plu-
 sieurs lieux, mere & nourrice. Car Platon appelle
 bien voirement la matiere mere & nourrice, mais
 aussi, dit-il, que la cause du mal est la puissance mo-
 tiue resseante en icelle, & qui par les corps est diui-
 sible, qui est vn mouuement desraisonnable & des-
 ordōné, mais non pas toutefois sans ame, laquelle
 il appelle disertement & expressément és liures de
 ses Loix, ame contraire & repugnāte à celle qui est
 cause de tout bien, par ce que l'ame est bien la cau-
 se & le principe de mouuemēt, mais l'entendemēt
 est la cause & le principe de l'ordre & de l'harmo-
 nie du mouuement : car Dieu n'a point rendu la
 matiere oyseuse, mais il a empesché qu'elle ne fust
 plus agitee ny troublee d'une cause folle & teme-
 raire, & n'a pas donné à la nature les principes de
 mutatiōs & de passions, mais elle estāt enueloppee
 de toutes sortes de passions & de mutations desor-
 dōnees, il en a osté tout le desordre & tout l'erreur
 qui

A qui y estoit, se seruāt pour outils propres à ce faire des nombres, des mesures & des proportions, dont l'effect est d'apporter aux choses, non par mouuement & mutation, les passions & differences de l'autre & de la diuersité, ains plustost de les rendre infallibles, fermes & stables, semblables à celles qui sont tousiours d'une sorte, & tousiours se ressemblent à elles mesmes. Voyla selon mon iugement quelle est la sentence & intelligēce de Platon: dont la premiere preuue est, que par ceste interpretation se soult & sauue la contrarieté que lon dit, & qui

B semble estre en ses escripts: car on n'attribueroit pas à vn yurongne de Sophiste, tant s'en fault qu'à Platon, vne telle inconstance & repugnance de propos, qu'il affermast vne mesme nature estre créée & non créée, c'est à sçauoir en son liure de Phædrus, que l'ame soit eternelle & non créée, & en celuy de Timæus qu'elle ait esté créée & engendree. Or les paroles qui sont en son traitté de Phædrus, sont presque en la bouche de tout le monde, par lesquelles il prouue que l'ame n'est point perissable, d'autant qu'elle n'a point esté en-

C gendree, & monstre semblablement qu'elle n'a point esté engendree, d'autant qu'elle se meut soy

» mesme: & au liure de Timæus il dit, Dieu n'a pas
 » fabriqué l'ame plus ieune que le corps, combien
 » que nous disions maintenāt qu'elle est posterieu-
 » re, car il n'eust iamais fait ny souffert que le plus
 » ancien lié & attaché avec le plus ieune, eust esté
 » par luy commandé: mais nous tenants fort ie ne
 » sçay commēt du fortuit & du temeraire, aussi par-

» lions nous de mesmes, car il est certain que Dieu a D
 » conioinct l'ame avec le corps precedente de gene-
 » ration & de vertu, comme dame & maistresse avec
 » son subiect pour luy commander & le regir. Et de-
 » rechef aiant dit, que l'ame se retournant en soy
 » mesme a commencé à viure d'une vie sage & eter-
 » nelle : Le corps du ciel, dit il, a bien esté fait visible,
 » mais l'ame est inuisible, participant du discours de
 » la raison, & de harmonie, engendree par la meil-
 » leure des choses intellectuelles & eternelles, estant
 » aussi elle la meilleure des choses nees & temporel-
 » les. Appellant en ce passage expressement Dieu le E
 » meilleur des choses eternelles, & l'ame la meilleu-
 » re des choses nees & temporelles, par ceste toute
 » euidente contrarieté il oste à l'ame l'eternité, & le
 » non auoir esté procréée. Et quelle autre solution y
 » a il à ces oppositions la, sinon celle que luy mesme
 » baille à ceux qui la veulent receuoir? Car il appelle
 » l'ame ingenerable & non nee ny procréée, celle
 » qui mouuoit toutes choses temerairement & des-
 » ordonneement auant la constitution du monde,
 » & au contraire nee ou procréée & engendree, cel-
 » le que Dieu composa de celle premiere, & de la F
 » substance permanente, eternelle & tresbonne, en
 » faisant vne ame sage & bien ordonnee, en y met-
 » tant du sien, & adioustant au sentiment l'entende-
 » ment, & l'ordre au mouuement, & l'aiant fait telle,
 » la constitua comme gouuernante & regente de
 » l'vniuers : tout de mesme aussi prononce il, que le
 » corps du monde est en vne sorte eternel, c'est à dire
 » non créé ny engendré, & en vne autre sorte créé
 » &

- A & engendré. Car quand il dit, que tout ce qui est visible, n'estoit point en repos, ains se mouuoit temerairement & sans ordre, mais que Dieu le prit, le renga & disposa par bon ordre: & de rechef quand il dit que les quatre elements, la terre, l'eau, l'air, & le feu, auant que l'vniuers fust d'iceux accoustre, faisoient vn merueilleux croulement & tremblement en la matiere, & qu'ils estoient aussi fort secouez par icelle, à cause de la difformité & inegalité: il appert qu'il fait là les corps estre comme vn subiect deuant la constitution du monde.
- B Et quand au cōtraire il dit, que le corps estoit plus ieune que l'ame, & que le monde auoit esté engendré & créé, d'autāt qu'il est visible & palpable, comme aiant corps, & que toutes ces choses la apparurent quand elles furent créées: il est tout manifeste qu'il attribue doncques vne naissance à la nature du corps, & neantmoins il s'en fault beaucoup qu'il se contredise, & se repugne à soy mesme si manifestement, & en choses principales: car ce n'est pas vn mesme corps ny de mesme sorte qu'il le dit auoir esté créé par Dieu, & auoir esté
- C auant qu'il fust, parce que cela seroit apertemēt le faict d'un basteleur ou enchâteur, mais luy mesme nous declare que c'est qu'il faut entendre par ceste generation ou creation. Car par auāt, dit il, tout ce
- » qui est en ce mōde estoit sans ordre, mesure ny rai-
- » son, le feu premieremēt, l'eau, la terre & l'air estoiet
- » pesse mesle en mesmes places, brouillee entie-
- » rement, cōme lon peult penser que doit estre tout
- » cela où Dieu n'est point: mais lors que l'vniuers

„ commancea à prendre son ornement, Dieu forma D
 „ d'especes & de nōbres toutes choses qui lors pre-
 „ mierement commencerent à venir en estre. Et en-
 core au parauant aiant dit que ce n'estoit pas œu-
 re d'une seule proportion, ains de deux, de lier
 ensemble la machine du monde qui est solide &
 „ profonde: & aiant narré, Que Dieu apres auoir
 „ mis l'eau & l'air entre le feu & la terre, lia quand &
 „ quand le ciel, & le ferra ensemble: de ces choses la,
 „ dit il, telles, & quatre en nombre, le corps du mon-
 „ de a esté engendré, s'accordant en proportion, &
 „ s'entre-portant amitié, tellement que depuis qu'il e
 „ a une fois ainſi esté aſſemblé, il n'y a riē qui le puis-
 „ ſe plus deſlier ny deſaſſembler, que celui ſeul qui
 „ qui l'a lié. enſeignant manifeſtement que Dieu
 eſtoit pere & auteur, non du corps ſimplement,
 ny de la machine & matiere ſeulement du monde,
 mais auſſi de la proportion, meſure, beauté & ſi-
 militude qui eſt au corps. Autant en fault-il penſer
 de l'ame, comme eſtât l'une non créée de Dieu, ny
 l'ame du monde, mais une puisſance de motion
 fantaſtique, turbulente, ſubiecte à opinion, ſe re-
 muant de ſoy meſme & touſiours, mais ſans ordre, F
 meſure ny raiſon quelconque: l'autre Dieu l'ayant
 accouſtree de nombres & de proportions conue-
 nables, l'a conſtituee regente & gouvernante du
 monde créé, elle meſme eſtant créée. Or que ce
 ſoit ceſte la, la vraye ſentence & intelligence de
 Platon, non par une maniere de ſpeculation & in-
 quiſition, touchant la creation ou generation tant
 du mode que de l'ame, cela en eſt un indice, outre
 pluſieurs

A plusieurs autres, qu'il dit, que l'ame est créée & nō créée, & du monde qu'il a esté né & créé, & non jamais qu'il est eternal, & non créé. Qu'il soit ainsi, il n'est ià besoing d'en alleguer les tesmoignages du liure de Timæus, attendu que tout le liure d'un bout à autre, n'est que de la generatiō ou creation du monde: & des autres liures, en l'Atlantique, Timæus faisant sa priere nōme celuy qui pieça estoit de faict, & maintenant aussi de parole, Dieu. Et en son Politique l'hoste Parmenidien dit, Que le monde de composé de Dieu a esté fait participant de plusieurs biens, & que fil y a quelque chose de mauvais, qu'il y est demouré meslé parmy de sa premiere habitude & estat, auquel il estoit auant sa constitution tout deregulé & desordonné. Et en ses liures de la Republicque, parlant du nombre que quelques vns appellent mariage, Socrates com-

» manceant à en discourir dit ainsi, Le Dieu natif

» ou engendré à sa conuersion que le nombre par-

» fait comprennent. En ce lieu là il ne peult appeller autre Dieu natif que le monde. *


Icy y a vne breche en l'original.

c La premiere copulation est d'un & de deux, la seconde de trois & de quatre, la troisieme de cinq & six, desquelles pas vne ne fait vn nombre quarré, ny par soy, ny par autres: la quatrieme est de sept & de huit, laquelle assemblée avec les premieres, fait le nombre quarré de trente six.

C'est en droit est tout corrompu. Le quaternaire des Pythagoriciens, par lequel ils in-

1	2
3	4
5	6
7	8


font ensemble 36.



Mais le Quaternaire des nombres que Platon a posez a vne plus parfaite generatiō, estāts les pairs multipliez par interualles pairs, & les non-pairs par interualles non-pairs : car elle contient premierement l'vnité comme la souche premiere des nombres tant pairs

que non-pairs, & au dessoubs d'elle le Deux, & le Trois, qui sont les premiers nombres plats : & puis Quatre & Neuf, les premiers quarrez : & puis huit & vingt & sept les premiers cubiques, l'vnité estāt mise hors de compte : par où il appert qu'il ne veut pas que lon colloque les nombres tous les vns sur les autres en droite ligne, ains à part les vns deuāt les autres, les pairs d'un costé, & les non-pairs de l'autre, comme il est cy dessoubs descrit : ainsi serōt les files des nombres semblables, qui engēdreront des nombres remarquables & notables, tant par composition que par multiplication : par composition ainsi, deux & trois font cinq, quatre & neuf font treize, huit & vingt & sept trente cinq : car de ces nombre là, les Pythagoriens appellent le cinq *πέντε*, c'est à dire son, estimants que le cinq soit le premier parlant & sonant des interualles du ton, & que le treze en est le residu, desesperans, comme aussi fait Platon, de pouuoir partir le ton en deux egales parties : & le trente cinq, ils appellent Harmonie, d'autant qu'il est composé des deux premiers nombres cubiques, procedant du premier pied

A pied pair, & du premier non-pair: c'est à sçauoir du huit & du vingt & sept, & semblablement aussi est composé de ces quatre nombres, du six, du huit, du neuf, & du douze, lesquels contienēt la proportion Arithmetique & Harmonique: mais cela sera plus clair à voir, en le mettant en figure deuāt les yeux. Supposons dōques qu'il y ait vne figure en forme de rhuile, qui s'appelle vn parallelogrāme à angles droicts qui soit designé par ces lettres, A B C D.



Dont

Dont le costé moindre *AB*, soit de cinq, & le plus *D* long *AD*, soit de sept parties, le moindre costé soit diuisé en sections inegales, l'une de deux, l'autre de trois parties au poinct signé *E*, & le plus long en autres deux inegales aussi, de trois & de quatre au poinct signé *F*, ainsi *AEGF* seront six, *EBIG* neuf, *GHDF* huit, *GICH* douze. Ceste figure parallelogramme, plus longue que large, estant composee de trente cinq parties, contient en soy toutes les raisons des premiers accords, & consonances de musique és nombres des aires & petites placettes quarrees: car le six comparé au huit a la raison ou proportion sesquitiere, en laquelle consiste la quarte. Le six à neuf a la raison sesquialtere, en laquelle consiste la quinte: & le six à douze a la raison double, en laquelle consiste l'octaue: aussi y est la raison du ton qui est sesquioctaue, comme de huit à neuf: c'est pourquoy ils ont appellé ce nombre la de trente cinq, qui contient les raisons des tons, les consonances & accords, l'harmonie, lequel estât multiplié par six, fait le nombre de deux cents dix, qui est le nombre des iours, dedans lesquels se forment & paracheuent les enfans qui naissent à sept mois. Item à le prendre par vn autre commencement par multiplication, deux fois trois font six, & quatre fois neuf font trente six, & huit fois vingt & sept font deux cens seize: or est le six nombre parfait, d'autant qu'il est egal à ses parties, & s'appelle mariage pour la commixtion du pair & du non-pair. Qui plus est, il se treuve composé du principe des nombres qui est vn, du premier

A mier pair qui est deux, & du premier non-pair qui est trois. Et puis trente six est le premier nombre quarré ensemble & triangle quarré du pied de six, & triangle du pied de huit, & se produit par multiplication des deux premiers nombres quarréz, c'est à sçauoir du quatre multipliant le neuf, & par l'assemblément de trois cubiques de l'un, du huit & du vingt sept, qui assemblez ensemble font trente six, & puis il se peult estandre en forme de thuile plus longue que large, en deux fortes, en mettant ou douze fois trois, ou neuf fois quatre. Or maintenant si lon prent les nombres des costez de toutes ces figures, c'est à sçauoir le six du quarré, le huit du triangle, le neuf de l'une des thuiles, & le douze de l'autre, on trouuera qu'ils feront les raisons & proportions de toutes les consonances: car le douze comparé au neuf sera la quarte, cōme fait la Nete la haulte note, à la moyene, au huit sera quinte, comme de l'Hypate la basse note à la moyene, & à douze sera l'octaue, comme la Nete à l'Hypate. Et le nombre de deux cents seize, est nombre cubique, procedant de six pour son pied, & si est egal

C aux aires quarrées de son pourpris: ces nombres proposez aians tant de vertus & de proprieté, le dernier vingt sept a encore cela de peculier, qu'il est egal à tous les precedents assemblez ensemble, c'est à sçauoir à vn, deux, trois, quatre, huit & neuf: d'auantage, c'est le nombre des iours de la reuolution de la Lune. Et les Pythagoriens entre les distances & interualles des sons mettēt celuy du ton en ce nombre la: c'est pourquoy ils appellent le

treize *λειτουργία*, comme qui diroit, le default, d'autant **D** qu'il s'en fault vne vnit  que ce ne soit la moiti  de vingt sept. Or que ces nombres la aussi contienent les raisons & proportions de toutes les consonances & accords, il est ais    entendre : car il y a la double d'un   deux, en laquelle consiste le Diapason : de deux   trois la sesquialtere, en laquelle consiste le Diapente ou la quinte : de trois   quatre la sesquitierce, en laquelle consiste le Diatesaron, la quarte & la triple : de trois   neuf, en laquelle c siste le Diapason & Diapente, ensemble la quinte sur double, & la quadruple : de deux   huit, qui **E** est le Disdiapason, c'est   dire, double sur double, ou vne quinziesme. Il y a aussi la sesquioctaue de huit   neuf, en laquelle consiste le ton, & si l'on compte l'unit  qui est c mune aux nombres pairs & non-pairs, tout le nombre des pairs, les prenant depuis un iusques   huit, fait quinze nombre triangle, procedant du pied de cinq : & ceux de la rengee des non-pairs,   s avoir, un, trois, neuf, vingt sept, sont quarante, qui les somme ensemble, & ces quarante la sont composez de treize & de vingt sept, par lesquels les Mathematiciens mesurent precis ment **F** les interualles des sons, dont on chante, appellants l'un Diesis, & l'autre Ton : & ce nombre de quarante vient par multiplication de la vertu du quaternaire : car si vous multipliez quatre fois chascun des quatre premiers nombres pris   par soy, c'est   s avoir un, deux, trois, quatre, il en prouendra, quatre, huit, douze, seize, qui summez ensemble feront quarante : & ces quarante la contienent

A nent encore toutes les raisons & proportions des consonances, pour ce que seize comparé à douze a proportion sesquitiere, à huit double, à quatre quadruple, & le douze à huit sesquialtere, à quatre triple, qui sont les proportions de la quarte, de la quinte, de l'octaue, & de la quinzieme. Et puis ce quarante est egal aux deux premiers nombres quarez, & aux deux premiers cubiques, les deux premiers quarez sont vn & quatre, les deux cubiques huit & vingt-sept, qui sonmez ensemble, font quarante, tellement que le quaternaire

B de Platon est en sa disposition bien plus ample, plus diuersifié, & plus parfait que non pas celuy de Pythagoras. Mais pource que és nombres proposez ne se peuuent trouuer places pour les medietez qu'il introduit, il a fallu estãdre les nombres en plus amples termes, en retenant tousiours les mesmes raisons & mesmes proportions, il nous fault vn peu declarer quels sont ces nombres là, & premierement traiter de ces medietez. La premiere doncques est celle qui surmonte & est surmontee de ses extremittez par vn mesme nombre,

C laquelle on appelle maintenant Arithmetique: l'autre qui surmonte & est surmontee par meime partie de ses extremittez, s'appelle Hypenantia, c'est à dire, soubcontraire: côme, pour exemple, les deux bouts & extremittez, & le milieu de la medieté Arithmetique sont six, neuf, douze: car neuf qui est au milieu surmonte six du mesme nombre qu'il est surmonté de douze, c'est à sçauoir de trois, & de la soubcontraire. Ces fins sont, comme six,

huit, douze : car huit qui est le milieu surmonte six **D**
 de deux, & est surmonté par douze de quatre, & le
 quatre est la troisieme partie de douze, cōme deux
 est la troisieme partie de six. Ainsi aduient il qu'en
 la medieté Arithmetique le milieu surmonte l'un
 des bouts, & est surmonté par l'autre d'une mesme
 sienne partie, & en la soubcontraire d'une mesme
 partie non siene, mais de ses extremittez, c'est pour-
 quoy elle est appelée soubcontraire : & c'est aussi
 celle que lon nomme harmonique, pour ce que
 dedans ses fins elle comprend les premieres conso-
 nances, c'est à sçauoir du moindre bout au plus **B**
 grand, le Diapason l'octaue : du plus grand au mi-
 lieu, la quinte : & du milieu au moindre bout, la
 quarte : par ce que le plus grand terme ou bout
 estant mis sur la note ou chorde Nete, & le moin-
 dre sur l'Hypate, le milieu se trouuera sur celle qui
 se nôme moienne, qui fera vers la Nete vne quinte,
 & vers l'Hypate vne quarte : tellement que huit
 fera sur la moienne, douze sur la Nete, & six sur
 l'Hypate. Or pour sçauoir facilement trouuer ces
 medietez la & promptemēt, Eudorus en monstre
 la maniere: car assemblez les deux bouts ensemble, **P**
 & du sommé des deux en prenez la moitié, ce sera
 la medieté Arithmétique : ou prenez la moitié de
 chascun des bouts, & les mettez ensemble, ce qui
 en prouiendra fera la medieté Arithmetique, autāt
 aux doubles comme aux triples. Mais en la soub-
 contraire ou harmonique, si les deux termes &
 bouts sont l'un à l'autre en proportiō double, pre-
 nez le tiers du moindre, & la moitié du plus grād,
 le nom-

A le nombre qui en prouiendra fera le milieu harmonique : mais si les deux bouts sont l'un à l'autre en proportion triple, il fault au contraire prendre la moitié du moindre, & le tiers du plus grand, & le sommé sera le milieu : comme, pour exemple, soit en triple proportiō le moindre terme six, & le plus grand dixhuit, si tu prens la moitié de six qui est trois, & le tiers de dixhuit qui est six, il en viendra neuf, pour le milieu qui surmonte, & est surmonté de mesme partie des deux bouts, c'est à sçauoir de la moitié. Voyla comment les medie-

Btez se prennent. Or les fault il là entreietter & colloquer entre deux, pour remplir les espaces ou interualles doubles & triples, mais entre les nombres proposez les vns n'ont aucune place de milieu, les autres ne l'ont pas suffisante : parquoy on les augmente, en retenant tousiours les mesmes proportions, & y fait on des places & receptacles suffisans pour receuoir lesdites mediocritez : & premieremēt pour le moindre bout ou terme, au lieu de vn on met six, pour ce que c'est le premier de tous les nombres qui a moitié & tiers, & multi-

Cplie lon tous les nombres qui sont au dessoubs par six, ainsi comme il est soubscript pour pouuoir receuoir les medietez toutes deux és doubles & triples interual- 12. 2. 3. 18. les. Et pour-
 „ autāt que Pla- 24. 4. 9. 54. ton a dit, E-
 „ stans les inter- 48. 8. 27. 162. ualles ses-
 „ quialteres, sesquitiers, & sesquioctaues, de ces liai-
 „ sons la és precedentes distances il remplissoit tous
 „ les sesquitiers de l'interualle sesquioctauē, laissant

une partie de chascun d'eulx, & la distance de ce- D
 ste partie prise de nombre à nombre, aiant pour
 ses bouts & ses termes deux cents cinquãte & six,
 & deux cents quarante & trois. Pour les paroles
 de ce texte ils ont esté contrainsts d'estendre encore
 ces nombres, & les faire plus grands, tant qu'il y
 eust deux nombres suiuan de reng en proportion
 sesquioctaue, là où le six ny de luy mesme entier
 ne pouuoit auoir proportion sesquioctaue, & qui
 l'eust diuisé, en partissant l'vnité en parcelles de
 nombres rompus, l'intelligence en venoit à estre
 mal-aisée à comprendre, il appella celle façon mul- E
 tiplication: ne plus ne moins qu'en la musique
 aux mutations, là où si vous tendez & augmentez
 le premier nombre, il fault quant & quant que la
 description de toutes les autres notes se tende &
 s'augmente aussi. Eudorus dōques suiuant Cran-
 tor, prit pour le premier nombre trois cents o-
 ctante quatre, qui se fait en multipliant soixante
 quatre par six, & les a induits à ce faire le nombre
 de soixante quatre, qui a pour son sous-sesquio-
 ctaue huit, & son sesquioctaue septante deux.
 Mais il accorde mieulx avec le texte & les paroles F
 de Platon, de supposer la moitié: car le default
 qu'ils appellent *λεῖμμα*, aura la proportion sesqui-
 octaue aux-nombres que Platon a posez, deux
 cents cinquante six, & deux cents quarante trois,
 aians mis pour le premier, cent nonante deux: &
 si le double d'iceluy se met pour le premier, le
 Limma sera de la mesme proportiō, mais en nom-
 bre double, comme de cinq cents douze à quatre
 cents

A cents octante quatre : car deux cents cinquante six sont en proportion sesquiterce de cent nonante deux, & cinq cents douze, de quatre cents octante quatre. Et ne sera pas ceste reduction sans raison, aiant donné occasion apparente à Crantor : car le nombre de soixante quatre est Cube, procedant du premier quarré, & quarré procedant du premier cube, & estant multiplié par trois, le premier non-pair, & le premier triangulaire, le premier parfait & sesquialtere, il fait cent nonante deux, qui a aussi son sesquioctave, comme nous mon-

B strerons. Mais premierement vous entendrez mieulx que c'est que Limma, & quelle est l'intelligence de Platon, si vous voulez vn peu rememorer ce que lon dit és escholes des Pythagoriens: car Diastema, c'est à dire, interualle en matiere de chant, est tout le contenu entre deux sons de diuerse tension, entre lesquels interualles il y en a vn qui s'appelle ton, celuy dequoy la quinte surmonte la quarte : de ce ton entier, comme tiennent les Musiciens, couppé en deux par la moitié, il se fait deux interualles, qui s'appellent l'vn & l'autre demy tons : mais les Pythagoriens n'estimét pas qu'il se puisse mespartir egaleement, & estans les deux sections inegales, ils en appellét la moindre, Limma, c'est à dire, le default, pour ce que c'est vn peu moins de la moitié: & pourtāt il y en a qui formét l'accord de la quarte de deux tons & demy ton, les autres de deux tons & d'vn Limma, & semble que le tesmoignage du sentiment de l'ouye s'accorde avec les Musiciens & Harmoniques, & la

demonstration avec les Mathematiciens. La preuve de la demonstration se fait en ceste maniere: C'est chose qui se suppose pour certaine, esprouvee par les instruments, que le Diapason ou l'octave a la proportion double: Diapente, la quinte, fessquialtere: Diatessaron, la quarte, fessquitierce: & le ton, fessquioctave: & en peult on encore presentement examiner & esprouver la verité, en attachant deux pois doubles à deux cordes egales, ou faisant de deux tuyaux de aubois d'egale cōcavité, l'un double en longueur de l'autre: car l'aubois qui sera de plus grande longueur sonnera plus gros, comme l'Hypate au regard de la Nete, & des deux cordes, celle qui sera roidie par le plus grand pois sonnera plus clair, cōme la Nete à comparaison de l'Hypate, & cela est la consonance du Diapason: semblablement aussi trois comparez à deux, soit en longueur ou en pesanteur, fera la quinte, & quatre à trois fera la quarte, car l'un a la proportion fessquitierce, & l'autre fessquialtere: & si l'inegalité des pois ou des longueurs est comme de huit à neuf, elle fera l'interualle du ton, non pas que ce soit accord, mais son propre à chanter: car les sons, qui les touche, ou sonne, ou entonne l'un apres l'autre, rendent vn chant doux & agreable aux oreilles, mais qui les sonneroit ensemble, le son en seroit fascheux, & offenseroit l'ouye: au contraire és consonances, qui les touche ou ensemble, ou l'un apres l'autre, l'oreille en reçoit le cōsent & accord avec grand plaisir: toutefois encore monstre lon cela par raison, car l'harmonie du Diapason est composée

L'experience
monstre que
le double se
doibt prendre
à la concavité,
et non pas
à la longueur.

A posée de la quinte, & de la quarte, & en nōbres, le double est composé du sesquialtere, & du sesquitiens, car douze sont en proportion sesquitiens du neuf, & sesquialtere du huit, & double du six: adōc la proportion double est composée de la sesquialtere, & de la sesquitiens, comme le Diapason du Diapente, & du Diatessaron, c'est à dire, l'octave de la quinte & de la quarte, mais la quinte est plus grande que la quarte d'un ton, & icy és nombres la sesquialtere plus grande que la sesquitiens, d'une sesquioctave: il appert doncques que le Diapason a la proportion double, & la quinte sesquialtere, & la quarte sesquitiens, & le ton la sesquioctave. Cela estant prouvé & démontré, voions maintenant si la sesquioctave se peut mespartir en deux sections egales: car si elle ne peut, aussi ne fait doncques pas le ton: & pour ce que le huit & le neuf sont la premiere proportion sesquioctave, il n'y a rien d'intervalle entre deux, l'un & l'autre estans doublez, le nombre qui se treuve entre deux fait deux intervalles: il est manifeste que si ces deux intervalles sont egaux, la sesquioctave se peut egalemment diuiser en deux. Or est il que la double de neuf est dixhuit, & de huit seize, lesquels reçoivent entre eux-deux dixsept: ainsi y a il l'un des intervalles plus grand, & l'autre plus petit, car le premier est de dixhuit à dixsept, & le second de dixsept à seize: adonc la sesquioctave proportion se diuise en portions & sections inegales, & consequemment aussi le ton. Parquoy la diuision faite, nulle des sections n'est proprement demy ton, ains

a esté l'vne à bon droit appelée par les Mathématiciens Limma: & c'est ce que dit Platon, que Dieu remplissant les sesquitiers des sesquioctaues laissa vne partie de chascun d'iceux, dont la raison est & proportion qu'ont deux cents cinquante six, à deux cents quarante trois: car que lon prenne vne quarte en deux nombres qui aient entre eux proportion sesquitierce, comme deux cents cinquante six, à cent nonante deux, dont le moindre nombre, 192. soit colloqué sur la note basse du tetrachorde, & le grand 256. sur la haute: il faut montrer que cela remply de deux sesquioctaues, il demeure vn interualle aussi grand, comme à le prendre en nombre deux cents cinquante six: car le bas son estant roidy & tendu d'un ton, qui est la raison sesquioctave, il se fait deux cents seize, & puis derechef cestuy estant encore roidy & tendu d'un autre ton, il deuient deux cents quarante trois: car ils surmontent deux cents seize de vingt sept, & deux cents seize surmontent cent nonante deux de vingt quatre, dont le vingt sept est sesquioctave de deux cents quarante trois, & vingt & quatre de deux cents seize. Parquoy de ces nombres icy le plus grand est sesquioctave du milieu, & le milieu du plus petit, & la distance depuis le plus petit iusques au plus grand, c'est à dire, depuis cent nonante-deux, iusques à deux cents quarante trois, deux tons remplis de deux sesquioctaues, lequel interualle osté il demeure l'interualle du total qui est entre deux cents quarante trois, & deux cents cinquante six, qui sont treize, c'est pourquoy ils

- A** ils appelloient ce nombre la *λεῖμμα*, comme qui diroit, default ou residu. Quant à moy doncie pense que la sentence de Platon est tres-clairement exposee en ces nombres la : les autres mettant les fins & termes du Diatessaron, pour le haut deux cents octante huit, & pour le bas deux cents seize, acheuent proportionalement le reste, sinon qu'ils prennent deux defauts entre les deux extremittez, le bas estant rendu d'un ton, il se fait deux cents quarante trois, & le haut estant lasché d'un autre, il deuient deux cents cinquante six, car ils
- B** sont sesquioctaues, 243. de 216. & 288. de 256. de maniere que chascun des interualles est d'un ton, & demeure ce qui est entre 243. & 256. qui n'est pas demy ton, ains est moins : car 288. est plus que 256. de 32. & 243. est plus que 216. de vingt-sept, & 256. est plus que 243. de treize, & tous les deux auantages sont moins que demy ton : parquoy le Diatessaron se trouue de deux tons, & de ce qu'ils appellent Limma, non pas d'un demy ton : voila comment il se demonstre. Ainsi n'est il pas mal-aisé à entendre par ce que nous auons
- C** dit, pourquoy c'est que Platon aiant dit, qu'il se fait des interualles sesquialteres, sesquitiers, & sesquioctaues, en remplissant les sesquitiers des sesquioctaues, il n'a point fait mention de sesquialteres, ains les a laissez en arriere : c'est pour ce que la sesquialtere est remplie, quand on adiouste la sesquioctauue à la sesquitierce, ou bien la sesquitierce à la sesquioctauue. Ces choses ainsi demōstrees, maintenant, quant à remplir les interual-

les, & y entreietter les medietez, quand personne ^D ne l'auroit fait auparauant, ie le vous laisserois faire pour vostre exercice : mais cela aiant desia esté fait, & par plusieurs gens de bien, principalement par Crantor, Clearchus, & Theodorus, tous natifs de la ville de Soles, il ne sera point hors de propos, de parler vn petit de la difference qu'il y a entre eux : car Theodorus ne fait pas deux files de nombres, comme les autres, ains les met tous d'une rengée les vns apres les autres, les doubles & les triples, & se fortifie premierement par ceste partition de la substance que lon appelle selon la longueur qui fait deux branches d'un tronc, & non pas quatre de deux, & puis il dit qu'il faut que les interpositions des medietez prennent ainsi place, autrement qu'il y auroit perturbation & confusion, & passant incontinent du premier double au premier triple, y deuant estre ce qui doit remplir l'un & l'autre. De l'autre costé aussi fait pour Crantor la situation & position des nombres plains avec les plains, quarrez avec les quarrez, & cubes avec les cubes, qui sont ainsi colloquez vis à vis l'un de l'autre en files opposites, & non pas selon ^F leur reng, ains alternatiuement. *

Icy y a vne grande breche en l'original.

Ce qui est tousiours d'une sorte, c'est l'espece ou la forme, mais ce qui se diuise par les corps, c'est le subiect & la matiere, & la mixtion qui se fait des deux, c'est le suppost parfait. Quant à la substance doncques indiuisible, qui est tousiours vne & tousiours de mesme sorte, il ne faut pas entendre qu'elle

A qu'elle fuyé diuision pour sa petitesse, comme font les petits corps, que lon appelle Atomes: car c'est ce qu'elle est simple, pure, non subiecte à passion, ny alteration aucune, ains tousiours semblable à soy & de mesme sorte, qui fait qu'elle est indiuisible, & n'ayant point de parties, pour laquelle simplicité, quand elle vient à toucher aucunement les composez & differents, elle fait cesser la diuersité, & les rend d'une mesme habitude par similitude, & si lon veut appeller celle qui est diuisible par les corps, matiere, comme subiecte à icelle, & participante d'icelle, vsant d'equiuocation, il n'y aura point d'interest quant à ce dont il est question: mais ceux qui veulent que la corporelle matiere soit meslee avec l'indiuisible, sont en grand erreur.

Premièrement par ce que Platon n'a point vsé maintenant d'aucuns noms d'icelle, par ce qu'il a tousiours accoustumé de l'appeller receptacle receuant tout, & nourrice, non pas diuisible par les corps, ains plustost corps diuisé en singuliers indiuidus. Et puis quelle difference y aura il entre la

C generation du monde & de l'ame, si leur constitution de l'un & de l'autre est composee de la matiere & des choses intelligibles? Platon certes luy mesme, cōme ostant à l'ame l'estre engendré du corps, dit que Dieu luy a mis tout ce qui estoit corporel au dedans d'elle, & puis que par dehors il a esté caché & couuert d'elle tout alenuiron, & brief apres auoir fabriqué de proportion l'ame, il subioinct puis apres le traitté de la matiere, ne s'en estant point seruy au parauant quand il traittoit de la

creation de l'ame. Autant en peut on semblablement répondre à Posidonius, car il ne s'est pas fort esloigné de la matiere, ains cuidant que la substance des termes & extremittez soit ce du'il appelle substance diuisible par les corps, & ioignant cela avec l'intelligible, il a prononcé & affermé que l'ame est l'Idée de ce qui est distant en tout sens selon les nōbres qui contiennent l'harmonie, par ce que les Mathematiques sont situees entre les premiers intelligibles & les sensibles: mais l'ame aiant des intelligibles l'estre eternelle, & des sensibles l'estre passible, il est conuenable qu'il y ait quelque substance entre deux, mais il n'a pas pris garde que Dieu depuis, apres auoir fait & parfaict l'ame, vsa des termes & extremittez du corps, pour en dōner forme à la matiere, termināt & finissant sa substance vague & esparse, non contenue d'aucune liaison, l'environnant de superficies cōposees de triangles ioincts ensemble: encore est-il plus impertinent de faire l'ame vne Idée, par ce que l'ame est tousiours en mouuement, & l'Idée est immobile, & l'Idée ne se peut mesler avec ce qui est sensible, & l'ame est tousiours attachee avec le corps. Et puis Dieu a esté imitateur de l'Idée comme de son patron, & ouurier de l'ame comme de son ouurage: & que Platon ne tienne point que la substance de l'ame soit le nombre, ains bien qu'elle soit ordonnee par nombre, nous l'auons desia dit au parauant, mais alencontre de ces deux opinions ceste opposition est commune: Que ny aux nombres, ny aux termes & bornes des corps il n'y a aucune appa-

A apparence, ny vestige de celle puissance, par laquelle l'ame iuge de ce qui est sensible: car l'entendement & la faculté d'entendre qu'elle a, c'est la participation du principe intelligible que luy mesme y a imprimé, mais l'opinion, la creance, l'imagination, & l'estre passive & sensitive des qualitez qui sont és corps, il n'est homme qui sceust penser que cela puisse proceder des vnitez, des points, des lignes, ny des superficies. Et toutefois non seulement les ames des mortels ont la faculté de iuger de toutes qualitez exterieures perceptibles aux

B sentimens: mais aussi celle du monde, ce dit Platon, quand elle vient à se tourner en soy mesme, & à toucher quelque chose qui ait la substance vague, fluide: & aussi l'indivisible en se mouuant par toute elle mesme, elle dit à quoy chascune chose est mesme, & à quoy elle est autre & diuerse, & à quoy principalement chascune chose est conuenable, soit à faire ou à souffrir, tant és choses qui viennent en estre qu'en celles qui sont tousiours d'une sorte. D'auantage faisant vne description des dix predicamens, il declare encore cela plus dilucidement puis apres. La raison vraye, dit-il, quand elle s'attache à ce qui est sensible, & le cercle de l'Autre allant droit l'annonce par toute son ame, alors il s'engendre des opinions & des creances fermes & veritables: mais aussi quand elle est en la partie intelligente & discursive, & que le cercle du Mesme tournant aisément & rondement le demontre, alors necessairement la science se parfait, & en quoy que ce soit que ces deux choses la s'engen-

» drent, si aucun le nomme autrement qu'ame, cer-
 » tainement il dit plustost toute autre chose que la
 » verité. D'où est-ce doncques quel'ame a eu ceste
 motion opinatiue, qui comprend ce qui est sensi-
 ble, diuerse & differente de l'autre intellectiue, qui
 se termine en science: il est bien mal-aisé de le dire,
 si lon ne suppose fermement que maintenant &
 en cest endroit la il ne compose pas l'ame simple-
 ment, ains l'ame du monde avec les parties cy des-
 sus mentionnees, c'est à sçauoir de la meilleure
 substance indiuisible, & de la pire, qu'il appelle di-
 uisible par les corps, qui n'est autre chose que l'i-
 maginatiue & opinatiue motion, l'accordant avec
 ce qui est sensible, laquelle ne s'engendre pas, ains
 est comme l'autre eternelle: car la nature qui a la
 vertu d'entendre, l'a aussi d'opiner, mais ceste in-
 tellectiue la est immobile, impassible, & posée &
 fondée sur la substance qui tousiours demeure d'v-
 ne mesme sorte, & l'autre est vague & diuisible,
 comme celle qui touche à vne matiere mobile,
 tousiours flottante & esendue çà & là: car la ma-
 tiere sensible parauant n'auoit ordre quelconque,
 ains estoit sans forme, & sans borne ne terminai-
 son aucune, & la puissance qui estoit en elle n'a-
 uoit ny les opinions expressees articulees & distin-
 guees, ny ses mouuemens tous certains & ordon-
 nez, ains pour la plus part ressemblans à des son-
 ges temeraires, turbulens, trauaillans ce qui est
 corporel, sinon que par fortune ils tombassent sur
 ce qui est le meilleur: car elle estoit entre deux, &
 auoit nature conforme & accordante à l'un & à
 l'autre

A l'autre touchât à la matiere en ce qu'elle est sensible, & aux choses intelligibles en ce qu'elle a moien de iuger: ainsi le declare il luy mesme en ces
 „ propres termes. Selon mon calcul, dit-il, ceste som-
 „ me soit arrestee de tout le compte: Que ces trois
 „ choses triplement separees estoient auant que le
 „ ciel fust la substance, la place, la generation. Il ap-
 pelle la place la matiere, comme ailleurs le siege,
 & aucune fois le receptacle, ce qui est l'intelligible,
 la generation, lors que le monde n'estoit pas en-
 core, ne peut estre autre chose que la substance
 B subiette à mouuemens & alterations, situee entre
 le moulant & le moulé, transmettant les images
 de là icy: c'est pourquoy elle a esté appelée diui-
 sible, pour ce qu'il est force que le sensitif se diuise
 & aille quand & le sensible, & l'imaginatif quand
 & l'imaginable: car le mouuement sensitif se meut
 vers le sensible au dehors, mais l'entendement de
 luy mesme estoit stable, ferme & immobile: mais
 estant imprimé en l'ame & en estant Seigneur, il
 se tourne en soy-mesme, & accomplit vn mou-
 uement en rond & circulaire, touchant à ce qui
 C est principalement en ce qui demeure tousiours.
 Et pourtant difficile fat la melleange, & l'associa-
 tion de meller le diuisible avec l'indiuisible, &
 ce qui n'est aucunement mobile avec ce qui re-
 mue tousiours, & qui va par tout, contraignant
 par force le Mesme de s'assembler avec l'Autre.
 Si n'estoit pas l'Autre mouuement, comme ny le
 Mesme n'estoit pas station ou repos, ains estoient
 le principe de diuersité & de identité: car l'vn &

l'autre descendent de diuers principes , à sçauoir le **D** Mesme de l'vnité, & l'Autre du binaire, & ont esté premierement meslez icy en l'ame, estans liez par nombres & par proportions, & par medietez enarmoniques: & le Mesme imprimé en l'Autre fait difference, & l'Autre au Mesme fait ordre, comme il appert manifestemēt és premieres puissances de l'ame, lesquelles sont la puissance de mouuoir, & la puissance de iuger. Le mouuement se monstre incontinent au ciel, & en la diuersité, l'identité, à la reuolution des estoiles errantes & Planetes, & en l'identité la diuersité en la situation **E** des estoiles fixes: car là est le mesme le plus fort, comme és choses terrestres tout le contraire. Et le iugement a bien deux principes, l'entendement du Mesme pour iuger les choses vniuerselles, & le sentiment de l'Autre pour iuger les particulieres, & la raison puis est meslee des deux, estant Intelligence és choses generales, intelligibles, & opinion és choses sensibles, vfans pour instrumens & outils de la memoire & de l'imagination, dont les vnes sont le Mesme en l'Autre, & les autres l'Autre au Mesme: car Intelligence est le mouuement de **F** l'entendement enuers ce qui demeure ferme, & l'opinion est la demeure de ce qui sent enuers ce qui remue: le Mesme colloque & met l'imagination ou phantasie, qui est vne liaison de l'opinion avec le sentiment en la memoire, & l'Autre au contraire la remue, pour la difference du passé & du maintenant, touchant ensemble à l'identité & à la diuersité. Et pour bien entendre la proportion
de

A de laquelle il a composé l'Ame, il faut prendre l'exemple de la constitution du corps du monde: car là les deux extremités, à sçauoir le feu & la terre, estans de nature bien difficiles à contemperer l'un avec l'autre, ou pour mieux dire, impossibles à compatir & à se mesler ensemble, il mit au deuant du feu l'air au milieu d'eux, & l'eau au deuant de la terre, si contempera premierement ces deux moïens la ensemble, & puis par eux les deux extremes des bouts qu'il accommoda & ioignit, & avec ces moïens la & avec eux mesmes. Et là mesme aussi derechef assembla il le Mesme, & l'Autre, puissances contraires & extremités ennemies, non par elles mesmes immediatement, ains en mettant entre deux d'autres substances, l'induisible au deuant du Mesme, & la diuisible au deuant de l'Autre, estant aucunement conuenable à l'une & à l'autre, puis ces deux estans meslees, y meslant & contemperant aussi les autres extremes, il ourdit & tissut ainsi toute l'espece de l'ame, faisant en tant qu'il estoit possible de differents semblables, & de plusieurs vn. Or y en a il qui disent que Platon n'a pas bien dit, d'appeller la nature de l'Autre difficile à mesler, attendu, disent ils, qu'elle n'est point insusceptible, ains plustost amie de mutation, & que plustost la nature du Mesme estant ferme & difficile à remuer ne reçoit pas facilement meslange, ains la fuit & la reiette, à fin qu'elle demeure simple, nette, sans aucune alteration: mais ceux qui reprennent cela ignorent que le Mesme est l'Idée de choses qui sont tousiours d'une sorte, & l'Autre

DE LA CREATION DE L'AME.

l'Idee de celles qui se portent diuersement, & que D
l'effect de cestui-cy est de tousiours diuiser, separer,
& alterer ce à quoy il touche, & d'en faire d'un plu-
sieurs, & l'effect de celuy la, de cōioindre & assem-
bler par similitude ces plusieurs en vne mesme
forme & puissance. Voila quelles sont les puissan-
ces de l'ame de l'vniuers, lesquelles entrans en des
instruments caduques & passibles, qui sont les
corps, bien qu'elles soient quāt à elles incorrupti-
bles & impassibles, l'espece de la Dualité indeter-
minee y apparoist d'auantage, mais celle de l'vnité
simple plus obscurement y est enfoncée: toutefois E
encore ne sçauroit on remarquer en l'homme, ny
vne passion du tout exempte de raison, ny mou-
uement aussi de raison, où il n'y ait du tout rien de
cupidité, d'ambition, de ioye ou de douleur. Et
pourtant y a il aucuns philosophes qui veulent
que les passions soient des raisons, comme si toute
cupidité, toute fascherie, & toute ire, estoient des
iugemens: & d'autres aussi qui tiennent que toutes
vertus sont passions, car force & vaillance, disent
ils, est ce qui craint, & temperance ce qui iouit de
volupté, & iustice ce qui gaigne: toutefois l'ame F
estant ensemble & contēplatiue & actiue, & con-
templant les choses vniuerselles, & faisant les par-
ticulieres, entendans les vnes, & sentant les autres,
la commune raison rencōtrant tousiours au Mes-
me, l'Autre, & en l'Autre aussi le Mesme tasche
bien à separer de diuerses bornes & separations, vn
d'auec plusieurs, & l'indiuisible d'auec le diuisible,
mais elle n'en peut venir à bout, ny estre puremēt
en

A en l'un ny en l'autre, tant les principes sont entrelassez l'un avec l'autre, & brouillez pêle-mêle. Et pourtant a Dieu constitué un receptacle au Mesme, & à l'Autre, de la substance diuisible & indiuisible, à fin qu'en diuersité il y eust ordre: car cela estoit le naistre, & sans cela le Mesme n'auroit point de diuersité, & consequemment point de mouuement ny de generation, & l'Autre n'eust point eu d'ordre, & par consequent aussi point de consistance ny de generation: car s'il fust aduenu au Mesme d'estre autre d'autre, & à l'opposite aussi à l'Autre d'estre Mesme à soy-mesme, ceste telle communication & participation l'un de l'autre n'auroit ny ne produiroit rien de generatif, ains a besoing de quelque tierce matiere qui les recoiue, & qui par eux soit disposee: & c'est celle que Dieu constitua & composa la premiere, en terminant & arrestant l'infinité de la nature mouuante des corps par la fermeté immobile des choses intellectuelles. Et comme il y a vne sorte de voix non articulée ne distincte, pour signifier aucune chose, là où la Parole est vne voix signifiante & articulée pour donner à entendre la pensée: & harmonie est un composé de plusieurs sons & interualles, & le son est vne chose simple & mesme, & interualle est difference & diuersité de sons, lesquels estans meslez & assemblez ensemble, il se fait le chant & melodie: aussi la passibilité de l'ame estoit infinie, instable & desordonnée, & depuis elle fut terminée, quand les bornes, termes & limites de l'espece certaine furent apposees à la diuersité variable

de son mouuement: ainsi aiant compris le Mesme, ^D
 & l'Autre par similitudes & dissimilitudes de nō-
 bres, faisans de difference accord, de là est proce-
 dede la vie de l'vniuers, sage & prudente, l'har-
 monie consonante, & la raison menant gré &
 force, grace & contraincte, meslee ensemble, que
 le commun appelle la fatale destinee: Empedocles
 la nomme accord & discord ensemble, Heraclitus
 la tension opposite du monde, comme d'un arc,
 dont les deux bouts tirent l'un contre l'autre, ou
 d'une lyre: Parmenides lumiere & tenebres: A-
 naxagoras Entendement & Infinité: Zoroastres, ^E
 Dieu & le Diable, nommant l'un Oromasdes, &
 l'autre Arimanius: mais Euripides n'a pas bien vsé
 de disionctiue au lieu qu'il deuoit vser de conion-
 ctiue, là où il dit,

Jupiter soit necessité forcee

De la nature, ou l'humaine pensee:

car à la verité, celle puissance qui penetre & do-
 mine par tout l'vniuers, est entendement & neces-
 sité. C'est ce que les Égyptiens couuertement
 veulent donner à entendre sous le voile de leurs
 fables, disans que quand Orus fut puny & des- ^F
 membré, l'esprit & le sang en fut donné à son pe-
 re, & la chair & la graisse à sa mere: mais de l'a-
 me, il n'y a rien qui demeure pur & net, simple, à
 part des autres: car comme disoit Heraclitus, Har-
 monie latente est meilleure qu'apparente, dedans
 laquelle Dieu qui l'a meslee, a caché & enfoncé les
 differences & diuersitez: & toutefois encore y
 voit on en la partie irraisonnable la temerité tur-
 bulente,

A bulente, & en la raisonnable la sagesse ordonnee, és sentimens necessité, en l'entendement pleine & entiere liberté: mais la puissance terminante aime l'vniuersel & l'indiuisible, à cause de leur consanguinité, & au contraire la puissance diuidente s'attache aux particuliers, par le diuisible: & le total s'esfouit de la mutation du mesme à ce qu'il faut par l'autre: mais la difference des inclinations à l'honneste ou au deshonneste, & au plaisant & au desplaisant, & les rauissemens d'esprit & transports des amoureux, & les cōbats de l'honneur, alencontre de la volupté en eux, monstrent euidentement, autant que nulle autre chose, la mixtion de la partie diuine & impassible, avec la mortelle & passible enuers les corps, dont luy mesme appelle l'vne concupiscence des voluptez nee avec nous, l'autre vne opinion introduitte d'ailleurs, appetant le souuerain bien: car l'ame produit de soy mesme la passibilité, & la participation de l'entendement luy vient de dehors infuse par le meilleur principe, qui est Dieu. Si n'est pas la nature du ciel mesme exempte de ceste double compagnie, ains voit on comme elle encline quelquefois en la reuolution du Mesme, qui est la plus forte, & gouuerne le monde: & viendra vne portion de temps, comme elle a desia esté par plusieurs fois, en laquelle la sagesse s'espointera & s'esmoussera, & par maniere de dire s'endormira, en se remplissant d'oublanec de son deuoir, & de ce qui luy est propre, & ce qui dés le cōmancement est familier & conforme au corps, attire, appesantit & de-

tourne en arriere l'acheminemēt & alleure de l'^v-^D
 niuers à la main droitte: mais il ne le peult rompre
 du tout à faict, par ce que la partie meilleure se res-
 ueille de rechef, & regarde au moule & patron de
 Dieu, qui l'aide à retourner & à le redresser. Ainsi
 nous eist-il monstré de plusieurs endroicts, que l'a-
 me n'est pas toute œuvre de Dieu, ains que aiant
 en elle vne portion de mal nee avec elle, elle a esté
 ordōnee & disposée par luy en termināt par l'vni-
 té l'infiny, à fin qu'elle deuint substance bornée de
 ses termes, & y mettāt par le moien du Mesme, &
 de l'Autre, l'ordre, la mutation, la différēce & la si-^E
 militude, & aiant contracté vne societé, alliance &
 amitié de toutes ces choses la, les vnes avec les au-
 tres, autant comme il estoit possible, par le moien
 des nombres & des proportions. Dequoy encore
 que vous ayez bien souuent ouy parler, & en ayez
 leu plusieurs liures, & plusieurs escripts, il ne sera
 pas mauuais que i'en die vn petit mot, en propo-
 „ sant premieremēt ce qu'en dit Platon. Dieu, dit-il,
 „ osta premierement vne partie de l'vniuers, & puis
 „ en osta encore le double de celle la, & puis vne
 „ triple sesquialtere de la seconde, & triple de la pre-^F
 „ miere, & puis vne quatriēme double de la secon-
 „ de, & vne cinquiēme triple de la troisiēme, & puis
 „ vne sixiēme octuple de la premiere, & vne septiē-
 „ me vingtseptuple de la premiere. Apres cela il ré-
 „ plit les doubles & les triples interualles, en retren-
 „ chant encore vne partie de là, & la mettant au mi-
 „ lieu d'iceux, de maniere que en chascue interualle
 „ il y auoit deux medietez, l'vne surmontant & estāt
 sur-

A surmontee d'une mesme partie de ses extremittez,
 » l'autre surmontant de mesme nombre l'une de ses
 » extremittez, & estant surmontee par l'autre : mais
 » estants les interualles sesquialteres, sesquitiars &
 » sesquioctaves de ces liaisons la es precedentes di-
 » stances, il remplit tous les sesquitiars de l'interualle
 » sesquioctave, laissant de chascun d'eulx vne partie,
 » & la distance de ceste partie prise de nombre à
 » nombre, aiant pour ses termes deux cents cin-
 » quante six, & deux cents quarante trois. En quoy
 lon demande premierement de la quantité de ces
 B nombres, & secondement de l'ordre de la quan-
 tité, qui sont ceux qu'il prend en doubles interual-
 les : & quant à l'ordre, à sçauoir s'il les fault tous
 disposer en vne rengee, comme fait Theodorus,
 ou plustost, comme fait Crantor, en forme d'un
 Lambda, Λ , en mettant l'un sur la pointe, & puis
 en vne file, les doubles à part, & les triples en vne
 autre file : & quant à l'usage & à l'efficace qu'ils
 ont à la constitution & cōposition de l'ame. Quāt
 au premier nous reietterons ceulx qui disent qu'il
 fuffit es proportions, considerer quelle nature ont
 C les interualles, & les medietez, qui les remplissent,
 en quelques nombres que ce soit que lon suppose
 qu'ils aient des places capables des proportions, la
 doctrine s'en faisant egaleement : car encore que ce
 qu'ils disent soit vray, ils enseignēt peu sans exem-
 ples, & si empeschent vne autre speculation, où il y
 a grace & doctrine ensemble. Si donc commen-
 ceans à l'vnité nous mettons à part les nombres
 doubles, & les triples, ainsi comme luy nous mon-

stre, il y aura d'un costé, Deux, Quatre, Huit, & de D
l'autre costé, Trois, Neuf, Vingt-sept, qui seront
sept nombres en tout, en prenant l'unité commune, &
procedant la multiplication iusques à quatre : car
ce n'est pas en cest endroit seulement, ains en plu-
sieurs autres, que la conuenance du quaternaire au
septenaire est manifeste : or le quaternaire qui est
tant célébré par les Pythagoriens, est de trente six,
lequel a cela d'admirable qu'il est composé des
quatre premiers pairs, & des quatre premiers non-
pairs, & se fait par la quatrième couple ou coniu-
gaïson des nombres mis ensemble de reng : * 2
car la première couple est d'un & de deux, la se-
conde d'un & de trois : car mettant l'unité en pre-
mier lieu, cōme commune à tous les deux, il prend
huit, & puis vingt-sept, nous montrant presque
au doigt quelle place il baille à l'un & à l'autre
genre. Or traiter cela plus exquisement & plus
exactemēt, appartient à d'autres, mais ce qui reste
est propre à la matiere subiecte : car ce n'a point
cité par ostentation de sa suffisance es arts mathe-
matiques, qu'il a inferé parmy vn traitté de philo-
sophie naturelle des medietez Arithmetiques & F
Harmoniques, mais comme propos fort conue-
nable, & seruant à la composition & constitution
de l'ame, combien que les vns cherchent les susdit-
tes proportions aux mouuements plus ou moins
vistes, des sphæres des planettes, les autres plus aux
distances, aucuns aux grandeurs des astres, & les
autres qui semblent rechercher les choses vn peu
trop subtilement, aux diametres des Epicycles,
comme

A comme si l'ouurier eust pour ceste cause appliqué l'ame distribuee en sept parts aux corps celestes. Plusieurs aussi accommodent à cecy les inuentions Pythagoriques, triplans la distance des corps, depuis le milieu, ce qui se fait en mettant l'vnité sur le feu & sur l'Antichthone, c'est à dire sur la terre opposée à la nostre trois, sur la terre neuf, sur la Lune vingt-sept, sur Mercure octante vn, sur Venus deux cents quarante trois, & sur le Soleil sept cents vingt-neuf, pource qu'il est ensemble quarré & cubique: c'est pourquoy ils appelloient le Soleil

B mesme, aucunefois quarré, & autrefois Cube, & reduisent ainsi par triplation les autres astres: mais ils se mescomptent & se fouruoient grandement de la raison, si les demonstrations geometriques valent quelque chose, & sont bien plus croyables à cōparer à eulx, ceux qui en vsent, combien qu'encore eux ne prouuet pas leurs positiōs bien exactement, mais ils en approchēt bien pres, disants que le trauers ou diametre du Soleil cōparé à celuy de la terre, est en proportiō telle cōme de douze à vn, & le diametre de la terre à celuy de la Lune est triple,

C & que celle qui apparoist la moindre des estoiles fixes, n'a pas son diametre moindre que la troisieme partie de celuy de la terre, & que la totale boule de la terre à la totale boule de la Lune a proportiō, comme de vingt-sept à vn. De Venus & de la terre les diametres sont en double proportiō, & les boules en octuple proportiō, cōme de huit à vn, & l'interualle de l'vmbre qui fait l'Eclipse au diametre de la Lune triple, & la largeur que decline la Lune

hors du Zodiaque est vne douzieme partie, & les habitudes & respects d'icelle en distâces triangulaires ou quadrâgulaires, prénent forme ou de Lune couppee par moitié, qui est le premier quartier, ou de bossue deuant & derriere; & apres auoir passé six signes, elle fait la pleine Lune, côme vn accord & consonance de Diapason, & estant ainsi que le Soleil se meut fort lentemēt au Solstice, tāt d'Esté côme d'Hyuer, & fort vistemēt aux deux equinoxes, la proportion de ce qu'il oste aux iours, & adiouste aux nuicts, ou au contraire és premiers trente iours apres le Solstice d'Hyuer, est qu'il ad-
 iouste au iour de la sixieme partie de la basse, dont la plus longue nuict surmonte le plus long iour, & les trente iours d'apres la troisieme partie, & aux autres iours iusques à l'Equinoxe, la moitié en interualles fescuples & triples pour egaler l'inegalité du temps: & les Chaldeïens disent que le Prim-temps est au regard de l'Automne en proportion de Diatessaron, en Diapente vers l'Hyuer, & vers l'Esté de Diapason: mais si Euripides a bien limité les saisons, quand il a dit,

De quatre mois est l'Esté chaleureux,

Et tout autant dure Hyuer le hereux,

La moitié moins dure le bon Automne,

Et le Prim-temps, autant que luy fleuronne:

les saisons se chāgent en proportion de Diapason. Les autres donnants à la terre la place de la note Proslambanomenos, qui est A re, & à la Lune celle de Hypate, qui est B mi, à Mercure & à Venus celles de Diatonos & de Lichanos, qui seroient,
 comme

A comme C fa vt, & D sol re: ils mettent le Soleil sur la Mese, comme tenant le milieu du Diapason, distant de la terre d'une quinte, & de la Sphère des estoiles fixes, d'une quarte: mais ny la gentille imagination de ceulx cy ne touche droict à la verité aucunement, ny ceux la non plus ne viennent precisément au poinct. Mais ceulx qui veulent que Platon n'ait iamais pensé à cela, disent bien que cela se rapporte fort aux descriptions de la tablature des musiciens, laquelle consiste en cinq tetrachordes, qu'ils appellēt le premier Hypaton, comme qui diroit des basses notes, le second Meson des moienes, le troisieme Synemmenon des conioinctes, le quatrieme Diezeugmenon des disioinctes, & le cinquieme Hyperboleon des supremes. Aussi disent ils que semblablement les Planettes sont posez en cinq distances, dont l'une est depuis la Lune iusques au Soleil, & ceulx qui ont mesme reuolution que luy, comme Mercure & Venus, l'autre depuis ces trois iusques à l'enflammee planette de Mars, la troisieme iusques à Iupiter, la quatrieme iusques à Saturne, & la cinquieme iusques au ciel

C des estoiles fixes, tellement que les sons & notes qui bornent les cinq tetrachordes ont les proportions des interualles des astres. D'auantage nous sçavons que les anciens ne mettoient que deux notes Hypates, trois Netes, vne Mese, & vne Paramese, tellement que les notes estoient egales en nombre aux sept Planettes: mais les plus modernes, aians adiousté celle qui se nomme Proslambanomenos, plus basse d'un ton que l'Hypate, ont

paracheué toute la composition du Diapason; D
 mais ils n'ont pas retenu ny conserué l'ordre des
 consonances & accords qui est selon nature, par ce
 que le Diapente est premier que le Diatessaron en
 adioustant vn ton au bas, là où Platon tout notoi-
 rement l'adioustoit au hault : car il dit en ses liures
 de la R. P. que sur chascun des huit cieux y a vne
 Sirene assise qui le fait tourner, qu'elles iettēt chas-
 cune vne voix propre, & que de toutes ensemble
 il s'en cōtempere vne harmonie, & qu'elles y pre-
 nants plaisir, chātent les choses diuines en dansant
 vne danse sacree sous la douce consonance de E
 huit chordes, cōme aussi y auoit il huit termes pre-
 miers des proportions doubles & triples en com-
 ptant pour vn terme l'vnité à chascune des files: &
 les plus anciens nous ont aussi baillé neuf Muses,
 les huit, ainsi que Platon mesme dit, entour les cho-
 ses celestes, & la neuueme alentour des terrestres,
 euoquee pour les addoucir & mettre en repos
 au lieu d'erreur, de trouble & d'inegalité. Or con-
 siderez si l'ame estāt deuenue tres iuste & tres sage,
 ne manie pas le ciel & les choses celestes, par ces
 accords & mouuements qui sont en elle, estant F
 ainsi deuenue bonne par les proportions harmo-
 niques, dont les images sont empreintes sur les
 corps & parties visibles & qui se voient du mōde,
 mais la premiere & principale puissance d'icelles
 est visiblement mesme inseree en l'ame qui se mon-
 stre elle mesme accordante & obeissante à la meil-
 leure & plus diuine partie, toutes les autres y con-
 sentans aussi. Car le souuerain ouurier & createur,

trouuant

A trouuant vn desordre & vne confusion és mouuements d'icelle ame, desordónée & folle, qui discordioit tousiours à elle mesme, il en diuisa & se para vne partie, & en reconcilia & rassembla d'autres en vsant de nombres & de proportiōs, moienant lesquelles les plus sourds corps, comme des pierres, des bois, des escorces d'arbres, les boyaux mesmes des bestes, leurs nerfs, leurs fiels, & leurs presures estants contemperez & accommodez par raisons ensemble, exhibent des figures de statues merueilleuses à voir, des forces de drogues & medicaments, des sons d'instruments admirables.

A raison dequoy Zenon le Citieien conuioit les ieunes gens à aller voir & ouir les ioueurs des flustes & au bois, és Theatres, pour entendre, disoit il, quelle doulceur de sons & de voix rédent des cornes, des bois, des cannes & rouseaux, & autres matrieres, dont on fait les instruments de musique, quand on leur applique la raison des proportions des accords: car ce que les Pythagoriens souloient dire & affermer, que toutes choses ressemblēt aux nombres, cela auroit besoing de lōg discours, pour le monstrier: mais que tout ce en quoy il y auoit parauant discord & debat, à cause de la dissimilitude, & depuis y a eu accord & consonance des vns avec les autres, ne soit aduenü par vne contemperature, moderation & ordre, en receuant les raisons & proportions des nombres: il n'est pas iusques aux poëtes qui ne le sçachent, appellants les choses doulces, amiables & gracieuses *ἁρμονίαι*, cōme qui diroit, nombrees: & au contraire *ἁρμονίαι*,

les ennemis & aduersaires, comme si le discord & d
inimitié n'estoit autre chose qu'une disproportion:
& celuy mesme qui a fait en vers vne louange fu-
nebre au poëte Pindare, dit,

Accommodé pour aux estrangers plaire,

Et à pas vn des bourgeois ne desplaire.

en quoy il monstre bien qu'il tenoit pour vne
vertu singuliere ceste facilité accointable, de se sca-
uoir accommoder : comme Pindare luy mesme
dit de Cadmus,


Dieu l'appellant il escoutoit,

Sa vaillance point ne vantoit.

Et les Theologiës du temps iadis, qui sont les plus
anciens philosophes, ont mis és mains des Dieux
des instruments de musique, non qu'ils voulussent
dire, que ce fust à faire à vn Dieu de iouër & son-
ner de la fluste ou de la lyre, mais qu'il n'y a point
de plus grãd chef d'œuvre, que l'accord & la con-
sonance harmonique en toutes choses. Ne plus ne
moins d'ocques que celuy qui chercheroit les pro-
portions sesquialteres, sesquitierces & doubles, au
manche ou au ventre & aux cheuilles du luc & de
la lyre, seroit digne d'estre moqué, non qu'il ne
faille que ces parties la soient tresbien mesurees &
proportionnees les vnes enuers les autres, en lon-
gueurs, grosseurs & espesseurs, mais pource qu'il
fault chercher ceste conuenance la entre les sons:
aussi est il vray-semblable que & les corps des a-
stres, & les distances & interualles des Sphères, &
les vistes de leurs cours & reuolutions soient
proportionnez les vns enuers les autres, & enuers
le total

A le total de l'vniuers, comme des instruments bien tendus & accordez, encore que la mesure de la quantité nous soit incogneuë, & de nous ignoree, mais il fault estimer que le principal effect & efficace de ces nombres & proportiōs la, dont le souverain ouurier vſa, est la consonāce, accord & conuenance de l'ame en soy mesme, par le moien desquels nombres elle a remply le ciel mesme quand elle y fut apposee de biens infinis, & a disposé & ordonné les choses de la terre par saisons & mutations temperees & mesurees, tresbien & tressagement, tant pour la production que pour la conseruation des choses produictes & engendrees.

SOMMAIRE DV TRAITTE DE LA CREATION DE L'AME.

C  E Traitté qui est intitulé, De la creation de l'Ame, selon qu'elle est descrite au liure du Timæus de Platon, declare tout ce que & Platon & les Platoniques en ont escript, & amaine certaines proportions & similitudes Geometriques, lesquelles il estime appartenir à la contemplation & intelligence de la nature de l'ame: aussi apporte il des propositions de Musique & d'Arithmetique, & dit que la matiere a esté informee par l'ame, donnant à l'vniuers vne ame, & à chaque animal aussi la siene qui le regit & gouuerne, & l'introduit aucunement ingeneree, & aucunement aussi subiecte à

generation: mais la matiere eternelle aiant esté formée de Dieu, par le moien de l'ame, Que le mal & le vice est vn germe de la matiere : à fin, dit il, que lon ne pense point que Dieu soit cause de mal.

Tout le reste est de mot à mot dedans le Liure, & seroit chose superflue de le mettre deux fois.

DE LA FATALE DESTINEE.

Tout ce petit traitté est si miserablement par tout laceré & mutilé, que c'est plustost deuiner que traduire, ce que i'en ay fait : & pourtant prie-ie les Lecteurs de m'excuser si ie ne pleunis pas ce que i'en ay escrit.



E tascheray à t'escrire le plus briefuement & le plus clairement qu'il me sera possible, cher amy Pison, mon opinion touchant la fatale Destinee, pour satisfaire à ta demãde, encore que tu sçaches fort bien que ie n'escriis pas volontiers, & que ie suis fort retenu à ce faire. Premièrement doncques il fault que tu entendes que la fatale Destinee se nomme, & se prent & entend en deux sortes, l'vne comme estant action, l'autre comme estant substance. Quant à l'action, en premier lieu Platon l'a ainsi grossièrement esbauchée en son liure intitulé Phedrus, C'est l'ordonnance ineuitable, qui tousiours suit & accompagne Dieu:

A Dieu : Et en son traitté qui se nomme Timeus, Les loix que Dieu a establies aux ames immortelles, en la procreation de l'vniuers. Et en ses liures de la chose publique, il dit, que la Destinee fatale est la raison & parole de la fee Lachesis, fille de la Necessité: par lesquels traicts il nous dōne à entēdre non tragiquemēt, mais theologiquement, ce qui luy en semble. Et si d'adventure en reprenāt ces passages alleguez, on les vouloit vn peu plus familièrement expliquer, on pourroit dire en exposant sa description du Phædrus, que la Destinee fatale est la raison diuine intrāsgressable pour cause qui ne se peut diuertir ny empescher. Et selon ce qu'il en a dit en son Timeus, c'est la loy attachee à la nature & creation du mōde, par laquelle passent toutes les choses qui se font: car c'est ce que fait Lachesis, qui veritablement est la fille de Necessité, ainsi que nous auons desia dit, & cōme nous l'entendrons encore mieulx par ce que nous dirōs en ce traitté cy apres. Voyla dōcques que c'est que la Destinee, quād on la prent cōme action. Mais cōme substance, que ce soit l'ame de l'vniuers, laquelle est diuisee en trois parties, la premiere celle qui n'erre point, la secōde celle que lon estime errer, & la troisieme celle qui est au dessoubs du ciel, alētour de la terre, desquelles trois parties de l'vniuers, la plus haulte s'appelle Clotho, la seconde se nomme Atropos, & la plus basse Lachesis, laquelle reçoit les influences & effi-caces de ses deux sœurs celestes, & les transmet & attache aux choses terrestres, qui sont dessoubs son gouuernemēt. Ainsi dōcques auōs nous exposé ce

qu'il fault dire de la destinee, à la prendre comme **D**
substâce, quelle elle est, quelles parties elle a com-
ment elle est ordonnee, & en soy mesme & enuers
nous : mais quant aux particularitez de tout cela, il
y a vne autre fable és liures de la chose publique
qui les donne couuertement à entendre, & nous
auôs essayé de te les expliquer au mieux que nous
auons peu. Mais reuenans à nostre destinee, com-
me action, discourons-en, pource que c'est d'elle
que se font la plus part des questions morales, na-
turelles, & dialectiques. Or auons nous desia au-
cunement desiny que c'est, & voions maintenant **E**
quelle elle est : encore que à plusieurs il semble
fort estrange, ie dis que la destinee n'est point infi-
nie, mais finie & terminée, combien qu'elle em-
brasse, cōme dedans vn cercle, l'infinité des choses
qui sont & ont esté depuis temps infiny, & qui se-
ront iusques à infinis siècles : car ny loy, ny raison,
ny autre chose diuine ne sçauroit estre infinie, ce
que tu entendras mieux, si tu consideres la reuolu-
tion vniuerselle & tout le temps vniuersel, quand
les vistes des huit reuolutiōs, c'est à dire des huit
spheres, cōme dit Timæus, aians paracheué leurs **F**
cours reuiennent à vn mesme poinct, estants me-
sures par le cercle du Mesme qui va tousiours d'v-
ne sorte : car en ceste raison qui est terminée & fi-
nie, toutes les choses qui sont, tant au ciel comme
en la terre, consistent par necessité de là sus, & se-
ront derechef remises en mesme situation, & dere-
chef rendues en leur premier cōmancement : par-
quoy la seule habitude du ciel ordonnee en toutes
choses;

A choses, tant enuers soy mesme, qu'enuers la terre, & enuers toutes les choses terrestres, apres longues reuolutions reuiendra derechef quelquefois, & celles qui suiuent apres consecutiuelement, & qui s'entretiennent de reng, baillent aussi consequemment chascune ce qu'elle apporte par necessité : car à fin que la matiere soit plus esclaircie, supposons que tout ce qui est en nous & autour de nous aduiēne & se face par le cours des cieulx & influences celestes, comme estants cause efficiente entierement de ce que i'escris cecy maintenant, & de ce que tu fais, ce que tu fais aussi presentement, & en la mesme sorte que tu le fais. Par cy apres dōcques, quād la mesme cause reuiendra, nous ferons les mesmes choses que nous faisons, & en la mesme sorte, & redeuiendrons les mesmes hōmes, & ainsi de tous les autres, & ce qui suit apres aduiendra aussi par la cause suiuiante : & brief toutes choses qui seront aduenues en chascune des vniuerselles reuolutiōs, seront derechef rēdues les mesmes: par ainsi apparoit il ce que nous auons desia dit au parauāt, c'est que la destinee estant en quelque sorte infinie, est c neantmoins terminee & finie, & aussi ce que nous auons dit, que c'est comme vn cercle, se peut aucunement voir & comprendre: car ainsi comme le mouuement du cercle est vn cercle, & le temps qui le mesure est vne maniere de cercle, aussi la raison des choses qui se font & qui aduiennent en cercle, à bō droit se peult estimer & dire cercle: cela doncques, quand il n'y auroit autre chose, nous mōstre presque que c'est que la destinee, non pas la parti-

culiere, ne celle de chascune & en chascune chose. **D**
 Quelle donc est celle là? c'est la generale en mesme
 espece de raison, tellement qu'on la pourroit ac-
 comparer à la loy ciuile: car premierement elle
 commande la plus part des choses, si non toutes,
 au moins par supposition, & puis elle comprend,
 autant qu'il luy est possible, toutes les choses qui
 appartiennēt au public en general: & pour miculx
 donner à entendre l'un & l'autre, il le fault speci-
 fier par exemple. La loy ciuile parle & ordonne
 en general du vaillāt hōme, & du lasche & couard,
 & ainsi des autres, mais ce n'est pas à faire à la loy **E**
 de parler en particulier de cestui-cy & de celuy là,
 ains l'vniuersel en general principalement, & le
 particulier qui est compris sous le general conse-
 quemment: car nous ne dirions iamais que ce soit
 à la loy ciuile de specifier qu'il fault punir ce parti-
 culier icy pour la couardise, & remunerer celuy là
 pour la vaillance, pourautāt que la loy en a desfiny
 en puissance, nō pas en paroles expresses: tout ainsi
 comme la loy des medecins & des maistres des ex-
 ercices, en maniere de parler, comprend les choses
 particulieres & speciales dedans les generales, tout **F**
 ainsi fait la loy de nature, determinant les choses
 generales, principalement & premierement, & les
 particulieres consequemmēt & secondement: ainsi
 se peuuent dire les choses particulieres & indiui-
 dues en aucune maniere destinees, pour ce qu'elles
 le sont par consequence des generales. Mais à l'ad-
 uenture pourroit on dire que cela seroit trop sub-
 plement recherché, & au contraire que les parti-
 culieres

A culieres choses & indiuidues precedent la composition des generales, & que le general est recueilly pour le particulier: or ce pourquoy autre est, precede tousiours ce qui est pour luy: toutefois ce n'est pas icy le lieu où il faut traiter ceste difficulté là, ains en faudroit parler ailleurs: mais que la Destinée ne comprenne pas toutes choses nettement & expressément, ains seulement les vniuerselles & generales, cela soit pour le present comme tout resolu, tant pour ce que nous auons desia dit que pour ce que nous dirons cy apres, par ce que le

B finy & terminé conuenant proprement à la prudence diuine, se voit plus és choses vniuerselles & generales que non pas és particulieres: telle est la loy diuine, & aussi la ciuile, & l'infiny est és choses indiuidues & singulieres. Apres cela il nous fault declarer que c'est que par supposition, & estimer que la Destinée est telle: nous auons doncques appellé par supposition, ce qui n'est pas posé de soy ny par soy mesme, ains supposé & adioinct apres vn autre qui signifie suite & consequence, & cela est l'ordonnance d'Adrastie, c'est à dire la

C loy & arrest ineuitable, à laquelle si quelque ame se pouuoit associer, elle verroit par consequence tout ce qui seroit iusques à l'autre generale reuolution, & seroit exempt de mal, & si elle le pouoit tousiours faire, elle ne souffriroit iamais aucun dommage: voyla que c'est que nous appellons par supposition, & general: & que la Destinée fatale soit telle, il est tout manifeste tant par la substance que par son nom car elle s'appelle *ἀναισθησία*,

comme si lon vouloit dire *enquén*, c'est à dire de- **D**
pendente & enfilee, & est vne loy & vne ordon-
nance, pour autant que les choses y sont ordonnées
& disposees, selon & en ensuiuāt celles qui se font
ciuilement. Apres il nous fault venir à traiter aussi
de la relation, c'est à dire comment se refere & se
porte la fatale Destinee enuers la prouidence diui-
ne, & comment enuers la fortune, & que c'est ce
qui est en nous, & qui est contingēt, & toutes cho-
ses semblables, & d'auantage decider en quoy, &
comment il est faulx, & en quoy & comment il est
veritable, que toutes choses aduiennēt & se facent **E**
par fatale destinee: car si lon entend que toutes
choses soient comprises & contenues en la fatale
destinee, il fault conceder que ceste proposition est
veritable: & si lon veult mettre toutes les choses
qui se font entre les hommes, & sur la terre, & au
ciel mesme, en la fatale destinee, concedons le en-
core pour le present: mais si lon entend ce qu'il
semble, que ce mot d'estre fatal emporte plus que
non toutes choses, ains seulemēt ce qui suit & qui
est dependant soit fatal, alors ne fault il pas dire ne
confesser que toutes choses soient en la fatale de- **F**
stinee: car tout ce que la loy comprend, & dōt elle
parle, n'est pas legitime ny selō la loy, par ce qu'elle
comprend trahison, elle traite de la lascheté d'a-
bandonner son reng en bataille, de l'adultere, &
de plusieurs autres choses semblables, dont on ne
sçauroit dire que pas vne soit legale, attēdu mesme
que ny faire vaillamment, tuer les tyrans, ny faire
aucun autre acte vertueux, ne se doit à mon aduis
appeller

A appeller legal, par ce que legal proprement est ce qui est commandé par la loy : & si la loy le cõmande, comment ne seroient rebelles à la loy & transgresseurs d'icelle ceux qui ne feroient de grandes vaillances d'armes, & qui ne tueroient les tyrans, ou qui ne feroient quelques autres tels actes insignes de vertu? & s'ils sont transgresseurs de la loy, pourquoy donc ne les punit on? mais si cela n'est pas iuste ny raisonnable, il faut doncques aussi cõfesser, que ces choses la ne sont pas legales ny selon la loy, & que legal & selon la loy est ce qui nommeement est prefix, & expressément commandé par la loy en quelque action que ce soit: ainsi sont seulement fatales & selon la destinee fatale, celles qui sont faites suivant la disposition diuine precedente, tellement que la fatale destinee comprét bien toutes choses, mais toutefois plusieurs de celles qui sont en elle comprises, & presque toutes celles qui precedent, à proprement parler, ne se doiuent point prononcer estre fatales, ny selon fatale destinee. Cela estant ainsi, il faut maintenant declarer comme ce qui est en nous, le liberal arbitre, la fortune, le possible & le contingent, & autres choses semblables, qui sont colloquees entre les precedentes, peuuent subsister avec la fatale destinee, & la fatale destinee avec elles: car la fatale destinee embrasse tout comme il semble, & toutefois ces choses la n'aduiennent pas par necessité, ains chascune d'icelles selon le principe de son naturel. Or est-il que le possible, comme estant genre, doit preceder & aller deuant le contingent, & le con-

ríngent, comme subiect & matiere, doit estre sup-^D
 posé à ce qui est en nous, & ce qui est en nous en
 doit vser & s'en seruir comme maistre & seigneur,
 & la fortune entreuient en ce qui est en nous par
 la propriété du contingent, qui est de pancher en
 l'vne & en l'autre partie: ce que tu comprendras
 plus facilement quand tu considereras que tout
 ce qui se produit, voire la production mesme, ne
 se fait pas sans vne puissance, & la puissance n'est
 pas sans vne substance: comme, pour exemple, la
 production & le produict de l'homme n'est pas
 sans vne puissance qui est en l'homme, & l'hom-^E
 me en est la substance. De la puissance qui est en-
 tredeux vient la substance, qui est le puissant, &
 la production & le produict sont les possibles: y
 aiant doncques ces trois choses, la puissance, le
 puissant, & le possible, auant que la puissance
 puisse estre, il est force que le puissant, comme
 son subiect, soit presupposé, & aussi est force que
 la puissance subsiste deuant le possible. Par ceste
 deduction doncques se peult aucunement enten-
 dre & declarer que c'est que le possible, & le peult
 on grossement definir: que c'est ce que la puissan-^F
 ce peult produire en estre: & plus proprement ce-
 la mesme, en y adioustât, prouueu qu'il n'y ait rien
 au dehors qui l'empesche: mais entre les choses
 possibles il y en a qui iamais ne sçauroient estre
 empeschees, comme celles qui se font au ciel, à
 sçauoir le leuer & coucher des estoiles, & choses
 semblables, les autres peuuent bien estre empes-
 chees, côme sont la plus part des choses humaines,

- A** & plusieurs aussi de celles qui se font en l'air. Les premières, cōme se faisans par nécessité, s'appellent nécessaires, les autres, qui peuuent aduenir en vne sorte & en vn autre s'appellent contingentes, & les pourroit on ainsi descrire toutes deux. Le nécessaire possible celuy qui est contraire à l'impossible, & le contingent possible celuy duquel le contraire est possible: car que le Soleil se couche c'est chose ensemble nécessaire & possible, d'autant qu'il est contraire à l'impossible que le Soleil ne se couche point, mais que le Soleil couché il viene de la
- B** pluye, l'vn & l'autre est possible & contingent. Et puis derechef entre les choses contingentes aucunes arriuent le plus souuent, les autres rarement & peu souuēt, les autres egalemēt, autant d'vne sorte que d'autre, comme elles se rencontrent: & celles la sont opposees à elles mesmes, à sçauoir celles qui arriuent le plus souuent à celles qui aduiennent raremēt, & celles la pour la plus part sont subiectes à la nature, mais ce qui aduiēt egaleement autant en vne sorte qu'en l'autre, est en nous: car que sous l'estoile caniculaire il face chaud ou froid, chaud
- C** le plus souuent, & froid peu souuent, tous deux sont soubmis à la nature: mais se promener ou non, & autres semblables, dont l'vne & l'autre est soubmise au liberal arbitre del'hōme, cela s'appelle en nous & en nostre election, mais plus vniuersellemēt s'appelle il estre en nous: car il y a deux sortes de cest estre en nous, l'vne qui procede de passion, comme de courroux ou de volupté, l'autre de discours & de iugemēt de raison, qui proprement

se peut nommer estre en nostre election:& y a rai-
 son pourquoy ce possible & contingent qui a esté
 nommé en nous, ne le soit pas pour mesme regard,
 ains pour diuers: car eu esgard à l'aduenir, il s'ap-
 pelle possible & contingent, & eu esgard au pre-
 sent, il se nomme en nous & en nostre arbitre: si le
 pourroit on ainsi definir, que le contingent est ce
 qui est, & son contraire possible: & ce qui est en
 nous l'une des parties du contingent, à sçauoir cel-
 le qui presentement se fait selon nostre appetit:
 parquoy il appert que le possible par nature prece-
 de le contingent, & que le contingent subsiste de-
 uant ce qui est en nous. Ainsi auons nous presque
 déclaré quel est chascun d'iceux, que c'est dont il a
 esté ainsi appelé, & les qualitez qui leur sont ad-
 iacentes: il reste maintenant à traiter de la Fortu-
 ne & de l'accident ou cas fortuit, & s'il y a autre
 chose semblable dont on ait accoustumé de dispu-
 ter. Il est certain que Fortune est vne cause, mais
 entre les causes il y en a aucunes qui sont causes de
 soy & par soy, les autres le sont par accident: com-
 me d'une maison ou d'une nauiure, les causes pro-
 pres par soy sont le maçon & le charpentier, mais
 par accident le Musicien & le Geometrien, & tou-
 te autre qualité qui peut aduenir au maçon & au
 charpentier, tant au corps cōme en l'ame, ou bien
 aux choses exterieures: dont il appert que la cause
 par soy ne peut estre que determinee, certaine &
 vne, mais que les causes par accident ne sont ia-
 mais vnes, mais infinies & indeterminées, car plu-
 sieurs accidents totalement differents, voire infi-
 nis,

Anis, peuuent estre ensemble en vn mesme subiect. Ceste cause doncques par accident quand elle se rencontre en chose qui se fait à quelque fin, & qui soit en nostre arbitre & election, alors elle s'appelle fortune, comme trouuer vn thresor en fouillant vn fossé ou vn creux pour plâter vn arbre, ou bien faire ou souffrir quelque chose extraordinaire, en fuyant ou chassant, ou bien autrement en marchant, ou seulement en se retournant, prouueu que ce ne soit pas à la fin de ce qui est aduenu, ains à quelque autre intention. Voila pourquoy quelques vns des anciens ont desfiny la fortune estre la cause incogneuë & impreuoyable au discours de la raison humaine : mais selon les Platoniques qui en ont approché plus pres par la raison, on la definit ainsi, La Fortune est cause par accident és choses qui se font à quelque fin, & qui sont en nostre election : & puis ils y adioustent encore, improuueuë & incogneuë au discours de la raison humaine : combien que le rare & l'estrange par mesme moien apparaisse aussi en ce genre de causes par accident : mais que c'est que cela, s'il n'apparoist assez par les oppositions & disputes faittes alencontre, au moins apparostrait il tresclairement par ce qui est escript dedans le Phædon de Platon, là où sont ces paroles : N'auoient ils doncques pas entendu comment auoit esté fait le iugement? Ouy bien, car quelqu'un le nous estoit venu dire, dont nous nous estions bien fort esmerueillez, de ce que y aiant long temps que le iugement estoit donné, il estoit mort long espace depuis.

» Qui fut cause de cela, Phédon? Cefut vne for-
 » tune qui luy aduint, Echecrates: car le iour de de-
 » uant le iugement, la prouë de la galere que les A-
 » theniens enuoyoit en l'Isle de Delos, auoit esté
 » couronnée. Esquelles paroles il faut noter que ce
 mot, Il luy aduint, ne se doit pas entendre simple-
 ment pour, il fut fait, mais plustost pour, il arriua
 par vn concours de plusieurs causes ensemble l'v-
 ne sur l'autre, par ce que le presbtre couronna de
 festons le vaisseau à autre fin & autre intention, &
 non pas pour l'amour de Socrates, & les iuges l'a-
 uoient condamné pour autre cause aussi, mais l'e-
 uenement & accident fut estrange & de telle for-
 te, comme s'il fust arriué par preuoyance ou de
 quelque humaine creature, ou de quelque autre
 superieure nature. Et quant à la definition de For-
 tune cela suffise, qu'il faut necessairemēt qu'il sub-
 siste quant & quant quelque chose cōtingente, de
 celles que lon fait à quelque fin, dont le nom luy a
 esté imposé, & qu'il fault que deuant il y ait vn
 subiect des choses qui sont en nous & en nostre ar-
 bitre: mais accident ou bien cas fortuit s'estend
 plus amplement que ne fait la fortune, car il la cō-
 prent elle mesme, & plusieurs autres choses qui
 peuuent aduenir tantost d'vne sorte & tantost d'v-
 ne autre: & ainsi comme la deriuation du mot
 mesme *αὐτόματον* le monstre, c'est ce qui aduint
 au lieu d'vn autre, quand ce qui estoit l'ordinaire
 n'aduint pas, mais vn autre en son lieu, comme
 seroit le froid au temps de l'estoile caniculaire, car
 quelquefois il y fait froid, & non pas sans cause, te-
 merai-

A merairement : en somme tout ainsi que ce qui est en nous & arbitraire est partie du contingent, aussi est la fortune partie du cas d'adventure ou de l'accident, & sont tous deux euenemens conioincts & dependans de l'un & de l'autre, à sçauoir le cas fortuit du contingent, & la fortune de ce qui est en nous & qui est arbitraire, & encore non pas de tout, mais de ce qui est en nostre election, ainsi comme nous auons desia dit. Voila pourquoy ce cas fortuit est cōmun autant aux choses qui n'ont point d'ame, comme à celles qui sont animees,

B là où la fortune est propre à l'homme seul qui a ses actions volontaires : au moien dequoy on estime que ce soit tout vn estre fortuné & estre heureux, & l'heur consiste en bien faire, & le bien faire est propre à l'homme, & à l'homme encore parfait.

Voila doncques les choses qui sont comprises dedans la fatale destinee, c'est à sçauoir, le contingent, le possible, l'election, ce qui est en nous, la fortune, l'accident ou cas fortuit, & leurs adioincts, comme sont ce qui est signifié par ces mots, peut estre, &, à l'adventure, mais ce n'est pas

C à dire que pour estre cōtenues dedans la destinee, pour cela elles soient fatales. Il reste maintenant à discourir de la prouidence diuine, car elle comprend mesme la fatale destinee. La prouidence doncques supreme & premiere est l'intelligēce & volōté du premier & souuerain Dieu, qui fait bien à tout ce qui est au monde, par laquelle toutes les choses diuines en tout & par tout ont esté tres-bien & tres-sagement ordonnees & disposees. La

seconde prouidence, est celle des seconds Dieux D
qui vont par le ciel, par laquelle les choses tempo-
relles & mortelles s'engendrent ordonneement &
regleement, & ce qui appartient à la conseruation
& continuation de chasque genre des choses. La
troisième se peut vray-semblablement appeller la
prouidence des Démonz qui sont parmy la terre,
ordonnez pour obseruer & regir les actions des
hommes: ceste troisième prouidence se voit, mais
toutefois proprement & principalement se nom-
me prouidence la supreme & premiere: si ne fau-
dras point de dire, encore que nous contredisions E
en cela à quelques philosophes, que toutes choses
se font par la prouidence & par la fatale destinee,
& par la nature aussi, mais aucunes choses par la
prouidence, les vnes par l'une, & les autres par
les autres, & aucunes par la fatale destinee: & la
fatale destinee entieremēt par la prouidence, mais
la prouidence nullement par la fatale destinee, &
pour le present cela s'entend de la premiere & sou-
ueraine prouidence. Or tout ce qui se fait par au-
tre, quelque chose que ce soit, est tousiours poste-
rieur à ce par qui il se fait, comme ce qui se fait par F
la loy est postérieur à la loy, & ce qui se fait par na-
ture est postérieur à la nature: aussi ce qui se fait
par la fatale destinee est postérieur à la fatale desti-
nee, & faut qu'il soit plus recent & plus moderne:
parquoy la prouidence supreme est la plus ancien-
ne de toutes, excepté celuy seul de qui elle est l'in-
telligence ou la volonté, ou toutes les deux en-
semble, qui est le souuerain auteur, ouurier &
pere

A pere de toutes choses. Et pour quelle cause, dit Ti-
meus, est-ce qu'il a construit toute la machine de
ce monde? Pour ce qu'il est tout bon, & qu'en ce-
luy qui est tout bon ne se peut iamais imprimer ny
engendrer aucune enuie, ains en estant hors du
tout en tout, il vouloit autant qu'il est possible que
toutes choses luy ressemblassent. Qui recevra ceste
origine de generation & de la creation du monde,
telle comme les hommes nous l'ont laissée par es-
cript, il fera tresbien: car Dieu voulant que tou-
tes choses fussent bonnes & rien de mal, entant
B qu'il estoit possible, il prit tout ce qu'il y auoit de
visible, qui n'estoit pas à requoy, immobile, ains
se mouuoit temerairement & confusément sans
ordre ne regle, & le renga en bonne ordonnance
hors de celle confusion, aiant en soy mesme iugé
que l'un estoit trop meilleur que l'autre: car il n'e-
stoit ny n'est conuenable à celuy qui est tresbon,
de faire chose qui ne fust tresbonne & tresbelle: il
faut doncques estimer que la Prouidence, ie dis la
premiere & souueraine, constitua premierement
cela, & puis de reng les choses qui ensuient ius-
C ques aux ames des hommes, & apres il crea les
huiet Sphères, autant comme il y a de principaux
astres, & distribua à chascune vne ame, & les mit
toutes comme dedans vn chariot sur la nature de
l'univers, & leur monstra les loix & ordonnan-
ces de la fatale Destinee. *

Qui sera celuy qui ne croira que par ces paroles
il declare disertement & manifestement la Desti-
nee fatale estre comme vne tribune aux haren-

gues, & par maniere de dire vne constitution de D
loix ciuiles conuenables aux ames des hommes,
de laquelle il rend les causes puis apres? Quant à
la seconde prouidence, il la remarque & signifie
» par ces paroles: Leur aiant ordonné loy de toutes
» choses, à fin que s'il aduenoit apres quelque fau-
» te, il fust exempt & non cause de la malice d'aucu-
» ne chose, il en espendit les vnes par la terre, les
» autres sur la lune, les autres sur les autres outils &
» instrumens du temps, apres laquelle distribution il
» donna mandement aux ieunes Dieux de faire des
» corps mortels, & y adiouster ce qui defailloit à l'a- E
» me humaine, & apres auoir fait & parfait tout
» ce qui y est adherent & consequent, qu'ils regis-
» sent & gouuernassent le mieux & le plus sagement
» qu'il leur seroit possible le mortel animal, à fin
» qu'il ne fust pas luy mesme cause de ses maux. En
ces paroles, qu'il fust exempt & non cause de la
malice d'aucune chose, par apres il cote & mon-
stre tresclairement à vn chascun la cause de la fata-
le Destinee:& l'ordre & office de ces ieunes Dieux
nous montre la seconde prouidence, & si semble
encore qu'il ait atteint & touché en passant la F
troisieme, si c'est pour cela qu'il a estably les loix &
ordonnances, à fin qu'il ne peust estre accusé com-
me autheur de la malice qui seroit en chascun, puis
apres: car Dieu qui est exempt de toute malice n'a
que faire de loix ny de fatale destinee, mais chas-
cun de ces petits Dieux, tiré par la prouidence de
celuy qui les a engendrez, fait ce qui est de son of-
fice. Que cela soit vray, & que ce soit l'aduís & la
sen-

A sentēce de Platon, il me semble que les paroles du
 legiſlateur en ſes liures des Loix en donnent aſſez
 ” ſuffiſans teſmoignages. S’il y auoit hōme qui fuſt
 ” ſuffiſant de ſa nature, ou par diuine fortune engē-
 ” dré & né ſi heureuſement qu’il peuſt comprendre
 ” cela, il n’auroit que faire de loix qui luy comman-
 ” daſſent: car il n’y a ny loy ny ordonnance qui ſoit
 ” plus digne ny plus puiſſante que la ſcience, & n’eſt
 ” pas loiſible qu’il ſoit ſerf ny ſubiect à perſonne, ſ’il
 ” eſt véritablement & realemēt franc & libre de na-
 ” ture, ains doit commander par tout. Quant à moy,
B i’entend & interprete ainſi la ſentence de Platon:
 car eſtant la Prouidence triple, la premiere, com-
 me celle qui a engendré la fatale deſtinee, en quel-
 que maniere la comprend: la ſeconde eſtant en-
 gendree avec elle, eſt auſſi totalement comprise &
 ambrassée quand & elle: la tierce, comme eſtant
 depuis engendree de la fatale deſtinee, & comprise
 deſſous elle, en la meſme ſorte que le ſont ce qui
 eſt en nous & la fortune, cōme nous auons dit: car
 ceux à qui l’aſſiſtance de la puiſſance d’un Démon
 aide, ainſi comme dit Socrates, expoſant que c’eſt
C que l’ordonnance inéuitable d’Adraſtia, Ce ſont
 ceux là que toy meſmes ſens & entends bien, les-
 quels croiſſent & viennent en auant incontinent:
 ainſi faut il attribuer à ceſte tierce prouidence la
 faueur que ſont les Démons à quelqu’un, & ce que
 ſoudainement ils deuiennent grands par force de
 la deſtinee: brief il ne peut eſtre douteux à per-
 ſonne que cela n’appartiene à la deſtinee. Et à l’ad-
 uenture pourra il eſtre trouué plus vray ſemblable,

que mesme la seconde prouidence fust comprise D
soubz la destinee, & en somme tout ce qui se fait
entierement, attendu mesme que la destinee, cōme
substance, a esté par nous diuisee en trois parties: &
le propos de la chaine cōprend les reuolutions des
cieux au nôbre & au reng des choses qui aduiennēt
par supposition: mais quāt à cela ie n'en debatroy
pas beaucoup, à sçauoir s'il les faut appeller, adue-
nants par supposition, ou bien conioincts à la De-
stinee, attendu que à la Destinee mesme cōmande
vn autre destin. Nostre opinion doncques, à la dire
par articles abbregez, est telle. Mais la sentence cō- E
traire ne met pas seulement toutes choses soubz la
Destinee, ains selon & par la destinee. Or tout ac-
corde à autre, & ce qui accorde à autre, il est tout
clair qu'il est autre aussi. Selon ceste opinion dōc-
ques, le Contingent a esté dit le premier, ce qui est
en nous le second: la fortune, le troisième: & l'acci-
dent ou cas fortuit, avec tout ce qui depend d'eux,
louange, blasme, & tous leurs alliez, le quatrième:
le cinquième & dernier de tous, les prieres aux
Dieux, leurs ceremonies & seruices. Au demourāt,
quant à ces argumens Sophistiques que lon ap- F
pelle Oyseux, & Moissonneurs, & à celuy que
lon appelle contre la Destinee, ce ne sont que vai-
nes arguces & laqs sophistiques, selon ceste opi-
nion: mais selon la sentence contraire, la premiere
& principale conclusion est, que rien ne se fait sans
cause, & que tout se fait par causes precedentes: la
seconde, que ce monde est gouuerné par nature,
qu'il conspire, consent & cōpatit avec soy mesme:
la

A la troisiéme semble plustost estre de resmoignages, dont le premier est de la diuination qui est approuuée de toutes sortes de gens, comme estant véritablement en Dieu : le second l'equanimité, & patience des sages, qui prennent doucement, & portent patiemment tout ce qui aduiet, comme aduenant par ordonnance diuine, & ainsi qu'il appartient : le troisiéme, ce propos qui est cōmun & vulgaire en la bouche de tous, à sçauoir, que toute proposition est ou vraie ou faulse. Nous auons ainsi estrainct ce discours en petit nombre
B de courts articles, à fin que nous comprinssions en peu de paroles toute la matiere de la destinee. S'il faut examiner tous ces poincts la de l'une & de l'autre opinion avec plus diligente inquisition, nous le ferons particulièrement cy apres.

*Tout y est corrompu, & ne s'en peut rien
tirer de solide resolution.*

QUE LES STOIQVES DISENT

DES CHOSES PLUS ESTRANGES

C que ne font les Poëtes.



N reprend Pindare de ce qu'il feint par trop estrangement, hors de toute verisimilitude, que Ceneus estoit si dur que sa peau ne pouuoit estre entamée par aucun ferremēt, & que, sans estre blecé, il fut enfon-
dré dedans la terre, comme il dit,

D'vn roide pied fendant la terre:

D

Mais ce Lapiſſe icy, c'eſt à dire, ce ſage des Stoïques, forgé d'vne impaſſibilité, cōme d'vn metal plus dur que diamāt, n'eſt pas tel qu'il ne ſoit bien quelquefois blecé, quelquefois malade, & quelquefois atteinct de douleur: & toutefois, cōme ils diſent eulx, il eſt touſiours ſans peur, ſans triſteſſe, il ne peut eſtre vaincu ne forcé, ſi biē on le naure, que lon luy face tous les maux du monde, que lon le tourmente, que lon luy ſaccage & deſtruife ſon païs deuant ſes yeux, & autres telles calamitez. Le Ceneus de Pindare, encore qu'il ſoit aſſenē de
coups de traict, pour cela n'en eſt point blecé: mais le ſage des Stoïques, encore qu'on le tienne enfermē, il n'eſt point pour cela priuē de ſa liberté: qu'on le iette du hault en bas d'vn precipice, il n'eſt point forcé: qu'on luy donne la gehenne, il n'eſt point tourmentē: que lon le bruſle, on ne luy fait point de mal: encore qu'il tōbe en luictant, il eſt inuincible: qu'on l'environne de muraille, il n'eſt point pourtant aſſiegē: qu'il ſoit vendu par les ennemis, ſi eſt il imprenable, reſemblant proprement à ces nauires qui ont ces belles inſcriptiōs
en pouſſe, Heureuſe nauigation, ou Prouoyance ſalutaire, ou Remede cōtre tous dangers, & neantmoins elles ſont tourmentees en mer, & quelquefois froiſſees contre vn rocher, & enſonrees iuſques au fond de la mer. Iolaüs, ainſi comme le poète Euripides feint, par la priere qu'il feit aux Dieux, deuint ſoudainement de vieil, imbecille & decrepitē qu'il eſtoit, ieune, diſpos & gaillard pour
com-

A combattre: aussi le sage des Stoïques estant hier malheureux & meschant, au iourd'huy se trouuera tout soudain changé en homme de bien & vertueux, & deuiendra de ridé, passe, maigre & deffait vieillard, comme dit Æschylus,

De mal de reins griesuement trauaillé,

Et de douleurs tendu & tenaillé,

ieune, beau, dispos, plaissant & agreable aux hommes & aux Dieux. Minerue, ainsi que dit Homere, osta à Vlysses ses rides, sa teste chaue & sa laideur, à fin qu'il apparust beau: mais le sage de ceux icy, B encore que la vieillesse ne se parte point de son corps, ains au contraire qu'elle y adioute & augmente toutes incommoditez, demourant bossu, si ainsi se rencontre, besgue, boiteux & edenté, n'est pour cela laid, ne difforme, ne contrefaict. Et comme lon dit que les escarbots fuyent les bonnes & douces odeurs, & cherchent les puantes, aussi l'amour des Stoïques s'attachant aux plus laids & plus difformes, apres les auoir par leur sapience tournez en toute venusté & beauté, se depart d'auec eux. Chez les Stoïques, qui le matin à C l'aduenture estoit tresmeschant, le soir sera deuenu treshomme de bien, & qui s'allant coucher estoit fol, ignorant, outrageux, intemperant, ou bien esclau, pauvre & indigent, le lendemain se leuera Roy, riche, bien heureux, chaste, iuste, ferme & constant, non point subiect à varieté d'opinions, non qu'il ait soudainement fait barbe ne poil en vn corps ieune & tendre, mais bien aiant engédre en vne ame debile & molle, effeminee & incon-

stante, vn entendement parfaict, vne souueraine D
prudence, vne disposition egale aux Dieux, vne
science certaine sans branlement d'opinions, &
vne habitude immuable, non que premierement
la meschanceté qu'il auoit s'en soit allee petit à pe-
tit, mais tout soudain estât deuenue d'une tresmau-
uaise beste vn demy Dieu, vn Démon, ou vn Dieu
tout entier. Car depuis qu'ils ont pris la vertu en
l'eschole Stoïque, ils peuuent dire,

Ce que voudras demande par souhait,

Incontinent il t'aduendra tout fait.

Ceste vertu leur apporte richesse, elle meine quād E
& soy vne royauté elle donne bonne fortune, elle
rend les hommes bien-heureux, n'aians besoing
de rien, contents de soy, encore qu'ils n'aient pas
vne seule drachme d'argent en leur maison. Les
fables des poëtes sont controuuees avec plus de
raison, car iamais elles n'abandonnent Hercules
en necessité de viures ou d'aucunes choses neces-
saires, ains semble qu'il y a tousiours vne viue sour-
ce quand & luy, dont il en coule à foison pour luy,
& pour ceux de sa compagnie. Mais celuy qui a
vne fois appris la chéure Amalthee, & la corne d'a- F
bondance des Stoïques, il est incontinent riche, &
si mendie sa vie des autres: il est Roy, & si enseigne
pour de l'argent à coudre & descoudre des syllo-
gismes: luy seul possède tout, & si paye le louage
de sa maison, il achapte son pain avec de l'argent
qu'il emprunte à vsure bien souuent, ou qu'il
demande à ceux qui n'en ont point. Il est bien
vray que le Roy d'Ithacque Vlysses demande
bien

A bien l'aumosne, mais c'est pource qu'il ne veult pas qu'on le cognoisse, & contrefaict le belistre miserable le plus qu'il peult. Mais celuy qui est yssu de l'eschole Stoïque, criant à pleine teste, C'est moy seul qui suis Roy, c'est moy seul qui suis riche, se fait souuēt voir aux portes & huys d'autrui disant,
 A Hipponaux donnez vn vestement,
 Car de froidure il transfit durement,
 Clacque des dents & branle des machoires.

LES CONTREDICTS DES PHILOSOPHES STOÏQUES.



N premier lieu ie voudrois que lon veist vne conformité & accord entre les opinions & les vies des hommes : car il n'est pas tant necessaire que l'Orateur & la Loy, comme dit *Æschines*, sonnent vne mesme chose, comme il est requis que la vie d'un philosophe soit conforme & consonante avec sa doctrine & sa parole. Car la parole du philosophe est vne loy volontaire & particuliere qu'il s'impose à soy mesme, fil est ainsi qu'ils estiment que la philosophie soit, comme elle est, profession de chose serieuse, graue & de tresgrande importance, non pas vn ieu ny vn cacquet mis à la volée au vent, pour en acquerir hōneur seulement. Or est il que nous voions que *Zenon* luy mesme a escript beaucoup, ainsi que le papier endure tout, & *Cleanthes*

aussi, mais Chrysippus encore d'auantage, touchant **D**
 le gouuernement de la chose publique, touchant
 le commander & obeir, touchant le iuger, plaider
 & aduocasser: Mais en la vie de pas vn d'eulx, vous
 ne trouuerez qu'ils aiēt iamais esté ny Capitaines,
 ny Legislateurs, ny Senateurs, ny Conseillers, ou
 Orateurs plaidans deuant les Iuges, ny qu'ils aient
 esté en aucune guerre, portants les armes pour la
 defense de leur pais, qu'ils aient esté en quelque
 ambassade, qu'ils aient fait quelque liberalité au
 public, ains ont demouré toute leur vie, qui n'a pas
 esté courte, mais fort longue, en pais estranger hors **E**
 du leur, aians gousté de l'aïse du repos, comme des
 Alises des Lotophages, que dit Homere, à escrire, à
 disputer, & à se pourmener: par où il appert mani-
 festemēt qu'ils ont vescu plustost selon que les au-
 tres disent & escriuent, que selon ce qu'eulx mes-
 mes iugent & confessent estre leur deuoir, aians
 passé tout le cours de leur vie au repos qu'Epicurus
 & Hieronymus louēt & recōmandent tāt. Qu'il
 soit ainsi, Chrysippus luy mesme en son quatrie-
 me liure de la diuersité des vies escrit, que la vie des
 Scholastiques, c'est à dire des gens d'estude oyseux, **F**
 ne differe en rien de celle des voluptueux: mais il

» vault miculx alleguer ses propres termes: Ceulx,
 » dit il, qui pensent que la vie scholastique & oyseu-
 » se conuiene principalement aux philosophes, fa-
 » busent des le commencement, cuidants qu'il faille
 » philosopher par maniere de passe-temps, ou pour
 » quelque autre chose semblable, & vser ainsi tout le
 » cours de sa vie à l'estude des lettres. c'est à dire,
 pour

A pour le declarer apertement, viure à son aise & ioyeuſement. Et n'eſt pas ceſte opinion fort cachée, ny diſſimulée: car pluſieurs le diſent tout clairement, & pluſieurs vn peu plus obſcurement. Mais qui eſt celuy qui ſoit plus enuieilly en telle vie oyſeuſe que Chryſippus, que Cleanthes, que Diogenes, que Zenon & Antipater? leſquels ont abandonné leur pais, encore qu'ils n'euffent occaſion quelconque de ſ'en plaindre, ains ſeulement, à fin qu'ils paſſaſſent leur vie plus doucement en repos, & ſur le baudrier, comme lon dit, c'eſt à dire
B en plein loilir, à diſputer & à eſtudier. Qu'il ſoit vray, Ariſtocreon diſciple & familier de Chryſippus, luy ayant fait dreſſer vne ſtatue de bronze, y eſcriuit ces vers:

Ceſte ſtatue Ariſtocreon meit

A Chryſippus lumiere des Stoïques,

Leſer trenchant des nœuds Academiques.

Voyla doncq quel a eſté Chryſippus le vieil, celuy qui louë la vie des Roys, & de ceulx qui verſent en l'adminiſtration de la choſe publique, celuy qui eſtime qu'il n'y ait point de difference entre la vie
C ſcholastique & oyſeuſe, & la voluptueuſe. Mais ceux d'entre eulx qui ſ'entremettent d'affaires, repugnēt encore plus que luy aux reſolutions de leur ſecte. Car ils exercent des magiſtrats, ils ſont Iuges, ils ſont Senateurs, ils vont au conſeil, ils ſont des loix, ils puniſſent les mal-faiteurs, ils recompēſent & honorent ceulx qui ſont bien, cōme eſtants villes celles où ils ſ'entremettēt du gouuernement, cōme eſtants Senateurs, conſeillers & iuges, ceulx qui

sont legitiment esleus à tels offices par le sort **D**
ou autrement, & comme estants Capitaines ceulx
que les citoiens tiennent pour tels, & cōme estants
vrayes loix celles de Solon, de Lycurgus & de Cli-
sthènes, lesquels toutefois ils maintiennent auoir
esté fols & mauuais: parquoy encore en se meslant
des affaires, ils ne laissent pas de se contrarier à eux
mesmes, & contredire leur doctrine. Et puis Anti-
pater au liure de la dissension d'entre Cleanthes &
Chrysippus, escrit que Zenon & Cleāthes ne vou-
lurent oncques estre faits citoiens d'Athenes, de
peur qu'il ne semblast qu'ils feissent tort & in- **E**
iure à leur propre pais. Or si ceux la firent bien, il
n'y a que tenir que Chrysippus n'ait mal fait en se
faisant enroller & immatriculer au nombre des ci-
toiens d'Athenes: toutefois ie ne me veux point
arrester à le discourir plus auant pour ceste heure,
mais bien dis-ie, qu'il y a vne grande & merueil-
leuse repugnance en leurs faictz, de conseruer en
leur pais le nom tout nud de patrie, & ce pendant
luy oster la presence de leurs personnes & de leurs
vies, en s'en allant ailleurs demourer si loing en
estrange terre, qui est tout ne plus ne moins que si **F**
quelqu'un laissant & abandonnant sa femme legi-
time, s'en alloit habiter avec vne autre, qu'il cou-
chast ordinairement avec elle, & luy feist des en-
fants, sans que toutefois il la voulust espouser, ne
passer contract de mariage, de peur qu'il ne feist
tort & iniure à sa premiere. Et puis Chrysippus au
traicté qu'il a fait de la Retorique, escriuant ainsi,
que le sage haranguera en public, & s'entremettra
des

A des affaires, cōme si la richesse, l'autorité & la santé estoient choses bonnes, confesse par là, que les preceptes & resolutions induisent les personnes à ne sortir point de leurs maisons, & à ne se point entre-mettre d'affaires, & par consequent que leurs doctrine & preceptes ne se peuuent accommoder à l'vsage, ny estre conuenables aux actions de la vie humaine. D'auantage, c'est vn des arrests donné par Zenon, qu'il ne fault point bastir de temples aux Dieux, d'autant que le temple n'est point chose sainte, ne qui soit grandement à estimer, attendu que c'est ouurage de massons & manœuures, & que nul ouurage de telle maniere de gens ne peult estre de grand pris. Et ce pendant ceulx qui aduouēt & approuuent cela cōme sagement dit, se font neantmoins receuoir en la religion des mysteres: ils montent au chasteau où est le temple de Minerue, ils adorent les images des Dieux, ils ornent de festons & de couronnes les temples qui sont ouurage de massons & de manœuures, & toutefois ils pensent que les Epicuriens, qui nient que les Dieux s'empeschent du gouuernemēt des choses humaines, se refutent eulx mesmes, quand ils leur sacrifient, & eulx mesmes sont encore mieulx refutez, quand ils sacrifient aux Dieux dedans les temples, & sur les autels, lesquels ils maintiennent ne deuoir point estre, ny que lon n'en doit point bastir. Zenon met plusieurs vertus selon leurs differences comme aussi fait Platon, Prudence, Force, Temperance, Iustice & autres, disant qu'elles sont bien de faict inseparables, mais neantmoins diuer-

ses & differentes de raison, & neantmoins en les **D**
 definissant les vnes apres les autres, il dit, que la
 Force est prudēce en ce qu'il faut executer, Iustice,
 prudence en ce qu'il faut distribuer, comme si ce
 n'estoit qu'une seule vertu, aiant diuerses relatiōs,
 selon la difference des choses qui tombent en a-
 ction. Si n'est pas Zenon seulement en cela repu-
 gnant à soy-mesme, mais aussi Chrysippus qui re-
 prent Ariston en ce qu'il dit, que toutes les vertus
 ne sont que diuerses habitudes & relations d'une
 mesme, & neantmoins defend Zenon qui les de-
 finit ainsi chascune. Et Cleāthes en ses Commē- **E**
 taires naturels, aiant dit que le battement du feu est
 la vigueur des choses: & fil est suffisant en l'ame
 pour paracheuer ce qui se presente, cela, dit il, s'ap-
 pelle force & puissance. Il subioint apres de mot à
 mot: Et ceste force & puissance la, si elle s'imprime
 es choses apparentes où il faille se contenir, elle se
 nomme continence: & si c'est en choses qu'il faille
 supporter, elle s'appelle force: si c'est en estimation
 de merite, iustice: si en choix ou en refus, c'est à dire
 en choses qu'il faille eslire ou refuser, temperance.

Contre ceste commune sentence, **F**

Par toy ne soit iustice departie,

Deuant qu'ouir l'une & l'autre partie.

Zenon y cōtredisant allegue ceste raison: Si le pre-
 mier a prouué son dire, il n'est point besoing d'ouir
 le secōd, car la question est desia finie & terminee:
 & fil n'a point prouué, c'est tout autant comme fil
 estoit contumax, n'aian point comparu estant ap-
 pellé, que aiant comparu n'auoir fait que basteler:
 soit

A soit doncques qu'il ait prouué, ou qu'il n'ait point prouué, il n'est point de besoing d'ouir le second: & ce pendant luy mesme qui faisoit ceste demande escriuoit contre les liures de la Republique de Platon, & enseignoit à souldre les arguments Sophistiques, & enhortoit ses disciples d'apprendre diligemment la Dialectique, comme science qui monstroît à ce faire, & neantmoins on luy pouuoit obiicier, Ou Platon auoit prouué son dire, ou il ne l'auoit pas prouué: Ny selon l'un ny selõ l'autre: il n'estoit doncq point necessaire de luy contre

B escrire, ains ne seruoit de rien estat superflu. Autant en peult on aussi dire des arguments Sophistiques. Chrysippus est d'aduis qu'il fault que les ieunes gens apprennēt premierement les arts qui concernent le parler, en second lieu les sciences morales, & tiercement les naturelles, consequemmēt qu'ils oyent parler de Dieu, pour le dernier. Ce qu'ayant dit en plusieurs passages, il suffira d'alleguer ce qu'il en escrit de mot à mot en son troisieme liure des vies: Premierement, dit il, il me semble suiuant ce

C de speculations philosophiques, celles qui appartiennēt au parler, celles qui concernent les mœurs, & celles qui touchent la nature des choses, & qu'il fault preferer & mettre deuant celles qui appartiennent au parler, en second lieu celles qui traittent des mœurs, & au troisieme les naturelles, entre lesquelles la derniere est celle qui traite de Dieu: c'est pourquoy lon appelle les traditions d'icelle *πρώτης*, comme qui diroit les dernieres. Mais ce

traitté la des Dieux, qu'il dit deuoir estre mis au **D**
dernier lieu, luy mesme au mesme traitté le met
deuant toute autre question morale. Car il ne
traitte ny des fins, ny de la iustice, ny des biens &
des maux, ny de mariage, ny de la nourriture des
enfants, ny de la loy, ny du gouuernement de la
chose publique, en aucune sorte, que cōme ceulx
qui proposent & mettent en auant les decrets és
choses publiques, n'aient mis au deuant à la bonne
fortune, ou à la bonne heure, aussi il n'ait luy, mis
deuant vne preface de Iupiter, de la Destinee, de la
prouidence diuine, & que le monde est maintenu **E**
par vne seule puissance, qu'il n'y a qu'un monde,
& qu'il est finy: desquels poincts nul ne se peult
fermement croire, ny bien persuader, que lon n'ait
profondemēt penetré, & que lon ne soit imbu ius-
ques au fond des plus profonds secrets & discours
de la philosophie naturelle. Mais escoutez vn peu
» ce qu'il en dit en son troisieme liure des Dieux: On
» ne scauroit, ce dit il, trouuer vn autre origine ny
» vne autre source de la iustice, que de Iupiter & de
» la commune nature. Car il fault que ce soit de là,
» que toute telle chose se deriue, si nous voulons dis- **F**
» courir des choses bonnes & mauuaises. De rechef
» en son traitté des positions naturelles: On ne scau-
» roit, dit il, autrement ny bien proprement proce-
» der au discours des choses bonnes & mauuaises ny
» des vertus, ny de la felicité souueraine, que de la
» cōmune nature, & de l'administration de ce mon-
» de. Puis encor plus outre: Il fault, dit il, subioindre
» à cela le propos des bonnes & des mauuaises cho-
ses,

A ses, n'y en aiant point de commencement meilleur que celuy la, ny meilleure relation, n'estât la sciēce naturelle pour autre occasion requise ny necessaire à apprendre, sinon pour cognoistre la difference du mal & du bien. Il s'ensuit dōques, selon Chrysippus, que la science naturelle est tout ensemble deuant & apres la morale, ou pour dire la verité plus ouuertement, il y a vn merueilleux renuersement d'ordre, duquel il est bien malaisé de se depestrer, de dire qu'il faille mettre cecy apres cela, lequel cela ne se peult aucunement comprendre

B sans cecy, & y a manifeste repugnāce, de dire que la science naturelle soit le principe de la morale qui traite du bien & du mal, & neantmoins ordonner qu'elle soit enseignee non deuant, mais apres celle la. Et si quelqu'un me dit que Chrysippus a escrit en son traitté de l'vsage d'oraison, que celuy qui apprend en premier lieu la Logique, c'est à dire la philosophie concernant le parler, ce n'est pas à dire pour cela qu'il se doie abstenir d'apprendre aussi les autres parties, ains qu'il en fault aussi prendre, autāt que lon en aura de moié, il dira bien

C la verité, mais aussi confirmera il l'accusation de sa faulte. Car il se cōbat soy mesme, en ordonnant tantost que lon apprene apres tout le demourant & le dernier, la science qui traite de Dieu, estant la raison pour laquelle on l'appelle *τελευτή*, comme qui diroit finale. & tantost disant au contraire, qu'il fault du commencement en prendre, aussi bien que des autres, quelque partie: car tout ordre se rompt & se confond, s'il fault par tout prendre

part, & gouster de tout. Il y a encore plus, c'est **D** qu'ayant arresté que le commencement de la doctrine des bonnes & mauuaises choses, doit proceder de la doctrine de Dieu, il ne veut pas neantmoins que ceulx qui se mettent à apprendre la philosophie morale, commâcent par là, ains qu'en apprenant celle cy, ils prennent vn petit en passant de celle la, autant qu'il leur en sera dôné de moien: & puis passer de la philosophie morale à la Theologie, sans laquelle Theologie & doctrine de Dieu, il dit qu'il ne se peut auoir aucun principe ny **v.** gres en la discipline des mœurs. D'auantage il dit, **B** que disputer sur vne mesme matiere en l'vne & en l'autre partie, il ne le reprouue pas vniuersellemēt, mais aussi conseille il d'en vser bien reseruément, & y estre bien retenu, comme quelque fois on fait en plaidant, où lon allegue les raisons des aduersaires, non pour les soustenir, mais seulement pour les refuter, & dissouldre ce qu'il y a de vray-sensible apparence: car autremēt, dit il, cela est à faire à ceulx qui doutēt & retiennent leur consentemēt de toutes choses, pour ce que cela leur sert à ce qu'ils pretendent. Mais à ceulx qui veulent **F** imprimer és cœurs des hommes vne science certaine, selon laquelle lon doit indubitablement se conduire, il faut fonder le contraire, & de poinct en poinct y conduire ceux que lon y introduit depuis le commencement iusques à la fin, en quoy il eschet bien quelquefois opportunité de faire mētion des opinions & sentences contraires, pour refuter & resouldre ce qu'il y pourroit auoir de verisimilitude, comme

A comme lon fait en plaidant deuant les Iuges: voila ce qu'il en dit en propres termes. Or que ce soit chose hors de tout propos, que les philosophes doiuent amener les opinions des autres philosophes contraires à la leur, non auec toutes leurs raisons, mais seulement à la mode des aduocats plaidans en iugement, en affoiblissant les preuues & arguments d'icelles, comme si la dispute se faisoit, non pour trouuer la verité, ains seulement pour acquérir l'honneur de la victoire, nous l'auons ailleurs discouru contre luy: mais que luy mesme, non en peu de lieux, ains souuent & en plusieurs endroicts, ait confirmé & corrobore les resolutions contraires à la sienne, auec sollicitude, affection & diligence, telle qu'il n'est pas aisé à chascun de discerner laquelle luy plaist le plus, ceulx mesmes qui admirent la subtilité & viuacité de son entendement le disent, & tiennent que Carneades n'a rien de soy mesme, ne qui soit de sa propre inuention, ains que des propres moiens & arguments dont Chrysippus cuidoit prouuer ses assertions, il les retournoit au cōtraire alencontre de luy, de maniere que bien souuent il luy crioit tout hault en disputant ce vers d'Homere,

O malheureux, ta force te perdra.

pour ce que luy mesme donnoit de si grandes prises & de si grands moiens à ceulx qui vouloient renuerser ou calomnier ses opinions. Mais quant à ce qu'il a mis en auant cōtre la coustume & l'ordinaire, ils s'en glorifient si fort, & l'en magnifient si haultement, qu'ils disent que tous les liures des

Academicques, qui les mettroit ensemble, ne sont pas dignes d'estre comparez à ce que Chrysippus a escrit de l'incertitude des sentimens. Ce qui est vn manifeste signe de l'ignorance de ceulx qui le disent, ou d'une aueuglee amour de soy mesme: mais cela est bien vray, que depuis aiant voulu defendre la coustume & les sens, il s'y est trouué de beaucoup inferieur à soy mesme, & le dernier traité beaucoup plus foible & plus mol que le premier, de maniere qu'il se cõtredit & repugne à soy mesme, attendu qu'il commande que lon propose tousiours les opinions & sentences des aduersaires, non comme en y consentant, mais avec vne monstre en passant, qu'elles sont hors de la verité, & puis se monstrent plus aspre & plus vehement accusateur que non pas defenseur de ses propres sentences, & conseiller aux autres de se donner garde des raisons contraires, cõme de celles qui destournent & empeschent la comprehension, & ce pendant estre plus diligent à recueillir & confirmer les preuues & raisons qui destruisent la comprehension, que celles qui l'establissent & confirment. Et toute fois qu'il craignist cela mesme, il le monstre clairement au quatrieme liure de ses Vies, là où il escrit ainsi : Il ne fault pas facilement ny legere-
 » rement proposer les opinions cõtraires, ny res-
 » dre aux arguments vray-semblables que lon alle-
 » gue alencontre des sentences vrayes, ains s'y fault
 » porter bien reseruément, craignant tousiours que
 » les auditeurs destournez par icelles ne laissent aller
 » leurs comprehensions, & que n'estans pas capa-
 » bles

Ables de comprendre suffisamment les solutions, ains les comprenant si foiblement, que leur comprehension soit facile à esbranler & secouër, veu que ceux mesmes qui comprennent par la coustume les choses sensibles, & qui dependent des sentimens, les laissent facilement aller, diuertis par les interrogations Megariques, & par autres encore plus puissantes & en plus grãd nombre. Je demanderois doncq volontiers aux Stoïques s'ils estiment les interrogatoires Megariques plus puissantes que celles que Chrysippus a escrites en six liures, **B** ou plustost il le fault demander à Chrysippus mesme : car voyez ce qu'il a escrit de la raison Megarique, en son liure intitulé, De l'vsage d'oraison, disant: Ce qui est aduenu à la raison Megarique de Stilpon & Menedemus, personnages qui ont esté renommez pour leur sapience: & neantmoins toute leur façon d'arguer est maintenant tournée en reproche, mocquerie & risée, comme estants leurs arguments, ou trop grossiers, ou apertement captieux & sophisticques. Mais ce pendant, bon homme, ces arguments la dont tu te moques, & **C** que tu appelles mocquerie & reproche de ceulx qui font telles interrogatoires, comme contenant apertement vne fallacieuse malice, tu crains neantmoins qu'elles ne diuertissent aucuns de la comprehension. Et toy mesme escriuant tant de liures contre la coustume, où tu as adiousté tout ce que tu as peu inuenter de toy mesme, t'efforçât de surmonter Arcesilaüs, n'esperois tu, & ne t'attendois tu point de diuertir & esbrâler aucuns des lecteurs?

Car il n'vse pas seulement de nues argumentations ^D en disputant contre la coustume, ains comme si c'estoit en vn plaidoyer, il esmeut les affections, se passionnant & affectionnant luy mesme, en l'appellant quelque fois folle, & quelque fois vaine & sottre : & à fin qu'il ne peust plus dire du contraire que luy mesme ne se contredie, il a ainsi escrit en

» les positions naturelles, On pourra bien quand
 » on aura parfaitement compris vne chose, arguer
 » vn peu alencontre, en y appliquant la defense qui
 » est en la chose mesme : & quelque fois quand on
 » ne comprendra ny l'vn ny l'autre, discourir de l'vn ^E
 » & de l'autre ce qui en est. Et au traitté de l'usage
 d'oraison, ayant dit qu'il ne fault pas vser de la force de la raison, non plus que des armes contre ce

» qui n'y est pas propre, il y adiousté puis apres: car il
 » en faut vser à trouuer la verité & ce qui luy ressem-
 » ble, non pas le contraire, combien que plusieurs le
 » facent. En disant plusieurs, à l'aduenture entend
 il ceux qui doubtent & qui surseent leur iugement de tout. Mais ceux la, d'autant qu'ils ne comprennent ny l'vn ny l'autre, ils arguent & contre l'vn & contre l'autre, comme monstrât la verité certaine, ^F

comprehension de foy mesme en ceste seule ou principale maniere, fil y a rien au monde qui soit comprehensible. Mais toy qui les accuses, escriuant le contraire de ce que tu comprends touchant la coustume, & enhortant les autres à le faire avec affection de defense, confesses que tu vses de la force d'eloquence en choses non seulement inutiles, mais dommageables, par vne vaine ambition de

A de monſtrer ton bel eſprit comme vn ieune eſcolier. Ils afferment que la bonne œuvre eſt le commandement de la loy, & le peché eſt la prohibition, & pourtant que la loy defend beaucoup de choſes aux fols, & ne leur commande rien, d'autant qu'ils ne peuuent faire aucun acte parfaitement vertueux. Et qui eſt celuy qui ne voit qu'il eſt impoſſible à celuy qui ne peut faire acte vertueux de ſe garder de peché ? Parquoy ils font que la loy ſe combat & ſe repugne à ſoy meſme, ſi elle commande ce que les hommes ne peuuent faire, & de-

B fend ce dont ils ne ſe peuuent garder: car celuy qui ne peut viure honneſtement ne ſçauroit faire qu'il ne ſe gouerne deſhonneſtement, & qui ne peut eſtre ſage, ne peut qu'il ne ſoit fol, & eulx meſmes tiennent que ceulx qui defendent, diſent vne choſe, en defendent vne autre, & en commandent vne autre: car celuy qui dit, Tu ne deſroberas point, il dit cela meſme, & defend de ne deſrober point. Parquoy la loy ne defendra rien aux fols, ou autrement elle leur commandera, comme ils diſent que le Medecin chirurgien commande à ſon

C diſciple de couper & de bruſſer, ſans y adiouſter opportunément & modérément: & le Muſicien ſemblablement commande de chanter ou de iouer quelque chanſon, ſans y adiouſter; de bon accord & par meſure, & neantmoins ils puniſſent ceulx qui le font mal & contre les regles de l'art, d'autant qu'on leur auoit commandé de le bien faire, & ils ne l'ont pas bien fait. Auſſi le ſage commandant à ſon valet de dire ou de faire

quelque chose, & le punissant pour ce qu'il l'aura D
 fait mal à propos, & autrement qu'il ne falloit. Il
 est certain doncques qu'il luy auoit commandé de
 faire vn bon office & non pas vn indifferent ou
 moien. Et si les sages commandent bien aux fols
 des choses moiènes, qui empeschera que les com-
 mandemens des loix ne puissent estre aussi sem-
 blables? Outre plus, l'instinct qu'ils appellent
δρμη, selon luy n'est autre chose que raison incitâte
 l'homme à faire quelque chose, ainsi comme il a
 escrit en son traité de la loy: au contraire donc-
 ques la diuersion qu'ils appellēt *ἀναγκη*, ne sera aussi E
 autre chose que la raison, diuertissâte de faire quel-
 que chose, & l'inclination est raisonnable inclina-
 tion, & la crainte retenue, raison du sage qui luy
 defend aucune chose, par ce que l'estre retenu &
 reserué est acte de sages & non de fols. Si d'ocques
 c'est autre chose, la raison du sage que la loy, les sa-
 ges ont ceste crainte retenue repugnante à la loy,
 mais si c'est autre chose la loy que la raison du sa-
 ge, il se treuue doncq' loy qui defend aux sages ce
 „ qu'ils doubtent & qu'ils craignent. Aux fols &
 „ meschans, ce dit Chrysippus, il n'y a rien qui soit F
 „ proufitable, ne n'y a fol qui ait vtilité quelconque
 VII. ny besoing. Aiant dit cela au premier liure de ses
 offices parfaicts, il dit apres, que la commodité &
 la grace appartiennent aux choses indifferentes &
 moiennes, desquelles selon eulx nulle n'est vtile.
 Qui plus est, encore dit il, qu'il n'y a rien qui soit
 propre ne conuenable au fol. Parquoy selon cela,
 par consequēt, il n'y a riē qui soit aliene ny estrāge
 du

A du sage & de l'homme de bien. Comment doncques est-ce qu'il nous rompt la teste à force d'escrire en tous ses liures, tant naturels que moraux, que dès nostre naissance nous sommes affectez & appropriez à nous mesmes, à noz parties, & à tout ce qui est né & yssu de nous? Et au premier liure de la iustice il dit, que les bestes sauvages mesmes sont affectées & appropriées à leurs petits, autant que leur besoing & leur nécessité le requiert, exceptez les poissons, car leurs petits se nourrissent d'eux mesmes: mais il n'y a point de sentiment là où il n'y a rien de sensible, ny d'appropriation là où il n'y a rien de propre, par ce que l'appropriation semble estre le sentiment & embrassement de ce qui est propre. Ceste opinion est conforme à leurs principales. D'avantage il appert manifestement que Chrysippus, encore qu'il ait en plusieurs passages escrit le contraire, s'accorde à ceste sentence, qu'il n'y a ny vice plus grand ny peché plus grief l'un que l'autre, ny reciproquemēt aussi vertu plus excellente, ny acte vertueux, qu'ils appellent office parfait, qui soit plus vertueux qu'un autre: attendu qu'il dit au premier liure de la nature, que tout ainsi comme, qu'il sied bien à Jupiter, & luy conuient de se magnifier soy mesme, se plaire de sa vie, & si faut ainsi parler, tenir la teste droite, s'estimer beaucoup & parler haut, viuant de vie digne de parole haultaine: aussi est-il bien seant & conuenable à tous gens de bien d'en faire autant, attendu qu'il n'a rien plus qu'eux ny deuant eux. Mais luy mesme derechef, au troisiéme liure

de la iustice, dit que ceux qui disent que la volup-
té soit la fin & le bien souverain de l'homme, des-
truisent la iustice, mais ceux qui disent qu'elle est
simplement bien, ne la destruisent pas. Les pro-
pres termes dont il use sont tels: A l'adventure
qu'en laissant à la volupté qu'elle soit bien simple-
ment, & non pas la fin & la cyme des biens, ny du
genre des choses choississables pour l'amour d'elles
mesmes, & qui sont honestes, nous pourrions sau-
uer la iustice par ce moien, en laissant l'honesteté
& la iustice vn plus parfaict bien que la volupté.

Mais s'il est ainsi que cela seul qui est honeste soit bon, celuy erre qui affirme que la volupté soit bien, mais il erre moins que celuy la qui voudroit dire qu'elle fust la fin des biens, pour ce que cestui-cy destruit & abolit entierement la iustice, & l'autre la conserue: & selon celuy la toute société humaine perit, & cestui-cy garde encore lieu à la preudhommie. Je passe, qu'il dit au liure qu'il a intitulé de Iupiter, que les vertus croissent, voire & qu'elles passent, de peur qu'il ne semble que ie m'attache aux paroles, cōbien qu'il morde bien asprement Platon & les autres philosophes en ceste sorte de reprehension, de se prendre aux mots: mais quand il defend de louer tout ce qui se fait selon vertu, il dōne à entendre qu'il y a doncques quelque difference entre les offices. Or dit-il ainsi en son traitté de Iupiter: Car encore que les actes selon les vertus soient louables, ce n'est pas à dire pourtant qu'il faille louer tout ce qui en est procédé, comme de la vaillance, l'auoir estendu le doigt
vail-

A vaillamment: de la temperance, s'estre abstenu d'une
 » vieille prochaine de sa fosse: & de la prudence, d'a-
 » uoir bien entëdu que trois ne font pas quatre. Qui
 » voudroit louer vn homme de telles choses & l'en
 » recommanderoit, il se monstreroit merueilleusemēt
 » impertinent & froid. Autant presque en a il dit au
 » troisiēme des Dieux: Je pense, dit-il, encore que
 » les louanges de telles choses sont impertinentes,
 » bien qu'elles dependent de la vertu, comme s'ab-
 » stenir d'une vieille qui se va mourant, endurer la
 » morsure d'une souris. Quel autre accusateur attēd
 B il doncques de ses opinions, que luy mesmes? Car
 si il est ainsi que celuy la soit impertinent & froid
 qui louē telles choses, encore bien plus impertinēt
 doit estre estimē celuy qui suppose que chascune
 de ces choses la soit office vertueux, non seulemēt
 grand, mais encore tresgrand: car si c'est acte de
 vaillance que d'endurer la morsure d'une souris,
 & de temperance, s'abstenir d'une vieille estant
 pres de sa fosse: il n'y a doncques point de differen-
 ce, & sera tout vn de louer l'homme de bien, au-
 tant pour cela que pour cecy. D'auantage en son
 C second liure de l'amitiē, enseignant qu'il ne faut
 pas dissouldre les amitez pour toutes fautes, il vse
 » de ces propres mots: Car il y a des fautes, dit-il,
 » qu'il faut totalement passer sans s'y arrester, les au-
 » tres où il faut vn peu prendre garde, les autres vn
 » peu plus, les autres qu'il faut estimer dignes, que
 » pour elles on dissolue l'amitiē. Et qui est encore
 plus que cela, au mesme liure il dit, que nous cōtra-
 cterons avec les vns plus, avec les autres moins,

tellement que les vns nous seront plus, les autres D
moins amis. Et ceste difference & diuersité s'estend
bien largement, en maniere que les vns seront di-
gnes de telle, les autres de plus grande amitié, &
les vns mériteront tant de foy, & les autres plus que
tant: car que fait il en tous ces passages la, sinon
mettre de grâdes differences entre les choses, pour
lesquelles l'amitié s'engendre? Et toutefois en son
traicté de l'honnesteté, pour démonstrer qu'il n'y a
rien que ce qui est honneste qui soit bon, il vse de
³⁰ telles paroles: Le bon est choisissable, le choisissable
³⁰ est esioissable, l'esioissable est louable, & le loua- E
³⁰ ble est honneste. Et derechef: Le bon est esioissable
³⁰ ble, l'esioissable est venerable, le venerable est hō-
neste. Ces propos cōbattent contre luy mesme, car
soit que tout ce qui est bon soit louable, adōcques
l'est aussi par tēperance s'abstenir d'une vieille, ou
soit que tout bon ne soit pas esioissable ny vene-
rable, la raison doncques est nulle: car comment
est il possible que les autres soient impertinents &
froids de louer quelqu'un pour telles choses, &
que luy ne soit digne que lon s'en mocque, de s'es-
iouir & se magnifier pour telles occasions? Voila F
quel il est en la plus part de ses escripts: mais aux
disputes qu'il fait contre les autres, il se soucie en-
core moins d'estre contraire & repugnant à soy
mesme. Car en son traicté qu'il fait de l'exhorta-
tion, reprenant Platon qui disoit, qu'à celuy qui
n'a rien appris & qui ne sçait pas viure, il est ex-
pedient de ne viure point, il dit ainsi en ses propres
I x termes: Ce propos la se combat soy-mesme, & n'a
force

A force ny efficace quelconque pour exhorter : car
 „ premierement en nous monstrant qu'il nous est
 „ expedient de ne point viure , & par maniere de di-
 „ re, nous conseillant de mourir, il nous exhorte plus
 „ tost à autre chose qu'à philosopher , par ce qu'il
 „ n'est pas possible de philosopher si lon n'est viuât:
 „ ny aussi de deuenir sage quelque long temps que
 „ lon suruiue , si lon vit mal & ignorantement. Puis
 vn peu plus auant il dit , qu'il est aussi conuenable
 aux mauuais de demourer en vie , & vse de ces
 „ propres mots:Premierement , ainsi comme la ver-
 „ **B**tu par soy nuëment consideree n'a rien pourquoy
 „ nous deuions viure : aussi le vice n'est rien pour-
 „ quoy nous nous en deuions aller de ceste vie. Il ne
 faut ia feuilleter d'autres liures de Chrysippus ,
 pour monstrier comment il se contredit & se repu-
 gne à soy-mesme: car en ceux la que nous venons
 d'alleguer tantost, il ameine ce mot d'Antisthenes,
 „ en le louant, qu'il faut faire prouision de sens pour
 „ entendre, ou d'un licol pour se pendre : & cest au-
 tre du poëte Tyrteus,

De la vertu , ou de mort , approcher.

◦ Et toutefois qu'est-ce que veulent dire ces propos
 la, sinon qu'il est plus expedient aux fols & aux
 mauuais de mourir que de viure ? Et quelquefois
 corrigeant Theognis, qui dir,

Pour pauureté fuir & euitier,

Il se faudroit, Cyrne , precipiter

Au plus profond de la mer furieuse,

Voire du haut d'une roche hideuse.

Il falloit, dit-il, plustost mettre , Pour le peché fuir

& couter. Que fait il doncques autre chose, si-
 non que les mesmes propositions & sentences
 que luy mesmes telle fois a escrippes, il les efface &
 les condamne quand d'autres les escriuent? car il
 reprend Platon de ce qu'il assure qu'il est plus
 expedient de ne viure du tout point, que de viure
 meschamment, ou en ignorance: & ce pendant il
 conseille à Theognis de mettre en sa poësie, qu'il
 se faut precipiter en la mer pour euter le vice & la
 meschanceté. Et louant Antisthenes de ce qu'il en-
 uoye les fols qui n'ont point de ceruelle, au licol
 pour se pendre: toutefois il blasme celuy qui disoit,
 que le vice n'estoit pas cause suffisante pourquoy
 nous nous deuions ietter hors de ceste vie. Et con-
 tre Platon, de la iustice, des le commencement il
 faulte au propos des Dieux, & dit que Cephalus
 ne diuertit & ne destourne pas bien les hommes
 de mal faire, par la crainte des Dieux, & que le dis-
 cours qu'il fait de la vengeance diuine est aisé à re-
 futer & à calomnier, par ce que de luy mesme il
 suggere beaucoup d'argumens & de verisimilitu-
 des au contraire, comme si cela ressembloit pro-
 prement aux comptes d'Acco & d'Alphito, dont
 les bonnes femmes font peur aux petits enfans,
 pour les garder de s'appliquer à mal faire: ainsi
 se moquant & detraçant de Platon, il louë au
 contraire ailleurs, & allegue en plusieurs passages
 ces vers d'Euripide,

Mais il y a vn Iupiter aux cieux

Qui voit les faicts humains, & d'autres Dieux,

• Pour les venger, encôre que lon rie

A De ce propos, par folle mocquerie.
Semblablement au premier liure de la Iustice,
aiant allegué ces vers icy d'Hesiodé,
Saturnien Iupiter irrité
Fait deualler griefue calamité,
Du ciel sur eux, la peste & la famine,
Qui tout vn peuple en la terre exterminé.
il dit que les Dieux font cela à fin que les meschâs
estants ainsi punis, les autres aduertis par ces exé-
ples la, s'adonnent moins à faire telles meschance-
tez. Derechef en son traitté de la iustice, aiant dit
B que ceux qui tiennent que la volupté soit bien,
mais non pas la fin des biens, sauuent aucunement
& retiennent la Iustice: car il le met en ces propres
„ termes. A l'adventure qu'en laissant à la volupté
„ qu'elle soit bien simplement, mais non pas la fin
„ & la cyme des biens, ny du genre des choses choi-
„ sissables pour l'amour d'elles mesmes, & qui sont
„ honnestes, nous pourrions sauuer la iustice par ce
„ moien, en laissant l'honnesteré & la iustice en plus
„ parfait bien que la volupté. voila ce qu'il dit en ce
lieu la de la volupté. Mais en son liure contre Pla-
c ton, le reprenant de ce qu'il mettoit la santé en-
tre les choses bonnes, il dit que non seulement la
iustice, mais aussi la magnanimité, la temperan-
ce, & toutes autres vertus se perdent & s'abolis-
sent, si nous tenons que la volupté, ou la santé,
ou quelque autre chose quelle qu'elle soit, se
puisse nôbrer & mettre entre les biens, si elle n'est
honneste. Or quant à ce qu'il faut respondre pour
la defense de Platon, nous l'auons escrit ailleurs

alencontre de luy : mais en cest endroit la repu-
 gnance & cōtradiction à soy mesme est toute ma-
 nifeste, veu qu'en vn lieu il tiét que lon peut main-
 tenir & defendre la iustice, en supposant que la
 volupté soit bien avec l'honnesteté: Et en vn autre
 lieu il accuse tous ceux qui reputent autre bien
 que ce qui est honneste, disant que c'est destruire
 & abolir toutes les vertus. Et à fin qu'il ne laisse au-
 cun moien de sauuer & defendre ses contradi-
 ctions, escriuant de la iustice alencontre d'Aristo-
 te, il escrit qu'il a tort de dire, qu'en supposant que
 la volupté soit la fin des biens on oste la iustice, & **E**
 „ avec la iustice toutes les autres vertus: Car il est
 „ bien vray, dit-il, que ceux qui ont ceste opinion la,
 „ ostent voirement la iustice, mais il n'y a rien qui
 „ empesche que les autres vertus ne puissent de-
 „ mourer, sinon choisissables pour l'amour d'elles, à
 „ tout le moins bonnes & realement vertus. Et puis
 il les nomme par leurs noms, les vnes apres les au-
 tres, & vaut mieux que nous produisions ses pro-
 „ pres termes: Encore qu'il semble par ce discours
 „ que volupté soit la fin des biens, ce n'est pas à dire
 „ pourrât que tout y soit compris dessoubs, & pour- **F**
 „ tant faut il dire, que nulle des vertus n'est à choisir
 „ pour l'amour d'elle mesme, ny des vices à fuir,
 „ mais qu'il faut referer tout cela à vn but proposé,
 „ & ce pendant rien n'empeschera selon eux, que la
 „ force, la prudence, la continence, la patience & au-
 „ tres semblables vertus, ne soient entre les choses
 „ bonnes, & leurs contraires entre celles qu'il faut
 „ fuir. Qui fut doncques iamais plus temeraire en
 paroles

A paroles que luy, veu que de deux Princes des philosophes, il impute à l'un qu'il oste & abolit toute vertu, en ne confessant pas, que cela seul qui est honneste soit bon : & à l'autre, que supposé, que la volupté fust la fin des biens, il n'estime pas que toute vertu se puisse sauuer & defendre, excepté la iustice? car c'est vne merueilleuse licence qu'en discourant sus vn mesme subiect & de mesme matiere, ce que luy suppose, le reprendre en Aristote, & puis luy mesme le subuertir & deltruire en accusant Platon, & toutefois en ses demonstrations

B de la iustice il n'iet expressement, que tout office parfait est action legitime & iuste operation. Or ce qui se fait par continence, par patience, par prudence, ou par vaillance, est office parfait : il sensuit doncques, qu'il est aussi legitime action. Comment doncq ne laisse il la iustice à ceux à qui il laisse la prudence, la continence, la vaillance, attendu que tous les actes qu'ils font selon ces vertus la sont offices parfaits, & par consequent iustes & legitimes operations? Platon a escrit en quelque

C passage, que l'iniustice est vne corruption de l'ame & seduction intestine, laquelle ne perd iamais sa puissance, non pas en ceux mesmes qui l'ont dedās eux : car elle fait combattre le meschant alencontre de soy mesme, elle le choque, le trouble & le trauaille Chrysippus reprenant cela, dit que c'est mal & faulxement parlé de dire, qu'on se peult faire „ tort & s'outrager soy mesme, Par ce que tout ou- „ trage, dit-il, est contre vn autre : mais puis apres ne se souuenant plus de ce propos, au traitté des de-

monstrations de la iustice, il dit, que celuy qui fait D
 iniustice, s'outrage soy mesme, & qu'il s'offense &
 se fait tort, estant cause à soy mesme de ce qu'il
 transgresse les loix, en quoy il se griefue & se blesse
 soy mesme indignement. Voicy ce qu'il dit contre
 Platon, en discourant que l'iniustice ne peut estre
 » contre soy-mesme, ains contre autrui : Car pour
 » estre particulièrement iniustes, il faut, dit-il, qu'il y
 » en ait plusieurs tels qui dient choses contraires l'un
 » à l'autre : & d'ailleurs, le mot d'iniustice se prend
 » ainsi comme estant entre plusieurs affectionnez de
 » telle sorte les vns enuers les autres, & ne conuient E
 » ny ne peut appartenir rien de semblable à vn
 » seul, sinon seulemēt en ce qu'il se deperte ainsi ou
 » ainsi enuers ses voisins. Au contraire, en ses de-
 monstrations il argumente ainsi, pour prouuer
 que l'iniuste s'outrage & se fait tort à soy mesme:
 » La loy defend d'estre auteur ny cause de transgres-
 » ser: or commettre iniustice est trāsgresser la loy: ce-
 » luy donc qui est cause à soy mesme de commettre
 » iniustice, transgresse la loy de soy mesme: & celuy
 » qui transgresse la loy contre quelqu'un, luy fait
 » tort & l'outrage. Celuy doncq qui outrage & fait F
 » tort à qui que ce soit, s'outrage & se fait tort à soy
 » mesme. D'auātage le peché est vne espee de bles-
 » seure & dommage que lon fait: & tout homme
 » qui peche, peche contre soy mesme: parquoy tout
 » hōme qui peche se blesse & s'endōmage soy mes-
 » me: & s'il est ainsi, il se fait tort & s'outrage doncq
 » soy mesme. Et puis il argue encore ainsi: Celuy qui
 » seuffre estre blesse & offensé par vn autre, se blesse
 & offense

A & offense quant & quant soy mesme indignemēt:
” & cela est outrager & faire iniustice: Celuy doncq
” qui est offensé & reçoit iniure de qui que ce soit,
” se fait tort à soy mesme. Au troisiéme liure des exhortations il dit, que la doctrine des bonnes & mauuaises choses qu’il introduit & qu’il approuue, est fort accordāte avec la vie humaine, & qu’elle est fort coniointe aux anticipations qui par nature sont empreintes en nous. Mais au contraire, au premier liure il met, que ceste doctrine destourne & diuertit l’homme de toutes autres choses,
B comme n’estant rien qui nous appartienne, ne qui nous aide à acquerir beatitude & felicité souueraine. Voiez donc comment il s’accorde avec soy mesme, quand il afferme que sa doctrine nous diuertit du viure, de la santé, du repos, & de l’intégrité des sens, & qui maintient que cela que nous demandons le plus en noz prieres aux Dieux, ne nous touche & ne nous appartient en rien, & neantmoins est fort accordant à la vie humaine, & aux communes anticipations de cognoissance qui naist avec nous. Mais à fin que lon ne puisse aucunement nier qu’il ne se repugne & cōtredic à soy mesme, voicy qu’il dit au troisiéme de la iustice:
” C’est pourquoy, dit-il, à cause de la transcendente
” grandeur & beauté de noz sentences, il semble que
” ce que nous disons soient choses feintes & cōtrouuees à plaisir, oultre le pouuoir de l’homme, & par
” dessus la nature humaine. Est-il possible de confesser plus apertement que lon se combat & cōtredit à soy mesme, que fait celuy-cy, disant, que les

propositions & opinions sont si transcendentes & d
 extrauagantes, qu'elles ressemblent à des fables cō-
 trouuées à plaisir, & qu'elles sont oultre l'homme
 & par dessus la nature humaine, & toutefois qu'el-
 les accordent & conuiennent fort à la vie de l'hō-
 me, & qu'elles approchent fort des cōmunes no-
 tions & anticipations de cognoissance, nees avec-
 ques nous: il afferme que l'essence propre de l'infel-
 licité est le vice, asseurant en tous ses liures de phi-
 losophie morale & naturelle, que viure selon le vi-
 ce, est autant que viure malheureusement: mais au
 troisième liure de la nature, aiant dit qu'il est vtile **E**
 & expediet de viure fol & insensé, plus tost que de
 ne viure point, encore que lon n'eust aucune espe-
 rance de deuenir iamais sage: il subioinct apres,
 „ Car il y a de tels biens aux hommes, que les maux
 „ mesmes en quelque maniere precedent les choses
 „ moyennes. Or qu'il ait escrit, que rien ne sert ny
 n'est vtile aux fols, & neantmoins qu'il escriue en
 celt endroit qu'il est expedient de viure voire fol &
 insensé, ie le laisse passer: mais, attédu qu'il appelle
 moyennes les choses qui ne sont ny mauuaises ny
 bonnes, de dire maintenant que les mauuaises ail- **F**
 lent deuant, & valent micux, c'est autant à dire
 comme, que les choses mauuaises valent micux, &
 doiuent aller deuant les non mauuaises, & que l'e-
 stre malheureux soit plus vtile, que le non estre
 malheureux: & par ainsi il estime donc plus inutile
 le non estre malheureux, & s'il est plus inutile, il est
 doncques plus dommageable que d'estre malheu-
 reux. Mais voulant vn peu rabotter & polir ceste
 rabor-

A rabotteuse faulxeté, il subioinct touchant les choses mauuaises: Non pas, dit-il, qu'elles aillent deuant, mais c'est la raison avec laquelle il vault mieux viure, encore que lon deust estre fol, que non viure. Premièrement doncques il appelle mauuaistié & vice, les choses mauuaises, & qui participent de mauuaistié: or mauuaistié est raisonnable, ou pour mieux dire est raison errante: ce n'est doncques autre chose viure avec raison, estant fols, que viure avec mauuaistié: & puis viure estant fols, est autant que viure estant malheureux. En

B quoy donc, & comment est-ce que cela precede les choses moyennes? Car il ne vouloit pas entendre (ce disent ils) que l'estre bien heureux precedast & allast deuant l'estre malheureux: ny ne pensa iamais Chrysippus qu'il fallust compter & mettre entre les choses bonnes, le demourer en vie, ny entre les mauuaises le sortir de ceste vie, ains a pensé que c'estoient choses moyennes de foy: au moien dequoy il est quelquefois conuenable aux heureux de sortir de ceste vie, & aux malheureux d'y demourer. Et quelle contrariété peut estre plus grande que celle cy, quant aux choses choisissables ou refusables, que de dire, qu'à ceux qui sont extrêmement heureux, pour l'absence d'une chose indifferente, il conuienne s'abstenir des biens presents? Et toutefois il estime que nulle chose indifferente n'est ny choisissable de foy, ny refusable, ains que cela seul soit à eslire, qui est bon, & cela seul à fuir, qui est mauuais: tellement qu'il aduiendra selon eux, qu'ils ne dresseront les discours &

conseils de leurs actions, ny à la poursuite des choses qu'il faut eslire, ny à la fuite de celles qu'il fault fuir, ains qu'ils auront autre but où ils viseront, & qu'ils viuront & mourront pour choses qu'ils n'esliront ny ne fuyront. Chrysippus aduouë que les choses bonnes sont entierement differentes des mauuaises, cōme aussi est il necessaire, s'il est vray que les vnes rendent ceux en qui elles sont, tout aussi tost extrememēt malheureux, & les autres extremement heureux. Or dit-il au premier liure de la fin des biens, que les choses bonnes & mauuaises sont sensibles, & le dit en ces termes: E

- „ Que les choses bonnes & mauuaises soient sensi-
 „ bles, il est force de le dire pour ces raisons. Car non
 „ seulement les passions avec leurs especes sont sen-
 „ sibles, cōme la tristesse, la crainte & autres sembla-
 „ bles, mais encore peut on sentir le larcin, l'adul-
 „ tere & autres semblables malefices, & generale-
 „ ment toute follic, couardise, & tous autres vices,
 „ non seulement la ioye, les benefices, & plusieurs au-
 „ tres dependances des vertueux offices de la prudē-
 „ ce, de la vaillance, & des autres vertus. Or à fin que
 nous laissions ce qu'il y a au demourant d'absurdi- F
 ré en ces paroles la, qui est-ce qui confessera qu'estant present le bien sensible, & ayant vne grande difference avec le mal, il soit possible de deuenir de meschant, homme de bien, & l'ignorer, & ne sentir pas la vertu presente, ains estimer que le vice y soit meslé? Commēt peult il estre que cela ne soit tres-estranger? Car nul ne peult ignorer ny mescroire qu'il ait toutes les vertus ensemble, ou il fault confesser,

À feller, qu'il y a bien peu de difference & bien mal-
aisée à discerner, entre le vice & la vertu, entre la
felicité & l'infelicité, & entre la vie treshonneste
& la tresdeshonneste, s'il est possible que lon passe
de l'une en l'autre sans s'en appercevoir. Il a escrit
vn œuvre qu'il a intitulé, Des Vies, diuisé en qua-
tre liures, au quatriéme desquels il dit, que le sage
fuit les affaires, ne se mesle que des siens, sans estre
curieux de ceux d'autrui. ses termes propres sont
„ tels : l'estime quant à moy, que l'homme prudent
„ fuit les affaires, s'entremet de peu, & ne se mesle
B que des siens : car cela est propre aux gens d'hon-
„ neur de se mesler de leurs affaires simplement, &
„ d'entreprendre peu. Il dit aussi presque le semblable
„ au liure intitulé, Des choses choississables & eligi-
„ bles pour l'amour de foy, en ces propres termes:
„ Car à la verité, dit-il, il semble que la vie reposée
„ soit hors de peril & en seureté, ce que le vulgaire ne
„ peut pas bien cōprendre. En quoy premieremēt il
est tout manifeste, qu'il approche bien pres de l'er-
reur d'Epicurus, qui oste de ce monde le gouver-
nemēt de la prouidence diuine, pource qu'il veut
C que Dieu demeure en repos, oisif, sans se mesler de
rien. Mais Chrysippus luy mesme au premier liure
des vies dit, que le sage volōtiers receura vn Royau-
me, & en fera son profit, & s'il ne peult regner
luy mesme, au moins il hantera avec le Roy, ira
quand & luy à la guerre, estant tel comme estoit le
Roy Hidanthyrsus de Scythie, ou Leucon le Roy
de Pont. J'allegueray encore ses mesmes paroles, à
fin que nous voions, si comme de la plus haute

& de la plus basse corde il se fait vne consonance D
 & accord de l'octaue, aussi s'accorde la vie d'un hō-
 me qui choisit de viure à repos sans rien faire, ou
 qui s'entremet de bien peu d'affaires, & puis apres
 s'en va avec les Scythes à la chasse à cheual, & piéd.
 en main les affaires du Roy du Bosphore, pour la
 „ moindre necessité qui se puisse presenter. Car quāt
 „ à ce poinct dit-il, que le sage ira à la guerre avec les
 „ Princes, viura & conuertera avec eux, nous le con-
 „ sidererons incontinent apres cecy, ce que quel-
 „ ques vns ne soupçonnent pas, à cause qu'il y a de
 „ presque semblables discours, & nous leur laissons E
 „ à cause de pareilles raisons. Puis vn peu apres: &
 „ non seulement avec ceux qui ont penetré bien
 „ auant en la discipline de vertu, & qui ont esté bien
 „ conditionnez, comme Hidanthyrus & Leucon.
 Il y en a qui reprennent Callisthenes, de ce qu'il
 passa la mer pour aller trouuer Alexandre en son
 camp, sous esperance de faire rebastir la ville
 d'Olynthe, comme Aristote auoit fait restablir
 celle de Stagira, & louent grandement Ephorus,
 Xenocrates & Menedemus, de ce qu'ils refuse-
 rent Alexandre. Mais Chrysippus nous pousse son F
 sage, la teste la premiere, pour gagner & faire son
 profit, iusques à la ville de Panticapœum, & ius-
 ques aux deserts de la Scythie, & que ce soit pour
 y gagner & y faire son profit, il l'a môstré au pa-
 rauant, supposant qu'il y a trois principaux moïes,
 par lesquels le sage peut pratiquer & gagner. Le
 premier, c'est par les biéfaicts des Roys: le secōd, de
 ses amis: & le troisieme, d'enseigner les lettres.

A Et toute fois en plusieurs lieux il nous rompt la te-
te à force de louer ces vers du poëte Euripides,

Que faut il plus à l'homme transitoire,

Que pain & eau, pour manger & pour boire?

Mais aux liures de la nature il dit, que le sage,
quand bien il auroit perdu de tresgrandes facultez
& richesses, estimera auoir perdu seulement autant
que vault vne drachme d'argent, & l'ayant là ainsi
eleué & enflé, au contraire icy il le raualle & abais-
se, iusques à en faire vn mercenaire & vn maistre
d'eschole. Car il veult qu'il puisse demander &
B exiger son salaire, voire & prendre argent auant la
main, tout au commencement de l'apprentissage,
& quelquefois aussi apres que le temps prefix à
son disciple sera passé: ce qui, dit il, est plus honne-
ste, mais l'autre est le plus seur, de se faire payer
auant la main, estant l'autre façon de dilayer & at-
tendre, subiecte à receuoir beaucoup d'iniures &
» de pertes: & le dit en ses propres termes. Les bien
» aduisez, dit il, exigent de leurs auditeurs leur escho-
» lage, non pas tous d'une mesme sorte, ains diuerse-
» ment selõ que l'opportunité se presente, & ne leur
C promettent pas de les rendre sages, & ce dedans
» vn an, mais bien promettent ils qu'ils le feront en
» tant qu'il sera en eulx, & dedans le temps qui sera
» dit & accordé entre eulx. Et vn peu plus auât par-
» lant de son sage, Il sçaura, dit il, le temps opportun
» de demãder son salaire, à sçauoir s'il vaudra mieulx
» l'exiger incontinent à l'entree de son escholier, cõ-
» me la plus part le font: ou bien, s'il leur faudra bail-
» ler vn terme prefix, estât ceste façon bien subiecte

à recevoir dōmage & perte, combien qu'elle sem-
 ble estre plus ciuile & plus honneste. Et comment
 sera donc maintenant le sage mespriseur d'argent,
 fil est ainsi qu'il contracte à pris faict pour liurer
 la vertu, & encore qu'il ne la liure pas, qu'il en exi-
 ge son salaire, comme aiant fait tout ce qui estoit
 en luy, & ce que requeroit son office? Ou com-
 ment sera il plus grand que de pouuoir endurer
 aucune perte ou dommage, fil est ainsi qu'avec si
 grāde sollicitude il se tienne sur ses gardes, que lon
 ne luy face tort ou dommage au payement de son
 salaire? Car nul ne reçoit tort à qui on ne fait point
 de dommage. Et pourtant combien qu'ailleurs il
 eust maintenu que le sage ne pouuoit receuoir
 tort, toutefois en ce lieu la il dit, que ceste façon est
 subiecte à recevoir perte & dommage. Et en son
 liure de la republique, aiant dit que les citoiens ne
 feront rien pour volupté, ny ne prepareront rien,
 louant grandement Euripides de ce qu'il a dit en
 ces vers,

Que fault il plus à l'homme transitoire,

Que pain & eau, pour manger & pour boire?

Vn peu plus auant il louë Diogenes, de ce que pu-
 bliquement il abusoit de sa nature, disant aux as-
 sistans, A la miēne volonté que ie peusse ainsi chas-
 ser la faim de mon ventre! Quel propos donc y a
 il, en mesmes liures de louer celuy qui chasse toute
 volupté, & celuy qui pour volupté fait à la veuë
 de tout le monde vne si meschante & si villaine
 chose? En ses liures de la nature aiāt escrit que la na-
 ture a produit beaucoup d'animaux pour la beau-
 té

té seulement, prenant plaisir à faire de belles crea-
 tures, & s'esioüissant en la diuersité, & y aiant d'a-
 uantage adiousté vn fort estrange propos, que le
 Paon auoit esté produit par la nature pour sa
 queuë, à cause de la beauté d'icelle. Au contraire
 en ses liures de la Republique il reprend fort as-
 prement ceulx qui nourrissent des Paons & des
 Rossignols, cōme voulants faire des loix contraires
 au souuerain legistateur du monde, en se mocquāt
 de la nature qui préd plaisir à produire de tels ani-
 maux, ausquels le sage ne donne point de lieu ny
 de place en sa republique. Car comment ne trou-
 ueroit on estrange & hors de toute raison, de re-
 prendre ceux qui nourrissent les animaux, pour la
 creation & production desquels ils louēt haute-
 ment la prouidence diuine? Aiant dit en son cinq-
 iefme liure de la nature, que les pulces nous esueil-
 lent vtilement, & que les souris nous aduertissent
 aussi de prédre bien garde là où nous mettōs cha-
 que chose, & qu'il est vraysemblable que la nature
 préd plaisir à produire de belles creatures, & qu'el-
 le s'esioüit en la diuersité: il dit encore ces propres
 mots, Cela peut bien euidemment apparoir en la
 " queuë du Paon: car elle monstre là que cest animal
 " a esté produit pour sa queuë, & nō pas au rebours,
 " ne plus ne moins qu'apres que le malle a esté créé,
 " la femelle est venue apres. Et en son liure du gou-
 uernemēt de la chose publique, aiant dit que nous
 sommes prests de faire peindre mesmes iusques
 aux lieux où lō fait pourrir le fumier, vn peu apres
 il dit qu'il y en a qui embellissēt leurs terres labou-

rables de vignes sur les arbres plantez à la ligne, & de meurthes mesmes, & qui nourrissent des paons, des pigeons, & des perdrix, à fin d'auoir le plaisir de les ouir jergonner, & des rossignols aussi: mais ie luy demanderois volontiers, que c'est qu'il sent & qu'il pense des abeilles & du miel. Car il estoit consequent à celuy qui auoit dit, que les pulces estoient créées vtilement, de dire que les abeilles estoient créées inutilement: & si leur donne lieu & place en sa chose publique, pourquoy est-ce qu'il defend à ses citoiens les choses qui resiouissent l'ouye? bref tout ainsi que celuy seroit impertinent qui reprendroit les conuiez au festin qui mangeroient des confitures & de la patisserie, beuroient de bon vin, & mangeroient des delicates viandes, & ce pendant louëroit celuy qui les auroit conuiez à ces delices la, & qui les leur auroit preparees: aussi est hors de toute raison celuy, qui louë la prouidence diuine de ce qu'elle a produit des delieux poissons, des oyseaux, du miel & du bon vin, & reprend ceux qui ne reiettent point tout cela, & qui ne se contentent pas de pain & d'eau pour manger & pour boire, choses qui nous sont tousiours à la main, & qui suffisent pour nostre nourriture: celuy la ne se soucie point de se contredire à soy mesme, & de tenir des propos tout contraires. Qui plus est en son traicté des exhortatiōs, aiant dit que c'est sans raison que lon a blasme & diffame l'auoir affaire avec ses meres, filles & sœurs, & de manger de quelque sorte de viande, ou bien d'aller au sortir d'avec vne femme, ou d'un mortuaire, à un sacrifice

A crifice : Car il fault, dit il, en cela regarder les bestes
» brutes, & par les exemples de ce qu'elles font, con-
» clure & colliger, qu'il n'y a rien de tout cela qui
» soit importun ou contre la nature : car on peult
» bien opportunément alleguer cela, & comparer
» l'usage des autres animaux, pour monstrier que ny
» pour s'assembler ny pour engédrrer, ny pour mou-
» rir és temples, il n'y a rien qui puisse souiller ny cō-
» taminer la diuinité. Et au contraire au cinquiésime
liure de la nature il dit, que le poëte Hesiodé nous
admoneste bien & hōnestement, de ne pisser point
B dedans les fontaines. ny dedans les riuieres, mais
encore plus raisonnable est il, s'abstenir de pisser
contre vn autel, ou contre l'image & statue d'vn
Dieu: & qu'il ne fait rien de dire, que les chiens, les
asnes & les petits enfans le font bien, qui n'ont
point de discretion ny de consideration de telles
choses. Il n'y a doncques point de propos de dire
là, qu'il soit opportun de considerer les exemples
des bestes brutes: & icy, qu'il soit hors de toute rai-
son. Il y a des philosophes qui imaginent vn mou-
uement accessoire de dehors en la partie principa-
Cle de l'ame pour bailler solution aux inclinations,
quand il semble que lon est contraint & forcé à
quelque chose par des causes exterieures. Ce mou-
uement apparoit principalement és choses ambi-
gues : car quand de deux choses egales en puissan-
ce, & du tout en tout semblables, il est force d'en
choisir l'vne, n'y aiant cause aucune qui nous incli-
ne plus tost en l'vne qu'en l'autre, d'autant qu'elle
n'est en rien meilleure que l'autre, ceste puissance

accessoire venât d'ailleurs, & saisissant l'inclination D
 de l'ame, decide toute ceste doubte. Contre ces
 philosophes la Chrysippus discourant, cōme for-
 çans la nature en mettant aucun effect sans cause,
 entre plusieurs exemples allegue l'osselet, & la ba-
 lance, & plusieurs telles autres choses qui ne peu-
 uent pas tomber ny pancher tantost en vn costé,
 & tantost en vn autre, sans quelque cause & quel-
 que difference qui soit en eulx entierement, ou qui
 leur aduienne d'ailleurs, parce qu'ils tiennent, que
 ce qui est sans cause ne peult estre nullement, ne ce
 qui est fortuit, mais qu'en ces mouuements acces- E
 soires qu'ils supposent, il y a quelques causes laten-
 tes qui secrettement esmeuent & induisent no-
 stre iustice & nostre inclinatio en l'vne des parties.
 Cela est l'vn des propos que plus souuent & plus
 notoirement il repete: mais ce que luy mesme dit
 apres tout au contraire, d'autant qu'il n'est pas ex-
 posé en veuë à tout le monde, ie l'allegueray aux
 mesmes paroles dont il vse. Car en son traicté de
 l'office de iuger, supposant deux courreurs qui ar-
 riuent au bout de la carriere tout l'vn quād & l'au-
 tre, il demande que c'est que doit faire le iuge en ce F
 cas la, à sçauoir s'il luy est loysible d'attribuer au-
 quel qu'il luy plaira des deux le rameau de palme,
 supposé encore qu'ils luy soient tous deux si fami-
 liers qu'il soit plustost pour leur gratifier du sié, que
 de leur oster ce qui seroit à eux, ou si la palme estât
 cōmune à tous deux, il luy sera loysible d'incliner
 fortuitemēt à l'vn ou à l'autre, comme s'ils eussent
 tiré au sort, ie dy incliner fortuitemēt, comme
quand

A quand lon nous presente deux drachmes semblables au demourât, nous enclinōs plus en celle que nous prenons. Et au sixiesme des offices, aiant dit qu'il y a certaines choses qui ne meritent pas que lon s'y arreste beaucoup, ny que lon les considere de bien pres, il estime qu'il fault en telles choses donner le choïs à la fortuite inclination de la pensee, ne plus ne moins qu'à l'aduenture du sort: comme, pour exemple, s'il est question d'esprouuer ces deux drachmes qui seront presentees, les vns pourront dire celle la, les autres celle cy est la bōne,

B mais pource qu'il en fault prendre l'vne des deux, alors sans s'arrester à en faire plus grand examen, nous prendrons la premiere venue. Et en vn autre lieu il dit, mettant cela à l'aduenture du sort, nous prendrōs quelquefois la pire. En ces passages la, la fortuite inclination de la pensee à la premiere venue, & le cōmettre à l'aduenture du sort, n'est autre chose sinon introduire vn choïs des choses indifferentes, sans aucune cause. Au troisieme, aiant dit de la Dialectique, que Platon & Aristote auoiēt fort trauaillé apres, & leurs disciples & sectateurs

C aussi, iusques à Polemon & à Straton, & principalement Socrates, & aiant encore adiousté à cela, que lon pourroit vouloir faillir avec de tels & si grands personnages, il subioinct puis apres de mot à mot:

„ S'ils n'en eussent, dit il, parlé qu'en passant par dessus, on se fust à l'aduenture peu mocquer de ce lieu

„ la: mais en aiant traicté si diligemment & si serieusement, comme de l'vne des plus grandes & plus

„ necessaires facultez, il n'est pas vray semblable

„ qu'ils aient si lourdement failly, estants en toute
 „ philosophie tels que nous les presumôs. Cômment
 doncq, luy pourroit quelqu'vn replicquer, ne ces-
 seras tu iamais de combattre de tels & si grands
 personages, & de les conuaincre, comme tu pen-
 ses, d'auoir erré? Car il n'est pas vray semblable
 qu'ils aient escrit diligemment & soigneusement
 de la Dialectique, & que des principes de la fin des
 biens, de la iustice & des Dieux, ils n'aient escrit
 qu'en iouïant, & par maniere d'acquit, encore mes-
 mement que tu appelles leurs traictez & discours
 aueugles, repugnans à foy mesme, & contenant
 innombrables fautes & erreurs. En quelque autre
 passage, il nie que le vice de *ἐμψυχονία*, c'est à dire,
 la ioye de voir mal aduenir à autrui, soit en estre,
 & qu'elle ait reale subsistence, pour autant, dit il,
 que iamais homme de bien ne s'esioiuit de voir mal
 aduenir à vn autre. Mais en son second liure du
 bien, declarant que c'est qu'enuie, c'est à sçauoir
 „ douleur du bien d'autrui : pour ce que les homes,
 „ dit il, veulent raualler leurs voisins, à fin que eulx
 „ aient le dessus : il y adiousté puis apres, la ioye du
 „ mal d'autrui, en disant, A celle la est contigue la
 „ ioye du mal d'autrui, parce que les hommes cher-
 „ chent à rabattre leurs voisins pour causes sembla-
 „ bles, mais quand ils sont detournez en d'autres
 „ mouuements naturels, il s'engédre la misericorde.
 Il appert par là, qu'il met la ioye du mal d'autrui,
 comme chose subsistente aussi bien que l'enuie &
 la misericorde: laquelle toutefois il dit ailleurs n'e-
 stre aucunement subsistente, comme ny la haine
 des

A des meschants, ny la cupidité de gain deshonneſte. Aiant dit en pluſieurs lieux que pour eſtre plus lōg temps heureux les hōmes n'en ſont pas plus heureux, que ceulx qui participent de la beatitude en vn moment de temps. En pluſieurs autres lieux au contraire il dit, qu'il n'en fault pas ſeulement eſtendre le doigt pour vne prudence qui ne dure qu'un moment de temps, ne plus ne moins qu'un eſclair qui paſſe volant. Mais il ſuffira d'alleguer les propres mots qu'il a eſcrits en ſon ſixieſme liure de queſtions morales, touchant ceſte matiere. Car

B aiant dit que ny tout bien ne tombe egalement en ioye, ny tout vertueux office en vanterie, il ſub-

» ioinct puis apres ces paroles: Car ſ'il ne doit auoir

» la prudence que pour vn moment de temps, ou

» pour le dernier iour de ſa vie, il n'en conuient pas

» ſeulement eſtendre le doigt pour vne telle prudence, combien que pour eſtre plus long temps

» heureux les hommes n'en ſoient pas plus heureux,

» ny la beatitude eternelle ne ſoit pas plus ſouhaitable, ny plus deſirable que celle d'un momēt d'heure. Or ſ'il eſtimoit que la prudence fuſt vn bien

C produiſant la beatitude, comme fait Epicurus, on ne reprendroit ſeulement que la nouueauté & faulſeté eſtrange d'une telle ſentence. Mais puis que la prudence n'eſt point autre choſe que la beatitude par ſoy, ains eſt la beatitude meſme, comment eſt-ce que cela ne ſe contre-dit & repugne, de dire que egalement ſoit eligible & deſirable la beatitude d'un moment d'heure, que celle d'une eternité, & que la beatitude d'un moment ne ſoit d'aucune

valeur? Il dit que les vertus s'entre-suyuent l'une
 l'autre, non seulement en ce que qui en a l'une, il a
 toutes les autres, mais aussi en ce que qui ouvre se-
 lon l'une, ouvre quand & quand selon toutes les
 autres, & tiennent qu'un homme n'est point par-
 fait qui n'a toutes les vertus. Mais toutefois au six-
 ieme liure des questions morales il dit, que ny
 l'homme de bien ne fait pas tousiours vaillamment,
 ny le meschant laschement, pource qu'il fault que
 l'un, luy estants certains obieets presentez, perse-
 uere en ses iugements, & que l'autre s'en departe:
 & est aussi croyable, que ny le meschant ne paillar-
 de pas tousiours. Or si faire vaillamment est user
 de vaillance, & faire laschement user de lascheté, ils
 disent choses contraires, quand ils afferment que le
 meschant ouurant selon un vice, ouvre selon tous
 ensemble, & que le vaillant n'use pas tousiours de
 vaillance, ny le lasche de lascheté. Il definit la Re-
 torique estre l'art, touchant l'ornement & ordre
 de l'oraison prononcee: d'auantage il a ainsi escrit
 „ au premier liure: Et ne fault pas à mon aduis auoir
 „ seulement soing d'un honnestes & simple ornemēt
 „ en ses paroles, ains fault aussi auoir cure des pro-
 „ pres gestes, des pauses & stations conuenables de
 „ la voix & composition du visage & des mains. Et
 „ estant ainsi curieux & exquis en cest endroit: au
 „ contraire en ce mesme liure, aiant parlé de la colli-
 „ sion des voyelles: Non seulement, dit il, il fault ne-
 „ gliger cela, & penser à ce qui est plus grand, & de
 „ plus d'importance, ains fault laisser passer certaines
 „ obscuritez, & certaines defectuositez, voire iusques
 à des

A à des incongruitez, dont plusieurs autres auroient
» honte. Or de permettre quelquefois d'estre cu-
rieux à bien disposer par ordre son langage iusques
à auoir hōneſte contenance, & en ſon viſage, & en
ſes mains, & vne autre fois ne ſe ſoucier point d'au-
cune defectuoſité en ſon langage ny d'aucune ob-
ſcurité, voire n'auoir point de honte de commettre
de groſſes incongruitez, cela eſt fait en homme qui
dit à la volée tout ce qui luy vient en la bouche.

Et en ſes poſitions naturelles touchant ce qui a
beſoing d'eſtre veu à l'œil, & d'experiance, aiant au
B parauant commandé d'y aller reſeruément, & y
» eſtre bien retenu, il dit: Par ainſi nous ne cuiderons
» pas, comme a fait Platon, que la nourriture liqui-
» de, c'eſt à dire le boire, aille aux poulmons, & la ſei-
» che en l'eſtomach, ny ne tomberons pas en autres
» erreurs ſemblables à celuy là. Quant à moy, i'eſti-
me que reprédre les autres, & puis tomber en l'er-
reur que lon a repris és autres, c'eſt la plus grande
repugnance & contrariété qui ſçauroit eſtre, & la
plus laide faulte. Mais luy meſme dit, que les con-
nexions qui ſe font par dix dignitez, c'eſt à dire dix
C propositions affirmatiues, excèdent en multitude
vn million, n'ayant pas ny par luy meſme aſſez di-
ligemment enquis & recherché cela, ny par hom-
mes exercez en tel art, bien entendu la verité. Et
routefois Platon a les plus excellents & plus re-
nommez medecins pour teſmoings, Hippocrates,
Philition, Dioxippus diſciple d'Hippocrates, &
entre les poètes, Euripides, Alceus, Eupolis, Era-
toſthenes, qui tous diſent que le boire paſſe par

les poulmons. Mais tous les ſçauants en Arithme-**D**
 rique, & exercitez en la ſcience des nombres, re-
 prennent Chryſippus, entre leſquels eſt Hippar-
 chus, monſtrant & prouuant qu'il y a en ſon dire
 vn tresgrand erreur de calcul, ſil eſt vray que l'af-
 firmatiue fait de cōnexions de ces dix dignitez iuf-
 ques à cent trois mille quarante & neuf: & la nega-
 tiue trois cēts dix mille neuf cēts cinquāte & deux.

Quelques vns des anciens ont dit, qu'il eſtoit
 aduenü à Zenon comme à celuy qui auoit du vin
 ſaigriffant, qu'il ne le pouuoit vendre ne pour vin-
 aigre, ny pour vin: car de ſon preallable, qu'ils ap-**E**
 pellēt, il ne le pouuoit expoſer en vente, ny com-
 me pour bon, ny comme pour indifferent. Mais
 Chryſippus a rendu l'affaire encore de plus mal-
 aiſee deffaitte, car en quelques endroits il dit, que
 ceulx la ſont furieux qui n'eſtiment rien & ne font
 compte des biens, de la ſanté & integrité du corps,
 & qui ne mettent peine de les auoir: & alleguant
 ce vers d'Heſiode,

Race des Dieux gentil Perſes trauaille.

il dit que ce ſeroit vne fureur que de dire,

Gentil Perſes garde de trauailler.

Et en ſon traitté des vies il eſcrit, que le ſage fera la
 court aux Roys pour faire ſes beſongnes, & enſei-
 gnera les lettres pour de l'argent, prenant des vns
 de ſes diſciples de l'argent d'auance, & faiſant mar-
 ché avec les autres. Et au ſeptieme liure des Ofi-
 ces il dit d'auantage, qu'il fera trois fois la culebutte
 prouueu qu'on luy baille vn talent. Et au premier
 liure des biens, il permet aucunement & concede
 à qui

A à qui le vouldra, d'appeller les choses preallables biens, & les contraires mauux, en ces propres termes. Si quelqu'un veult, fuiuant ces permutations la, appeller l'un bien à foy, & l'autre mal, prouueu qu'il vife aux choses, & ne vague point temerairement, & qu'il ne faille point en l'intelligence des choses signifiees, au demourant qu'il s'accommode à l'usage & coustume de la denomination. Ainsi aiant approché le preallable du bien si pres en ce passage la, & l'aiant meslé encore, au contraire en autres lieux il dit, que rien de tout cela ne nous appartient, ains que la raison nous retire & destourne de toutes telles choses: car il a ainsi escrit cela au premier liure de l'exhortation. Et au troisieme de la nature il dit, qu'il y en a qui benissent & reputent heureux & glorieux les Roys & les riches, qui est autant cōme si on les benissoit & reputoit heureux, pour ce qu'ils auroient des bassins à retraict, & des passemens d'or: mais qu'à l'homme de bien autant luy est perdre toutes ses facultez, comme s'il ne perdoit qu'une drachme, & l'estre malade autant que de chopper vn petit. Et pourtāt a il remply de telles contrarietez, non seulement la vertu, mais aussi la prouidence: car la vertu se trouuera extremement mechanique & folle, de s'occuper à choses si viles & de si peu de pris, commandant au sage de nauiger pour icelles gaigner, iusques au pais du Bosphore, & de saulter & culebutter. Et Iuppiter est digne de mocquerie, prenant plaisir à fouir appeller Ctesius, qui signifie donnant des possesiōs: & Epicarpus, superintendāt des fruiets:

& Charidotes, donateur de ioye, pourautant qu'il donne aux mauuais & aux meschans des bassins à retraict, & des passemens d'or, & aux bons choses valents vne drachme, quand ils deuiennent riches par la prouidence de Iupiter. Apollo est encore plus digne de mocquerie, sil est ainsi qu'il s'amuse à rendre responses & oracles touchant des bassins à retraict, & des franges d'or, & du choppement des pieds. Mais encore rendent ils ceste contrariété plus euidēte & plus manifeste par la demonstration: car ce dequoy lon peult, ce disent ils, & bien & mal vsfer, n'est ny bien ny mal, ny bon ny mauuais. Or tous les fols vsent mal de la richesse, de la santé, & de la force du corps, parquoy nulle de ces choses ne se pourra dire bonne. Si doncques Dieu ne donne pas la vertu aux hommes, ains ce qui est honnestē s'acquiert, & il donne la richesse, la santé sans la vertu, & à ceulx qui en doiuent non bien vsfer, mais mal, c'est à dire inutilement, honteusement & pernicieusement: & toutefois si les Dieux peuuent bailler la vertu & ils ne la baillent, ils ne sont pas bons: & s'ils ne les peuuent rendre bons, aussi ne leur peuuent ils doncques aider, attendu qu'il n'y a rien hors cela qui soit ny bon ny vtile. Car de dire que les Dieux iugent par vertu & par force ceulx qui sont autrement bons que par eulx, cela n'est rien dit: car aussi bien les bons iugent les mauuais par vertu & par force, tellement qu'ils n'en aident point plus les hommes qu'ils n'en sont aidez par les hommes. Toutefois Chrysippus ne iuge bon ny luy, ny au-

A cun de ses familiers, ou de ses precepteurs. Que pensez vous doncq' qu'ils sentent des autres, sinon ce que eux mesmes disent, qu'ils sont tous furieux, fols & insensé, qu'ils sont mescreans, violateurs des loix, qu'ils sont au plus hault & dernier degré de misere & d'infelicité? Et puis ils tiennent, que nous estans si mal-heureux & si miserables, sommes gouuernez par la prouidence diuine. Or si les Dieux se changeans nous vouloient offenser, affliger, & tourmêter & debriser, ils ne nous pourroient pas mettre en pire estat que nous sommes
B maintenant, selon que Chrysippus prononce, ny ne pourroit pas estre la vie de l'homme ne pire ne plus mal-heureuse qu'elle est, tellement que si elle auoit langue & voix pour parler, elle diroit les paroles d'Hercules,

Plein suis de maux, plus n'en pourrois auoir.
 Quelles sentéces & affirmatiōs pourroit on doncques trouuer plus contraires & plus repugnantes l'vne à l'autre, que celle de Chrysippus touchant les Dieux & touchant les hōmes, quand il dit que les vns, à sçauoir les Dieux, prouoyent le mieulx
C qu'ils peuuent, & les hōmes sont le pis qu'ils sçauoient estre? Il y a des Pythagoriens qui le reprennent de ce qu'il dit au traitté de la iustice, touchant les Coqs, à sçauoir qu'ils ont esté vtilement pro-
 „ creez: Car dit il, ils nous esueillent pour trauailler,
 „ ils amassent & deuorent les scorpions, & nous
 „ animent aux combats, nous imprimant vne en-
 „ uie & ialousie de combattre vaillamment, & tou-
 „ tefois il nous les fault manger, de peur qu'il

ne naisse plus grand nombre de poullets qu'il n'en
 seroit de besoing. Et se mocque tant de ceulx qui
 le reprennent de telles sentences qu'il escrit ainsi
 au troisieme liure des Dieux, touchant Iupiter, sau-
 ueur, createur, pere de iustice, de loy & de paix. Et
 cōme les villes & citez quand elles sont trop plei-
 nes de peuple, en ostent ou enuoyent des colonies
 au loing, & commencent des guerres contre quel-
 ques vns: aussi Dieu enuoye les commācemens de
 quelque mortalité: & cite pour tesmoing Euripi-
 des. & les autres qui disent, que la guerre de Troie
 fut enuoyee par les Dieux pour espuiser la trop
 grande multitude du peuple. Or quant aux autres
 routes euidētes faulsetez, ie les laisse: car ie n'ay pas
 proposé de rechercher tout ce qu'ils ont mal dit,
 mais seulement ce qu'ils ont dit en contredisant à
 eulx mesmes. Considérez comment il donne à
 Dieu tousiours les plus beaulx noms, & les plus
 humaines appellations du monde, & au contraire
 les effects sauuages, cruels, Barbares & Galatiques:
 car ces grandes mortalitez & pertes d'hommes ne
 ressemblent point proprement aux colonies que
 les citez enuoyent dehors, comme celles qu'ame-
 na la guerre de Troie, ou celle des Medes, ou la
 Peloponesiaque, si ce n'est que ces gents icy sça-
 chent qu'il y a eu quelque ville qui se fonde &
 se peuple dessoubs la terre aux enfers. Mais Chry-
 sippus fait Dieu semblable à Deiotarus, le Roy
 de Galatie, lequel aiant plusieurs enfans, & vou-
 lant laisser son estat & Royaume à l'un d'iceulx
 seul, il tua luy mesme tous les autres, comme s'il
 eust

A eust couppé & taillé les branches d'un cep de vigne, à fin que celle qui demeure en debviene plus grande & plus forte, combien que le vigneron le face lors que les branches sont encores petites & foibles. Et nous quand les petits chiens sont encore si ieunes qu'ils ne voient goutte, pour espargner la chienne, nous luy en oston plusieurs: là où Iupiter ne laisse pas tellemēt croistre & venir en aage parfait les hommes, ains luy mesme les faisant naistre & leur donnant croissance, les tourmente puis apres en leur preparant occasions de corruption

B & de mort, là où il falloit plustost ne leur donner point de causes & de principes de naissance: mais cela est moindre, & cecy que ie diray maintenant est bien plus grief: car il ne s'ourd guerre aucune aux hommes sans quelque vice, ains est cause de l'une la volupté, de l'autre l'avarice, de l'autre l'ambition & la cupidité de dominer. Parquoy si Dieu forge les guerres, par consequence aussi produit il doncques les vices, en irritant & tordant les hommes, combien que luy mesme en son traitté De iuger, & encore en son second liure des Dieux, escriue, Qu'il n'est pas raisonnable de s'ostenir que

„ Dieu soit cause de chose aucune deshoneste: car

„ tout ainsi comme les loix ne sont iamais cause de

„ violer les droits, aussi n'est iamais Dieu cause d'au-

„ cune impieté. Aussi n'est il pas vray-semblable qu'ils soient causes aux hommes de commettre aucune deshonesteté. Et que peut il estre plus deshoneste que de procurer les uns aux autres perdition & ruine, dont Chrysippus dit que Dieu

leur suggere les commencemens? Voire mais, dira D
quelqu'un, au contraire, il louë Euripides de ce
qu'il dit,

Si les Dieux font rien qui soit vicieux,
Certainement ils ne sont doncq pas Dieux.

Et ailleurs,

Accuser Dieu est chose bien facile.

comme si nous faisons autre chose maintenant
que d'exposer ses paroles & sentences contraires
les vnes aux autres: toutefois ce propos loué main-
tenant, se peult alleguer non vne, ny deux, ny trois
fois, mais innumerables, contre Chrysippus: car E
premierement en son traitté de la nature, aiant ac-
comparé l'eternité du mouuement à vn breuueage
composé de toutes sortes d'herbes, qui bransle &
tourne toutes les choses qui naissent, les vnes d'v-
ne sorte, les autres d'une autre: il dit ainsi, Comme
ainsi soit que le gouuernement & l'administration
de l'univers procede & aille en ceste sorte, il est ne-
cessaire que nous soions disposez en la maniere
que nous le sommes, cōment que ce soit que nous
le soions, soit que nous soions malades contre no-
stre propre nature, soit que nous soions mutilez F
& estropiez, ou que nous soions Grammairiens
ou Musiciens. Et de rechef vn peu apres, Se-
lon ceste raison nous en dirons autant de nostre
vertu ou vice, & generally de la science ou
ignorance des arts, comme i'ay dit. Et vn peu apres,
ostant toute doubte & ambiguité: Car il n'y a rien
de particulier, iusques aux moindres choses, qui
puisse autrement aduenir que selon la commune
nature,

A nature, & selon la raison d'icelle. Or que la nature commune & la raison d'icelle soit la destinee, la prouidence diuine, & Iupiter, il n'est pas iusques aux Antipodes qui ne le sçachent : car ils n'ont autre propos en la bouche que celuy la, & disent qu'Homere a fort bien dit,

De Iupiter le vouloir se faisoit.

referât cela à la destinee & à la nature de l'vniuers, par laquelle toutes choses se regissent. Comment est il maintenant possible que ces deux positions subsistent ensemble, que Dieu ne soit point cause

B d'aucune chose deshonneste, & qu'il n'y ait rien, iusques aux moindres choses, qui se face, sinon par la commune nature & selon la raison d'icelle? car entre toutes les choses qui se font, sont certes aussi les deshonnestes. Et toutefois Epicurus se tourne & vire de tous costez, & va imaginant toutes les subtilitez qu'il luy est possible, pour tascher à delier & deliurer le liberal arbitre de ce mouuement eternal, de peur de laisser le vice sans iuste reprehension. Mais cestuy-cy luy dône vne licence tout arriere ouuerte, de dire que non seulement il se

C cōmet par necessité de la destinee, mais aussi par la raison de Dieu, & selon la nature & la meilleure qui soit: encore y voit on cela de mot à mot: car la commune nature s'estendant à toute cause, il faudra que tout ce qui se fait, comment qu'il se face, & en quelque partie que ce soit, se face selon ceste commune nature & selon la raison d'icelle, par suite de consequence sans empeschement, par ce qu'il n'y a rien au dehors qui mette empeschement

à son administration, & qu'il n'y a partie qui se D
meuve, ne qui soit autrement habituee que selon
la nature commune. Mais quelles sont les habitu-
des & quels les mouuemens des parties? Il est cer-
tain que les habitudes sont les vices, & les mala-
dies, cōme l'auarice, la luxure, l'ambition, la couar-
dise, l'iniustice: & les mouuemens sont les actes qui
en procedent, comme les adulteres, les larcins, les
trahisons, les homicides, les parricides. Chrysippus
estime qu'il n'y a rien de tout cela ne petit ne grād
qui se face outre la raison de Iupiter, & contre la
loy, la iustice & la prouidēce, de maniere que vio- E
ler les loix n'est point contre la loy, ny oultrager
autrui n'est point faire contre iustice, ny faire mal
contre la prouidence. Et toutefois il tient que Dieu
punit le vice, & qu'il fait beaucoup de choses pour
punition des meschans, comme au second liure des
„ Dieux : Aucunefois, dit-il, il aduient des choses inu-
„ tiles aux bons, non comme aux mauuais par puni-
„ tion, ains par vne autre prouidence, comme il ad-
„ uient es villes & citez. Et de rechef en ces mots,
„ Premièrement il faut entendre les maux, comme
„ nous auons dit parauant, & puis qu'ils sont distri- F
„ buez selon la raison de Iupiter, ou par punition, ou
„ par vne autre œconomie & disposition de l'vni-
„ uers. Or est cela fort dur à digerer, que le vice soit
par la disposition & raison de Dieu, & neant moins
qu'il le punisse: mais il roidist encore d'auantage sa
contradiction au secōd de la nature, escriuant ainsi:
„ Mais le vice, quant aux grands & griefs accidents a
„ vne peculiere raison: car il se fait par la commune
raison

A raison de la nature, & à fin que ie le die ainsi, il se
 „ fait non inutilement, eu esgard à l'vniuersel: car au-
 „ trement les biens ne seroient point. Et puis il va re-
 prenant ceux qui également disputent & discou-
 rent en vne & en l'autre partie, luy que pour enuie
 qu'il a de dire tousiours, & en toutes choses quel-
 que nouueauté & singularité exquise par dessus
 tous les autres, il dit que ce n'est point inutilement
 qu'il y a des coupeurs de bourses, des calomnia-
 teurs, des luxurieux, & que ce n'est point inutile-
 ment qu'il y a des personnes inutiles, dommagea-

B bles, malheureuses: & fil est ainsi, quel est Iupiter?
 I'entens celuy de Chrysippus, fil punit vne chose
 qui n'est ny de soy mesme, ny inutilement: car le
 vice, selon l'opinion de Chrysippus, seroit totale-
 ment irreprehensible, & à l'opposite Iupiter luy
 mesme seroit à reprendre, fil fait le vice estant
 inutile, & fil le punit l'ayant fait non inutilement.

Et derechef au premier liure de la iustice, aiant dit
 des Dieux, qu'ils s'opposent aux iniquitez de quel-
 ques vns, mais oster du tout le vice, il n'est ny pos-
 sible, ny expedient quand il seroit possible, ny bon
 C d'oster toute iniustice, toute iniquité contre les loix
 & toute folie: ce qui n'appartient pas au present
 traitté d'en discourir, ny de rechercher. Mais luy
 mesme estant tout vice par le moien de sa philoso-
 phie, entant comme en luy est, ce qui n'est pas ex-
 pedient ny bon d'oster, il fait chose en cela qui est
 repugnante & à la raison & à Dieu. D'auantage en
 disant qu'il y a des iniquitez & pechez ausquels les
 Dieux s'opposent, il donne aisiblement à entendre

qu'il y a doncques quelque inegalité entre les pe-
chez. Oultre, aiant escrit en plusieurs passages, qu'il
n'y a rien à reprendre, ny dont on se peust plain-
dre en ce monde, par ce que toutes choses s'y font
par vne tresbonne raison : au contraire il y a des
endroits ausquels il nous laisse des negligences &
paresses reprehensibles & en choses non legeres
ny petites. Qu'il soit ainsi, en son troisiéme liure
de la substance, aiant fait mention qu'il peut bien
aduenir quelques telles fautes aux gens de bien &
„ d'honneur : Est-ce, dit-il, par ce qu'il y a des choses
„ dont on ne tient point de compte, comme en vne
„ grande maison, il ne se peut faire qu'il ne se perde
„ quelque son & quelques grains de bled, encore
„ que la totalité & generalité au demourât soit bien
„ gouuernee & regie? ou pour ce qu'il y a quelques
„ malings esprits superintendans sur ces choses la, où
„ certainement les negligences & paresses sont re-
„ prehensibles: & dit aussi qu'il y a beaucoup de ne-
cessité meslee parmy. Or ie ne me veux point ar-
rester à deduire au long, ny à peser combien gran-
de legereté & temerité c'est à luy de comparer les
accidents aduenus aux grands & vertueux per-
sonnages, comme la condamnation de Socrates,
l'embrasement de Pythagoras, qui fut bruslé tout
vif par les Cyloniens, le martyre que le Tyran De-
mylus feit endurer à Zenō, & le tourmēt que Dio-
nysius feit souffrir à Antiphon, quand ils les feirent
mourir à du son qui se perd és grandes maisons.
Mais qu'il y auroit des malings esprits commis à la
superintendence de telle charge, par prouidence
diuine,

A diuine, comme est il possible que cela ne soit vn reproche fait à Dieu, comme si c'estoit vn mal sage Roy qui commeist des gouuernemens de prouinces à des mauuais & temeraires Gouverneurs & Capitaines, en leur souffrant outrager, iniurier & tourmenter par sa nonchalance, les plus gens de bien de ses subiects? Et s'il est ainsi qu'il y ait beaucoup de necessité & cōtrainte meslé parmy les affaires de ce monde, adoncques Dieu n'est pas souuerain maistre de tout, ny toutes choses ne sont pas absoluëment regies & gouuernes par sa raison. Il combat fort alencontre d'Epicurus, & alencontre de ceux qui ostent du gouuernement du monde la prouidence diuine, les refutant principalemēt par les communes notions & conceptions nees avec nous, par lesquelles nous nous persuadons que les Dieux soient bienfaiteurs & benigns enuers les hommes: & pource que c'est chose toute vulgaire & commune parmy eux, il n'est ia besoing d'en alleguer les expres passages: & toutefois toutes sortes de gens ne croient pas que les Dieux soient doux ny benigns: car voyez ce que les Iuifs & les Syriens croient des Dieux: voyez les escripts des poëtes, de combien de superstition ils sont pleins. Il n'y a personne qui estime que Dieu soit mortel, corruptible, ny qu'il ait esté engendré, toutefois Antipater de Tarse, à fin que ie passe les autres sous silence, en son liure des Dieux en escrit ainsi de mot à mot. Mais à fin que tout ce discours soit plus clair, nous recueillirons en peu de paroles l'opinion que nous auons de Dieu. Nous estimons

„ donc que Dieu soit vn animal bien-heureux , in- D
 „ corruptible , & bienfaiteur aux hommes. & puis
 „ en exposant chascun de ces termes la, il dit : Com-
 „ bien que tous estiment qu'ils soient incorrupti-
 „ bles. Il faut d'ocques, selon le dire d'Antipater, que
 Chrysippus ne soit point entre ces tous la, car il
 n'estime qu'il y ait rien incorruptible entre tous les
 Dieux, sinon Iupiter tout seul, ains pense que tous
 également ont esté engédrez, & que tous sembla-
 blement aussi soient pour vne fois perir. Ce qu'il
 dit presque par tout, mais toutefois i'en allegueray
 vn passage expres de son troisiéme liure des Dieux. E
 „ à vn autre propos. Les vns, dit-il, sont engendrez
 „ & mortels, les autres non engendrez, mais la preu-
 „ ue & demonstration de cela, des son principe ap-
 „ partient plus à la science naturelle : car le Soleil &
 „ la Lune, & les autres Dieux qui sont de semblable
 „ nature, ont esté engendrez, mais Iupiter est sempi-
 „ ternel. Et de rechef vn peu plus auant. Autant en
 „ dira lon de Iupiter & des autres Dieux, touchant le
 „ naistre & le perir: car les vns sont perissables, & des
 „ autres les parties sont incorruptibles. A cela ie
 veux encore conferer vn peu de ce qu'en escrit F
 „ Antipater: Ceux, dit-il, qui ostent la beneficence
 „ aux Dieux touchét en partie à l'anticipee cognois-
 „ sance d'iceux, & par mesme raison ceux qui esti-
 „ ment qu'ils soient participans de generation & de
 „ corruption. S'il est ainsi doncques que celuy qui
 estime que les Dieux soient perissables & corru-
 ptibles, soit autant faux & abusé que celuy qui
 pense qu'ils n'ayent point de beneficence ny de
 benigne

A benigne affection enuers les hommes : autant doncques est esloigné de la verité Chrysippus, comme Epicurus, par ce que l'un oste aux Dieux l'immortalité & incorruptibilité, & l'autre leur oste la beneficence & liberalité. Et puis Chrysippus en son premier liure des Dieux, dit touchant ce point, que les autres Dieux se nourrissent, il dit
» ainsi: Les autres Dieux vsent de nourriture, s'entre-
» tenans de mesme egaleement par icelle, mais Iupi-
» ter & le Monde par vn autre maniere qu'eux qui
» sont engendrez & consumez par le feu. En ce lieu
B il maintient, que tous les autres Dieux se nourris-
sent, exceptez Iupiter & le Monde. Et au premier de la prouidence il dit, que Iupiter s'augmente tousiours iusques à ce que toutes choses soient consumées en luy : car estant la mort la separation du corps & de l'ame, & l'ame du monde ne se separe point, mais bien s'augmente elle continuellement iusques à ce qu'elle ait consumé toute la matiere en soy, il ne faut pas dire que le monde meure. Qui pourroit plus se contredire à soy mesme que celui qui dit qu'un mesme Dieu se nourrit & ne se nourrit point? & n'est ia besoing de l'inferer & colliger par consequence necessaire, attendu que luy mesme au mesme lieu l'a escrit tout appertement.
» Lon dit que le Monde seul se suffit à soy mesme,
» pour ce que le Monde seul contient en soy mes-
» me tout ce dont il a besoing, & dont il se nourrit
» de soy mesme, & s'augmente, les parties d'iceluy se
» transmuans l'une en l'autre. Non seulement don-
ques il se contredit & repugne à soy mesme, en

cela qu'il dit que les autres Dieux se nourrissent, **D** exceptez le Monde & Iupiter, mais aussi encore d'avantage en ce qu'il dit que le monde s'augmente en se nourrissant de soy-mesme : là où au contraire il estoit plus vray-semblable de dire, Le Monde seul ne s'augmente point, aiant pour sa nourriture sa destruction, & que au contraire les autres Dieux s'augmentent & s'accroissent d'autant qu'ils ont leur nourriture de dehors d'eux, & que plustost le monde se consumoit en eux, s'il est ainsi que le monde prenne tousiours de soy-mesme, & les autres Dieux de luy. Le secôd poinct que contient la commune notion & opinion qui est imprimée en nous, touchât les Dieux, c'est qu'ils sont beneicts, & bien heureux, & parfaicts: & pourtant louent ils Euripides de ce qu'il a dit,

Si Dieu au vray est Dieu realement,
 Il n'a besoing de poëte nullement,
 Qui à son los de beaux carmes escriue,
 Tout cela n'est que parole chetifue.

Toutefois Chrysippus aux lieux que j'ay alleguez dit, que le monde seul est contêt & suffisant à soy, pour ce que seul il contient dedans soy tout ce **F** dont il a besoing. Qu'est-ce doncques qui s'ensuit à ceste proposition, que le monde seul soit content & suffisant de soy, sinon que ny le Soleil ny la Lune ne sont suffisans de soy, ny autre quelconque des Dieux, & n'estans pas contents & suffisans de soy, aussi ne sont ils doncques pas bien-heureux? Il estime que l'enfant estant dedans le ventre de sa mere s'y nourrit naturellement, ne plus
 ne

A ne moins que fait vne plante & vn arbre dedans la terre, mais que quand il est enfanté, alors estant refroidy par l'air, & affiné, par maniere de dire, il mue d'esprit, & deuient animal, & que ce n'est pas sans cause que l'ame a esté appelée Psyche, à cause de ceste refrigeration la: mais puis apres repugnant à soy-mesme, il dit que l'ame est vn esprit plus rare & plus subtil de nature: car comment est il possible que vne chose subtile se face d'une grosse, & qu'un esprit se rarefie pour refroidissement, & par espessissement? Et qui plus est, comment est-ce que affirmant que l'ame s'engendre par refrigeration, ou par refroidissement, il estime que le Soleil qui est de feu soit animé & engendré d'une exhalation transmuee en feu: car il dit ainsi en son tiers liure de la nature, La mutation du feu, dit-il, est telle, par l'air il se tourne en eau, & de l'eau en la terre, luy estant aux dessous posée, l'air en exhale, lequel air venant à se subtiliser, le feu s'en produit tout alenuiron, & les estoiles avec le Soleil s'allument de la mer. Qu'y a il plus contraire à l'allumer que le refroidir? ou à rarefier & subtiliser que l'espessir & cōdenser? l'un fait l'eau & la terre du feu & de l'air, l'autre tourne ce qui est humide & terrestre en feu & en air. Et toutefois en vn lieu il fait le refrigerer cause de l'ame, & en l'autre l'allumer: & quand il y a inflammation par tout, dit-il, alors il vit & est animal: mais puis apres quand il vient à s'estaindre & à s'espessir, il se tourne en eau, en terre, & en nature corporelle. Au premier liure de la prouidence il escrit ainsi: Car quād le Monde est

" par tout en feu, alors il est tout aussi tost son ame & D
 " sa raison, mais lors que se tournant en humeur &
 " en l'ame delaissee au dedas, il se tourne presque en
 " ame & en corps, tellement qu'il demeure compo-
 " se d'iceux, il est d'une autre sorte. En ce passage il
 tient manifestement que les parties mesmes inani-
 mees du monde, par exustion & inflammation se
 tournent & muent en ame, & au contraire que
 par extinction l'ame se relasche & s'humecte en
 s'en retournant en nature corporelle. L'inferie doc-
 ques qu'il est impertinent, absurde & estrange, de
 vouloir tantost faire deuenir des choses insensibles E
 animees, & tantost transmuier la plus part de l'ame
 du mode en choses insensibles & inanimees. Mais
 encore oultre cela, le discours qu'il fait de la gene-
 ration de l'ame a la preuue & demonstration cõ-
 traire à son opinion. Car il dit, que l'ame s'engen-
 dre apres que l'enfant est sorty du ventre de la
 mere, parce que l'esprit se transforme par la refri-
 geration, ne plus ne moins que la force & le fil de
 l'acier s'affine par la trempe. Et pour prouuer que
 l'ame s'engendre, & qu'elle s'engendre encore
 apres que l'enfant est né, il vse de cest argument F
 principal, Que les enfans deuiennent semblables
 à leurs peres & meres en leurs meurs, & en leur in-
 clination naturelle. En quoy la repugnance & cõ-
 trarieté est si manifeste, qu'elle se peult, en maniere
 de dire, veoir à l'œil: car il n'est pas possible que l'a-
 me qui s'engendre apres l'enfantement prenne
 son ply d'inclination naturelle auant l'enfante-
 ment: ou il faudra dire, que l'ame, auant que d'estre,
 sera

A sera desia semblable à vne autre ame, c'est à dire qu'elle sera par similitude, & ne sera pas, par ce qu'elle ne sera pas encore en estre. Et si quelqu'un dit que c'est pour la temperature & les complexions des corps que la similitude s'imprime, mais que les ames quand elles viennent à estre engendrees se changent, il destruit l'argument & le signe, par lequel il se monstre que l'ame s'engendre. Car il s'ensuit par là que l'ame, encore qu'elle fust ingenerable, quand elle entreroit dedans le corps, se tourneroit par la température d'un semblable corps.

B Il dit aucunesfois que l'air est leger, & qu'il monte contremont, & quelquefois qu'il n'est ny pesant ny leger. Qu'il soit ainsi, en son second liure du mouuement il dit, que le feu n'ayant aucune pesanteur va contremont, & semblablement l'air aussi, & que l'eau est plus ressemblant & conforme à la terre, & l'air au feu. Mais en ses arts naturels il panche en la contraire opinion, que l'air n'a de soy ny pesanteur ny legereté. Il dit que par nature l'air est tenebreux, & pour ceste cause par consequent, il est aussi le premier froid, & que sa tenebrosité est directement opposée à la clarté, & sa froideur à la chaleur du feu: mouuant ce propos au premier liure des questions naturelles, au contraire en son traitté des habitudes il dit, que les habitudes ne sont autres choses que des airs, Par ce que les corps dit-il, sont cōtenus par elles, & la cause par laquelle vn chascun corps qui est contenu de quelque habitude est tel c'est l'air contenant, lequel on appelle durteté au fer, espaisseur en la poix, blancheur en

l'argent: en quoy il y a grande repugnāce, & grande & estrange faulseté. Car si cest air demeure tel qu'il est de sa nature, comment est-ce que le noir en ce qui n'est pas blanc se peut appeller blancher, & ce qui est mol en ce qui n'est pas dur, durer, & ce qui est rare en ce qui n'est pas espais, espaisseur? Et si l'on veut dire qu'en se meslant en cela, il s'altere & devient semblable, cōment est-ce dōc qu'il est habitude, ny puissance, ny cause de ces effects la, par lesquels il est luy mesme subiugué? Car cela est plustost souffrir que faire, & ceste mutation la n'est pas tant de nature cōtenante, que d'impuissance, par laquelle il perd toutes ses proprietéz & propres qualitez: cōbien que par tout ils soustienent que la matiere de foy est oyseuse, & sans nul mouuement, subiecte & exposée à recevoir les qualitez, & que ces qualitez sont esprits & tensions aërees, lesquelles formēt, moulent & figurent les parties de la matiere ausquelles ils s'attachent. Ils ne peuuent soustenir cela, aians supposé que l'air soit tel, cōme ils disent qu'il est: car si il est habitude & tension, il conformera & cōfigurera à foy chascun corps, tellemēt qu'il les rendra noirs & mols: mais si pour estre meslé & destrépié avec eux, il prēd des formes contraires aux siennes naturelles, il s'ensuit qu'il est doncques matiere de la matiere, non pas habitude, ny cause ou puissance d'icelle. Chrysippus escrit souuent, & en plusieurs lieux, que hors du monde il y a vn vuide infiny, & que l'infiny n'a ny cōmancement, ny milieu, ny fin: & est la raison principale par laquelle ils refutent de luy mes-

A me le mouuement contre les atomes, c'est à dire de petits corps indiuisibles que met Epicurus: par ce qu'en l'infiny il n'y a point de differences locales, par lesquelles on peust entédre ny specifier ny haut ny bas: mais au quatriéme liure des Possibles, il suppose qu'il y ait vn lieu de milieu, & vne place moyenne, là où il dit que le monde est fondé. Le
" texte où il le dit est tel: Pourtant fault il dire du
" mōde qu'il est corruptible: combien qu'il soit mal-
" aisé à prouuer, toutefois il me semble plus à moy
" estre ainsi. Et neantmoins pour induire à croire
" qu'il y ait, si il fault ainsi parler, quelque incorrupti-
" bilité, beaucoup luy sert l'occupatiō de la place du
" milieu, là où il est colloqué, pource qu'il est au mi-
" lieu. Car si lon entendoit qu'il fust ailleurs, il seroit
" totalement necessaire qu'il y eust quelque corru-
" ption attachee. Et de rechef vn peu apres: Car ainsi
" la substance eternellement a occupé la place du
" milieu, estant des le commencement telle, que, &
" par autre maniere, & par la rencontre, elle ne re-
" çoit point de corruption, & est eternelle. Ces pa-
" roles la contiennent vne repugnance & contrarie-
" té toute euidente, & qui se voit à l'œil, quand il
" nous laisse en l'infiny vne place du milieu. Mais il
" y en a vne autre seconde plus obscure & plus ca-
" chée que celle la, & aussi plus desraisonnable. Car
" estimant que le monde ne demoureroit pas incor-
" ruptible, si son assiette eust esté en autre endroit de
" l'infiny qu'au milieu: il appert manifestement qu'il
" craignoit que les parties de la substāce ne se mou-
" uans & tendans au milieu, il ne s'en ensuiuiſt vne

dissolution & corruption du monde. Or n'eust il **D**
 pas crainct cela s'il n'eust pēsé que les corps eussent
 naturellement tendu de tous costez au milieu, non
 de la substance, mais de la place qui contient la
 substance, de quoy il a en plusieurs lieux parlé, que
 c'estoit chose impossible, & contre la nature, par ce
 qu'il n'y a point dedans le vuyde de differēce, pour
 laquelle les corps se doiuent mouuoir plustost en
 çà qu'en là, & que la composition du monde est
 causée du mouuement au centre, & que routes
 choses de tous costez tendent au milieu. Et pour
 le veoir, il suffit alleguer son texte mesme du se- **E**
 cond liure du mouuement: car aiant dit que le
 monde est vn corps parfait, & que les parties du
 môde ne sont point parfaites, par ce qu'elles sont
 au regard de l'vniuers, & non pas par elles mesmes:
 & aiant discouru du mouuement d'iceluy, qu'il
 estoit par nature apte à se mouuoir en toutes ses
 parties pour se contenir & conseruer, non point à
 „ se rompre, dissouldre ne brusler, il dit apres: Mais
 „ l'vniuers tendant & se mouuant à mesme poinct,
 „ & ses parties aians mesme mouuemēt de la nature
 „ du corps, il est vraysemblable que ce mouuement **F**
 „ premier selon nature est propre à tous corps vers
 „ le milieu du monde, le monde se mouuāt ainsi, eu
 „ esgard à soy mesme & ses parties, comme estants
 „ parties d'iceluy. Et dea, luy pourroit dire quel-
 qu'un, homme de bien, mon amy, quel accident
 t'a fait oublier ces paroles la de prononcer, que le
 monde, si par fortune il ne se fust trouué & ren-
 cōtré au milieu, eust esté corruptible & dissoluble?

A Car son propre naturellement est de tendre tousiours à son milieu, & y adresser ses parries de tous costez en quelque endroit du vuide qu'il eust esté transporté : & contenant soy mesme & s'embrassant, il fust tousiours demouré incorruptible & hors de danger de toute fraction. Car les choses qui se brisent, & qui se corrompét & estaingnent, seuffrent cela par la diuision de chascune de leurs parties & dissolution, se retirant & escoulant chascune en son propre lieu naturel, hors de celuy qui leur est contre nature. Mais toy cuidant que qui **B** mettroit le mōde en autre endroit du vuide, il s'en ensuiuroit vne totale ruine & corruption, & l'affirmant ainsi, & pour ceste cause mettant vn milieu, là où naturellement il n'y en peult auoir, à sçauoir en l'infiny tu quittes là ces tensions, embrassemēts & inclinatioſ, comme n'aiants rien d'asseuré pour maintenir le monde, & attribues toute la cause du maintien & de la conseruation du monde, à l'occupation du lieu : & neantmoins tu adioustes encore cecy, cōme si tu prenois plaisir à te conuaincre & arguer toy mesme. Et en la sorte que chascune des parties se meut estant attachee au reste, il est accordant à raison que par soy aussi il se meue : & si par maniere de dire nous imaginions & supposions en quelque partie vuide de ce monde, & comme estāt enuelpé de toutes parts, il se mouueroit vers le milieu, il demourera en ce mouuement la, encore que, par maniere de dire, soudainement il se rencontrast du vuide autour de luy. Et puis chasque partie quelle qu'elle soit, embras-

fee du vuide ne perd point sa naturelle inclination **D**
 de tendre & se mouuoir vers le milieu, & le monde
 luy mesme tout entier, si la fortune ne luy eust
 préparé son siege au milieu, eust perdu sa vigueur
 & tension qui le conserue, les autres parties de sa
 substance se mouuans ailleurs: & en cela il y a de
 plusieurs autres grandes contrarietez à la raison
 naturelle: mais ceste cy particulierement entre au-
 tres alencontre de la raison de Dieu, & de la diuine
 prouidence, c'est que leur attribuant les moindres
 & plus legeres causes, il leur oste la principale & la
 plus grande. Car quelle autre puissance pourroit **E**
 estre plus grande que la manurention & la con-
 seruation de l'vniuers, ou de faire que la substance
 viue avec ses parties se contienne en soy-mesme?
 Mais cela est aduenu casuellemēt & fortuitement,
 selon Chrysippus, car si l'occupation d'un lieu est
 la cause de l'incorruptibilité du monde, & si elle est
 aduenue par cas d'adventure, il fault doncques
 inferer que le salut de l'vniuers depend de celle ad-
 uenture, non pas de la destinee ny de la prouiden-
 ce diuine. La doctrine touchant les choses possi-
 bles que met Chrysippus repugne directement
 contre celle de la destinee. Car si le possible n'est
 pas, selō ce que dit Diodorus, ce qui est ou qui sera
 veritable, mais tout ce qui est susceptible de pou-
 uoir estre, encore que iamais il ne doie estre, cela
 est le possible: il y aura beaucoup de choses possi-
 bles, qui ne seront pas par destinee inuincible, in-
 expugnable, & qui est par dessus toutes choses, ou
 bien il fault qu'il destruisse toute la force & puis-
 sance

A fance de la destinee : ou bien s'il est ainsi , comme
veult Chrysippus , ce qui sera susceptible de pou-
voir estre , tombera bien souuent en impossible , &
tout ce qui est vray sera necessaire , estant compris
& contenu de la plus grande necessité de toutes , &
tout ce qui est faulx impossible , aiant la plus gran-
de & plus puissante cause repugnante à luy , pour
pouvoir estre veritable . Car celuy auquel il est de-
stiné de mourir en la mer , comment est il possible
que celuy la soit susceptible de mourir en terre ? &
comment est il possible que celuy qui est à Me-
B gare vienne à Athenes , estant empesché par la de-
stinee ? Mais aussi sa doctrine & decision , touchant
les imaginations & fantasies repugne brauement à
la fatale destinee . Car voulant prouuer que la fan-
tasie n'est pas entiere cause du consentement , il dit ,
que les sages ferôt domage , imprimants de faul-
ses fantasies , s'il est ainsi que les fantasies facent en-
tierement le consentement . Car souuentefois les
sages ont de faulses imaginations & fantasies tou-
chant les meschants , & aménent vne fantasie vray-
semblable , non pas toutefois cause de consente-
C ment , car elle seroit aussi cause d'opinion faulse , &
de deception . Si doncq quelqu'un transfere ce
propos la du sage à la destinee fatale , disant , que la
destinee n'est pas cause des consentemens , car il
faudroit confesser que par la destinee se font les
faulx consentemens , & opinions & deceptions ,
& seront endommagez par la destinee : la raison
qui exempte le sage de iamais faire aucun dom-
mage , môstre quant & quant que la destinee n'est

pas cause de toutes choses. Car s'ils n'opinent ny ne reçoivent dommage par la destinee, certainement aussi ne font ils rien de bon, ny ne sont sages, ny n'opinent fermement, ny ne reçoivent bien & profit par la destinee, & ainsi s'en va à vau l'eau ceste conclusion qu'ils tiennent pour toute asseurée, que la fatale destinee soit cause de toutes choses. Et si quel qu'un d'adventure me dit, que Chrysippus ne fait pas la destinee fatale cause entière & absolue de toutes choses, mais seulement un principe antecedent, il se decouvrira de rechef se contredisant à soy mesme, là où il loue excessiue-
ment le poëte Homere disant de Iupiter,

Chascun de vous a de mal ou de bien

Ce qu'il luy plaist vous enuoyer du sien.

Et Euripide,

O Iupiter y a il apparence,

Qu'en nous chetifs soit aucune prudence,

Veu que du tout de toy nous dependons,

Et ne faisons de nous, ny n'entendons,

Sinon cela que cognoist ta sagesse ?

Celuy mesme escriuant plusieurs choses accordantes à cela, finalement il dit, que rien du tout ne s'arreste ny ne se meut, tant peu que ce soit, autrement que par la raison de Iupiter, qu'il dit estre le mesme que la destinee fatale. Et puis, la cause principiante est plus debile & plus infirme que la parfaite, & n'attaint pas à l'effect, estant vaincue par autres qui s'y opposent : là où luy prononçant que la fatale destinee est vne cause invincible, que lon ne peut ny empescher ny fleschir, luy mesme l'appelle pour
ceste

A ceste cause Atropos & Adraſtie, comme qui diroit, cause que lon ne ſçauroit deſtourner ny euitier, Neceſſité, & Peproméne, c'eſt à dire finiſſant & terminant toutes choſes. C'eſt à ſçauoir doncques ſi nous dirons que les conſentemens, les vertus, les vices, bien ou mal faire, ne ſont pas en noſtre liberal arbitre : ou bien ſi nous dirons, que la fatale deſtinee ſoit imparfaite, & la fatalité finiſſante n'aiât point de pouuoir de finir & les mouuemens & habitudes de Iupiter non paracheuees. Car de ces conſolutions la les vnes enſuiuent à dire, que la deſtinee ſoit vne cauſe abſoluë & parfaite, les autres à ce, qu'elle ſoit ſeulement cauſe principiante. Car eſtât parfaite & abſoluë de toutes choſes, elle tollit le liberal arbitre, & ce qui eſt en nous, & ſi elle n'eſt que principiante & acheminante, elle perd l'eſtre efficace par deſſus tout empeschement. Car ce n'eſt pas vne fois ny deux, mais par tout, & pour mieulx dire, en tous ces liures de Phyſique, qu'il y a aux particulieres natures & particuliers mouuemens, beaucoup d'obſtacles & d'empeschemens, mais que au mouuement de l'vniuers, il n'y en a point. Et comment eſt il poſſible que le mouuement de l'vniuers ne ſoit empesché & deſtoubé, ſ'eſtendant aux particuliers, ſ'il eſt ainſi que les ſinguliers & particuliers ſoient empeschez & deſtoubez ? Car la nature de l'homme en general n'eſt point empeschée, ſi celle du pied ou de la main ne l'eſt point, ny le mouuement de la galere ne ſera point empesché, ſ'il n'y a point d'empeschement à la voile ny aux rames & à voguer. Mais oultre ce-

12, si les fantasies & imaginations ne s'impriment point par fatale destinee, comment doncques sont elles cause des consentemens? Et si c'est pource qu'elles impriment des fantasies qui conduisent à consentement, & les consentemens se disent estre par fatale destinee, comment est il possible que ceste fatale destinee ne se contrarie & repugne à soy-mesme, attendu qu'es choses de plus grande importance elle imprime bien souuent des fantasies toutes differentes, & destourne la pensee & entendemēt en fantasies toutes contraires, là où ils tiennent que ceux qui s'attachent à l'une des imaginations, & ne soustiennent point leur consentement, errent & pechent. Car s'ils cedent, disent ils, à fantasies incertaines, ils choppent & bronchent: si à faulses, ils se trompent & abusent: si à non communément entendues, ils opinent. Et toutefois, il faut necessairement que ce soit l'un de ces trois, ou que toute fantasia ne soit pas œuvre ny effect de la destinee, ou que toute reception & assension de fantasia ne soit pas infallible, ou bien que la destinee mesme ne soit pas irreprehensible. Car ie ne voy pas cōment elle soit irreprehensible faisant de telles fantasies & imaginations, ausquelles le repugner & le resister ne soit pas reprehensible, mais le suiure & le ceder. Et toutefois en leurs disputes alencōtre des Academiques, la principale force de Chrysippus mesme, & d'Antipater, est de prouuer, que nous ne faisons du tout riē, ny ne sommes enclins à rien faire, sans consentemēt precedant, ains que ce sont fables controuuees à plaisir, & vaines

suppo-

A suppositions, que quand la fantasie propre se presente, incontinent on est enclin sans ceder ny consentir. Et de rechef dit Chrysippus, que Dieu & le sage imprimēt des faulses imaginations, non qu'ils veullēt que nous y cedions, ne que nous y consentions, mais que nous faisiōs seulement, & que nous nous incitions à ce qui nous apparoiſt. Mais que nous estants mauuais, pour nostre infirmité, descendons à telles fantasies & imaginations. La repugnāce & contrarieté de ces propos la est bien facile à voir. Car celuy qui ne veut pas que nous

B consentions aux fantasies qu'il enuoye, mais seulement que nous faisons, soit ou Dieu, ou le sage, il ſçait biē que telles fantasies ſuffiſent à faire operer, & que les consentemens ſont superflus. Car ſi ſçachant bien que la fantasie n'imprime point vn inſtinct à operer, ſans consentement, il nous imprime de faulſes & de vray-ſemblables fantasies. Il eſt dōcques ſciēment & volontairemēt cause de nous faire broncher & faillir, en preſtāt consentement à choſes non parfaictemēt entendues & comprises.

C DES COMMVNES CONCEPTIONS CONTRE LES STOIQVES.

IL eſt vrayſemblable, Diadumenus, que vous autres Academicques ne vous ſouciez pas beaucoup que lon die & penſe que vous philoſophiez cōtre les communes notices & conceptions, attendu que vous ne faictes pas grand compte des cinq cens de natu-

re mesmes, dont procede la plus part des communes conceptions, aians pour leur siege & fondement la foy & assurance des imaginations qui nous apparoiſſent: mais ie te prie que tu essayes de me guarir, ou par paroles, ou par charmes & enchantemens, ou par quelque autre espece de medecine, si tu en ſçais, par ce que ie viens à toy, plein, ce me semble, de grand trouble & d'estrange perturbation, tant i'ay esté secoué & esbranlé par certains personnages Stoiques qui m'ont fait perdre terre, combien qu'ils soient au demourât bien gens de biē certes, & encore mes familiers & amis: mais ils se sont trop asprement & hostilement attachez à l'Academie, attendu que pour quelques petites choses que i'auois dites modestemēt en tout honneur & reuerence, ils m'en ont, ie n'en mentiray point, bien rudement repris, & si ont appellé en cholere les anciens, Sophistes corrupteurs des sentences & doctrines de la philosophie, laquelle autrement s'en alloit en bon train bien établie, & plusieurs autres propos encore plus estranges, iusques à ce que finablement ils sont coulez sur les communes conceptions, reprochans à ceux de l'Academie, qu'ils y introduisoient vne confusion & combustion. Et y en a eu l'un d'entre eulx qui a dit, qu'il estimoit que ce n'auoit point esté par fortune, mais par diuine prouidence, que Chrysippus auoit esté apres Arcefilaüs & deuant Carneades, desquels l'un est autheur & promoteur de l'iniure & oultrage fait alencontre de la coustume, & l'autre a eu plus de vogue que nul autre de tous les

Acade-

- A** Academicques. Et Chrysippus aiant esté entre les deux, par ses escripts contraires à la doctrine d'Arcesilaüs, boucha & couppa chemin à l'eloquence de Carneades, aiant laissé au sentiment beaucoup de secours, comme pour soustenir vn siege, & luy ostant du tout le trouble des anticipations & communes conceptions, en corrigeant chascune, & la remettant en son propre, tellement que ceulx qui de rechef ont voulu depuis troubler & forcer les choses, n'y ont rien gaigné, ains ont esté conuaincus d'estre malicieux, & Sophistes trompeurs.
- B** Aiant doncques esté irrité & enflammé de ces paroles des le matin, i'ay besoing de gens qui m'estaignent & qui m'ostent comme vne inflammation de la doubte que i'en ay en mon esprit.

DIAD. Tu fais à l'aduenture comme plusieurs du vulgaire, mais si tu crois aux poëtes, lesquels disent, que l'ancienne ville de Sipylus en Magnesie fut iadis destruite & abysmee par la prouidence des Dieux, qui vouloient chastier & punir Tantalus: croy aussi à noz amis de l'eschole Stoïque, que nature a porté & produit, non par cas de fortune,

C mais de certaine prouidence diuine, Chrysippus, voulant renuerser la vie humaine, & mettre le dessus dessous, & au contraire le dessous dessus, car il n'y eut iamais homme qui fust plus à propos pour faire cela que luy ains comme Caton disoit de Iules Cesar, que deuant luy nul n'estoit iamais venu sobre ny aduisé à conspirer la ruine de la chose publique: aussi me semble il, que cest homme avec plus grande diligence, & plus d'eloquence, & de

viuacité d'entendement, abolit & destruit la cout-
 stume autât qu'en luy est. Ce que tesmoignét ceux
 mesmes qui le magnifient, quand ils combattent
 contre luy du Sophisme, qu'ils appellent le Men-
 teur : car de dire que ce qui est composé de posi-
 tions contraires, ne soit pas notoirement faulx : &
 derechef de dire aussi que des Syllogismes aiant les
 premisses vrayes, & les inductions vrayes, puissent
 encore auoir les contraires de leurs conclusions
 vrayes, quelle conception de demonstration, &
 quelle anticipation de foy est-ce que cela ne ren-
 uerse? On dit que le Poulpe en hyuer mange ses
 pieds & ses fleaux pendants, mais la Dialectique
 de Chrysippus ostant & subuertissant les princi-
 pales parties d'icelle, quelle autre conception laisse
 elle qui n'en deuienne suspecte? Car on ne scauroit
 penser que cela soit seur & ne branle point, qui est
 basti sur des fondemens qui ne demeurent point
 fermes, ains où il y a tant de doubtes & de trou-
 bles. Mais tout ainsi que ceulx qui ont de la fange
 ou de la poulciere dessus leurs corps, s'ils tou-
 chent à quelques autres, ou qu'ils se frottent à
 eulx, ils ne s'ostent pas tant l'ordure, comme ils se
 l'attachent d'auantage : aussi y en a il qui blasment
 & accusent les Academicques, & pésent leur met-
 tre sus des imputations & accusations, dont eulx
 mesmes se trouuent les plus chargez : car qui sont
 ceulx qui plus peruertissent les communes conce-
 ptions du sens commun que font les Stoïques?
 mais si tu veux, sans nous arrester à les accuser eux,
 nous respondrons aux calomnies & imputations
 qu'ils

A qu'ils nous mettent sus. LAMP. Il me semble Diadumenus, que ie suis maintenant deuenu tout autre & tout different de ce que i'estois tantost: car n'agueres ie m'en venois tout bas & rauallé, & perturbé, aiant besoing de quelqu'un qui parlât pour moy, & maintenant ie me tourne & change tout prest à accuser, & veux iouir du plaisir de la vengeance de les voir tous ensemble arguez & conuaincus, de ce qu'ils philosophét eux mesmes, contre les communes conceptions & communes anticipations, pour lesquelles principalement ils semblent magnifier leur secte. * & disent, qu'elle seule consent & s'accorde avec la nature. DIA D. Commencerons nous doncques premierement à leurs plus renommées propositions, qu'ils appellent eulx mesmes Paradoxes? c'est à dire, estranges opinions, aduouans eux mesmes facilement qu'elles sont estranges & exorbitantes, cōme, Que les sages seuls sont Roys, qu'ils sont seuls riches & beaux, seuls citoiēs, & seuls Iuges: ou si tu veulx que nous enuoyons tout cela au marché des vieilles & froides dērees, & que nous examinions ceste question

des matieres qui consistent plus en action, & qui se disent plus à certes. LAMP. Quāt à moy ie l'aime mieulx ainsi, car quāt aux refutatiōs de ces Paradoxes la, qui est-ce qui n'en est de pieça tout rēply? DIA D. Or cōsidere dōques en premier lieu, si cela est selon les cōmunes conceptions, consentir & accorder avec la nature, d'estimer les choses naturelles toutes indifferētes, & que ny la santé, ny la bōne disposition & bon portemēt, ny la beauté, ny

la force, ne soiét ny choississables, ny vtils, ny profitables, ny seruās à la perfection qui est selon la nature, ny les contraires aussi euitables, ny nuisibles & dommageables, comme mutilations de membres, douleurs, hontes, maladies, desquelles choses ils confessent que la nature nous allie aux vnes, & nous estrange des autres. Ce qui mesme est fort bien contre le commun sens, & la commune conception, que la nature nous allie & concilie à ce qui n'est ny bon ny vtile, & qu'elle nous estrange de ce qui n'est ny mauuais, ny nuisible, & qui plus est, qu'elle nous en estrāge & aliene iusques là, que pour faillir à obtenir les vnes, & tomber dedans les autres, les hommes avec raison se iettent eulx mesmes dehors de ceste vie, & refusent de viure. I'estime que cela se die aussi contre le sens cōmun, que la nature d'elle mesme soit indifferente, & que l'accorder & consentir à la nature, ait en soy quelque partie de bien: car ny suiure la loy & obeir à la raison n'est bon, si la loy & la raison ne sont aussi bonnes & honnestes, & encore est cela le moindre.

Mais si Chrysippus en son premier liure d'exhortation a escrit, Le viure heureusement gist & consiste seulement à viure selon vertu, & toutes autres choses accessiores, dit il, ne nous touchēt ny appartiennent en rien, ny ne nous seruent de rien à cela: Il fault qu'il aduouē que non seulement la nature est indifferēte, mais bien plus, qu'elle est insensee & folle, qui nous allie & fait amis de ce qui ne nous touche en rien: & sommes aussi fols nous mesmes de penser que la felicité souueraine soit consentir

A & s'accorder avec la nature, laquelle nous conduit à ce qui ne sert de rié à la felicité. Et toutefois qu'y a il plus selon le sens commun, que cōme les choses eligibles, choississables, sont pour viure vtilemēt, aussi les choses selon nature soient pour viure selon la nature? Mais eulx ne le disent pas ainsi, ains supposans que le viure selon la nature soit la fin derniere du bien de l'homme, neantmoins ils tiennent, que les choses selon nature soient de soy indifferentes. Et n'est pas moins que cela contre le sens commun & la commune conception, qu'un

B homme de bon sens & prudent ne soit pas egalemēt enclin & affectiōné à choses qui sont egales, ains que des vnes il n'en face compte aucū, & pour les autres il supporte & endure toutes choses, encore qu'en grandeur ou petitesse elles ne soient aucunement differentes: car ils tiennent que ce sont choses egales, mourir pour son pais, & s'abstenir de cognoistre vne vieille estant sur le bord de sa fosse, & que l'un & l'autre semblablement font ce que requiert le deuoir: & toutefois pour cela, comme pour chose grande & glorieuse, ils seroient prests

C & disposez à perdre la vie, là où se vāter de cestuy-cy seroit vne honte & vne mocquerie. Si dit encore Chrysippus au traitté qu'il a fait de Iupiter, que c'est chose froide, maigre & impertinente, de louer de tels actes, encore qu'ils procedent de la vertu, comme de porter vaillamment la picqueure d'une mousche guespe, & s'abstenir chastement d'une vieille tirant à la mort. Ceulx-la donc n'enseignent, & ne philosophent ils pas contre le sens

commun, & la commune conception, de confesser & aduouër qu'il n'y a rien de plus beau, que des actions qu'ils ont honte de louer: car comment est eligible, & comment approuuable ce qui ne merite pas ny que lon le louë, ny que lon l'admire, ains que lon reputé sots, froids & impertinents ceulx qui les louent ou admirent? Mais encore, à mon aduis, te semblera plus contre le sens commun, que l'homme sage & prudent ne se soucie pas, si l'a ou si l'a pas les plus grâds biens du monde, ains tel comme il est enuers les choses indifferentes, ainsi se deportera il au maniement & administration de ces biens la: car

Tant qu'il y a d'hommes mangeans le fruiçt,
 Que la grandeur de la terre produiçt,
 nous iugeons que ce qui present apporte & secours & vtilité, & absent fait faulte, & qui se fait regretter, soit bon, vtile & recherchable: mais ce pourquoy lon n'iroit pas d'icy là, si ce n'estoit pour iouer, rire, ou pour passer son temps, cela est indifferent: car nous ne separons ny ne distinguons par autre marque de difference l'homme diligent à bon escient, d'auec celuy qui se traueille pour neant, sinon que l'un se traueille à choses inutiles ou indifferentes, & l'autre pour quelque chose grandement vtile & profitable: mais ceulx cy font tout au contraire, car selon eulx l'homme sage & prudent se trouuant en plusieurs comprehensions, & memoires de comprehension, se souuenant de plusieurs choses dont il a certaine & parfaicte science, il estime qu'il y en ait peu qui
 luy

A luy appartenēt, & des autres ne s'en souciāt point, il ne pense pas auoir ny plus ny moins, pour s'en souuenir il aura la cōprehension, c'est à dire, certaine cognoissance & sciēce de Dion qui esternua, ou de Theon qui forgea, combien que toute comprehension en l'homme sage, & toute memoire aiant assurance & fermeté, est incontinent science, & vn bien grand, voire tresgrād. C'est à sçauoir doncques si il est autant sans cure ne soucy quand la santé luy default, quand quelqu'vn de ses sentimens se porte mal, quand il perd ses biēs, & si le sage estime que riē de tout cela ne le touche, ou si se sentāt malade il paye le salaire aux medecins qui le viennent visiter, & si pour gagner quelque argent il s'en va deuers Leucō, le prince du païs de Bosphore, & s'en va trouuer iusques en la Scythie le Roy Idarthyrsus, comme dit Chrysippus: & si y a des sens, que les perdant il ne voudroit pas viure. Commēt donc ne recognoissent & ne confessent ils qu'ils philosophēt contre le sens commun, prenans tant de peine, & se trauaillans tant pour choses indifferentes, & se portans indifferēment quand de grands biens leur sont ou presents ou absents? Mais encore est aussi cela contre les communes conceptions, que leur sage estant homme, ne s'esioit point pour sortir de plus griefs maulx, & entrer és plus grands biens, & toutefois c'est ce que fait leur sage, car sortant d'vne extremité de vice, & passant à vne extremité de vertu, fuyant la plus miserable vie qui soit au monde, & s'acquerant la plus heureuse, il n'en mōstre signe aucun ny appa-

rence de ioye, ny ne l'esléue, ny emeut aucunemēt D
 vn si grand changement, de ce voir eschappé de
 toute la misere & malheureté plus grāde qui pour-
 roit estre, & paruenū à vne consommation ferme
 & asseuree de tous biens. D'auātage cela est con-
 tre le sens cōmun, que le plus grand bien de l'hom-
 me soit l'estre immuable en ses iugemens & ses
 conformations, & toutefois que celuy qui attain-
 t à la cyme n'ait point besoing de cela, ny ne s'en
 soucie point quand il y est arriué, tellement que
 bien souuent il n'en estendrait pas seulement le
 doigt, pour ceste asseurance & stabilité, laquelle E
 toutefois ils estiment le souuerain & parfait bien.
 Si ne disent pas les Stoïques ces estranges propos
 la seulement, mais encore ceulx-cy d'auantage,
 Que le temps en quelque longueur qui suruienne
 n'augmentera point le bien du sage, ains que si par
 vn momēt d'heure seulemēt il a vne fois esté sage,
 il ne fera de rien moindre ny inferieur en felicité,
 à celuy qui tout son aage aura vescu selon vertu, &
 y aura heureusement vſé & passé toute sa vie. Et
 combien qu'ils prononcent & asseurent cela ainsi
 hardiment & vaillamment, ce neantmoins d'au- F
 tre costé ils disent, que la vertu de peu de duree ne
 sert ny ne profite de rien: car de quoy seruiroit à vn
 qui deuroit incontinent perir & estre noyé en vn
 naufrage, ou bien estre precipité du hault en bas
 d'vn precipice, si la sagesse en vn moment luy
 suruenoit? Et qu'eust seruy à Lichas, lequel Her-
 cules lança à tour de bras comme dedans vne fon-
 de au milieu de la mer, si l'eust soudain tourné
 de

A de vertu en vice? Ces propos la doncques ne sont pas seulement d'hommes qui philosophent contre les sens & les conceptions communes de tout le monde, ains aussi de ceux qui brouillent les leurs propres, & se cōtredisent à eux mesmes, si il est ainsi qu'ils estiment que acquerir & posseder la vertu, pour peu de temps que ce soit, ne diminue rien de la souueraine felicité, & que quant & quant ils ne facent du tout aucune estime d'une si briefue & si courte vertu. Et encore n'est-ce pas ce que tu trouueras le plus estrange en leurs propos, mais bien B qu'ils disent, que quand on acquiert ceste souueraine vertu & beatitude, celui qui l'acquiert, bien souuent n'en sent rien, & ne s'apperçoit point qu'estant n'agueres tres-miserable & tres-fol, maintenant il se treuve & heureux & sage tout ensemble: car non seulement ce seroit vne plaisante farce de dire, qu'un homme prudent & sage ignorast seulement ce seul poinct, qu'il fust sage, & ne congneust point qu'il fust hors d'ignorance. Mais à dire en somme, ils font le bien sans aucun pois, & si obscur qu'il n'apparoist point, si il est ainsi qu'il ne se face C point sentir quand il arriue: car de sa nature le bien n'est point imperceptible selon eux, ains escrit expressiement Chrysippus en son liure de la fin, que le bien est perceptible par le sentiment, & le preuue & demonstre à son aduis. Il reste donc que ce soit ou par sa foiblesse, ou par sa petitesse, qu'il fuit le sentimēt, quand ceux qui l'ont present ne le sentent ny ne l'apperçoient pas. Et puis il n'y auroit point d'apparence de dire, que la veuë sentant &

discernant ce qui est vn peu & moyennement D
 blanc, ne puisse sentir ce qui est en perfection blâc,
 & que l'attouchement qui sent & iuge ce qui est
 mollement & laschement chaud, ne sente point ce
 qui l'est extremement. Et encores est il plus absur-
 de, que quelqu'un comprenne ce qui est commu-
 nément selon la nature, comme la santé & le bon
 portement, & ignore la vertu quand elle se pre-
 sente, veu qu'ils disent, qu'elle est souuerainement
 selon nature: car comment ne seroit cela contre le
 sens commun, de comprendre bien la difference
 qui est entre santé & maladie, & ignorer celle E
 d'entre sagesse & folie? ains estimer que celle la
 s'en estant allée soit presente, & celle cy quand on
 l'a acquise, ignorer que lon l'ait? Et pour autant
 que apres que lon est arriué à la cyme du profit &
 auancement, on change en felicité & vertu, il fault
 necessairement l'un des deux, ou que cest estat la
 de profit & auancement ne soit point vice ny in-
 felicité, ou qu'il n'y ait pas grand' difference ny di-
 stance entre le vice & la vertu, ains que la diuersi-
 té des biens aux maux, soit petite & impercepti-
 ble au sentiment, car autrement les hommes n'i- F
 gnoreroient pas quand ils auroient l'un & l'autre.
 Tant que doncques il ne se departirent d'aucune
 contrariété de sentences, ains qu'ils se voudront
 permettre d'affirmer & poser toutes choses: Que
 ceux qui profitent & auancent encore sont fols
 & meschans: Que ceulx qui sont deuenus sages
 & bons, l'ignorent eux mesmes, & ne s'en ap-
 perçoient point: Qu'il n'y ait pas grande dif-
 ference

A fference entre la sagesse & la folie, te semble il qu'ils gardent vne grande constance & vniformité en leurs sentences & doctrines? Mais si en leurs doctrines ils contreuient au sens commun, & se contredisent à eux mesmes, autant en font ils en leurs negoces & affaires, quand ils afferment, que tous ceux qui ne sont pas sages, sont également mauuais, iniustes, desloyaux & fols: Et puis toutesfois en leurs affaires il y en a qu'ils refuient & abhorriſſent, & quelques vns mesmes qu'ils ne daignent pas saluer quand ils les rencontrent par le chemin: aux autres ils commettent leur argent, ils les elisent magistrats, leur donnent leurs filles en mariage. Parquoy si c'est par ieu qu'ils tiennent ces propos la si extrauagans qu'ils rauallent doncques leurs sourcils, & ne ſaſent point tant des graues: mais si c'est à certes, & comme philosophes, c'est contre les communes opinions, blaſmer & reprendre également tous hommes, & neantmoins vſer des vns comme des gens modeſtes, & d'autres comme de tres-meschans, & admirer extremement Chryſippus, & ſe mocquer de Alexinus, & neantmoins auoir opinion qu'ils ne ſoient pas moins fols l'un que l'autre. Il eſt bien vray, diſent-ils, mais comme celuy qui dedans la mer n'eſt qu'à vne coudee pres de la ſuperficie, ſe noye & ſuffoque tout auſſi bien comme ſ'il eſtoit enfondré en cinq cens braſſes de fond: auſſi ceux qui approchent de la vertu ſont auſſi bien dedans le vice, comme ceux qui en ſont bien reculez: comme les aueugles ſont toujours

» auergles, encore que quelques vns soient pres de **D**
 » recouurer leur veuë: aussi ceux qui profitent, ius-
 » ques à ce qu'ils aient attainct la vertu, ils demou-
 » rent tousiours fols & vicieux. Mais au contraire
 » que les profitans ne ressemblent pas aux auergles,
 ains à ceux qui voyent moins clair, & non pas à
 ceux qui se noyent, mais à ceux qui nagent, mes-
 mement pres du port, eux mesmes le tesmoignent
 par leurs œuures: car autrement ils ne s'en serui-
 roient pas pour Conseillers, Capitaines, Legisla-
 teurs & Gouverneurs, comme les auergles se ser-
 uent de guides pour les conduire, ny ne louëroient **E**
 & n'imiteroient pas les faicts, les actions; les dicts,
 & les vies d'aucuns, s'ils voyoient que tous egale-
 ment fussent noyez & suffoquez dedans la folie
 & la meschanceté. Mais encore laissant cela à part,
 considere vn peu cecy pour plus t'esmerveiller
 d'eux, de ce que par les exemples d'eux mesmes ils
 ne sont pas enseignez de quitter là ces sages qui
 ne se recognoissent pas eux mesmes, & qui ne sen-
 tent ny ne cognoissent pas, qu'ils cessent d'estre
 suffoquez, & qu'ils commencent à veoir la lumie-
 re, & qu'estans venus au dessus du vice & de la **F**
 malice, ils commencent à respirer & reprendre ha-
 leine: & que c'est contre le sens commun, qu'un
 homme qui a tous les biens, & à qui rien ne defect
 pour estre parfaitement heureux & bien fortuné,
 à celuy la il soit conuenable se deffaire soy-mesme,
 & encore plus, que celuy qui n'a ny n'aura iamais
 rien de bien, à celuy la il ne soit pas conuenable de
 refuser le viure, si ce n'est que quelque chose de
 celles

A celles qu'ils tiennent pour indifferentes, luy aduienne. Voyla les belles loix qui sont en l'eschole des Stoiques, & en deffont plusieurs, leur donnās à entendre qu'ils seront encore plus heureux, cōbien que selon eux le sage soit heureux, beneit, bien né, bien fortuné, assuré, sans danger, mais le mauuais & fol plein de tous vices & meschancetez, tel que lon ne scauroit où le mettre: & toutefois à ceux cy est conuenable de demourer en la vie, & à
 „ ceux la d'en sortir. Et non sans cause, ce dit Chry-
 „ sippus, par ce qu'il ne faut pas mesurer la vie aux
 B biens ou aux maux, ains à l'estre selon nature. Voyla comment ces philosophes la maintiennent la coustume ordinaire, & philosophent selon les communes conceptions. Que dis-tu? Ne faut il pas considerer,

Si bien ou mal se fait en la maison,
 à celuy mesmemēt qui fait profession d'enseigner de la vie & de la mort: ne doit il pas examiner, cōme à la balance, ce qui a marque de seruir à la felicité & à l'infelicité, pour en choisir ce qui en sera profitable, ains faire son fondement & la supputa-
 C tion pour viure plus heureusement ou non, des choses indifferentes, & qui point ne seruent ny ne nuisent? Selon telles presuppositions & tels principes, sera il pas conuenable que celuy à qui rien ne defaut de ce que lon doit fuir, choisisse de viure, & que celuy-la fuye le viure qui a tout ce que lon doit chercher & eslire? Et combien qu'il soit estrāge & hors de raison, de dire que ceux qui ne sont en nul mal, fuyent la vie, encore est il plus estrange

& plus hors de tout propos & de toute apparence, pour n'auoir pas quelque chose indifferente, quitter & abandonner ce qui est bien, comme ceux-cy font, laissans la felicité & la vertu presente à faulte de richesse & de santé qui leur est absente:

Saturnien à Glaucus bien osta

L'entendement, alors qu'il permuta

Cent bœufs à neuf, & de l'or à du cuyure.

Et toutefois encore les armes de cuyure n'estoient pas moins vtils pour combattre que celles d'or, là où la belle forme & disposition du corps & la santé, selon les Stoïques, n'apporte aucun profit ny accroissement à la felicité. Et neantmoins ceux-cy permutent & eschangent la sagesse à la santé: car ils tiennent qu'il eust esté conuenable à Heraclitus & à Pherecydes, fils eussent peu quitter la vertu & la sagesse, si par là ils eussent peu faire cesser leurs maladies, l'un la pediculaire, l'autre l'hydropisie. Et si Cyrcé verfoit deux breuuages, l'un qui feist deuenir les hommes fols de sages, & l'autre sages de fols, Vlysses eust deu boire plus tost celuy de la folie, que de changer sa figure humaine en forme de beste, aiant en soy la sagesse, & par consequent la felicité aussi: & disent que c'est la sagesse & prudence mesme qui monstre & enseigne cela, & les admoneste ainsi, Quitte moy la & me laisse perir, si faut que ie sois portee çà & là en forme & figure d'asne. Mais ceste sagesse & prudence la, ce leur dira quelqu'un, est la sagesse d'un asne, si l'estre sage & heureux est par soy bon, & porter la face d'un asne est indifferant. On dit qu'il y a vne
nation

A nation entre les Æthiopiens, là où vn chien est le Roy, & est salüé & honoré comme Roy, a les honneurs & les temples que lon fait aux Roys, & les hommes y font tous les offices qui appartiennent aux gouuerneurs de villes, & aux magistrats. N'est-ce pas tout de mesme enuers les Stoïques? Car la vertu a le nom & l'apparence du bien, & l'appellent seule eligible, profitable & vtile, mais toutefois ils font toutes choses, ils philosophent, ils viuent & meurent à l'appetit & comme par le commandement des choses indifferentes. Et toutefois
B il n'y a personne des Æthiopiens qui tue ce chien là, ains est assis & adoré de tous en grande reuerence: mais ceux-cy perdent la vertu, & la font mourir & perir en eux mesmes, pour retenir la santé & la richesse. Mais le couronnement que Chrysippus mesme adioust à leurs enseignemens
 „ nous oste de peine d'en dire d'auantage: Car comme ainsi soit, dit-il, qu'il y a en la nature des choses
 „ bonnes, des autres mauuaises, des autres indifferentes & moiennes, il n'y a homme qui ne voulust
 „ plus tost auoir ce qui est bon, que ce qui est indifferent, ou ce qui est mauuais. Et qu'il soit vray,
 „ nous en faisons mesmes les Dieux tesmoins,
 „ quād nous leur demandōs, par noz prieres & oraisons, principalemēt la possession & iouissance des
 „ biens: ou sinon, à tout le moins de pouuoir eschapper les maux: mais ce qui n'est ny bon ny mauuais, nous ne le voulōs point auoir au lieu de bien,
 „ & le voulons bien auoir au lieu du mal. Mais cestuy-cy change la nature & renuerse son ordre,

transposant le milieu de la place moienne en la dernière, & ramenant le dernier, & le remuant en la place du milieu, comme font les Tyrans qui aux meschans donnent le credit & l'autorité, nous donnant la loy de chercher premierement le bien, secondement le mal, & de reietter & reputer le dernier & le pire de tout ce qui n'est ny bon ny mauuais, comme si lon mettoit apres le ciel les enfers, & que lon reiettaist la terre & ce qui est alentour d'elle là bas en la fondriere du Tartare,

Là bas deffoubs bien loing au fond du monde,

Où l'enfer est baricaue profonde:

Aiant doncques dit en son troisiéme liure de la nature, qu'il vaut mieux viure, encore que imprudét & fol, que de ne viure point, encore que iamais l'homme ne deust deuenir sage: il y adioust de
 „ mot à mot, Car tels sont les biés des hommes, que
 „ les maux en quelque maniere vont deuant ceux
 „ qui sont au milieu, non pas qu'ils aillent deuant,
 „ mais la raison avec laquelle est le viure conioinct
 „ peze plus & va deuant, encore que nous deuions
 „ estre fols. Il est doncques aussi manifeste, qu'encor
 que nous deuions estre meschans, iniustes, enne-
 mis, & haïs des Dieux, & mal-heureux, car rien de
 tout cela ne defaut à ceux qui sont fols, il vault
 donc mieux estre mal-heureux que n'estre point
 malheureux, & souffrir mal que ne souffrir point,
 commettre iniustice que n'en commettre point,
 violer les loix que ne les violer point, c'est à dire, il
 fault faire ce qu'il ne faut pas, & conuient viure se-
 lon ce qui ne conuient pas. Ouy, car il est pire estre
 sans

A sans discours de raison & sans sentiment, que d'estre fol. Et où ont ils doncques la ceruelle, de ne vouloir pas aduouer & cōfesser que cela soit mal, qui est pire que le mal, & que pour ceste cause ils afferment estre à fuir? Pourquoi disent ils qu'il ne fault fuir que la folie, si est conuenable de fuir non moins, mais encore plus, la disposition qui n'est pas capable ny susceptible de folie? Mais qui se courrouceroit ou scandaliseroit de cela, se souuenant de ce qu'il a escrit en son second liure de la nature, où il dit & affirme, que le vice n'a point

B esté inutilement fait pour l'vniuers? Mais il sera meilleur de repeter ceste sienne doctrine avec ses propres termes, à fin que tu entendes en quel lieu mettent, & en quel rang tiennent le vice ceux qui accusent Xenocrates & Speusippus, de ce qu'ils n'estimoient pas la santé chose indifferente, ny la richesse inutile, & quels propos ils en tiennent.

» Mais le vice, dit-il, a son limite au regard des autres accidents, car il est aussi luy aucunement selon nature, & à fin que ie die ainsi, il n'est pas du tout

» inutile, eu egard à l'vniuers, car autrement le bien

C ne seroit pas. Doncques fault il inferer, qu'il n'y a point de bien entre les Dieux, puis qu'il n'y peult auoir de mal, ny apres que Iupiter aura resolu toute la matiere en soy & sera deuenu vn, aiant osté toutes autres diuersitez & differences, ce ne sera doncques plus rien que le bien, attendu qu'il n'y aura plus rien de mal. Et il y aura accord & mesure en vne danse sans que personne y discorde, & santé au corps humain sans que nulle partie

d'iceluy en soit malade ne dolente: & il ne se pour-
 ra faire qu'il y ait de la vertu sans le vice, ains com-
 me il y a quelque conuenance entre certaines dro-
 gues medicinales, & le venin d'un serpent ou le
 fiel d'une hyaine, aussi y aura il quelque alliâce en-
 tre la meschanceté de Melitus, & la iustice de So-
 crates: & entre la dissolution de Cleon, & la preu-
 dhômie de Pericles. Et commét est-ce que Iupiter
 nous eust produit Hercules & Lycurgus, s'il ne
 nous eust quant & quant aussi engendré Sardana-
 palus & Phalaris? Et m'esbahis qu'ils ne disent
 aussi que la Phthise, quand on crache les poulmôs, ^E
 a esté mise en auant pour le bon portement, & la
 goutte pour la bonne disposition des pieds, &
 qu'Achilles n'eust pas esté cheuelu, si Therſites
 n'eust esté chauue: car quelle difference y a il entre
 ceux qui alleguent ces folies & resueries là, & ceux
 qui disent que la dissolution & paillardise n'a pas
 inutilement esté mise sus pour la continence, &
 l'iniustice pour la iustice, à fin que nous prions aux
 Dieux que tousiours il y ait de la meschanceté,

Et qu'il y ait tousiours des menteries,

Propos rusez, & fines tromperies:

si ces choses la ostées la vertu s'en va quant & quāt
 perduë & peric. Mais veux tu encore veoir ce
 qu'il y a de plus galand & de plus elegant en sa
 „ gentille inuention & deduction? Tout ainsi, dit-il,
 „ que les Comédies ont quelquefois des epigrâmes
 „ ou inscriptions ridicules, lesquelles ne valent rien
 „ quant à elles, mais neantmoins elles dōnent quel-
 „ que grace à tout le poëme: aussi est bien à blâmer
 & ridi-

A & ridicule le vice quant à luy, mais quant aux autres il n'est pas inutile. Premièrement doncques c'est chose qui surpasse toute imagination de faulseté & absurdité, de dire que le vice ait esté fait par la diuine prouidée, ne plus ne moins que le mauuais Epigramme a esté composé par la volonté expresse du poëte. Car comment, si cela est vray, seront doncques plus les Dieux donneurs de biens que de maux? & comment est-ce que le vice sera plus ennemy & hay des Dieux? & que pourrons nous plus respondre à ces sentences icy des poëtes

B qui sonnent si mal aux aureilles religieuses,

Dieu fait sortir en estre quelque cause
 Quand d'affliger du tout il se dispose
 Vne maison :

Et ceste autre,

Lequel des Dieux les a ainsi poullez,
 A contester en termes courroucez?

Et puis vn mauuais Epigramme orne & embellis la Comédie, & sert à la fin à laquelle elle est ordonnée & destinee, qui est de plaire & donner à rire aux spectateurs. Mais Iupiter que nous surnommōs pere, & paternel, souuerain iuridique, & parfait ouurier, comme dit Pindare, n'a point composé ce monde comme vne farce grande, variable & de grande science, ains comme vne ville commune aux hommes & aux Dieux, pour y habiter avec iustice & vertu en commun accord heureusement. Et quel besoing estoit-il à ceste sainte & venerable fin de brigands & larrons, de meurtriers, de parricides, ny de Tyrans? Car le vice n'estoit

point vne entree de morisque plaisante ny galante & agreable à Dieu, & n'a point esté attaché aux affaires des hommes pour vne recreation par maniere de passe-temps, pour faire rire, ny pour vne gaudisserie, choses qui n'apportent pas seulement vne vmbre de celle tant celebree concorde & conuenance avec la nature. Et puis le mauuais Epigramme ne fera qu'une bien petite partie de la Comédie, & qui occupera bien fort peu de lieu en icelle, & si n'y abondent pas telles ridicules compositions, ny ne corrompent & gastent pas la grace des choses qui y sont bien faites: là où toutes les affaires humains sont tous remplis de vice, & toute la vie des hommes, depuis le commencement du preambule iusques à la fin de la conclusion, est desordonnee, deprauee & perturbée, & n'y en a partie aucune qui soit pure ny irreprehensible, ains est la plus laide & plus mal plaisante farce qui soit au monde. Parquoy ie luy demanderois volôtiers, à quoy a esté le vice vtile à l'vniuers: Car ie croy qu'il ne dira pas, pour les choses diuines & celestes, parce que ce seroit vne mocquerie de vouloir dire, que si le vice n'eust esté ny ne feust entre les hommes, ny l'auarice, ny la menterie, & que si nous ne nous entredefrobions, & pillions, & calomnions, & entretuions, le Soleil ne chemineroit pas son ordonné chemin, ny le monde ne garderoit pas ses saisons & ses reuolutions des tēps ordinaires, ny la terre ne seroit colloquée au milieu de l'vniuers, pour donner les principes & causes primitives des pluyes & des vents. Il reste donc
que

A que ç'ait esté pour le regard de nous & de noz affaires, que le vice ait esté vtile au monde, & est à l'aduenture ce qu'ils disent aussi. Sommes nous doncques plus saincts pour estre vicieux? ou auons nous plus grande abondance des choses qui nous sont necessaires? nous sert elle ceste mauuaistié ou à nous rēdre plus beaux, ou à nous faire plus forts? Ils disent que non. Aussi est-ce vn nom de silence seulement, & vne opinion celle-la tenebreuse de Sophistes nocturnes qui se couurent d'yne nuict, non pas comme la preudhomie, laquelle est exposée à tous en veuē de tout le monde, en sorte qu'il n'est pas possible qu'elle apporte aucune nuyssance, ou chose qui ne soit vtile: mais moins encore, ô bons Dieux, pour le regard de la vertu, à laquelle nous auons esté nez. Et quelle absurdité seroit ce de dire, qu'à vn laboureur, à vn marinier, à vn chartier, ce qui leur est vtile, leur sert & leur aide à paruenir à leur but & à leur propre fin, & ce qui auroit esté créé de Dieu pour la vertu, ait perdu, gasté & corrompu la vertu? Mais à l'aduenture est il desormais temps de passer à vn autre poinct, &

c laisser cestui-cy. **L A M P.** Non ie te prie, mon amy, pour l'amour de moy: car ie desire sçauoir & entendre comment ces gens icy introduisent les maux deuant les biens, & le vice deuant la vertu.

D I A D. Aussi est ce certainement, amy, vn poinct bien digne de sçauoir & d'entēdre. Si en babillent ils bien au long, mais en fin ils disent, que prudence est la science des biens & des maux, autrement qu'elle seroit ostee & abolie de tout poinct, par ce

que tout ainsi comme estant la verité, il est impos-
sible que la faulseté ne soit aupres : au cas pareil est
il conuenable qu'estans les biens, les maux soient
quant & quant aussi. L A M P. L'un n'est pas mal
dit, mais il me semble que de moy mesme i'apper-
çoy l'opposite de l'autre : Car i'en voy bien la dif-
ference, par ce que ce qui n'est pas verité est incō-
tinent mensonge, mais ce qui n'est point mal, n'est
pas incontinent bien, par ce qu'entre le vray & le
faulx il n'y a point de milieu, mais entre le bien &
le mal, si, à sçauoir ce qui est indifferent : & n'est
pas necessaire si l'un est, que l'autre soit aussi quant
& quant, car il peut estre que la nature ait le bien
sans qu'elle ait besoing du mal, mais ouy bien ce
qui n'est ne bien ne mal : mais du premier propos
s'il se dit quelque chose par les vostres, c'est ce
qu'il faudroit ouir. D I A D. Il s'en dit beaucoup
de choses, mais pour ceste heure il en fault pren-
dre ce qui est plus necessaire. Premièrement c'est
vne sottise de penser que pour la prudence le bien
& le mal ait subsisté. Car au contraire estant ia le
bien & le mal, la prudence est suruenue apres, ne
plus ne moins que la medecine a esté trouuee, estās
ia les choses salubres & maladiues. Car le bien & le
mal ne subsistent pas à fin que la prudence soit,
mais la puissance par laquelle nous iugeons & dis-
cernons le bien & le mal qui desia sont, s'appelle
prudence: ne plus ne moins que la veüe est vn sen-
timent, par lequel nous discernons le blanc d'auec
le noir, lesquelles couleurs ne sont point venues en
estre à fin que nous eussions la veüe, mais à l'oppo-
site

A site nous auons eu befoin de la veuë pour discerner ces couleurs la. Secondement quād le monde sera tout reduit en feu, selon qu'ils tiennent eux, il ne demourera rien qui soit de mal, & l'vniuers alors sera tout sage & prudent: ainsi fault il qu'ils confessent qu'il peult y auoir prudence, encore qu'il n'y ait point de mal, & qu'il n'est point necessaire que le mal subsiste si prudence est. Mais quāt bien il seroit totalement ainsi, que la prudence fust la science du mal & du bien, quel mal y auroit il, si estans les maux abolis, il n'y auoit plus de prudence, mais vne autre vertu au lieu d'elle, laquelle ne seroit plus science du mal & du bien, mais seulement du bien? Comme si entre les couleurs le noir perissoit entierement, qui nous contraindroit de confesser que la veuë perist aussi? Car qui nous empescheroit de dire, que la veuë ne seroit pas le sentiment pour discerner le blanc & le noir? Il n'y auroit point d'inconuenient, si nous n'auions pas le sentiment que tu dis, mais bien vn autre sentiment & puissance naturelle, par laquelle nous apprehenderions la blanche & noire couleur. Car ie

E ne pense pas que quand bien la faueur amere, ou toutes les choses ameres seroient ostees hors de la nature, que pour cela le goust fust perdu, ny l'atouchement, quand toute douleur seroit abolie & aneantie, ny prudence aussi, quand le mal ne seroit point present, ains que ces sentimens la demoureroient qui apprehenderoient les faueurs douces, & la prudence aussi qui seroit la science du bien, & de ce qui ne seroit pas bien. Et sil y en a

qui ne le trouuent pas bon ainſi, qu'ils prennent le **D** nom pour eux, & nous laiffent à nous la choſe. Mais ſans cela, qui empescheroit de dire, que le mal fuſt en intelligence, & le bien en eſſence: comme la ſanté eſt, à mon aduis, entre les Dieux en eſſence, & la fiebure & la pleureſie en intelligence, attendu que, comme ils diſent eulx meſmes, nous auons tous affluence de tous maux, & rien de bien: mais pour cela nous ne laiſſons pas d'entendre que c'eſt que prudence, que c'eſt que le bien, & que c'eſt que la felicité. Ce qui fait à eſmer-ueiller, ſi n'y aiant point de vertu, il y a des gens **E** qui enſeignent touteſois que c'eſt, & en imprimant vne comprehension. Mais ſi elle n'eſtoit point, il ne ſeroit pas poſſible d'en acquerir l'intelligence. Voiez ce que nous perſuadent ceux cy qui philoſophent ſelon les conceptions communes, que par l'imprudence nous cōprehendons la prudence, mais la prudence ſans l'imprudence ne peut comprendre l'imprudence meſme: & quand bien la nature euſt neceſſairement eu beſoing de la generation de mal, vn exemple certes, ou deux de mal euſt peu ſuffire, & ſi vous voulez, il falloit **F** qu'il y euſt dix mauuais, ou mille, ou dix mille, non pas vne ſi grande abondance de mauuaiſtié & de vice, que ny l'arene, ny la poulciere, ny les plumes des oyſeaux aux pennages diuers, n'en pourroïent pas rendre vn ſi grād nombre: & de vertu, non pas vn ſonge ſeulement. Ceux qui auoient la ſurintendance des ſalles où lon mangeoit à Sparte, monſtroient en public à leurs ieunes gens deux ou trois

A de leurs esclaves, qu'ils appelloient Elotes, yures & pleins de vin, pour leur faire voir quelle grãde villanie c'est que de s'en yurer, à celle fin qu'ils s'en gardassēt & apprissent à estre sobres. Mais en la vie humaine la plus part de noz actiōs sont exemples de vice: car il n'y a personne qui soit sobre à la vertu, ains nous errōs tous mal viuans, & estants malheureux. Ce propos la nous enyure & nous remplit de si grande perturbation & folie, que nous ressemblons proprement à ces chiens la qu'Æsope dit qu'ils brilloient apres certains cuyrs qu'ils voyoient flotter sur l'eau, & pour les cuyder auoir, ils se prirent à vouloir boire & aualler toute la mer, mais ils creuerent plus tost que de toucher à ces cuyrs la. Aussi nous esperans acquerir gloire & reputation par la raison, & approcher de la vertu, auant que d'y arriuer, elle nous corrompt & nous perd, estants remplis au parauant de force pure & amere mauuaisiē, si il est ainsi que ceulx cy disent, que ceulx mesmes qui profitent iusques au bout, n'ont allegeance, ny relasche, ny respiration aucune de folie & de malheureté. Mais voy vn petit comment celuy qui dit que le vice n'a point esté produit en estre inutilement, le vous depeint, quelle chose il dit que c'est, & quel heritage pour celuy quil'a. Car, en son traicté des Offices, il dit, que le vicieux n'a besoing ny faulte de rien, rien ne luy est vtile, rien ne luy est propre ny conuenable: comment doncques est-ce que le vice sera vtile, avec lequel ny la santé mesme n'est pas vtile, ny la quantité de pecune, ny le profit & auancemēt, & ne luy

seruent de rien les choses que eulx mesmes appellent precallables & preferables, voire vtilles, & d'autres selon nature, & de tout cela nul n'en reçoit vtilité ny profit, s'il n'est sage? Le mauuais doncques & vicieux n'a point de besoing de deuenir sage, ny les hommes n'ont point de faim ny de soif iusques à ce qu'ils soient sages. Quand ils ont soif donques, ils n'ont que faire d'eau, ny de pain quād ils ont faim, ressemblans aux hostes gracieux qui ne demandent que le couuert, & du feu. Ainsi n'auoit point de besoing de couuert & de manteau celuy qui disoit,

A Hipponax donnez vn vestement,

Car de froidure il gele durement.

Mais veux tu dire vne proposition bien estrange, extrauagante & peculiere? dis que le sage n'a affaire de rien, ny n'a besoing de chose quelconque: il est bien heureux, il est bien fortuné, il n'a besoing de rien, content de soy, parfait. Mais quel esbloüissement & estourdissemēt de ceruelle est-ce de dire, que celuy qui n'est indigent de rien, ait besoing des biens qu'il a, & que le vicieux & meschant ne soit indigent de beaucoup de choses, & n'ait besoing de rien? Car c'est ce que dit Chrysippus, que les meschants n'ont besoing de rien, & toutefois ils sont indigents, remuans çà & là, comme des osselets, les communes conceptions. Car tous hōmes iugent que l'auoir affaire aille deuant l'estre indigent, estimant que celuy qui a besoing de choses qu'il n'a pas prestes à la main, ny ne sont pas aisees à recouurer, est indigent. Qu'il soit vray, nul homme

A men'est indigent de cornes ny d'ailes, par ce qu'il n'en a point de besoing, mais bien disons nous, que quelques vns sont indigents d'armes, & d'argent, & de vestemens, lors qu'en aians affaire ils n'en treuuent pas à leur necessité, ny ne les ont pas. Mais ces gens icy ont si grande enuie de sembler dire tousiours quelque chose de nouveau contre les communes conceptions, que bien souuent ils sortent mesmes hors de leurs propres opinions & assertions, pour l'enuie qu'ils ont de dire tousiours quelque nouveauté, cōme en cest endroit. Qu'il soit vray, cōsidere le, reduisant ta memoire vn peu plus hault. C'est vn des poincts qu'ils afferment cōtre le sens commun & les communes opinions, Que rien ne sert ny ne vault au meschant : & toutefois il y en a plusieurs qui estans instruits & endoctrinez profitent, estans esclaves sont affranchis, estās tenus assiegez sont deliurez, estants yures sont cōduicts & menez par la main, & estants malades sont guaris, mais pour tout cela ils ne sont point aidez, quelque chose qu'on leur face, ny ne reçoient point de bienfaicts, ny n'ont point de biēfaicteurs, c ny aussi ne negligent ils point leurs bienfaicteurs : par ainsi dōcques les vicieux ne sont point ingrats, mais aussi ne le sont point les bōs & les sages. Donques l'ingratitude est chose qui n'est point, & qui n'a point de subsistāce, par ce que les bons ne mescognoissēt iamais la grace & le bienfaict qu'ils ont receu, & les meschants ne sont pas aptes d'en recevoir. Or voy maintenāt qu'ils respondent à cela : ils disent que la grace est au ranc des choses moiēnes,

& que l'aider & estre aidé appartient aux sages **D**
 seulement, vray est que les meschâs reçoient aussi
 grace, mais tous ceulx qui ont part à grace, n'ont
 pas aussi part à besoing & vtilité, & là où s'estend
 la grace, là rien n'est vtile ne propre. Et y a il autre
 chose qui face que le plaisir soit grace, que l'estre
 vtile celuy qui l'a fait à celuy qui le reçoit? **LAMP.**
 Mais à tant laisse ce poinct là, & nous dy que cest
 que la *ἐξουσία*, dont ils font tant de cas. **DIAD.**
 C'est chose, laquelle, comme grande & singuliere,
 ils reseruent aux sages seuls, & neantmoins ne leur
 „ en laissent pas seulement le nom. Si vn sage, disent **B**
 „ ils, où que ce soit estend son doigt sagement, tous
 „ les sages qui sont sur la terre habitable en sentent
 „ aide. Cela est l'effect de l'amitié qui est entre eulx,
 & en cela se terminent les vertus des sages à faire
 des aides communes. Et Aristote resuoit, aussi res-
 uoit Xenocrates, qui affermoient, que les hommes
 estoient aidez par les Dieux, aidez par leurs peres
 & meres, & aidez par leurs precepteurs, & n'en-
 tendoient pas ceste merueilleuse aide que les sages
 reçoient les vns des autres, quand ils se meuuent
 à la vertu, encore qu'ils ne soient pas ensemble, & **P**
 qu'ils ne s'entrecognoissent pas les vns les autres:
 neantmoins tous hommes estiment que amasser,
 ferrer, garder, & mesnager soit vtile & profitable,
 quād on en reçoit profit & vtilité. Et vn bon mes-
 nager achette des clefs, & garde bien ses celiers,

Prenant plaisir à ouurir le thresor,

Là où il met son argent & son or:

mais amasser & ferrer ce qui n'est vtile à rien, & le
 garder

A garder soigneusement & diligemment, avec grand soing & grand labeur, n'est ny grand ny honorable, ains digne de mocquerie. Si doncques Vlysses avec le nœud que Circé luy auoit enseigné, eust lié & scellé, nō les presens qu'Alcinoïus luy auoit faits des pots à trois pieds, des vases d'argent, des draps & vestemēts, & de l'or, mais ie ne sçay quelles droguerries de pierres, & autres fatras qu'il auroit amassez, & eust estimé vn grand heur à luy, de posseder & garder diligemmēt vn tel amas, qui seroit celuy qui louëroit & voudroit imiter ceste folle

B prudence, prouoyance & vaine diligence? Et toutefois c'est là toute l'honnesteré du consentement des Stoïques, toute la gravité & le bon heur, & riē autre chose, sinon vn amas, garde & conseruation de choses inutiles & indifferentes. Car telles sont les choses selon nature & exterieures, attēdu qu'ils comparent bien souuent vne tresgrande richesse à des franges ou à des vrinaux d'or, ou bien à des burettes à huyle quelquefois. Et puis comme ceulx qui semblent auoir superbemēt mesprisē les temples, & iniuriē les sacrees cerimonies & seruices de

C quelques Dieux ou quelques demy Dieux, tout incontinent apres, comme changeans de note, ils parlēt bas, & se seient cōtre terre benissāns & magnifiāns la diuinité: aussi eulx comme tombans en la vengeance & punition diuine de celle folle arrogance & vanité de paroles, ils trauaillent à bon escient apres les choses qu'ils appellent indifferentes, & criers à pleine teste, que cela ne leur touche en rien, que l'amas & l'acquisition des biens, & le

mesnage à les augmenter & conseruer, n'a rien de bon, de grand, ny honorable : ils tiennent bien apres, que quand ils n'en peuuent auoir, ils pensent qu'il ne faille plus viure, & se deffont eulx mesmes, ou se font mourir de faim en s'abstenans de manger, franchissans compaignie à la vertu : & qu'il soit vray, ils reputent totalement le poëte Theognis hōme de bas, lasche & vil courage, par ce qu'il dit,

Pour pauureté fuir & euter

En pleine mer se faut precipiter,

Voire du hault des rochers plus sublimes,

pour ce qu'il s'est monstré si lasche en ses vers : & ce pendant eulx admonestent & disent en prose, que pour fuir vne grande maladie ou vne vehemente douleur, si lon n'a en la main vne espee, ou que lon ne puisse finer de ciguë, qu'il se faut ietter dedans la mer, ou se precipiter des plus haults rochers, & que ny l'un ny l'autre n'est dōmageable, ny mauuais, ny inutile, ny ne rend malheureux
 „ ceulx qui tombent en tel accident. D'où est-ce
 „ doncques, dit il, que ie commenceray, & quel fonde-
 „ ment & commencement prendray-ie de l'office
 „ & du deuoir, quel subiect & quelle matiere de la
 „ vertu, quand i'auray laissé la nature, & ce qui est
 „ selon la nature ? Et dont est-ce qu'Aristote, beau-
 „ sire, a commencé, & Theophrastus ? quels fonde-
 „ mens prennēt Xenocrates & Polemon ? & Zenon
 „ mesme ne les a il pas suivis en ce qu'ils supposent
 „ la nature, & ce qui est selon nature, estre les elemēts
 „ de la felicité ? Mais ceulx-la s'y sont arrestez, cōme
 „ à choses eligibles, choississables, bonnes & profita-
 „ bles,

ables, y adioustant d'auantage la vertu qui employe chascune d'icelles, & s'en sert selon sa propriété, & ont estimé en ce faisant accomplir vne parfaicte & entiere vie, & consommer la concorde, & conuenance qui est à la verité sortable & consonante avec la nature. Car ils ne s'embrouillent point, & ne se contredisent point, comme ceux qui saultent de terre, & retombét incontinent sur elle, en nommant de mesmes choses prenables & non choisissables, propres & non bonnes, inutiles & profitables, & ne nous appartenantes en rien, & neantmoins les principes des offices & du deuoir. Mais tel comme estoit leur langage, telle aussi estoit leur vie de ces grands personages la, rendás leurs faiçts conformes & semblables à leurs paroles: & au contraire, la secte de ces Stoïques icy fait cōme la femme que décrit Archilochus, qui d'une main tient, cauteleuse, l'eau, & en l'autre le feu. Car en quelques vnes de ses doctrines & assertions elle reçoit & admet la nature, & és autres elle la reiette: ou, pour dire plus clairement, quant aux actes & aux faiçts, ils adherent aux choses qui sont selon nature, comme estans eligibles & bonnes: mais quant aux propos & aux paroles, ils les refusent & reiettent, comme indifferentes & inutiles à la vertu pour acquerir felicité: &, qui pis est, les iniurient, & leur font contumelie. Et pource que tous hommes generalmente entendent & estiment, que le souverain bien soit esioüissable, souhaitable, heureux, de tresgrande dignité, suffisant, content de soy, n'ayant faute de rien, voy maintenant

le souuerain bien de ceulx-cy, & le compare à la commune opinion. Ne disent ils pas que c'est vn bien esioüissable que d'estendre sagement le doigt? Que le souffrir la torture & la gehenne est au sage bien souhaitable & desirable? Celuy qui se iette du hault en bas d'un precipice avec bonne raison, n'est il pas heureux? leur bien souuerain n'est il pas de tresgrande dignité & tresgrand pris, veu que la raison choisit bien souuent de le quitter & reietter pour vne chose qui n'est pas de soy bonne? N'est il pas content de soy, accomply & parfait, encore que luy present, si d'adventure ils ne peuuent obtenir quelcune des choses indifferentes, ils ne daignent ny ne veulēt pas viure? Encore y a il vn autre propos qui oultrage villainement la coustume ordinaire, luy soubstrayant & luy arrachant ses legitimes & naturelles conceptions, comme ses propres enfans, & luy en supposant d'autres bastardes, farouches & estranges, & le contraignant de les aimer & nourrir au lieu des autres: & ce en traittant des biens & des maux, des choses à eslire ou à fuir, propres & estranges ou contraires, lesquelles deuoient estre plus claiement & plus notoirement distinctes, que non pas les choses chaudes des froides, ny les couleurs blanches des noires. Car les apprehensions & imaginations de ces qualitez-la sont de dehors introduites par les sens naturels: mais celles-cy sont dedans nous, prenans leur naissance des biens que nous auons au dedans: & ceulx-cy venants à donner dedans le propos de la souueraine felicité avec leurs arguces de Dialectique, com-

A meſſils auoient à traiter du Sophiſme, qu'ils appellent Menteur ou le Maïſtre, ils n'ont ſolu pas vne des doubtes & queſtions qui y ſont, ains en ont ſuſcit   innumerables qui n'y eſtoient point. Et puis il n'y a perſonne qui ne ſ  ache, que y aiant des biens de deux ſortes, l'vne qui eſt la fin derniere, l'autre les moiens pour y paruenir, la fin eſt le plus grand & le plus parfait. Chryſippus meſme ſ  ait bien ceſte difference la, comme il appert par ce qu'il eſcrit en ſon troiſieme liure des biens. Car il diſcorde avec ceulx qui cuidoient que la fin ſoit la ſcience, & met au lieu o   il traite de la iuſtice, ſil y a aucun qui ſuppoſe que la volupt   ſoit la fin des biens, il n'eſtime pas que le droict & le iuſte ſe puiſſent ſauuer, & non pas ſeulement la fin des biens, mais ſimplement le bien. Je ne penſe pas que tu veuilles que ie te recite preſentement ſes propres termes. Car on les peult prendre en quelque endroit que lon veult du troiſieme liure de la iuſtice.

Quand doncques ils diſent que nul bien n'eſt plus grand que l'autre, ny moindre auſſi, ains que le bien final eſt egal    celuy qui ne l'eſt pas, il ſemble qu'ils ne repugnent pas ſeulement aux communes conceptions, mais    leurs propres propos meſmes. Et de ceſchef, ſi de deux maux l'vn nous rend pires que nous n'eſtions, quand il nous eſt venu, & l'autre nous endommage bien, mais il ne nous rend pas pires, le mal    mon aduis, eſt le plus grand, celuy qui nous rend pires nous meſmes. Mais Chryſippus conſille qu'il y a des peurs, des faſcheries, & des tromperies qui nous offenſent bien, mais elles

ne nous rendent pas pires. Lis le troisieme liure de **D** ceulx qu'il a escrits contre Platon, touchant la iustice: car encore pour autres choses fait il bon voir la iaserie de cest homme en ce lieu la, qui n'espargne matieres ny doctrines quelles qu'elles soient, ny propres à leur secte, ny estrāgeres, qu'il n'en die contre le sens commun, comme pour exemple, Qu'il est loisible de se proposer deux fins, & deux buts de la vie, & non pas rapporter & referer tout ce que nous faisons à vn seul poinct. Et encore plus est contre le sens commun qu'il y ait vne fin, & toutefois qu'à autre poinct se referēt les actions, **E** & neantmoins il est force qu'ils endurent l'vn ou l'autre. Car si les premieres choses, selon nature ne sont pas eligibles pour elles mesmes, & la fin derriere, mais bien la raisonnable election & le chois d'icelles, & que chascun face ce qui est en luy pour auoir & obtenir ces choses la qui sont premieres selon nature, & que toutes les actiōs & operations aient là leur relation, à sçauoir pour acquerir & iouir les choses premieres selon nature. S'ils estiment ainsi, il fault que sans viser ny aspirer à obtenir ces choses la, ils aient vne autre fin, à laquelle ils **F** referent l'election & le chois d'icelles choses, & non pas elles mesmes. Car la fin sera, les sçauoir bien choisir & prendre sagement: mais elles mesmes, & le iouir d'elles, sera peu de chose, estāt comme vne matiere & vn subiect qui aura la dignité & l'estime, il me semble qu'ils vident & mettent par escrit ce mesme mot la pour monst^r la difference.

L A M P. Tu as vaillamment retenu & ce qu'ils disent,

A sent, & comment ils le disent. D I A D. Mais considere qu'ils font comme ceulx qui s'efforcent de saulter par dessus & plus auât que leur vmbre. Car ils ne laissent point, ains portent tousiours quand & eulx l'absurdité & faulseté avec leur dire, qui s'esloigne tousiours de plus en plus du sens commun: tout ainsî cōme si quelqu'un disoit, que l'archer fait tout ce qui est en luy, non pour atteindre au but, mais pour faire tout ce qui est en luy, il seroit à bōne cause tenu pour homme qui parleroit par ænigmes, & diroit choses prodigieuses: aussi

B font ces trois fois radottez refuseurs, qui veulent à toute force que l'obtenir les choses selon nature ne soit pas la fin de viser & aspirer aux choses selon la nature, ains les prendre & les eslire, & que l'appeter & le rechercher la santé ne se termine pas en chascun en la santé, & en l'estre sain, ains au contraire que l'estre sain se rapporte & refere à l'appeter & le poursuiure. en disant que le promener, le lire, ou parler haut, l'endurer des sections, & prendre des medecines, le tout par raison, soient les fins de la santé, & non pas elle fin de tous ces

C moiens la. Ceux la refusent tout aussi bien que qui diroit, nous souppons à fin que nous sacrifions, que nous nous baignions & estuions. Ce qu'ils disent change d'auantage l'ordre & la coustume, & contient vne confusion & vn renuersement de tous affaires. Nous ne prenons pas garde à nous promener opportunément, pour bien cuire & digerer nostre viande, ains nous cuisons & digerons la viande pour nous promener opportunément. La

nature n'a elle point ainsi produit la santé pour D
l'hellebore, ou si plustost elle a produit l'hellebore
pour la santé? Car que leur reste il plus à dire de
toutes choses estranges que de telles propositions?
quelle difference y a il entre celuy qui dit que la
santé a esté faite pour les drogues medicinales, &
non pas les drogues medicinales pour la santé, &
celuy qui tient que la cueillette desdittes drogues,
l'usage & la composition, est preferable à la santé
mesme? ou plustost n'estimant qu'elle soit aucune-
ment choisissable, & constituant la fin en la nego-
ciation & tractation d'icelles drogues, en affermant E
que le iouir se refere à l'appeter, & non pas l'ap-
peter au iouir: car à l'appeter, dit il, est conioinct le
proceder sagement & raisonnablement. Ouy bien,
dirons nous, s'il regarde au iouir & obtenir ce qu'il
poursuit, autrement toute raison en est hors, s'il fait
toutes choses pour obtenir ce qui n'est ny digne ny
heureux. L A M P. Et puis que nous en sommes
tôbez sur ce propos là, on diroit plustost que toute
autre chose fust selon le sens commun, que de dire,
que sans auoir notice ny conception du bien, on le
puisse poursuiure & l'appeter: car tu vois que Chry F
sippus mesme serre & presse Ariston en ce destroit
là, de songer & imaginer vne indifferance des cho-
ses ny bonnes ny mauuaises, n'aiants pas encore le
bien & le mal esté entendus & congneus: car ainsi
faudra il que ceste indifferance subsiste deuant, s'il
est ainsi que lon n'en puisse auoir intelligence que
le bien ne soit premierement entendu, qui n'est au-
tre chose que le bien seulement. D I A D. Or con-
sidere

A sidere & voy maintenant ceste indifference, que les Stoiques nient, & qu'ils appellent consentement, comment & d'où elle a donné moien d'imaginer le bien: car si sans le biē il n'est pas possible de concevoir & d'imaginer l'indifference d'auec ce qui n'est pas bien, encore d'auātage la prudence & intelligence des biens ne donne point la cogitation à ceulx qui n'ont point propensé le bien. Mais cōme il n'y a point de cogitation de l'art des choses salubres & insalubres, & maladiues à ceulx qui deuant n'ont eu la cogitatio d'elles mesmes: aussi n'y

B a il point de sciēce des biens & des mauulx que premierement on n'ait pensé les biens & les mauulx. Qu'est-ce doncques que le bien? non autre chose que la prudence. Et qu'est-ce que la prudence? non autre chose que la sciēce. Il y a doncques bien du Corinthe de Iupiter, comme lon dit en commun prouerbe, c'est à dire, des redittes en leurs propos: car quant à dire que cela est tourner le pilon, laisse le là ie te prie, de peur qu'il ne semble que tu te moques d'eux, combien que leur dire soit proprement cela, par ce qu'il semble que pour l'intelligence du bien il faille entendre la prudence, & au reuers qu'il faille chercher la prudence en l'intelligence du bien, estant force de poursuiure tousiours l'un par l'autre, y aiant defectuosité en l'une & en l'autre, & implication de contrarieté en ce qu'il fault tousiours entēdre deuant ce qui ne peut estre entendu à part. Et encores peult on par vne autre voye entēdre non ia l'entorse, mais la destorse & reduction de leur propos à neant entiere-

ment. Ils disent que la substance du bien est l'elec-
tion raisonnable de ce qui est selon la nature: Or
n'est pas l'election raisonnable qui est dirigee à
quelque fin, comme il a esté dit parauant. Qu'est-
ce doncq' que cela? Autre chose, disent ils, que le
raisonnablement discourir és elections, de ce qui
est selon nature. Premièrement doncques s'en va
à vau-l'eau, & se pert la conception du bien: car ce
bien discourir és elections est vne operation qui
dépend de l'habitude du bon discours, & pourtant
estans contraincts d'entendre celle habitude de la
fin, & la fin non sans icelle habitude, nous demou-
rons courts de l'intelligence de tous les deux. Et
puis ce qui est encore plus, par toutes les raisons du
monde, il falloit que la raisonnable election fust
election des choses bonnes, vtils & cooperantes à
paruenir à la fin: Car de choisir & eslire choses qui
ne soient ny vtils, ny honorables, ny totalement
eligibles, comment seroit il raisonnable? Supposons
qu'il soit ainsi comme ils disent, que la fin soit rai-
sonnable election des choses qui ont dignité pour
estre heureux: considere vn peu comme leur dis-
cours reussit & se va terminer en vne belle & di-
gne conclusion & sommaire: car la fin, selon eulx,
est le bien discourir, en faisant election des choses
qui ont dignité pour estre heureux. En oyant ces
paroles, Amy, la sentence ne t'en semble elle pas
bien estrange? L A M P. Ouy bien, mais ie vou-
drois sçauoir d'auantage, comment cela aduient.
D I A D. Il fault bien doncques que tu y prennes
garde de plus pres, car il n'entend pas qui veut cest
anigme.

A énigme. **LAMP.** Escoute donc, & me responds. Est-ce, selon eux, la fin que bien discourir és élections selon nature? **DIAD.** Ils le disent ainsi. **LAMP.** Et ces choses qui sont selon nature, les elisent ils comme bônes, ou comme aians quelques dignitez, ou quelques preferences pour être heureux? **DIAD.** Pour cela. **LAMP.** Est-ce pour aduenir à la fin, ou pour autre chose? **DIAD.** Je ne le pense pas, ains croy que c'est pour la fin. **LAMP.** Or voy doncques à descouuert maintenant ce qui leur aduient, que leur fin est, bien discourir de la felicité. **DIAD.** Ils disent voirement, qu'ils n'ont ny n'entendent autre chose de la felicité, que ceste precieuse rectitude de discours, touchant les electiôs des choses qui ont dignité. Mais il y en a qui disent que ces refutations la sont seulement alencôtre d'Antipater, & non pas de toute la secte, & que luy se ressentant pressé par Carneades, tomba en ces iaseries & vains propos la. Au demourât quant à ce que lon discourt & enseigne de l'amour en l'eschole Stoïque, contre les communes conceptions, il touche à tous les supposts qui sont de la secte, qui ont tous part à l'absurdité: Car ils disent que les ieunes gens sont laids estants vicieux, & fols: & que les sages seuls sont beaux, & que de ces beaux la, nul iamais n'a esté aimé ny digne d'estre aimé. Et cela n'est pas encore le plus estrange, mais ils disent, que ceulx qui sont aimez pour ce qu'ils sont laids, cessent d'estre aimez quand ils sont deuenus beaux: & qui a iamais veu vn tel amour, qui incontinent que la laideur du corps

& mauuaistié de l'ame se descouure, vient en estre, **D**
 & incontinent apres la cognoissance de la beauté
 avec temperāce & iustice, il l'estaint & l'esuanouit?
 Ils ressemblent proprement aux mouscherons qui
 aiment le vin aigre, ou esuenté, ou poulzé, & l'es-
 cumme d'iceluy: mais le bon vin & souef à boire, ils
 le fuyent & s'enuolent arriere. Et quant à ce qu'ils
 nomment apparence de beaulté, qui disent estre
 attraict de l'amour, premierelement il n'y a point de
 verisimilitude: car en ceulx qui sont tres laids &
 tres-mauuais & meschants, il n'y scauroit auoir ce-
 ste apparēce de beaulté, s'il est vray ce qu'ils disent, **E**
 que la mauuaistié des mœurs remplit la face, & se
 montre au vilage: car il y en a qui expliquēt fort
 estrangement, que c'est à dire que l'homme laid
 soit digne d'estre aimé, pour ce, disent ils, qu'il doit
 deuenir beau, & s'attend on qu'il l'aura quelque
 fois: & quand il a acquis la beaulté, & qu'il est de-
 uenu beau & honnestre, alors, disent ils, il n'est plus
 aimé de personne. Car l'amour est comme vne
 chasse d'un ieune homme qui est encore impar-
 faict, mais bien né à la vertu. **L A M P.** Et que fai-
 sons nous maintenant, mon bon amy, autre cho- **F**
 se, que de refuter les erreurs de leur secte, qui de-
 struiēt & force ainsi les communes conceptions?
 car il n'y a personne qui empesche la sollicitude de
 ces sages icy enuers les ieunes gens: encore que
 tous hommes & toutes femmes entendent & ap-
 pellent amour, ce que les poursuiuans de Pene-
 lopé disent en Homere,

Ils souhaittoient tous de trefardēt zeles,

D'estre

A D'estre couchez en vn liēt aupres d'elle:

Et Iupiter à Iuno,

Iamais amour de Deesse ne femme,

N'esprit mon cœur de si ardente flamme,

Que maintenant de coucher avec toy.

DIAD. Voila comme en iettant la philosophie morale en des inuolutions ainsi tortues, où il n'y a rien de bon, cependant ils detractent, desprisent & vilipendent tout ce qui est alentour d'eux, comme estâts seuls qui ont restitué en son entier, & redressé la nature & la coustume, ainsi qu'il appartient:

B & toutefois la coustume diuertit & induit par appetitions, poursuittes & inclinatioſ chascune chose à ce qui luy est propre. Et quant à la Dialectique contentieuse & disputatrice, elle n'en reçoit aucun bien ne profit, ains comme l'oreille qui est malade par des sons vains est remplie de toute obscurité & difficulté d'ouir, de laquelle cy apres, prenâs vn nouveau principe, si bon te semble, nous deuiferôs plus amplement. Mais pour le present prenons leur philosophie naturelle, laquelle ne trouble pas moins les anticipations & communes conceptioſ,

C que leur doctrine morale des fins, és principaux & plus importants poincts. Premièrement c'est chose hors de toute apparence & contre le sens commun de dire, que ce qui est ne soit pas, & que ce qui n'est pas soit, & c'est ce qu'ils disent de l'vniuers. Car supposans qu'il y ait tout autour de l'vniuers vn vuide infiny, ils disent que l'vniuers n'est ny corps, ny sans corps: à quoy ensuit que l'vniuers qui est, n'est doncques pas: car ils disent & tiennēt

que cela seulement est qui est corps. Et pour ce que **D**
le propre du corps est faire & souffrir quelque
chose, & l'univers n'estant pas, est: adonc l'univers
ne fera ny ne souffrira rien, & ne sera pas mesme
en lieu: car ce qui occupe lieu est corps, & l'univers
n'est pas corps. Et ce qui occupe vn mesme lieu,
c'est ce qui demeure: doncques l'univers ne de-
meure pas, par ce qu'il n'occupe point de lieu: &
qui plus est il ne se remue pas mesme, par ce qu'il
faut que ce qui se remuë soit en lieu & en place
certaine. Et puis pour ce, que ce qui se remuë, ou se
remuë soy mesme, ou est remué par autrui: or ce **E**
qui se remuë soy mesme a quelques panchemens,
& quelques inclinations de legereté ou de pesan-
teur: & la pesanteur & legereté sont, ou quelques
habitudes, ou quelques puissances ou differéces de
tous corps. Et l'univers n'est pas corps: adonc il est
force que l'univers ne soit ny pesant ny leger, &
par consequent qu'il n'ait doncques point en soy
de principe de mouuement. Et toutefois, aussi ne
fera il point remué par autrui: car il n'y a rien oul-
tre l'univers, de maniere qu'il est force qu'ils dient
ce qu'ils disent eux mesmes, que l'univers n'est ny **F**
mouuant ny arresté en somme, pour ce que selon
eux il ne faut pas dire que l'univers soit corps, &
toutefois le ciel, la terre, les animaux, les plantes, les
hommes, & les pierres sont parties de l'univers: il
/ faudra doncques dire, que ce qui n'est point corps
aura des parties qui seront corps, & ce qui ne sera
pas pesant aura des parties pesantes, & ce qui ne
sera pas leger des legeres: ce qui est tant contre les
com-

A communes conceptions, que les songes mesmes ne le font pas tant: oultre ce, qu'il n'est rien si accordant au sens commun que ceste disionction: Si quelque chose n'est point animee, elle n'a donc point d'ame: & au contraire, si aucune chose n'est point sans ame, doncques elle est animee. Et toutefois ils tollissent ceste manifeste euidence, cōfessant que l'vniuers n'est ny sans ame, ny animé, & sans cela il n'y a personne qui entende ny imagine l'vniuers imparfaict, attendu qu'il n'y a partie aucune qui luy defaille, & neantmoins ceux-cy tiennent qu'il est imparfait, par ce, disent ils, que ce qui est parfait est finy & terminé: & l'vniuers pource qu'il est infiny n'est point aussi terminé, ains desordonné. Ainsi selon eux, il y a quelque chose qui n'est ny parfaite ny imparfaite. Aussi n'est il point partie, par ce qu'il n'y a rien plus grād que luy: ny tout aussi, pour ce que s'il est tout, il est doncques ordonné: là où l'vniuers d'autant qu'il est infiny, aussi est il interminé & desordonné. Aussi n'a il point d'autre cause, par ce qu'il n'y a rien plus ny oultre l'vniuers: ny n'est point l'vniuers cause d'autrui ny

B de soy mesme, par ce qu'il n'est pas né à rien faire, & la cause s'entend estre ce qui fait quelque effect. Prenez le cas doncques que lon demande à tous les hommes qui sont au monde, que c'est qu'ils entendent estre rien, & quelle pensee ils en ont, ne diront ils pas, ce qui n'est cause d'autrui, ny n'a point de cause de soy mesme, qui n'est ny tout ny partie, ny parfaict ny imparfaict, ny aiant ame ny sans ame, ny mouuant, ny arresté, ny subsistant, ny

C

corps ny sans corps, cela qu'est-ce autre chose que ^D rien, veu que ce que tous les autres hommes afferment de rien, ceux-cy l'afferment de l'vniuers? Il semble qu'ils facent tout vn l'vniuers, & rien. Il fault donc dire que le temps ne soit rien, la predication, la proposition, la conionction, la composition. Ce sont termes dont ils vsent plus que nuls autres philosophes, & toutefois ils disent que ce ne sont pas choses existentes. Qui plus est, ils tiennent que le vray estant, n'est ny ne subsiste point, ains se comprend par intelligence, & est compris & passé en croyance, encore qu'il n'ait aucune part ^E d'essence. Comment scauroit on sauuer cela qu'il ne surpasse toute extrauagance de faulseté & d'absurdité? Mais à fin qu'il ne semble que cela tienne trop des doubtes & difficultez de Logique, nous en traiterons d'autres qui seront plus propres à la Physique & philosophie naturelle. Pour autant doncques qu'ils disent,

Iupiter est de tout commencement,

Et le milieu, & paracheuement.

il falloit principalement qu'ils rhabillassent & redressassent en mieux les communes conceptions ^F des hommes touchant les Dieux, si d'aduenture il y auoit en elles quelque erreur & quelque perturbation: sinon, les laisser chascun en l'opinion que les loix ou la coustume de leur pais leur donnent de la diuinité: car ce n'est pas de ceste heure ou de n'agueres, mais de tout temps, que ces opinions la des Dieux sont au monde, & n'y a homme qui sceust dire de quel temps elles ont commencé.

Mais

A Mais ceux-cy aians commencé des la Deesse domestique Vesta, comme lon dit en commun proverbe, à remuer ce qui estoit estably, & qui estoit receu en chasque país, touchant la creance des Dieux, ils n'en ont laissé pas vne opinion ny cogitation qu'ils n'ayent, par maniere de dire, contaminée & brouillée: car qui est ou qui a esté celuy des hommes qui iamais n'ait entendu que Dieu soit incorruptible & eternal? Quelles confessions fait on plus coustumieres, & de plus certain consentement, que celles-cy,

B Là pour tousiours les Dieux se resiouissent,
Beatitude eternelle iouissent:
Les Dieux li-sus sont au ciel immortels,
Sur terre en bas marchent hommes mortels.

Et ceste autre,
Point ne sont subiects à foiblesse
De maladie ou de vieillesse:
Exempts de douleur & de mort,
Sans crainte de passer le port
D'Acheron bruyant.

On pourroit à l'adventure trouver quelques nations barbares & sauvages, qui ne pensent point qu'il y ait de Dieu, mais il n'y eut iamais homme qui eust quelque imagination de Dieu, qui ne l'estimast quant & quant immortel & eternal. Qu'il soit vray, ces malheureux qui ont esté appelez Atheistes, vn Diagoras, vn Theodorus, vn Hippon, n'ont pas osé dire que Dieu fust corruptible, mais ils ne croyoient pas qu'il y eust rien au monde qui peust estre incorruptible: ainsi conseruoient ils la

commune anticipation des Dieux, mais ils estoient
l'incorruptibilité de substance: là où Chrysippus
& Cleanthes aiant rempli de paroles, par manie-
re de dire, & en leurs escripts, tout le ciel, la terre,
l'air & la mer, de Dieux, neantmoins de tant de
Dieux ils n'en font pas vn eternal, ny pas vn im-
mortel, sinon Iupiter seul, en qui ils dependent &
consument tous les autres, tellement que le resoul-
dre en luy n'est de rien meilleur que l'estre resolu:
car autāt est-ce d'imbecillité d'estre par resolution
tourné en vn autre, comme d'estre entretenu &
nourry par la resolution des autres en soy. Et cela
n'est pas comme les autres absurditez, que lon tire
par illation des premisses & suppositions qui soient
en leurs escripts, & qui par necessaire consequence
s'ensuiuent de leurs doctrines: mais eux mesmes
crians à pleine teste le disent expressement en leurs
escripts des Dieux, de la prouidence, de la destinee,
de la nature, Que tous les Dieux ont eu commen-
cement d'essence, & que tous seront resolus par le
feu, fondus en soy, comme s'ils estoient de cire, ou
d'estain. Or est-ce contre le sens commun autant
de dire que l'homme soit immortel, comme que
Dieu soit mortel, ou plus tost, ie ne voy point
quelle difference il y aura de l'homme à Dieu, si
Dieu est aussi bien que luy vn animal raisonnable
& corruptible. Car s'ils nous opposent ceste belle
arguce & finesse de dire, que l'homme est bien
mortel, & le Dieu non mortel, ains corruptible,
voyez l'inconuenient qui en dépend: car il fault
qu'ils dient, ou que Dieu soit immortel & cor-
ruptible,

A ruptible, ou ny mortel ny immortel. Dont on ne
sçauroit, quand expressement on s'y estudieroit,
excogiter rien plus estrange ny plus absurde, ie dis
aux autres: car quant à eux, ils n'ont rien laissé à di-
re & attenter des plus extrauagantes absurditez du
monde. Et puis Cleanthes fortifiant & confir-
mant encore d'auantage son embrasement & in-
flammation, dit que le Soleil rend semblables la
Lune, & les autres estoiles, à soy, & les tourne en
soy, & que la Lune & les estoiles estants Dieux, ai-
dent au Soleil à faire leur resolution par inflamma-
B tion. Ce seroit doncques vne grande mocquerie à
nous de leur faire prieres & oraisons pour nostre
salut, & les estimer sauueurs des hommes, si leur
est naturel de tendre à leur corruption & resolu-
tion. Et toutefois eux ne laissent rien à faire ny à
dire, crians contre Epicurus, qu'il oste l'opinion &
persuasion anticipée és cœurs des hōmes touchant
les Dieux, quand ils ostent la prouidence diuine,
par ce que les Dieux sont estimez & tenus de tous,
non seulement immortels & bienheureux, mais
aussi humains, benignes, aians soing du bien & du
C salut des hommes, cōme il est vray: mais si ceux qui
ostent la prouidence diuine, ostent quant & quant
l'opinion anticipée de Dieu, que font ceux qui di-
sent que les Dieux ont bien soing de nous, mais
qu'ils ne nous aidēt de rien, & qu'ils ne sont point
donneurs de biens, ains indifferents, ne donnans
point la vertu, mais donnans bien la richesse, la
santé, la generation des enfans, & autres sembla-
bles choses, dont pas vne n'est ytile, ny profitable,

ny eligible, n'est il pas vray que ceux la ostent les communes conceptions que lon a des Dieux? Et ceux-cy les oultragent & s'en moquent disans, qu'il y a vn Dieu fructier, qui a la superintendence des fructs de la terre, vn autre generatif, vn autre medecin, vn autre deuin, & ce pendant la sante n'est rien de bon, ny la generation, ny la fertilité & abondance de fructs, ains sont choses indifferetes & inutiles à ceux qui les ont. Le troisieme poinct la commune conception des Dieux est, qu'ils ne different des hommes en rien, tant que en felicité & en vertu: mais selon la doctrine de **E** Chrysippus, ils n'ont point cela par dessus les hommes, par ce qu'il tient que Iupiter ne passe point en vertu Dion, & que Iupiter & Dion estans tous deux sages, sont egalelement & semblablement aidez l'un de l'autre, quant l'un se sent du mouuement de l'autre: car c'est le bien que les Dieux font aux hommes, & les hommes aux Dieux, quand ils deuiennent sages, & non autre chose, & que prouueu qu'il n'ait pas moins de vertu, il n'a pas moins de beatitude aussi, ains qu'il est autant & egalelement heureux que Iupiter le sauueur, encore que ce soit **F** vn pauvre fortuné, qui pour ses griesues maladies & mutilation de ses membres est contraint de se ietter hors de ceste vie, & de se faire mourir soy mesme, prouueu qu'il soit sage. Mais il n'y en a pas vn, ny n'en y eut iamais dessus la terre, & au cōtraire innumerables millions d'hommes mal-heureux en toute extremité, en la police & domination de Iupiter, duquel le gouuernemēt & administration

A est tres-bonne. Et que pourroit il plus estre contre le sens commun, que de dire, que Iupiter gouuernant souuerainement bien, nous soions souuerainement mal-heureux? Si doncques, ce qui n'est pas seulement loisible de dire, il ne vouloit plus estre ny sauueur, ny deliureur, ny protecteur, ains tout le contraire de ces belles appellations la, on ne sçauroit plus rien adiouster de bien à ce qu'il en a, ny en nombre, ny en quantité, ainsi comme ils disent, là où les hommes viuent en toute extremité miserablement & meschamment, ne receuant plus le vice aucun accroissement, ny la malheureté aucun auancement. Et toutefois encore n'est-ce pas là le pis qu'il y ait, ains se courroucent à Menander, de ce qu'il a dit comme poëte, par ostentation,

L'estre trop bon est cause de grands maux.
disans que cela est contre le sens commun. Et ce pendant eux font Dieu, qui est tout bon, la cause de tous maux: car la matiere n'a peu produire le mal de soy, par ce qu'elle est sans qualité, & toutes les diuersitez qu'elle a, elles les a de ce qui la remue & qui la forme, c'est à dire, la raison qui est dedans qui la remue & la forme, n'estant pas idoine à se former & se remuer soymesme, tellement qu'il est force que le mal viëne en estre ou de rien, & de ce qui n'est pas, ou si c'est par quelque principe mouuant, que ce soit par Dieu: car s'ils pensent que Iupiter ne domine pas sur ces parties, & n'vse pas de chascune selon sa propre raison, ils parlent contre le sens commun, & feignent vn animal du.

quel plusieurs des parties n'obeissent pas à sa vo-
 lonté, vñs de leurs propres actions & operations,
 auxquelles le total ne donne point d'incitation, ny
 n'en commence point le mouuement: car il n'y a
 rien si mal cõposé entre les creatures qui ont ame,
 que contre sa volonté ou ses pieds marchent, ou sa
 lãgue parle, ou sa corne frappe, ou sa dent morde,
 dont il est force que Dieu seuffre plusieurs choses,
 si contre sa volonté les mauuais mentent & com-
 mettent d'autres crimes, rompent les murailles des
 maisons pour aller desrober, ou s'entretuēt les vñs
 les autres. Et si comme dit Chrysippus, il n'est pas
 possible que la moindre partie se porte autrement
 que comme il plaist à Iupiter, ains toute partie ani-
 mee & qui a ame viuante, s'arreste & se remue
 ainsi que luy la meine, & la manie, & arreste &
 dispose. Mais encore est ceste parole de luy plus
 pernicieuse: car il estoit plus raisonnable de dire,
 qu'innombrables parties, par force, pour l'impuif-
 sance & foiblesse de Iupiter, feissent plusieurs cho-
 ses mauuaises contre sa nature & volonté, que de
 dire, qu'il n'y ait ny malefice, ny intemperance au-
 cune, dont Iupiter ne soit cause. Et puis que le
 monde soit vñe ville, & les estoilles soient les ci-
 toiens: s'il est ainsi donc, il fault aussi qu'il y ait des
 liguees, des magistrats, & volontiers que le Soleil
 en est vn Conseiller, & Mercure le Preuost ou le
 Maire. Ie ne sçay si d'autres de leurs absurditez
 qui appartiennent plus aux choses naturelles, mon-
 strent point ceux qui s'amusent à refuter de telles
 impertinences, encore plus impertinents que ceux
 qui

A qui les asseurent & afferment. N'est-ce pas vne affirmation contre le sens commun de dire, que la semence est plus grande que non pas ce qui est engendré d'icelle? Car nous voyons que la nature en tous animaux & toutes plantes sauvages prent les principes de graines fort petites, & si menues qu'à peine les peut on veoir, pour la generation de tres-grands arbres: car non seulement d'un grain elle produit un espy, & d'un pepin de raisin un cep de vigne, mais d'un noyau d'oliue ou d'un gland qui sera eschappé & tombé à un oyseau, cōme d'une petite scintille allumant & enflāmant la generation, elle produit un tronc d'un chesne, ou d'un palmier, ou d'un sapin fort grand & droit, & pour ceste cause que ce mot de Sperma, qui signifie semence, a esté ainsi nommé: comme Spirasis, c'est à dire inuolution ou enuoloppement de grande masse en petite quantité: & Physis, c'est à dire nature, comme Emphysesis qui signifie soufflement & diffusion des propos & des nōbres qui sont ouuerts & desliez sous elle. Mais de rechef le feu, qu'ils disent estre la semence du monde, apres l'inflammation vniuerselle change le monde en sa semence, de peu de corps & de petite masse s'estendant en beaucoup de soufflement, & encore d'auantage occupāt une place infinie du vuide qu'il enuahit par son augmentation, puis quand la generation est faite, la grandeur aulli tost se retire & tombe, se referrant incontinent la matiere en soy apres la generation. On peult lire beaucoup de leurs liures & de leurs escripts, où ils disputent & crient alencontre

des Academiques, qu'ils confondent toutes choses D avec leurs indistinguiables identitez, voulans à toute force, qu'en deux substances il n'y ait que vn qualifié. Et toutefois il n'y a celuy qui ne l'entende, & ne le pense ainsi, & ne pense le contraire estre merueilleux & estrange, si vne cane à vne cane, vne abeille à vne abeille, & du froment à du froment, & vne figue à vne figue, comme on dit en commun prouerbe, n'est pas toute semblable en tout temps. Mais cela veritablement est contre le sens commun qu'ils disent eux, & qu'ils feignent, qu'en vne seule substance il y a deux particulièrement qualifiez, & qu'une mesme substance aiant particulièrement vn qualifié, y en suruenāt vn autre, le reçoit & garde egalemeⁿt l'un comme l'autre. Car s'il y en a deux, ie dis qu'il y en pourra auoir trois & quatre & cinq, & autant quel on en sçauroit dire, en vne mesme substāce, ie dis non en diuerses parties, mais tous egalemeⁿt en toute la substance, voire infinis. Chrysippus doncques dit, que Iupiter ressemble à l'homme, & le mode aussi, & à l'ame la prouidence: quand doncques l'embrasemēt sera fait, Iupiter seul des deux incorruptible se retirera à la prouidence, & demourerōt tous deux en la substance de l'ether. Mais laissons là pour ceste heure les Dieux, en les priant de vouloir donner à ces Stoïques vn sens commun & entendement accordant avec le reste des hommes, & voions maintenant ce qu'ils disent eux touchant les elements. C'est contre le sens commun qu'un corps soit le lieu d'un corps, & qu'un corps passe

a trauers

A à trauers d'un corps, n'ayant l'un ny l'autre rien de vuide, ains le plein entrant dedans le plein, & ce qui n'a point de distance, receuant en soy ce qui se mesle parmy luy, mais ce qui est plein, n'a point de distance vuide en soy, à cause de la continuité. Et ceux cy ne mettent pas vn dedans vn, ny deux, ny trois, ny dix, les poulsans ensemble, ains toutes les parties du monde taillees en petites piéces, & les iettans en vn, le premier venu, voire le moindre sensible: disans d'auantage qu'il contiendra le plus grand qui scauroit suruenir: & l'assurant brauement & hardiment, ils font de ce qui les cōvainct & refute vne de leurs sentences, ainsi qu'en plusieurs autres choses, comme ceux qui préneent des suppositions toutes repugnâtes au sens commun. Premièrement doncques suiuant ce propos-la, il fault admettre beaucoup de positions monstrueuses & prodigieuses à ceux qui meslent les corps entiers avec les entiers, entre lesquelles absurditez est, *Que trois sont quatre.* Car ce que les autres alleguent pour vn exemple de ce qui ne peult tomber en imagination de sens humain, ceux cy le tiennēt **C** pour chose vraye, disans, que quand vn verre de vin est meslé avec deux d'eau, il ne defaut point, ains s'egale en approchant le tout du tout, & le confondant ensemble, tellement qu'un faict deux par l'egalisation de la meslange d'un avec deux, par ce qu'un demeure & s'estend autant comme deux, faisant autant que le double. Et si par la mixtion à deux il prend la mesure de deux en la diffusion, cela est la mesure ensemble & de trois &

de quatre : de trois , par ce qu'un est meslé avec deux : & de quatre, par ce qu'estant meslé à deux, il a autāt de quantité cōme ceux à qui il est meslé : & ceste belle gentillesse la leur aduient, parce qu'ils iettent vn corps dedans des corps , & par ce que lon ne sçauroit imaginer comment ils font contenir l'un dedans l'autre. Car il est force que les corps entrans les vns dedans les autres par la meslange, que l'un ne contienne pas, & l'autre soit cōtenu, & que l'un recoiue, & l'autre soit dedans. Car ainsi ce ne seroit pas mixtion, ains attouchement & approchement des superficies, l'une entrant dedans, & l'autre contenant par le dehors, les autres parties demourans pures & entieres sans se mesler, & ainsi fera vn de plusieurs differents. Là où il est force que quand la mixtion se fait ainsi comme ils veulent, que les choses meslees, se meslent les vnes dedans les autres, & qu'une mesme chose en estant dedans soit quant & quant contenue, & en receuant contienne l'autre, & n'est plus possible que l'un ny l'autre, retourne à estre ce qu'il estoit, ains aduient que les deux qui se meslent, penetrent l'un dedans l'autre, & n'y a pas vne partie de l'un ny de l'autre qui demeure, ains sont toutes necessairement remplies les vnes des autres. Icy vient en ieu la cuysse d'Arcefilaüs qui est tant promenee par les escholes, marchant par dessus leurs absurditez avec grande rüse. Car si les mixtions se font de tout en tout, qui empesche qu'une cuysse, estant coupee, pourrie, & ietee en la mer, & par succession de temps toute fondue, que non seulement la flotte d'Anti-

A d'Antigonus nauigue dedans, comme disoit Ar-
cesilaïs, mais aussi les douze cents voiles de Xer-
xes, & que encore les trois cents galeres des Grecs
ne donnent vne bataille dedans icelle cuysse? Car
elle ne defaudra point de s'estendre tousiours en
auant, ny ne cessera pas le moindre dedans le plus
grand, ny iamais la mixtion ne prendra fin, ny l'ex-
tremité d'icelle ne fera attouchement là où elle fi-
nira, ne penetrant pas par le total, ains se lassera de
se mesler, ou si elle se mesle par le total, elle ne dō-
nera pas seulement place de bataille aux armées
B nauales des Grecs, estant pour cela besoing de cor-
ruption & de mutation: mais si vn verre de vin, ou
bien mesme vne goutte, venoit à tomber en la
mer Ægée, ou la mer de Candie, elle viendra ius-
ques dedans l'Ocean & iusques à la grande mer
Atlantique, ne touchant pas à la superficie seule-
ment par le dessus, mais se respandant par toute la
profondeur, longueur & largeur. Et Chrysippus
admet cela au commencement de son premier li-
ure de ses questions naturelles, disant qu'il ne s'en
falloit rien qu'une goutte de vin, ne se meslast par
C toute la mer. Et à fin que nous ne nous en esmer-
ueillions pas, il dit d'auantage, que ceste goutte
la par mixtion s'estendra par tout le monde: ce
qui est si absurde & hors de toute apparence de
raison, que lon ne scauroit rien dire de plus, &
contre le sens commun: par ce qu'il n'y aura point
en la nature de corps supreme ny premier, ny
dernier, ny en quoy se doie terminer la grandeur
du corps, ains passant tousiours outre celuy qui

sera pris pour subiect, la chose ira en l'infiny & in-D
terminé. Car on ne pourra entendre ne compren-
dre vne magnitude plus grande ou plus petite que
l'autre, parce qu'à l'une & à l'autre aduiendra le
proceder de ses parties en infinny, qui est oster tou-
te la nature d'inegalité. Car de deux magnitudes
qui sont entendues inegales, l'une demeure courte
de ses dernieres parties, & l'autre passe oultre & va
plus auant: & n'y ayant point d'inegalité en lon-
gueur, aussi n'y aura il point d'inegalité en superfi-
ce. ny d'aspreté. Car le raboteux n'est autre chose
qu'inegalité de superficie enuers soy mesme, & l'as- E
preté est l'inegalité de superficie avec rudesse &
dureté, dont ne laissent rien ceux qui ne terminent
pas vn corps en sa dernière partie, ains tirent tous
corps par multiplication de parties en infinny: &
toutefois à qui n'est il euidant & notoire, que
l'homme est composé de plus grand nombre de
parties que n'est son doigt? & le monde plus que
l'homme? Tous hommes scauent & pensent cela,
sils ne sont Stoïques: mais depuis qu'ils sont vne
fois deuenus Stoïques, ils disent & sentent le con-
traire, que l'homme n'est point composé de plus F
de parties que son doigt, ny le monde que l'hom-
me. Car la section reduit les corps à l'infinny, &
en l'infinny il n'y a ny plus ny moins, ne n'y a point
de multitude qui surpasse, ny ne cesseront iamais
les parties de ce qui est resté, d'estre tousiours en-
core sous-diuisées, & de bailler & fournir multi-
tude de soy. Cōment est-ce donc qu'ils denouënt
ces nœuds là? fort subtilement & vaillamment
certes.

A certes. Car Chrysippus dit, que si lon nous demâde si nous auons aucunes parties, & combien, & si elles sont composées d'autres parcelles aussi, & de combien, que nous vserons de telle distinction, supposans que le total entier est composé de parties, cōme de la teste, de l'estomach, & des cuysses, comme si cela estoit tout ce que lon demande, & dequoy lon est en doubte : mais s'ils produisent leurs interrogatoires iusques aux extremes parties, il n'en fault rien estimer, determiner, ny rien dire, ne qu'il soit cōposé d'aucunes parties, ny de combien, ne si elles sont finies ny infinies. Mais il vault
B mieulx que i'allegue ses propres paroles, à fin que tu voyes comment il conseruoit les communes conceptions, en nous defendant d'entendre & d'imaginer, ne de dire, de quelles parties, ny de combien de parties chasque corps est composé, ne si elles sont finies ou infinies. Car s'il y auoit vn milieu entre le finy & l'infiny, comme il y a entre le bien & le mal, qui est l'indifferent, il falloit dire ce que c'est, & ainsi souldre la difficulté. Mais si tout ainsi comme ce qui n'est pas égal, incontinent est
C inegal, & ce qui n'est pas corruptible est incorruptible, aussi ce qui n'est pas finy est infinny, il me semble que dire, que le corps n'est cōposé de parties ny finies ny infinies, c'est autant cōme de dire, que vn argument est composé ny de vrayes ny de faulx positions : & se glorifiant temerairement de cela, il dit, que la pyramide estant constituee de triangles, les costez inclinans vers la commissure sont inegaulx, & toutefois l'un ne passe pas l'autre,

en ce qu'ils sont plus grands. Voyla comment il **D** fauuoit les conceptions: car fil y a quelque chose qui soit plus grande & qui ne passe pas, aussi y aura il quelque chose plus petite qui ne defaudra pas, & ne demourera pas courte: doncques y aura il quelque chose inegale qui ne surpassera point, & si ne defaudra point, c'est autant à dire comme qui sera egale & inegale, & non plus grand ce qui sera plus grand, & non plus petit ce qui sera plus petit. D'auantage voy vn petit cōment il respond à Democritus qui doutoit fort naturellemēt & visuellement, si vne pyramide ronde venoit à estre couppee à ni- **E** neuu auprès de sa base, que faudroit il iuger touchant les superficies des sections, si elles seront egales ou inegales, car si elles sont inegales, elles feront dōcques que la pyramide ronde prendra plusieurs engraueures profondes & rabotteuses: & si elles sont egales, les sectiōs seront aussi egales, & se trouuera que la pyramide ronde fera pareil effect que la coulomme, cōme si elle estoit composee de cercles egaux, & non pas inegaux, ce qui est fort absurde. En cecy doncques monstrant Democritus estre vn ignorant, il dit, que les superficies ne sont **F** ny egales ny inegales, mais que les corps sont inegaux, à cause que les superficies ne sont ny egales ny inegales. Or de vouloir par forme d'ordonnance affermer qu'il peult arriuer que les superficies estans inegales, les corps ne soient pas inegaux, c'est à faire à homme qui se permet vne merueilleuse licēce d'escrire & de dire tout ce qui luy vient en l'entendement. Car la raison avec l'euidence
toute

A toute notoire, nous donne à entendre tout le contraire, que des corps inegaux, les superficies sont aussi inegales, & plus grandes celles du plus grand, si la passe, dont il suruance le plus petit, ne doit demourer sans superficie. Car si les superficies des plus grands corps ne surpassent celles des moindres, ains defaillent auant le bout, il faudra dire, qu'une partie du corps ia terminé n'aura point encore de terme ny de fin. Car s'il dit, que par force ainsi *. Car les graueures rabotteuses qu'il soupçonne en la pyramide røde, c'est l'inegalité des
B corps, non pas celle des superficies, qui les fait. C'est doncques vne sottise digne de mocquerie, qu'en ostant les superficies, estre conuaincu de laisser vne inegalité és corps. Mais pour ne sortir point de ceste matiere, que peut il estre plus contre les conceptions du sens commun, que de feindre de telles resueries? Car si nous mettons que la superficie ne soit ny egale ny inegale, il faudra aussi consequemment dire, que ny la magnitude ny le nombre ne serôt ny egaux ny inegaux: attédu que lon ne scauroit dire qu'il y ait entre l'egal & inegal quelque
C milieu qui soit neutre, ny le conceuoir en l'entendement. Et puis s'il y a des superficies qui ne soient ny egales ny inegales, qui empeschera qu'il n'y ait aussi des cercles qui ne soiét ny egaux ny inegaux? Car ces superficies la estants superficies de sections de pyramides rondes, sont cercles: & si vous mettez des cercles, aussi faudra il mettre des diametres qui ne soient ny egaux ny inegaux: & si cela, aussi des angles & des triangles, & des parallelo-

grammes, & des superficies également distantes. **D**
 Car si les longueurs ne sont ny egales ny inegales,
 adoncques ny le pois, ny les coups, ny les corps.
 Et puis comment osent ils reprendre ceulx qui in-
 troduisent des vacuitez, & quelques indiuisibles
 combattans l'un contre l'autre, & qui supposent
 qu'ils ne bougent ny ne se meuuent, veu qu'ils sou-
 stiennent que telles propositions sont faulses? Si
 quelques choses ne sont egales les vnes aux autres,
 elles sont inegales: & ces choses icy ne sont pas
 egales les vnes aux autres: elles sont doncques in-
 egales les vnes aux autres. Mais pource qu'il dit **E**
 qu'il y a quelque chose de plus grand qui ne passe
 point, pourtant il est raisonnable de demander, à
 sçauoir si elles quadreront l'une à l'autre, ou si l'une
 passera, & l'autre demeurera courte: car si elles
 quadrent, comment sera l'une plus grande que
 l'autre? Et si elles ne quadrent point, cōment est il
 possible que l'une ne passe, l'autre demeure cour-
 te? Ce sont choses contraires de dire, ny l'un ny
 l'autre ne passe, & il ne quadrera point avec le plus
 grand, ou il quadrera, & que l'un soit plus grand
 que l'autre. Il est force que ceulx qui ne gardent
 pas les communes conceptions se treuuent en tel-
 les perplexitez. D'auantage c'est contre le sens
 commun de dire, que rien ne touche à l'autre, &
 non pas moins, que les corps s'entre touchent les
 vns les autres, & qu'ils ne s'entre touchent de rien.
 Or il est force que ceulx qui ne laissent point de
 moindres parties du corps admettent cela, & s'ils
 mettent quelque chose premier que ce qui semble
 toucher,

A toucher, & qui ne cessent iamais de passer tousiours oultre, c'est ce que principalement ils obli- cent à ceux qui defendent & soustiennent les par- celles indiuisibles, qu'il ne se fera point de touche- ment de tous, ains que ce sera mixtion, & que cela n'est pas possible, attēdu que les indiuisibles n'ont point de parties. Comment doncq' est-ce que eulx mesmes ne tombent en pareil inconuenient, veu qu'ils ne laissent partie aucune premiere ny der- niere? pour autant qu'ils disent, que les corps s'en- tretouchent de tout en tout par vn terme, non pas
B par vne partie, & le terme n'est pas corps, adonc le corps touchera le corps par vn terme qui n'est pas corps: & à l'opposite ne le touchera point, l'incor- porel n'estant point entre deux. Et s'il touche, il fe- ra & souffrira quelque chose estant corps, par vn incorporel qui n'est pas corps. Car le propre des corps est de faire & de souffrir quelque chose les vns des autres, & de s'entretoucher: & si le corps a le touchement particulier, par le moien de l'incor- porel, aussi aura il l'attouchemēt vniuersel, la mix- tion & l'incorporation. D'auantage en ces attou-
C chemens & ces mixtions, il est necessaire que les termes des corps demeurent, ou qu'ils ne demeurent pas, ains deperissent, & l'vn & l'autre est contre le sens commun. Car eulx mesmes ne mettent pas des corruptions & generations des incorporels, & ne scauroit on dire qu'il y ait mixtion ny attouche- ment vniuersel des corps retenants leurs propres termes. Car c'est le terme qui constitue & termi- ne la nature du corps, & les mixtiōs (si ce n'estoiet

approchements des parties pres des parties) con-
 fondent en vn les corps qui se meslent. Et comme
 disent ceulx-cy, il fault laisser des corruptions des
 termes és mixtions, & puis de rechef des genera-
 tions és separations & segregations. Or n'est il
 homme qui peust entendre ny comprendre cela
 facilement. Car par ce que les corps s'entretou-
 chent, par cela mesme ils s'entrepressent, s'entrefer-
 rent & se froissent l'un l'autre. Or est il impossible
 que chose incorporelle seuffre ny face cela, & ne se
 peult mesme imaginer, & ils nous veulēt contrain-
 dre de l'imaginer & entendre. Car si vne boule
 touche vn plain corps par vn poinct seulement, il
 est certain qu'elle sera aussi trainee par vn poinct
 tout le long de ce plain. Et si la boule est peinte de
 vermillon par dessus, elle imprimera vne ligne seu-
 lement rouge dessus le plain : & estant iaulne, elle
 iaulnira la superficie du plain. Et que chose incor-
 porelle taigne ou soit taincte de couleur, c'est
 contre le sens commun. Et si nous imaginons vne
 boule de terre, ou de crystal & de verre, qui tombe
 de hault sur vn plain de pierre bien vny, il est con-
 tre raison de pēser qu'elle ne se brisera point, quād
 le coup viendra à dōner contre vn plain dur & so-
 lide. Et encore sera il plus hors de toute raison de
 dire, qu'elle se brisera par vn terme, cōme vn poinct
 qui n'a aucū corps, de maniere qu'en toutes sortes
 les anticipations & communes conceptions, tou-
 chant les corps, sont toutes perturbées ou plustost
 ostées du tout, en supposant plusieurs choses im-
 possibles. C'est contre le sens cōmun de dire, qu'il
 y a vn

A y a vn temps futur & vn temps passé, mais qu'il n'y a point de temps present, ains que nagueres, & n'a pas long temps subsistent, mais que maintenāt n'est totalement rien qui soit: & toutefois cela aduiant à ces philosophes Stoïques, lesquels ne laissent pas le moindre temps du monde entre deux, & ne veulēt pas que le maintenant mesme soit indiuisible, ains de tout ce que l'hōme prend à penser & imaginer cōme present, de cela ils disent qu'il y en a desia partie de passé & partie de futur: de sorte qu'il ne reste ny ne demeure au milieu par celle
B quelconque de temps present, si de ce que lon dit estre instant partie est attribuee aux choses passees & partie aux futures. Parquoy il fault que l'un des deux en aduienne, ou qu'en mettant le temps, il estoit, & le temps, il sera, on abolisse totalement le tēps, il est: ou qu'estāt present le tēps il est, vne partie en soit passée, & vne encore à venir: & dire que de ce qui est, partie en est encore future, & partie en est desia passée: & du maintenāt, qu'il y a vne piece deuāt, & vne autre derriere: tellemēt que maintenāt soit ce qui n'est pas encore maintenāt, & ce qui
C n'est plus maintenāt: car ce n'est plus maintenāt ce qui est desia passé, ny maintenāt ce qui est encore à venir. Et en diuisant ainsi le maintenāt, il faudroit qu'ils dissent aussi, que de l'annee & de la lumiere partie seroit de l'an passé, & partie de l'an qui viēt, & du quāt & quant qu'il y eust deuāt & derriere. Car ils ne trauaillent pas moins à brouiller estrangement toutes ces paroles la, le non encore, le desia, le non plus, & le maintenāt: là où tous les autres

hommes entendent & estiment le naguères, le peu d'apres, estre parties differentes du maintenant, & en mettent l'une deuant, l'autre apres le maintenant. Et Archidemus disant que le maintenant est vn principe, vne ioincture, & vne commissure, ne s'apperçoit pas qu'en ce disant, il abolit tout le temps entierement. Car si est vray que le maintenant ne soit pas temps, ains seulement vn aboutissement de temps, & toute partie du temps est comme le maintenât: il semble donc, que le maintenât n'a aucune partie, ains se resoult tout en termes, aboutissemens, & ioinctures, & commence-
 ments. Et Chrysippus se voulant monstrier ingenieux & artificiel en ses diuisions, au traicté qu'il fait du vuide, & en quelques autres passages, il dit, que le passé & le futur du temps ne subsiste pas, ains a subsisté, & qu'il n'y a que le present ou instant qui subsiste: mais au troisieme, quatrieme & cinquieme traicté des parties, il met que du temps instant partie est future, & partie passée, tellement qu'il luy aduient de diuiser la substance du temps en parties non subsistentes du total subsistant, ou pour mieulx dire, de ne laisser partie aucune subsistente, si l'instant & present n'a partie aucune qui ne soit ou passée ou future. L'intelligence doncques du temps, à eulx, ressemble proprement à l'empoingnement de l'eau, laquelle plus on estraint & serre, plus elle coule & glisse. Mais quant aux actions & mouuemens, toute euidence y est brouillée & confondue. Car il est force, si l'instant & le maintenant se diuise en ce qui est passé, & ce qui
 est

A est à venir, que de ce qui se meut en instant, partie soit desia remuee, & autre partie encore à remuer, & que le commencement & la fin du mouuement soient abolis, & que de nulle œuvre, il n'y aura eu rien de premier, & n'y aura rien de dernier, estants les actiōs distribuees avec le temps. Car tout ainsi comme ils disent, que du temps present partie est passēe & partie est à venir, aussi de ce qui se fait, partie est desia faite, partie encore à faire. Quand donc a eu son commencement, & quand aura sa fin, le disner, l'escrire, le marcher, si tout hōme disnant a ia disné & disnera, & tout marchant a desia marché & marchera, & ce qui est, comme lon dit, de toutes estranges absurditez la plus estrange, s'il aduient que celuy qui vit ait ia vescu, ou doiue viure, iamais doncques le viure n'a eu commencement, ny iamais n'aura fin, ains chascun de nous, comme il appert, a esté né sans commencer à viure, & mourra sans cesser de viure, s'il n'y a nulle dernière partie. Car s'il y a quelque chose de futur à celuy qui vit de present, iamais il ne sera faulx de dire, Socrates viura, tant qu'il sera veritable, Socrates vit. Tellement que s'il est veritable, Socrates viura, en infinies parties de temps : en nulle partie de temps ne sera iamais veritable, Socrates est mort. Et neantmoins quelle fin y aura il autrement en chascune operation, & où arresterez vous le bout de chascue action; si autant de fois comme il sera veritable, il se fait, autant de fois aussi sera il veritable, il se fera : car celuy mentira qui dira, c'est le bout de Platon escriuant ou disputant, par

ce que iamais Platon ne cessera d'escrire & de dis-
 puter, si iamais il n'est faulx de dire de celuy qui
 dispute, il disputera, & il escrira de celuy qui escrit.
 D'auantage de ce qui se fait, il n'y aura partie qui
 ne soit ia faite ou à faire, & preterite ou future : &
 oultre, de ce qui est ia fait, ou de ce qui se fera du
 passé & de l'aduenir, il n'y a aucun sentiment. Par-
 quoy il n'y aura simplement & vniuersellement
 sentiment de rien du monde : car nous ne voyons
 pas ce qui est passé, ne ce qui est à aduenir, ny ne
 l'oyons, ny ne prenons aucun sentiment des choses
 qui ont esté, ou qui seront, ny encore qu'il fust pre-
 sent rien ne sera pourtāt sensible, si du present vne
 partie vient, & vne autre est desia passée, & l'vn a
 esté & l'autre sera. Et toute fois eulx mesmes crient
 apres Epicurus, qu'il fait choses intolerables de for-
 cer les cōmunes conceptions, en mouuāt les corps
 d'egale celerité, & tenant qu'il n'y en a point vn
 plus viste que l'autre. Mais bien plus est insuppor-
 table, & plus elongné du sens commun, de dire,
 que nulle chose n'en peult atteinre vne autre,

Si le cheual d'Adrastus qui voloit,

Courant apres vne tortue alloit,

comme lon dit en commun prouerbe. Et est force
 que cela aduienne en ceux qui se meuent selon
 deuant & apres, mais estans les interualles, selon
 lesquels ils se meuuēt, diuisibles en parties infinies,
 ainsi comme ceulx-cy veulent, si la tortue est de la
 longueur d'vn arpent seulement deuant le cheual,
 ceulx qui diuisent l'interualle en infinies parts, &
 qui meuent l'vn & l'autre selon deuant & apres,
 iamais

A ses contraires, que celuy auquel il est incorporé, conioinct & confondu, ne laissant point d'apparence & de discretion de difference au sens extérieur. Combien qu'on lise que Lynceus anciennement auoit la veüe si perçante & si aigüe, qu'il voyoit à trauers les pierres, & à trauers les bois: & se feant sur quelque eschauguette en la Sicile, il voyoit les vaisseaux qui partoient du port de Carthage, par vn interualle & distance de la navigation d'un iour & d'une nuit. Et dit on que Callistrates faisoit des chariots de la grandeur de formis, **B** tellement que l'aisle d'une moufche les couuroit, & engrauiot sur vn grain de millet des vers d'Homere. Et toutefois pas vn d'eulx ne veit ny n'apperceut ceste diuersité & ceste perpetuelle allure, ny nous mesmes iamais ne nous apperceusmes que nous fussions doubles, & que d'une partie nous coulissions tousiours, & de l'autre nous demourissions tousiours vns & mesmes, depuis nostre naissance iusques à nostre fin. Mais encore fais-ie le propos plus plain & plus simple: car quāt à eulx ils font quatre subiects alendroit d'un chascun de nous, ou, pour mieulx dire, que vn chascun **C** de nous en est quatre, mais il suffit de deux pour monstrier la faulseté de leur resuerie: car quand nous oyons dire à Pentheus és Tragedies, qu'il voit deux Soleils & deux Thebes, nous iugeons qu'il ne les voit pas, mais qu'il les cuide voir, aiant le sens & l'entendement troublé & transporté. Et ceulx-cy qui supposent non vne ville seule, mais tous les hommes, tous les animaux, les arbres, les

plantes, tous les meubles & vtenfilles, & tous ve- D
 stemens estre doubles & composez, ne les reiette-
 rons nous pas, comme gens qui nous veulent faire
 non entendre, mais peruertir & confondre nostre
 entendement? Toutefois à l'aduenture en ce pro-
 pos leur fault il pardonner s'ils controuuent & fei-
 gnent d'autres natures, par ce qu'ils ne peuuent
 trouuer autre moien, quelque peine qu'ils y met-
 tent, de conseruer & retenir les augmentations.
 Mais en l'ame, à quel propos, & pour quelles au-
 tres suppositions vont ils former d'autres differen-
 tes especes de corps, par maniere de dire, innume- E
 rables? On ne le scauroit dire, sinon qu'ils veulent
 desplacer, ou plustost tollir du tout & perdre les
 communes conceptions, pour y en introduire de
 nouuelles toutes estranges & sauuages. Car c'est
 chose merueilleusement extrauagante & pleine de
 route absurdité, que des vices & des vertus, & d'a-
 uantage des sciences & des arts, des memoires, des
 apprehensions, des passions, & encore des incli-
 nations & des consentemens, en faire des corps, &
 dire qu'ils ne gisent ny ne subsistent en nul subiect,
 & leur laisser seulement dedans le cœur vn pertuis F
 petit comme vn poinct, là où ils reingent & ser-
 rent la partie principale du discours de la raison en
 l'ame, estant occupé de tant de corps, qu'il seroit
 malaisé de les compter à ceulx qui scauent mieulx
 distinguer & discerner l'un d'avec l'autre, & de
 n'en faire pas seulement des corps, mais des ani-
 maux mesmes raisonnables, & vne si grande ru-
 chee ou formilliere d'animaux, & encore non
 douce

A douce ne priuee, mais qui par sa mauuaistié repugne à l'euidence & à la coustume. Et ceulx-cy tiennent que non seulement les vertus & les vices sont animaulx, ny les passions seulement, comme l'ire, le courroux, l'enuie, la douleur, la malignité, ny les comprehensions, les apprehensions, les ignorances & les arts & mestiers, comme le mestier de cordonnier, de ferrurier : mais oultre cela encore sont ils les operations & les actes mesmes corps & animaulx, le promener vn animal, le baller, le chauffer, le saluër, l'iniurier, à quoy il est consequent aussi, que le rire soit aussi vn animal, & le plorer : & si cela est, que le toussir, l'esternuer, le gemit, le cracher, le moucher & autres actions semblables, qui sont assez manifestes. Et si ne doiuent pas trouuer estrange ny se courroucer, si on les conduit de paroles peu à peu, iusques à ces baderies là, fils se souuiennent de Chrysippus, qui au troisieme de ses questions naturelles dit ainsi :

„ La nuict, n'est elle pas corps? le vespre, le matin, le milieu du iour & de la nuict, ne sont-ce pas corps?

„ Le commencement du mois, le dixieme, & le quinzieme de la Lune, le trétieme, le mois entier n'est-ce pas corps? l'Esté & l'Automne, & l'An? Et quant à tout ce que nous auons dit, ils le tiennent à toute force contre les communes anticipations & conceptions. Mais ce que nous dirons est contre les leurs propres, car ils engédrent ce qui est treschaud par refrigeration, & ce qui est le plus subtil par grossissement & espaisissement, par ce que l'ame est vne substâce fort chaude, & de fort subtiles parties,

& ils la produisent par refrigeration & condensation du corps, comme par vne trempe commuant l'esprit, & le rendant de vegetatif esprit, animal. Ils disent aussi, que le Soleil est deuenu animé, l'humidité s'estant tournée en feu intellectuel & spirituel. Vois tu comme ils imaginent, que le Soleil ait esté engendré & produit par refrigeration? On dit que Xenophanes oyant vn iour compter à quelqu'un, qu'il auoit veu des anguilles viuantes
 „ en de l'eau chaude : Et nous les cuirons doncques,
 „ dit il, en de l'eau froide. Puis que donc ils engendrent la chaleur par la refrigeration d'alentour, la
 E consequence veult aussi qu'ils produisent la legereté par la condensation, & par la chaleur la froideur, par le fondre l'espessir, & par le rarefier le peser, pour garder vne correspondance & proportion de faire toutes choses contre raison. Et quant à la substance de la commune conception & sens commun, n'en determinent ils pas contre le sens commun mesme? car ceste conception est vne apprehension, & ceste apprehension vne impression qui se fait en l'ame : & la nature de l'ame est vne exhalation, laquelle difficilement peult receuoir F impression, à cause de sa rarité: & encore qu'elle la receust, il seroit impossible qu'elle la gardast & reteint: car sa nourriture & sa generation procedant d'humidité a vn continuel cours de succession & de consommation, & la meslange de la respiration avec l'air fait tousiours quelque nouuelle exhalation, se tournant & changeant par le flux de l'air inspiré & respiré, qui du dehors donne dedans,

A & derechef sort du dedans au dehors. Car plus-
 tost pourroit on imaginer vn ruisseau d'eau cou-
 rante, qui conseruast les formes, figures, & es-
 peces empreintes, qu'un esprit coulant en des va-
 peurs & humeurs, & melle avec vn autre vent
 de dehors oisif & estranger continuellement.
 Mais ils s'oublient tant, qu'ayants definy les con-
 ceptions communes, estre pensees mises à part, &
 les memoires permanentes, & impressions rela-
 tiues, & fichans du tout les sciences, comme
 B aians toute fermeté & toute stabilité, puis apres
 ils mettent deffoubs tout cela vn fondement &
 vne base de substance glissante, facile à dissiper
 & esprendre, qui tousiours va & vient, & tous-
 iours coule. Or est il que tous hommes ont ceste
 conception imprimee en leur entendement tou-
 chant le principe & element, qu'il est pur, simple,
 & non meslé ny composé: car ce qui est meslé ne
 peult estre element ny principe, mais ce dont il
 est meslé & composé. Et toutefois ceux-cy fai-
 sans Dieu principe de toutes choses, vn corps spi-
 rituel & entendement assis en la matiere, ils ne le
 C font ne pur ne simple, ny incomposé, ains affer-
 ment qu'il est composé d'un autre & par vn au-
 tre. Or la matiere estant par soy sans raison &
 sans qualité, a la simplicité & la propriété de
 principe, & Dieu, s'il est vray qu'il ne soit pas
 sans corps, & sans matiere, participe de la ma-
 tiere, & comme d'un principe: car si c'est tout
 vne & mesme chose que la matiere & la raison,
 ils n'auroient pas bien definy de dire, que la ma-

tiere soit irraisonnable sans raison: & si ce sont cho. D
 ses differentes, Dieu doncques est constitué de tou-
 tes les deux, & non vne simple essence, mais com-
 posee, aiant pris l'estre intelligent avec l'estre cor-
 porel de la matiere. Et puis veu qu'ils appellent
 les quatre premiers corps, la terre, l'eau, l'air & le
 feu, premiers elemens, ie ne sçay comment ils en
 font aucuns d'eux simples, & les autres composez
 & meslez: car ilstiennent que la terre & l'eau ne
 peuuent contenir, ny eux mesmes ny autrui, &
 que c'est de la participation de l'esprit, & de la for-
 ce du feu, que depend la conseruation de l'vnion, E
 & que l'air & le feu pour leur force se fortifiēt eux
 mesmes, & estans meslez avec les deux autres, leur
 donnent force & vigueur, & la fermeté de subsi-
 stance. Comment doncq est-ce que la terre est
 element, ou l'eau, sil n'est ny simple, ny premier,
 ny suffisant à se conseruer, ains aiant besoin d'au-
 trui qui le contienne par dehors en estre, & le con-
 serue? car ils ne laissent pas seulement moien de
 penser qu'ils soient substance, ains contient ce pro-
 pos grande confusion & grande incertitude tou-
 chant la terre à par soy. Mais si la terre est par soy, F
 comment est-ce qu'elle a besoin de l'air qui la lie
 & la contienne? car ainsi elle ne sera plus par soy
 terre, ne par soy eau, ains l'air serrant & espais-
 sant ainsi la matiere, en a fait de la terre: & au
 contraire la desliant & amollissant ainsi, en a fait
 de l'eau. Il fault doncques inferer, que nul de ces
 deux la n'est element, puis qu'un autre luy a don-
 né essence & generation. D'auantage ils disent,
 que

A que la matiere & la substance subsiste par ses qualitez, & la definissent presque ainsi. Et puis d'un autre costé ils font les qualitez estre des corps, en quoy il y a vne grande confusion: car si les qualitez ont vne substance propre, pour laquelle elles soient appellees & soient realement corps, elles n'ont point besoing d'autre substance, par ce qu'elles ont la leur propre. Et si elles ont seulement celle qui est commune, qu'ils appellent essence ou matiere, il est euident qu'elles participent de corps, & qu'elles ne sont pas corps. Or ce qui se B soubsterné & qui reçoit, il est force qu'il soit different de ce qu'il reçoit, & à quoy il est soubsterné. Et ceux-cy ne voient qu'à demy: car ils appellent bien la matiere non qualifiée, c'est à dire sans qualitez, mais ils ne veulent plus appeller les qualitez sans matiere. Et toutefois comment est-il possible de faire vn corps sans qualité, que lon n'entende aussi vne qualité sans corps? car le langage qui complice le corps avec toute qualité, ne permet pas que la pensèe puisse toucher à corps aucun, sans quelque qualité. Il fault doncques C que celuy qui repugne à l'estre corporel de la qualité, repugne aussi quant & quant à l'estre qualifié de la matiere, ou celuy qui separe l'un d'avec l'autre diuise tous les deux d'ensemble. Et quant au propos que quelques vns d'entre eux mettent en auant qu'ils appellent la substance non qualifiée, non pour ce qu'elle soit du tout priuée de toute qualité, ains plustost pource qu'elle a toutes qualitez, cela est plus que iamais contre le sens cōmun.

DES COM. CONCEP. CONTRE LES ST.

Car nul ne pense ne imagine pour non qualifié
ce qui est participant de toute, & priué de nulle
qualité, ny impassible, ce qui est né pour rece-
voir & souffrir toute passion, ny immobile
ce qui est mobile en tout sens : & ceste
doubte n'est point solüe, que si bien
tousiours la matiere s'entend avec
qualité, neantmoins on en-
tend que ce soit autre
chose & differente,
la matiere que
la qua-
lité.

